

Milik Dr.
Tidak
Untuk

dan K

Hikayat Putroe Baren 1

Ramli Harun



Departemen Pendidikan dan Kebudayaan

HIKAYAT PUTROE BAREN

1

Hikayat PUTROE BAREN 1

Dialihaksarakan oleh
RAMLI HARUN



Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1983

Diterbitkan oleh
Proyek Penerbitan Buku Sastra
Indonesia dan Daerah

Hak pengarang dilindungi undang-undang

PERPUSTAKAAN
DIT. SEJARAH & NILAI TRADISIONAL

Nomor Induk : 1078/1986

Tanggal terima : 20 - 4 - 86

Tanggal catat : 19 - 1 - 86

Penerimaan dari : pro. pen. bk. sastra dan keteratur.

nomer buku :

spine : 2

KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuananya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, yang berasal dari Museum Negeri Banda Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1983

Proyek Penerbitan Buku Sastra
Indonesia dan Daerah

Pengantar

Naskah Hikayat Putroe Baren ini kami dapati di Museum Negeri Banda Aceh bulan Agustus 1983. Dengan ukuran 22 x 16 cm, naskah tulisan Arab setebal 441 halaman ini dapat terbaca seluruhnya. Tiap halaman terdiri rata-rata dua puluh dua baris. Hanya kira-kira satu atau dua halaman yang hilang sesudah halaman 171, namun tidak mengganggu jalan ceritanya. Beberapa bait telah kami sisipkan pada bagian yang hilang untuk menyambung bait yang terputus.

Pada bagian akhir naskah, terdapat keterangan bahwa hikayat ini disalin oleh Teungku Akob kampung Gle U, Aceh Barat dari naskah kepunyaan Teungku Daud kampung Babah Nipah. Tidak disebutkan apakah naskah Teungku Daud merupakan naskah asli atau salinan. Juga tidak dicantumkan nama pengarang dan tahun penulisannya. Teungku Akob sendiri menyalin naskah ini pada zaman pendudukan Jepang.

Hikayat ini termasuk hikayat lama dan sangat terkenal di daerah Aceh. Menurut Dr. Snouck Horgrunje ada beberapa persamaan antara Hikayat Putroe Baren dengan cerita Melayu JOHAR MANIKAM yang terbit di Breda tahun 1845. Kiranya menarik untuk diteliti sampai di mana terdapat unsur-unsur saling mempengaruhi antara hikayat ini dengan hikayat-hikayat lainnya, mengingat terdapat banyak persamaan dalam jalan ceritanya, antara lain tentang putri kaca. Kebudayaan putri kaca terdapat dalam beberapa hikayat Aceh.

Hikayat yang cukup panjang ini telah kami alih aksarakannya ke dalam huruf latin dan membaginya menjadi dua jilid disertai ringkasan ceritanya. Kami tidak dapat membagi hikayat ini ke dalam beberapa anak judul karena batas jalan ceritanya tidak begitu jelas. Keterangan mengenai penyalin kami pisahkan di bawah anak judul "penutup".

Bagi pengamat kesusastraan daerah hikayat ini merupakan bahan telaah yang berharga.

Jakarta 1 Maret 1984

Ramli Harun

RINGKASAN
HIKAYAT PUTRI BAREN
Jilid I

Dahulu kala negeri Bagdad diperintah oleh seorang raja yang adil bernama Baren Nasi. Sembilan ratus orang raja takluk di bawah kekuasaannya. Dari permaisuri Meureudum Rakna baginda memperoleh dua orang anak. Yang laki-laki bernama Bangta Sulotan dan yang perempuan bernama Baren Miga, yang lebih terkenal dengan nama Putri Baren. Bangta Sulotan sejak kecil memiliki beberapa kelebihan, antara lain tenaganya yang luar biasa. Pernah ia membawa sendiri sebatang pohon kayu yang besar untuk bahan bangunan istana Panglima Jedah. Putri Baren mempunyai keistimewaan lain. Ia dikandung ibunya selama lima tahun. Sejak dalam kandungan ia telah memperdengarkan suaranya. Ia lahir dalam bulan puasa di malam lailatul kadar. Namanya diberikan oleh malaikat Malik Ridwan sesuai dengan do'a baginda raja kepada Tuhan. Dalam usia kanak-kanak ia pernah bermimpi bertemu dengan Nabi Muhammad.

Raja Baren Nasi bermaksud membangun sebuah istana untuk putri kesayangannya. Diperintahkannya rakyat untuk mencari kayu bahan bangunan di hutan-hutan. Akan tetapi tidak ada sebatang pohon pun yang mempan ditebang dengan kapak atau benda tajam lainnya. Semua penebang kayu memberitahu-kan kepada baginda tentang keanehan itu. Ahli-ahli nujum dipanggil. Salah seorang di antara mereka menyatakan bahwa keanehan itu disebabkan karena baginda tidak memberitahukan maksudnya itu kepada putrinya. Sesudah rencana itu disampaikan, Putri Baren mengatakan bahwa ia bermimpi melihat sebatang kayu yang amat besar di puncak gunung Mahalhikmat yang terletak di sebuah negeri kayangan yang dikuasai oleh bangsa Jin. Baginda tidak mampu mendatangkan pohon kayu itu. Putri Baren meminta bantuan Bangta Sulotan. Dengan mengendarai seekor kuda terbang, Bangta Sulotan dalam waktu singkat sudah berada di bawah pohon kayu. Mula-mula Bangta Sulotan dihadang oleh bangsa jin, tetapi berkat kelebihannya dan karena nama Putri Baren, pohon kayu raksasa itu diantar sendiri oleh

empat orang raja Jin. Dalam sekejap saja pohon itu sudah berada di halaman istana Baren Nasi dan dimulailah pembangunan istana.

Ketika istana sedang dibangun datanglah Raja Yaman dengan pasukannya yang besar hendak merebut Putri Baren yang terkenal cantik itu. Tetapi dalam waktu singkat dapat dihalau oleh Bangta Sulotan, bahkan ia mengejar Raja Yaman sampai ke negerinya. Namun di sana ia disergap dan terperangkap dalam jaring besi. Tak lama Putri Baren tiba dan membebaskannya. Raja Yaman menyerah kepada Bangta Sulotan dan kekuasaan negeri diserahkan kepadanya. Sesudah membimbing rakyat negeri Yaman untuk berbuat kebaikan sebanyak mungkin, enam bulan kemudian Bangta Sulotan pulang ke Bagdad.

Pada suatu hari seorang Syiah bernama Kilan hendak membawa Putri Baren ke suatu tempat untuk diberikan pelajaran agama. Baginda menyetujuinya, tetapi permaisuri keberatan apabila putrinya dibawa ke tempat lain. Karena Syiah tersinggung, permaisuri dibuat tidak berdaya sehingga tertidur. Putri Baren dibawa ke istananya sendiri. Mula-mula ia hendak diajarkan membaca al Quran. Ternyata putri lebih pandai dari Syiah Kilan, sehingga Syiah itu terpaksa belajar dari putri sampai mendapat ijazah.

Adapun permaisuri Meureudum Rakna tatkala terbangun dari tidurnya sangat marah melihat putrinya tidak ada, dan sambil mengacungkan pedang menanyakan halnya kepada baginda. Karena kelakuannya itu baginda menghukum permaisurinya dengan memasukkannya ke dalam penjara. Ketika Bangta Sulotan mengetahui ibunya dipenjarakan, dengan segera ia meminta ampun dari ayahandanya. Ibunya dikeluarkan dari penjara. Kemudian permaisuri minta izin dari suaminya untuk meninggalkan istana. Baginda mengabulkannya, seraya berjanji tidak akan kawin lagi. Permaisuri pergi bertapa di sebuah gua. Tujuh tahun kemudian permaisuri Meureudum Rakna meninggal dunia dalam pertapaannya. Ketika itu Putri Baren dibawa oleh malaikat untuk melihat ibunya. Saat-saat akan meninggal Meureudum Rakna menyebutkan beberapa bencana yang akan menimpa putrinya. Sesudah itu dengan segera Putri Baren dibawa pulang oleh mala-

ikat ke istananya. Atas pemberitahuan Bangta Sulotan, baginda pergi ke gua mengambil jenazah permaisurinya.

Banyak anak negeri datang melayat permaisuri antara lain Ratu Hamban dari negeri Syam. Selain untuk melayat, ratu ini mempunyai maksud lain. Ia sangat mengharapkan baginda raja yang sudah duda itu sudi mengambilnya sebagai permaisurinya. Putri Baren ketika itu belum datang. Perdana menteri memberitahukan bahwa putri tidak mau melihat jenazah ibunya. Baginda amat murka dengan sikap putrinya itu. Putri Baren mengetahui semua hal itu. Dengan menyamar sebagai seorang pahlawan dan dengan pedang terhunus ia pulang ke istana. Sambil berjalan ia mempertunjukkan kesaktiannya dengan mencabuti pohon-pohon kelapa. Baginda dan Bangta Sulotan serta semua yang berada di istana melarikan diri melihat tingkah laku Putri Baren. Ratu Hamban yang terkenal sakti, juga tunduk kepadanya. Jenazah Meureudum Rakna diurus sendiri oleh Putri Baren dengan dibantu oleh Ratu Hamban. Setelah semuanya selesai barulah Baginda Raja dan Bangta Sulotan bersama rakyatnya pulang ke istana.

Setelah empat puluh empat hari permaisuri meninggal, Raja Baren Nasi mengumumkan kepada rakyatnya bahwa baginda akan menunaikan ibadah haji dan meminta supaya memilih penggantinya. Karena baginda tidak menyetujui Bangta Sulotan sebagai penggatinya maka terpilihlah seorang kadi yang akan memegang kerajaan Bagdad. Putri Baren menentang keputusan itu karena akan berakibat buruk bagi dirinya, tetapi baginda tetap pada keputusannya.

Dengan menggunakan beberapa buah kapal, Raja Baren Nasi dan Bangta Sulotan serta sejumlah besar pengantar berangkat menuju tanah suci. Di tengah laut tiba-tiba semua kapal berhenti. Menurut ahli nujum hal itu disebabkan pengangkatan kadi sebagai raja, yang tidak disetujui oleh Putri Baren. Tetapi berkat doa baginda, kapal-kapal itu dapat berlayar kembali dan tak lama kemudian sampai di Mekah. Oleh karena raja dari Bagdad ini dianggap wali dan terhormat, maka raja Mekah menyerahkan pimpinan kerajaan kepadanya. Baginda tidak dapat menolak

pengangkatan itu.

Sepeninggal Raja Baren Nasi, Raja Kadi mulai menggoda putri Baren, tetapi putri yang saleh ini tidak melayaninya. Ia tidak mau membuka pintu istananya untuk menerima Raja Kadi, bahkan ia memaki-makinya. Karena maksudnya tidak tercapai Raja Kadi meminta bantuan seorang Syiah untuk menulis surat kepada Raja Baren di Mekah memberitahukan bahwa putrinya telah berbuat serong dengan banyak lelaki. Ketika Raja Baren Nasi menerima surat dari Raja Kadi, baginda dan semua orang yang mengetahuinya sangat sedih. Tidak disangkanya putrinya itu melakukan perbuatan yang tercela, sampai-sampai baginda hendak membunuh diri kalau tidak dicegah oleh Bangta Sulotan.

Dalam keadaan yang sangat marah Bangta Sulotan pulang ke Bagdad dengan maksud hendak membunuh adiknya yang sudah mencemarkan nama keluarganya. Tiga hari tiga malam ia mengintip di bawah istana, tidak seorang lelaki pun terlihat olehnya kecuali mendengar adiknya selalu membaca al Quran. Ia mulai curiga akan kebenaran berita yang diterima di Mekah. Dalam keadaan demikian tiba-tiba Putri Baren datang mendekati. Dengan serta merta ia meminta supaya Bangta Sulotan menghabisi nyawanya, supaya negeri Bagdad tidak ternoda. Sesudah mengatakan demikian Putri Baren tertidur nyenyak. Bangta Sulotan amat terharu melihat keadaan adiknya, dan yakinlah ia bahwa adiknya masih suci. Sewaktu bangun ia tetap menuntut supaya abangnya yang sudah bersumpah dengan ka'bah segera memenuhi janji untuk membunuhnya. Mendengar ucapan adiknya Bangta Sulotan terpaksa melakukannya meskipun dalam keadaan yang amat sedih. Dengan menutup mata ia memenggal leher adiknya sampai putus. Seorang malaikat telah menyelamatkan Putri Baren dengan membawanya ke sebuah gunung, dan yang digorok oleh Bangta Sulotan ialah seorang wanita yang serupa dengannya. Sejak itu Putri Baren tinggal dalam sebuah istana yang telah tersedia di gunung Syam, dan hidup seorang diri dalam serba kecukupan.

Tersebutlah seorang raja yang belum beragama di negeri Syam, Saidil Bakhil namanya. Setelah bermimpi bertemu dengan

Nabi Muhammad Asidil Bakhil memeluk agama Islam, dan se-sudah menyiarakan agama selama satu tahun baginda wafat dengan meninggalkan isterinya yang sedang mengandung bernama Putri Diwi. Putra Saidil Bakhil lainnya yang masih kecil bernama Abdullah diangkat sebagai raja. Abdullah seorang wali Tuhan yang pernah mendapat hadiah Nabi Sulaiman melalui Syiah Kilan. Syiah ini hidup sejak Nabi Sulaiman dan meninggal sesudah menyerahkan hadiah itu kepada Raja Abdullah. Hadiah itu berupa sebuah cangkul, sebuah takaran beras dari bambu, secangkir air dan sepotong roti. Dengan cangkul itu Raja Abdullah bertani sedangkan roti dan air sebagai bekalnya selama bekerja. Dengan karunia Allah, Raja Abdullah mendapat hasil sawahnya yang berlimpah-limpah sehingga dapat mengeluarkan zakatnya dalam jumlah besar.

Dalam usia 15 tahun Raja Abdullah sampai tiga kali ber-mimpi bertemu dengan seorang putri di sebuah istana dalam rimba raya. Dengan sejumlah rakyat dan pawang, Raja Abdullah pergi ke hutan dengan alasan berburu. Pada suatu malam para pengikut Raja Abdullah yang tidur di tepi sungai hanyut dibawa banjir. Raja Abdullah dengan penjaga kudanya bernama Katir selamat. Keduanya melanjutkan perjalanan. Tak lama kemudian mereka sampai di sebuah istana. Seorang gadis cantik ke luar dan mereka saling memperkenalkan diri. Gadis itu tidak lain dari Putri Baren. Kemudian oleh malaikat Jibril mereka dinikahkan. Dua tahun lamanya mereka tinggal di istana gunung itu. Banyak ilmu yang diperoleh Raja Abdullah dari isterinya. Demikian pula Katir, ia menjadi seorang yang alim. Pada tahun berikutnya mereka pulang ke negeri Syam. Kedatangan Putri Baren di negeri Syam diketahui oleh Raja Sindun dari negeri Heran Garib. Raja yang terkenal suka mengumpulkan putri-putri cantik ini bermaksud memerangi negeri Syam hendak merebut Putri Baren. Hal ini diketahui oleh putri yang cerdik ini. Raja Abdullah diberitahu-kan tentang segala kemungkinan yang akan dihadapi.

Armada Raja Sindun sudah mendekati pantai negeri Syam. Seorang utusan membawa surat kepada Raja Abdullah, namun utusan itu disiksa oleh Panglima Bandran Raja Sindun amat

murka. Meriam-meriam kapal menembaki kubu-kubu pertahanan negeri Syam. Pertempuran seru terjadi. Raja Sindun terpaksa mengakui keunggulan Raja Abdullah. Ia berpura-pura menyerah. Dengan tipu daya ini Raja Sindun dapat melumpuhkan perlawanan Raja Abdullah sehingga ia bersama pasukannya dapat mendarat. Di daratan pasukan Raja Sindun merasa tidak sanggup melanjutkan peperangan. Menurut seorang pendeta hal itu disebabkan di negeri Syam terdapat seorang yang keramat. Raja diminta supaya bersabar beberapa hari. Putri Baren selalu berdoa di istana supaya dapat mengalahkan musuhnya. Akhirnya dengan suatu siasat Raja Sindun dapat ditewaskan oleh Katir.

Pada suatu ketika dengan menggunakan beberapa buah kapal Putri Baren berlayar menuju Mekah hendak mengunjungi ayahnya. Ia pergi dengan membawa ketiga orang anaknya yang masih kecil dan dikawal oleh Perdana Menteri, Hulubalang dan Panglima Perang serta sejumlah rakyat. Raja Abdullah sendiri tidak ikut meskipun sudah diingatkan oleh isterinya supaya ia menemaniya berlayar. Dalam perjalanan Putri Baren dipaksa berbuat mesum oleh Panglima Perang bernama Dusun dengan ancaman jika putri tidak bersedia melayaninya ketiga anaknya yang masih kecil akan dibunuh. Dengan berbagai ancaman Putri Baren tetap menolak. Akhirnya ketiga anaknya dibuang ke laut oleh Panglima Dusun. Putri berpura-pura menerima ajakan Panglima Dusun. Ia diberi izin ke luar kamar sebentar. Kesempatan itu digunakan oleh Putri Baren untuk memanjat tiang kapal lalu berdoa memohon pertolongan Tuhan. Dengan tiba-tiba alam menjadi gelap gulita disertai hujan badai yang dahsyat. Putri Baren terpelanting ke laut dan terdampar di pantai negeri Raja Pari. Dalam keadaan sedih dan lesu Putri Baren diketemukan oleh Raja Pari dan dibawa ke istana.

Tiga buah kapal yang selamat dari ilmu sakti Panglima Dusun, pulang ke negeri Syam. Para penumpang memberitahukan tentang peristiwa yang menimpa Putri Baren dan ketiga anaknya kepada Raja Abdullah. Mendengar berita itu Katir amat menyesali tindakan Raja Abdullah yang tidak menyertai istrinya pergi ke Mekah sehingga menyebabkan terjadinya peristiwa

yang menyedihkan itu. Katir dengan segera terbang dengan kudanya mencari tuan putri. Beberapa hari kemudian ia melihat Putri Baren di halaman istana Raja Pari. Ketika itu Raja Pari sedang berada dalam rimba. Karena terlalu letih Katir tertidur nyenyak dan tidak dapat dibangunkan oleh Putri Baren. Dengan kuda Katir, Putri Baren terbang sendirian meninggalkan istana Raja Pari. Sesudah berminggu-minggu lamanya dalam perjalanan, Putri Baren sampai di sebuah negeri bernama Malabari. Penduduk negeri ini belum beragama. Rakyatnya tidak mengetahui Putri Baren seorang wanita karena selalu memakai pakaian lelaki. Tak lama kemudian karena kebijakannya, Putri Baren diangkat sebagai raja di negeri tersebut dengan gelar Raja Makmur, karena dapat memakmurkan negeri dan membawa rakyatnya memeluk agama Islam.

Adapun Raja Abdullah terus mencari isterinya yang hilang. Tiga tahun kemudian ia sampai di negeri Malabari. Di sana ia bertemu dengan Raja Makmur yang tidak dikenalnya sedangkan Putri Baren mengenal suaminya. Raja Makmur menyarankan supaya Raja Abdullah tidak mencari isterinya lagi dan sebagai gantinya ia memberikan seorang dayang-dayang yang cantik sebagai isterinya. Demikianlah tanpa diketahui tiap malam Putri Baren tidur bersama Raja Abdullah yang disangkanya seorang dayang-dayang. Tiada berapa lama kemudian Raja Abdullah minta izin dari Raja Makmur hendak mencari isterinya.

Nama Raja Makmur termasyhur ke mana-mana. Raja Baren Nasi dari Mekah mengutus putranya Bangta Sulotan membawa bingkisan tanda persahabatan kepada Raja Makmur. Di sana ia diterima secara kebesaran. Ia tidak mengetahui bahwa Raja Makmur adalah adiknya sendiri karena ia yakin adiknya sudah mati di tangannya. Ketika pulang Raja Makmur mengirim pula hadiah kepada Raja Baren Nasi. Tak lama kemudian Raja Makmur berkunjung ke Mekah dan disambut dengan hangat oleh Raja Baren Nasi. Baginda memperhatikan bahwa wajah Raja Makmur yang disebutnya Raja Muda itu amat mirip dengan wajah putrinya yang sudah tiada. Raja Baren sangat mengharapkan Raja Muda menetap di Mekah. Untuk maksud itu Raja Muda dinikahkan

dengan tunangan Bangta Sulotan yaitu Putri Sunoe, tetapi Raja Muda tetap tidur sendirian dengan alasan masih dalam masa pertapaan.

Pada upacara pelantikan Bangta Sulotan sebagai raja Mekah menggantikan ayahnya, banyak pembesar datang dari berbagai negeri antara lain Raja Kadi dan Panglima Dusun. Raja Makmur diangkat sebagai panglima perang. Pada suatu kesempatan berbicara, Panglima Makmur menyampaikan suatu cerita yaitu riwayat mengenai dirinya sendiri. Setelah itu ia masuk ke dalam kamarnya. Dengan mengenakan pakaian wanita, Putri Baren memperkenalkan dirinya terutama kepada ayah dan suaminya. Semua yang hadir keheran-heranan. Ketika itu semua rahasia terbuka. Raja Kadi dan Panglima Dusun yang menyebabkan Putri Baren menderita, diadili dan kemudian dihukum mati. Perkawinan Raja Makmur dengan Putri Sunoe dengan sendirinya batal, dan berlangsunglah pernikahan Bangta Sulotan dengan Putri Sunoe seperti direncanakan semula. Berkat sebutir intan sakti, ketiga orang anak Putri Baren yang ditelan oleh seekor ikan raksasa diketemukan kembali oleh Bangta Sulotan. Putri Baren berkumpul kembali dengan suami dan anak-anaknya.

Kira-kira enam bulan Putri Baren tinggal bersama anak-anak dan suami di Mekah datang pula bencana lain. Ketiga orang putranya dibawa terbang oleh seekor burung burak dan diturunkan di tiga buah negeri. Putra sulung diturunkan di negeri Cina, yang kedua di Pagaruyung dan yang bungsu diturunkan di negeri Rum. Tak lama kemudian mereka masing-masing menjadi raja di tiga negeri tersebut.

Hikayat
PUTROE BAREN
1

**HIKAYAT
PUTROE BAREN**

I

BISMILLAHIRRAHMANIRRAHIM

Lon tuan púphon ngon nama Allah
Bismillah mula peurtama
Sigala pujoe meuwoe keu Allah
Alhamdulillah peusamporeuna

Deungon keuramat sigala syiah
Beureukat Makah tanoh mulia
Beureukat ibu seureuta ayah
Neubri bak mudah ban pinta hamba

Ngon keurainat roh dumna aruah
Ngon ijazah guree nyang 'ala
Beureukat entuku Nabi Adam
Sajan-sajan tuan Ti Hawa

Beureukat Makah deungon mon zam-zam
Beureukat makam kubu Saidina
Beureukat Umar deungon Usman
Alipi sajan ngon Abubaka

Beureukat Husen sajan ngon Hasan
Cuco junjongan Nabi mulia
Bak phui ngon tuboh beumangat badan
Pinto pandangan neubri teubuka

Utak beucaye ate lon beutrang
Beujeuet ulon pham haba rahsia
Lon keumeung salen saboh karangan
Haba sulotan nyang sangat eela

Kareuna ate sangat reuen-mareuen
Laksana **bulueun** teungoh gurana
Meunankeu tamse hai adek meugleueng
Bek sapeue takheun nyang deungo haba

Maklum hai cutda adekda bandum
Kadangpi teusreueng kalam lon mula
Tambahan pula ujung seumbarangan
Ureueng nyang karang ulon calitra

Kadang hai adek cit tamaklum
Sabab lon keumuen le peue keurija
Aneuk miet muda raya meukeusud
Lon harap adek cut bek cit taceula

Gampong Lam Pisang jalan Mukim Peuet
Si nyak drop daruet dalam lhok saba
Jinoe lon peugah dube meukeusud
Muhammad Daud lon tuan nama

Muhammad Daud nyang po karangan
Muhammad Adan gob nyan nyang tuha
Nanggroe Lhee Mukim di Kayee Adang
Di Gampong Tibang ulon bandua

Supaya hai adek 'oh ka lon seubot
Hana payah buet bak tajak mita
Meuseuki raja atawa pocut
Soe na meukeusud keu haba raja

Bek salah nama watee taseubot
Nyankueu adek cut lon tamah haba
Dak takheun pawang nyo cit atueeh khut
Ka kheundak Makbud tapaban teuma

Beuthat bak dumnan hai adek po cut
Kon cit meukeusud lon mita nama
Cit kon meukeusud di lon ugoh
Jikalee gaduh meupo areuta

Nyankeu sabab nyang jeuet lon teuoh
Kon keu ugoh wahe syeedara
Lon nyoe miseue laksana bakoh
Cit suntok gadoh lam uteuen bangka

Lon woe 'oh malam lon jak 'oh beungoh
Meunan adoe jroh lon tuan hina
Pucok krueng Leubok si nyak cet luloh
Si nyak keumeukoh ngon tudong raya

Bek sagai takheun lon tuan ugoh
Ka roh lon teuoh nyang po areuta
Adat tameututo ingat bek gadoh
Wahe adoe jroh beuteugoh simasa

Amma bakdu makna keumudian
Sidroe sulton ulon calitra
Teumpat keurajeuen nanggroe Bageudad
Meusyeuhu that hana tara

Raja jimeunan Baren Nasi
Deurajat tinggi di atueuh donya
Salehpi that gaseh Tuhan
Uroe malam dalam takwa

Suntok sabe dalam khaluet
Han tom teusureut nyan keu donya
Kayem ladem lam ibadat
Raja keuramat hana tara

Lom meusyeuhu sigala nanggroe
Ngon meubunyoe bijaksana
Rakayat gasch sigala be
Peubuet bakti nyan keu raja

Dalam geupujoe han tom jiupat
Jigaseh that raja eelia
Tunong baroh barat timu
That meusyeuhu sigala donya

Raja saleh leubeh pangkat
Donya akhirat meubaghia
Hukompi ade amat sangat
Han tom rakyat geuinaya

Tanganpi murah suara mangat
Gaseh rakyat hana tara
Adat na raja laen nyang meunan
Bak bilangan siribee sa

Sikureueng reutoh taklok sultonan
Bak raja nyan sujud keupala
Subhanallah 'amma yusyrikun
Aman keurajeuen Tuhan karonya

Teutap keurajeuen umu siploh thon
Poteu peutren saboh rahsia
Bak simalam neumeulumpoe
Han tom puroe dilee nyang ka

Neumeulumpoe malam Jumeu'at
Leumah alamat saboh tanda
Neulumpoe neukandong buleuen ngon uroe
Peungeuh nanggroe sigala donya

Cahya limpah ceumeureulang
Hu trang-bandrang u antara
Bintang di langet jitren u yup
Keunan jisujud ubak cahya

Bek antara bintang di langet
Naleueng ceumeucet sujud dumna
'Oh lheueh ka neumeulumpoe
Beungoh uroe teubiet faja

Ban teukeujot poteu sidroe
Duek teupipoe wet ngon sila
Teuma teuingat nyan keu lumpoe
Hana neutupeue takbi rahsia

Teuma neupangge yoh nyan bujang
Jitren rijang ubak raja
Jidong di yup peurakna seumbah
Jaroe dua blah ateueh jeumala

Deelat teugayu laman meukatoe
Pakon kamoe neuseuranta
Trenkeu sabda teuma di manyang
Tadeungo bujang lon peuhaba

Sabda taseutot ahli nujum
Taba bandum keunoe sigra
Bujang deungo sabda meunan
Jak tueng yoh nyan nujum dumna

Ban sare troh ubak nujum
Jikheun saleuem poteu raja
'Oh jideungo narit meunan
Jijak yoh nyan sigra-sigra

Ban sare troh tamong leugat
Ngadap hadarat raja eelia
Jidong di yup peurakna seumbah
Jaroe dua blah ateueh jeumala

Deelat tuanku syahi alam
Seumbah laman po meukuta
Pakon tuanku neupangge kamoe
Nekheun jinoe siri sabda

Trenkeu sabda teuma di manyang
Deungo sikalian dumteu rata
Ulon tuan kumeulumpoe
Hana lon tupeue hareutoe makna

Lon meulumpoe malam Jumeu'at
Leumah alamat saboh tanda
Lon lumpoe lon kandong buleuen ngon uroe
Peungeuh nanggroe sigala donya

Hana lon tupeue takbi hareutoe
Tapeugah proe dumna gata
Dalam falak eleumee nujum
Saleh maklum leumah nyata

Cuba kalon dalam surat
Peue alamat takbi rahsia
Nujum seuon titah hadarat
Buka surat jibeuet angka

Abeh jifam harah abeujad
Maklum leugat dumjih rata
Sajan jitilek dalam dihen
Lahe baten leumah nyata

Lom neutanyong raja meutuah
Peue na leumah pandang gata
Teuma seuot ahli nujum
Ban nyang maklum jicalitra

Nujum nyang ahli lhok teunuban
Jideelat yoh nyan poteu raja
Tuanku lumpoe buleuen ngon uroe
Aneukneu sidroe that meubahgia

Thon nyoe nyata pandang bumoe
Peugawe nanggroe seumangat kuta
Meunankeu maklum dumna kamoe
Takbi lumpe lahe nyata

Tuanku ampon laman meukatoe
Aneuk dua droe po meukuta
Sidroe aneuk ureueng lakoe
Matauroe nyanpi raja

Nyang neulumpoe buleuen ngon uroe
Ureueng binoe akhe nyata
'Oh lheueh nujum peugah meunan
Po junjongan ate suka

Mangat ate poteu sidroe
Neubuka peutoe saboh nyang raya
Neucok di dalam alat peukayan
Neusalen yoh nyan nujum dumna

Neubri deureuham meuh nyang mirah
Akan seudeukah meunulak bala
Lheueh nyan nujum dum sinaroe
Jimohon droe ubak raja

Poteu raja neupeuidin
Lheueh neusalen bansineuna
Sajan leupah nujum jiwoe
Troph u nanggroe bansimua

Bak malam nyan raja ngon putroe
Lam meuligoe meusuka-suka
Ateueh geuta raja neueh
Teuka abeh asoe istana

Dumna dendayang seudang-seudang
Teungoh meusubang muda-muda
Abeh jitamong dalam keuleumbu
Teumpat beuradu poteu raja

Ladom ceupet urot badan
Raja sultan mayoh meurasa
Wie ngon uneun dum dendayang
Miseue bintang jroh-jroh rupa

Raja teungeut sinan pangsan
Tren dendayang bansineuna
Teuma neuek tuan putroe
Laju neupeutoe ubak raja

Sinan neueh dalam keuleumbu
Mayoh rindu ate suka
Putroe tido ngon sulotan
Bak malam nyan mayoh meurasa

Raja situboh deungon putroe
Nekmat katroe jatirasa
Lheueh nyan teuma bandua droe
Tren jak manoe sinan dua

Di leuen meuligoe na kulam saboh
Iepi that jroh hana tara
Keunan neupeurab raja ngon putroe
Dendayang dua droe sajan sireuta

Sidroe peh boh kruet sidroe peh beudak
Peumanoe cut nyak deungon raja
Jipleu kalang nibak asoe
Raja ngon putroe siseun dua.

Jiboh beudak dum bak badan
Raja sulotan manoe sigra
'Oh lheueh neumanoe ngui peukayan
Salen basahan bak anggeeta

Teuma raja neuwoe bak khaluet
Tuan putroe cut u istana
Raja neuduek murakah
Meungadap Allah Tuhan Nyang Esa

Teukeudi Allah teuma dudoe
Hame Putroe Meureudum Rakna
Poteu raja jareueng that neuwoe
Laloe neupujoe Allah Ta'ala

Lheueng lhee buleuen dudoe nibak nyan
Paduka sulotan neuwoe u istana
Ban sare troh lam meuligoe
Tuan putroe neujak sapa

Deelat teugayu judo teungku droe
Trep that lagoe nyan neugisa
Jeh 'oh lawet trep that meulheueng
Umu lhee buleuen han tom neuteuka

Ate lon rindu mayoh deundam
Uroe malam keu meukuta
Sireuta neukheun putroe meutuah
Yoh nyan neuseumbah teuot raja

Raja seuot teuma sipatah
Tango lon peugah ubak gata
Ate beureuhi lon keu Tuhan
Tuwo tuan lon woe bak gata

Hana teuingat keupeue laen
Di lon meusyen keu Rabbana
Meugoh na langkah keu lon sidroe
Hankeu lon woe ubak gata

Putroe marit ngon sulotan
Nyokeu meunan po meukuta
Lheueh meuhaba tuan putroe Ti
Diam beureunti po jroh rupa

Lawet lawan teuma dudoe
Buleuenpi sampoe budak keulua
Buleuenpi meupeue uroepi meuhad
Cut bungong riwat budak ka nyata

Rabioi awai buleuen molot
Malam Jumeu'at budak beulua
Neukalon aneuk ureueng lakoe
Tamse pudoe indah rupa

Hana saboh keu teuladan
Bak masa nyan sigala donya
Raja teutap dalam khaluet
Teungoh khusyuek pandang Esa

Troh dendayang teuma keunan
Jipeugah yoh nyan ubak raja
Deelat tuanku doli khalifah
Harap di bawah laman sroepada

Tuanku deungo haba sipatah
Suroh titah judo meukuta
Neuyue po cut ubak kamoe
Saleuem putroe dum peukara

Tuanku po cut ka na si manyak
Kamoe neuyue jak bak po meukuta
Neuyue jak peugah bak junjongan
Budak bangsawan indah that rupa

Raja deungo haba dendayang
Hireuen bimbang ate liga
Lheueh nyan teubiet raja lam khaluet
Neuwoe leugat u istana

Ban sajan troh lam meuligoe
Ubak Putroe Meureudum Rakna
Neueu aneuk ureueng lakoe
Hana sidroe bandeng rupa

Neucok aneuk peuduek lam leumueng
Raja uem-uem meusempeuna
Neumeulakee deungon lisan
Do'a teujintan poteu raja

Ya Ilahi wa ya Rabbi
Poku neubri ban kupinta
Neupeutroh napsu ulon meulakee
Gata nyang me peukabui pinta

Neubri seulamat aneukku sidroe
Troh an dudoe meubahgia
Bak le inseueh nyan neupandang
Gaseh sayang keu aneukaa

Phon jinoe kon beutroh keumudian
Beumeusyeuhuran sigala donya
Beulanjot umu aneuukku sidroe
Beujeuet gantoe sambot pusaka

Beuphet kulet beumangat asoe
Aneukku sidroe cahya mata
Sira neukheun nyan neucom neupangkee
Gusuek ulee do'a sempeuna

Lheueh nyan neumamoh ranup sigapu
Teuma neuseumbo bijeh mata
Abeh neuseumbo nap ngon likot
Teuma neubalot deungon ija

Geuboh lam tumpe kayen nadari
Bineh meuteupi kasap Roma
Lheueh nyan geupasoe dalam ayon
Geumeupanton mangat suara

Panton gareb tango bimbang
Teungeut rijang bijeh mata
Raja pangge sidroe bujang
Teuka le keunan sigra-sigra

Jidong di yup peurakna seumbah
Junjong khalifah raja raya
Deelat tuanku laman meukatOE
Neupangge kamoe peue na sabda

Yoh nyan seuot paduka sulotan
Dumna bujang seuon sabda
Wahe bujang tango kupeugah
Sabda takrah dua blah raja

Dumna nujum nyang ahlillah
Ulama syiah beuabeh taba
Sabda takrah banda duson
Dum beujitren tuha muda

Kareuna ulon raya hajat
Kaoi le that meukeurija
Bujang seuon sabda hadarat
Bungka leugat sigra-sigra

Ka jitamong jeuep-jeuep gampong
Mongmong ngon gong meuseuranta
Jijak peugah sabda sulotan
Dum sikalian nyang peutua

Lheueh nyan jiwoe tandi bujang
Tamong u dalam deelat raja
Ubak raja jipeuseumbah
Abeh meukrah po meukuta

Poteu seuot rijang-rijang
Pioh tuan jinoe gata
Teuduek haba tandi bujang
Uleebalang tren bak raja

Jitren rakyat banda duson
Dum meuron-ron tuha muda
Bungong jaroe jime sajan
Peurseumbahan dum keu raja

Keubeue lumo kameng kibah
Laen barollah untapi na
Laen boh kayee anggo jabet
Jipeudieng brat atueuh unta

Abeh jeuneh dum boh kayee
Pisang teubee ngon u muda
Nyang peutua uleebalang
Duek cong kandran atueuh guda

Rakyat seuleusak peunoh padang
Uleebalang raja raja
Ban sare troh teuntang dalam
Jitet meuriam meutaga-taga

Lheueh nyan tamong dum u dalam
Rakyat hitam peunoh donya
Dalam ngon mideuen peunoh seuleusak
Di atueuh tambak jeuet taleueng tika

Teuma geujak laju leugat
Nyan geudeelat raja eelia
Rakyat teudong dum meureuntang
Seumbah yoh nyan dum peutua

Jidong di yup peurakna seumbah
Junjong khalifah raja eelia
Deelat tuanku syahi alam
Seumbah laman doli sroepada

Pakon tuanku neupangge kamoe
Neukheun jinoe siri sabda
Trenkeu sabda teuma di manyang
Raja kheun ban jideungo rata

Tadeungo he rakyat meukatoe
Nyang jeuet keunoe lon yue teuka
Nyang lon seutot gata keunoe
Karcuna kamoe meukeurija

Lon keumeung peulheueh kaoi hajat
Aneuk siurat di lon ka na
Na hajat majih masa dilee
Meunoe jilakee meusempeuna

Jilakee beuna aneuk saboh
Kusie tujoh boh binatang unta
Laen nibak nyan kameng ngon kibah
Meunan jihah kaoi nada

Teumá meuh pirak tujoh ploh katoe
Kaoi Putroe Meureudum Rakna
Jinoe ka troh ban jilakee
Hajat dilee meusempeuna

Uroe tujoh geupeucicap
Raja rigap meukeurija
Rakyat 'a-'u meugeureupoh
Ban seunujoh kiam subra

Geusie keubeue lumo bubiri
Han soe tukri troh meulaksa
Ureueng nyang alem khatam Quruan
Uroe malam hana reuda

Ladom seulaweuet ladom tahle
Siteungoh ri ratebpna
Siteungoh ri dike molot
Beungoh seupot hana reuda

Teuma neubri ngon seudeukah
That barollah troh meubara
Nyang ulama dumna syiah
Bajee jubah meusrudiwangga

Seudeukah le that meuploh-ploh katoe
Meuh sinaroe laenpi na
Ureueng tabib ahli nujum
Neutheun bandum bansineuna

Ureueng alem ulama syiah
Duek di bawah raja raya
Rakyat laen dum sinaroe
Le nyang ka woe dum jigisa

Teuma marit raja sipatah
Tango lon peugah dumna gata
Sabda teupangge ureueng alem
Nyang mutakkim syiah ulama

Abeh neupangge tuan pakeh
Ureueng leubeh that ulama
Beuna sajan teungku khatib
Neuba ngon murid dum barangna

Nujum neuyue me sif ngon jibat
Sireuta ayat kalon angka
Lon meung yue boh nan aneuk miet cut
Nyan meukeusud lon bak gata

Tacuba eu dalam surat
Aneuk nyoe meuhad taboh nama
Lheueh nyan nujum buka surat
Jibeuet ayat kalon angka

Sare meupakat nujum yoh nyan
BANGTA SULOTAN jiboh nama
Lheueh geuboh nan aneuk miet cut
Teungku Syiah seubot lam risala

Bahren Nasi raja meutuah
Eelia Allah meubahgia
Rakyat pujoe sikalian
Bit that budiman hana tara

Lheueh nyan rakyat jikeumeung woe
Jimohon droe ubak raja
Ampon tuanku laman meukatoe
Kamoe meuwoe po meukuta

Jakkeu tuan beuseulamat
Beutroh u teumpat dumteu rata
Sare leupah rakyat jiwoe
Dum u nanggroe maseng jeumba

Amma bakdu dudoe nibak nyan
Bangta Sulotan kucalitra
Siploh uroe majih madeueng
Jeuet dong-dong budak baro na

Limong buleuen peurintah Hadarat
Ek jime brat tujoh gunca
That pahlawan han sibagoe
Khuluk peungaroe hibat raya

Ilok pareh that samlakoe
Meuangget dhoe bintang raja
Abeh buleuen thon meugantoe
Muda samlakoe maken raya

Geunap umu Bangta dua thon
Cut puteh sabon indah that rupa
Siuroe laen simalam bukon
'Oh takalon laju raya

Uroe nyoe meunoe singoh laen
Maken canden taeu rupa
Ilok pareh that samlakoe
Siuroe-uroe jahet meuganda

Uroe nyoe ngon singoh jeuoh parak
Lom ngon rancak bak meuhaba
'Ajab ngon tahe soe nyang pandang
Bangta Sulotan got that rupa

Narik meujeulih santon sopan
Ban manisan saka gula
Leumah-leumbot meuhabaran
Soe nyang pandang ate suka

Bak neumarit that ceureudek
Akai bayek Bangta muda
Bak siuroe teukeudi Allah
Marit ngon ayah muda beulia

Bangta Sulotan deelat ayah
That bit cidah bijaksana
Deelat tuanku ayah meutuah
Neungo lon peugah sipatah haba

Raja kalon aneukneu deelat
Tahé dahsyat puteu raja
Bukon that bijak aneuk bangsawan
Jitu'oh padan deelat raja

Bahren Nasi ateneu keumang
Sajan neupandang beureuma mata
Teuma marit raja sipatah
Cuba peugah peue na haba

Lom neumarit Bangta Sulotan
Nepeugah ban bak ayahda
Wahe ayah du teungku droe
Neumita beusoe nyang sibara

Neupeugot peudeueng keu lon saboh
Beusoe nyang jroh nyan neumita
Teuma neutanyong keu peue beusoe
Sidum-dum noe kayue mita

Pakon hai aneuk raya peudeueng
Pane ureueng jak prang gata
Bangta seuot tanyong ayah
Tango lon peugah he du raja

Peudeueng he du nyan keu hibat
Nanggroe Bageudad dudoe prang raya
Ban raja deungo aneuk kheun meunan
'Ajab haba nyan hireuen that raja

Teupike lam ate 'ajab han ban
Bangta Sulotan aneuk miet muda
Umu baro cit dua thon
Pakri maklum soe peuhaba

Saleh aneuk nyoe eelia Allah
Abeh leumah dum peukara
Teuma raja neutanyong kri
Ka neusudi bak aneukda

Siri ureueng jak prang keunoe
Cuba kheun proe bijeh mata
Teuma seuot Bangta Sulotan
Raja Yaman jak prang hamba

Ban raja deungo haba meunan
Bangta Sulotan bit troh mata
Nyang keuramat gaseh Rabbi
Phon cut meuri Allah peunyata

Buet nyang goh lom abeh jitukri
Saleh wali Bangta muda
Adat kon meunan pakri jithee
Pane eleumee soe peuhaba

Yoh nyan raja syuko keu Tuhan
Bangta Sulotan neulakee do'a
Neuleueng jaroe neumeuinseuen
Do'a neukheun keu aneukda

Bangta Sulotan bak meutuah
Eelia Allah meubahgia
Lheueh nyan raja neurahob jaroe
Neucom bak dhoe Bangta muda

Teuduek haba Bangta Sulotan
Meuwoe karangan duneu raja
Baren Nasi raja meutuah
Abeh neuyue krah bansineuna

Neuyue peuase dumna beusoe
jeuep-jeuep nanggroe neuyue peuna
Teukeudi Allah beusoepi ase
Rakyat me le ubak raja

Ase beusoe dum meusapat
Geutimang brat lhee reutoh bara
'Oh lheueh abeh ka geutimang
Doli junjongan neumeusabda

Tango kamoe dumna rakyat
Lon kheun pakat ubak gata
Tajak u gle dumteu sare
Ngeu beuase tajak mita

Beuliong taeu nyang tajam-tajam
Takoh bak reukam nyang raya-raja
Teuma tatet keunoe tapeuwoe
Tajak jinoe dumna gata

Dumna rakyat seuon titah
Jimeulangkah jak lam rimba
Na siribee ureueng jak u gle
Kayee jikoh le sigra-sigra

'Oh lheueh jikoh teuma jipuntueng
Leugatjisurung lam apui raya
Rakyat nyang tinggai sinoe di nanggroe
Neuyue hareutoe teumpat teumeumpa

Teuma jipeugot palong ngon tumpeuen
Umu sibuleuen nyanpi leungka
Lheueh nyan **jiato** lantui ngon palee
Sireutoh ribee dum meubanja

Sare ase dum sinaroe
Geuseutot jinoe pande teumeumpa
Ase utoh sikureueng reutoh droe
Neujok beusoe uleh raja

Rakyat jak u gle dum abeh woe
Ngeu sinaroe jiseuon rata
'Oh sare troh ngu u nanggroe
Pande jinoe phon teumeumpa

Dumna pande jipeh beusoe
Malam uroc jimeujaga
Sare tam-tum jipeh beusoe
Pande sinaroe teubiet meuk mata

Sunggoh jipeh umu lhee buleuen
Baro teuleueng siblah mata
Han ek balek peudeueng geuhon that
Dumna rakyat tan kuasa

Han soe ek balek peudeueng that panyang
Geuseutot rijang Po Cut Bangta
Bangta Sulotan neujak bak tumpeuen
Neukalon peudeueng goh lom leungka

Sinan teutiek ateueh landah
Balek pantah Bangta muda
'Oh meubalek nyan meusumpom
Peudeueng meudeungong ban su geureuda

Rakyat tahe dum sinaroe
Jikalon proe Bangta muda
Han tom Bangta nyoe pahlawan that
Dumna rakyat meuklep-klep mata

Bukon teuga that muda samlakoe
Bube nyan beusoe meubalek sigra
Geutanyoe sinoe meuploh-ploh katoe
Dum sinaroe hana kuasa

Bek an meubalek meugrakpi tan
Bangta Sulotan that peurkasa
Neubalek peudeueng hana payah
Bukon meutuah Bangta muda

Hana sabe bak pahlawan
Rab sipadan Ali Murtala
Adat na kayem rasa donya nyoe
Neubalek sidroe ngon siklep mata

Meunankeu miseue Bangta Sulotan
That pahlawan hana tara
Salang mantong cut dumnan kuat
Dudoe makan that teuma 'oh raya

Lheueh nyan pande jipeh peudeueng
Umu nam buleuen baro leungka
Ban lheueh leungka teutiek bak tumpeuen
Rakyat hireuen bansineuna

Ulee sinan mata sinan
Peudeueng jimeunan Si Crekaya
Tujoh ploh hah panyang peudeueng
Teuma linteueng limong deupa

Lheueh nyan teuka Bangta bak tumpeuen
Jak eu peudeueng nyan ka leungka
Teuma neucok reugam bak jaroe
Neuteubiet jinoe u blang raya

Rakyat ireng Bangta Sulotan
Hireuen yoh nyan tuha muda
Peudeueng di jaroe neukilap-kilap
Teumakot rakyat bansineuna

Sajan neusayong su meuhuet-huet
Bube sayeuep inong geureuda
'Oh tapandang na 'oh bak u
Hayut taeu ate lia

Rakyat lam blang abeh jiplueng
Tahe hireuen Bangta muda
Pakon jiplueng dumna rakyat
Sabab lon mat peudeueng raya

Lheueh nyan neutiek peudeueng lam blang
Neuwoe rijang bak ayahda
Neujak peugah ubak ayah
Rakyat barollah plueng simua

Saleh jitakot lon mat peudeueng
Rakyat jiplueng sigala donya
Teuma seuot raja meutuah
Gata bak Allah darohaka

Gata aneuk that teukabo
Jinoe tasyuko keu Rabbana
Talakee ampon ubak Tuhan
Aneuk bangsawan bijeh mata

Bangta neungo narit ayah
Neupateh mbah meubahgia
Bangta Sulotan meuucap syuko
Ie mata ro meuleulumba

Sireuta neukheun astaghfirullah
Subhanallah le neukata
Teuma neuseumbah teuot ayah
Bangta meutuah bijaksana

Lheueh nyan neubeuot jaroe dua blah
Mohon bak ayah muda beulia
Ampon tuanku du teungku droe
Meuh sikatoe neubri keu hamba

Baren Nasi raja keuramat
Neupeutroh hajat napsu aneukda
Teuma neubri meuh sikatoe
Teubiet jak mubloe Bangta muda

Neubloe keuruma anggo jabet
Sajan aneuk miet sabe muda
Neubloe ija dum sinaroe
Meuh sikatoe keu beulanja

Lheueh nyan neubungka muda samlakoe
Jeuep-jeuep nanggroe jak eu desa
Sajan meuteumeung deungan aneuk miet
Keuruma jabet neubri le sigra

Neibri ija sikhan sapo
Meunankeu he po muda beulia
Jeuep-jeuep gampong abeh neutamong
Agam inong neubri rata

Soe meuteumeung neumeuhei le
Meunankeu pie muda beulia
Dumna ureueng neuyue seumbahyang
Ija pinggang neubri rata

Neuyue peumubeuet dumna syiah
Neuberi upah le Cut Bangta
Ureueng peutua imum sagoe
Neubri sinaroe dum beulanja

Buet nyang maksiet abeh neularang
Neuyue seumbahyang tuha muda
Soe nyang han tem neuyue seutot
Neuyue peugot meuseujid raya

Beulanja neubri keu hadiah
Keu seudeukah Bangta muda
Mon jeuep-jeuep rot neuyue kurok
Upah neujok le Cut Bangta

Aman nanggroe dum sikalian
Bangta Sulotan peukong agama
Umu nam buleuen neucré ayah
Trok u Jeudah neujak lanja

Ngonneupi tan neujak sidroe
Muda samlakoe balek rupa
Alat peukayan dum bak asoe
Neucok sinaroe neusom sigra

Bahle teiduek haba nyan siat
Laen riwayat lon calitra
Amma bakdu laen kisah
Panglima Jeudah lon calitra

Neukrah rakyat meureutoh ribee
Neumeung hue kayee peugot istana
Neusie keubeue kameng ngon kibah
Panglima Jeudah meukeurija

Rakyat meutamon na peuet ribee
Keumeung hue kayee tuan Panglima
Watee rakyat teungoh makan
Bangta Sulotan keunan teuka

Ban sare troh Bangta keunan
Lakee makanan bak Panglima
Teuma marit Panglima Jeudah
Pane langkah gata teuka

Patbu nanggroe gampong ayah
Cuba peugah kungo nyata
Bangta seuot Panglima Jeudah
Narit neupeugah neusom punca

Ulon nanggroe pucok krueng nyoe
Kamoe sidroe mante rimba
Gaseh sayang teungku meutuah
Neubri sibabah bu keu hamba

Pruet ulon deuek padum uroe
Jeuoh nanggroe dalam rimba
Ban neudeungo haba mante
Ie mata ro tuan Panglima

Enseueh ate teuka sayang
Ija bak pinggang neuploh sigra
Neujok tangkulok teuma sikrak
Hireuen galak tuan Panglima

Rupa jroh that muda samlakoe
Neujok dudoe sikrak treuk ija
Teuma neubri ngon makanan
Makeuen yoh nyan muda beulia

'Oh lheueh makeuen rakyat meuribee
Jak hue kayee tuan Panglima
Kayee teudu nyan teugageueng
Na bube krong lhee ploh gunca

Ban sare troh dumna sare
Ka geubet le kayee raya
Bube-be sapai raya taloe
Rakyat meukatoe sare subra

Siplohpucok taloe geuboh
Surak riolah bunyoe taga
Surak meualon dumna rakyat
Jilipat-lipat siurat dua

Pruetjih ka troe mangat badan
Kayee sikhan meugrak hana
Rakyat meuribee sare riolah
Ayoh ayoh surak lanja

Hana meugrak meusigeutu
Neupeurab laju Bangta muda
Neucok kayee neutiek u baho
Rakyat tahe bansineuna

Teukap jaroe dumna rakyat
Pahlawan that pane teuka
Yoh nyan teuingat Panglima Jeudah
Allah Allah Bangta muda

Aneuk Raja Baren Nasi
That juhari di atueh donya
Nan geuseubot Bangra Sulotan
Nyankeu tuan nyoho ka teuka

Panglima Jeudah teuma deelat
Jihoreumat Bangta muda
Deelat tuanku syahi alam
He manikam bek taboh nama

Gata pangulee dumna kamoe
Rakyat sinoe sikalian na
Bangta neupeuduek kayee u bumoe
Neubet jaroe atueh Panglima

Bek tadeelat ulon sidroe
Kareuna kamoe goh meuraja
Gata ngon kamoe saban-saban
Bangta Sulotan meuhad raja

Ayah di nanggroe nyang nan khalifah
Hamba Allah deelat dumna
Bangta neucok kayee jatoe
Laju neupuwoe u gampong Panglima

Rakyat sinan meuribee katoe
Teukap jaroe dumjih rata
'Oh sare troh kayee u gampong
Panglima salen Bangta muda

Ija jroh jroh bajee meukasab
Indah sangat hana tara
Lheueh nyan Bangta neukeumeung woe
Keudeh u nanggroe bak ayahda

Lakee idin meumat jaroe
Com meumoe-moe tuan Panglima
Panglima marit teuma sipatah
Ngadap di bawah Bangta muda

Pakon po cut rijang neuwoe
Neudong bak kamoe po cut raja
Neudong bak kamoe neukeurajeuen
Dalam ngon mideuen lon bri keu gata

Gata sidroe mat keurajeuen
Kamoe bandum ikot sireuta
Teuma marit Bangta Sulotan
Ayah lon tuan raja raya

Tadeungo lon kheun haba sipatah
Panglima Jeudah sah syeedara
Bek neupeudong lon di sinoe
Lon woe u nanggroe bak ayahda

Trep that ka cre lon di gampong
Rab troh sithon bak lon kira
Lon woe jinoe laman siat
Dudoe meuhad lom lon teuka

Meunan idin nibak Allah
Cit troh langkah saweue gata
Lon jak keunoe teuma dudoe
Jinoe lon woe idin sigra

Panglima Jeudah weueh that ate
Meugrum ile ngon ie mata
Weueh jipandang muda samlakoe
Ho troh kamoe po meukuta

Han neutem dong meudua uroe
Sajan kamoe ureueng tuha
Panglima Jeudah neubri idinkan
Bangta Sulotan leugat neubungka

Keumeung jak intat han neutem bri
Teuma neuwoe le sidroe saja
Sira neuwoe Bangta sidroe
Jeuep-jeuep nanggroe meuseuranta

Neuyue ibadat sigala ensan
Neuyue seumbahyang tuha muda
Yoh masa neujak cit ka neupeugah
Jinoe neutamah supaya meusra

Teukeudi Allah leupah neuwoe
Troph u nanggroe paduka ayahda
Bangta tamong nyan u dalam
Ngadap junjongan raja raya

Ban sare troh u leuen meuligoe
Meuteumeung jinoe Bangta muda
Laju neuk u meuligoe
Neucom jinoe teuot ayahda

Teuma raja marit sipatah
'Oh na langkah bijeh mata
Pane 'oh trok aneuk tajak
Tapeugah bak kamoe dumna

Bangta neumarit teuma ngon ayah
Deungo lon peugah he du raja
Droe cit ka ngon teukeudi Allah
Troh u Jeudah ulon bungka

Ban raja deungo haba meunan
Hireuen yoh nyan poteu raja
Raja seubot Allah ya Ghani
Aneukku neubri beumeubahgia

Tatkala nyan abeh meusyeuhu
Barat timu jeuep-jeuep raja
Troh nanggroe Kleng nanggroe Diu
Troh meusyeuhu sigala donya

Aneuk Raja Baren Nasi
That juhari indah rupa
Ilok pareh muda samlakoe
Meuangget dhoe bintang raja

Meunan meugah jeuep-jeuep nanggroe
Aneuk Putroe Meureudum Rakna
Subhanallah 'amma yasifun
Peurintah Tuhan barangjan masa

Amma bakdu teuma dudoe
Kisah muwoe haba raja
Umu lhee thon lheueng nibak nyan
Meulumpoe tuan poteu raja

Miseue dilee leumah lumpoe
Tuhan sidroe bri rahsia
Malam Seunen buleuen Ramadan
Leumah buruhan takbi rahsia

Suloh nyan akhe kutika saho
Beudoh bak tido puteu raja
Lheueh nyan neutren teuma bak kulam
Tueng ie seumbahyang sigra-sigra

Neuseumbahyang dua raka'at
Seumbahyang hajat lakee do'a
Teuma neuwoe u meuligoe
Ubak Putroe Meureudum Rakna

Bak malam nyan raja situboh
Makanan haloh mayoh meurasa
That beureuhi keusukaan
Nekmat Tuhan hana tara

Tuhan Kade bri eleuham
Jeuet manikam indah rupa
Lheueh nyan neutren u leuen meuligoe
Raja ngon putroe siseun dua

Neujak bak mon bandua droe
Raja ngon putroe manoe sigra
Dua dendayang neuba sajan
Beudak lam cawan ngon kruet meuupa

Teuma jiple ie le dendayang
Jipleu kalang bak anggeeta
'Oh lheueh manoe raja ngon putroe
Teuma neuwoe lam istana

Teuma neungui ngon bee-beewan
Sajan peukayan indah rupa
Lheueh nyan geubet ngon idangan
Pajoh makanan malam jula

Pajoh bu saho akhe malam
Kukuek ayam manok donya
'Oh lheueh makeuen geucok idang
Buet dendayang nyang keurija

Lheueh nyan raja neuduek siat
Dudoe beurangkat meukuta donya
Raja neuwoe ubak khaluwat
Ngadap Hadarat Allah Ta'ala

Dawok seumbahyang ngon meurateb
Raja galeb deungon takwa
Meunankeu buet baranggajan
Seumbah Tuhan nantiasa

Uroe malam hana khali
Ate beureuhi pandang Esa
Lawet lawan teuma dudoe
Hame Putroe Meureudum Rakna

Abeh buleuen meugantoe thon
Budak lam kandong hana keulua
Leupah nibak had leubeh buleuen
Putroe hireuen tahe liga

Hingga sampie bak thon laen
Hana jitem budak keulua
Putroe gundah hana padan
Peue jeuneh nyan aneuk beurala

Han tom meunoe nyang ka dilee
Neueu lagee gundah raya
Teukeudi Allah peurintah Hadarat
Tuan putroe brat jameun masa

Kata sahib eumpunya kisah
Peurintah Allah han ek kira
Umu limong thon budak lam kandongan
'Oh lheueh nibak nyan pandang donya

Meureudum Rakna gundah laku
Neueu bak pruet hu that meucahya
Tamse beuneung raja timoh
Meunan ulah neueu rupa

Pruetneu raya droeneu kheun tan
Budak bangsawan meubahgia
Teuma neumarit putroe sipatah
Ka neupeugah bak aneukda

Wahe aneuk tateubiet rijang
Mateu bimbang sosah raya
Peue jeuneh gata jin ngon syetan
Atawa ensan manusia

Adat syetan weh beupantah
Lon that gundah hana tara
Adat nyang ensan teubiet rijang
Lon keumeung pandang bijeh mata

Putroe gundah hana lagee
Sabab malee atueuh donya
Teukeudi Allah peurintah Tuhan
Meusu aneuk nyan dalam pruet bunda

Budak jimarit teuma deungon nang
Hireuen bimbang Meureudum Rakna
Deungon suara that fasihat
Marit lam jasad lam pruet po ma

Subhanallah walhamdulillah
Pakon sum'ah narit gata ma
Wahe po ma pakon gundah
Cuba peugah lon ngo nyata

Seulawet po ma neume kamoe
Padum jijaboe iblih peudaya
Padum seun teuka burong ngon syetan
Po ma kheun ban lon deungo nyata

Teuma marit tuan putroe
Neupeugah proe bak aneukda
Wahe aneuk tango kamoe
Meukheun jinoe ubak gata

Hana aneuk na meularat
Badanku mangat miseue nyang ka
Hana jaboe nibak syetan
Mangat badan Allah karonya

Nyang na aneuk malee kamoe
'Ayeb bunyoe keunong ceureuca
Lheueh nyan marit budak lam pruet
Tango lon seubot po ma raja

Bek an geutanyoe gutee tanoh
Rasulullah keunong ceureuca
Bek tagundah po ma badan
Kheundak Tuhan beutarela

Putroe neumarit lom ngon budak
Pajan he nyak tateubiet gata
Buleuen siri aneuk kheun ban
Peurjanjian lon ngon gata

Lom jimarit budak lam kandongan
Jipeugah jan ubak po ma
Wahe ma po ma teungku droe
Tango jinoe lon peuhaba

Lon kuteubiet po ma badan
Buleuen Ramadan kupandang donya
Lelaton kada suloh nyang akhe
Yoh nyan lahe kupandang donya

Kadang po ma pangsan teungeut
Ulon teubiet neuthee hana
Wahe aneuk tango kamoe
Han tom meunoe dilee nyang ka

Teubiet aneuk dalam badan
Keusaketan hana tara
Rasa teubiet nyawong lam badan
Meunan tuan budak keulua

Hana saket leubeh nibak nyan
Bala Tuhan bri keu hamba
Cit 'eh-'oh apoh-apah
Badan beukah na nyum rasa

Na nyum teubiet nyawong lam jasad
Meunan saket that hana tara
Ka lon rasa masa dilee
Hana lagee sosah raya

Nyoe he aneuk takheun han lon thee
Masa dilee ka lon rasa
Bukon mustahe haba neupeugah
Sang beurakah narit gata

Lom jimarit budak bangsawan
He ma badan ngo lon peuhaba
Hana tango fireuman Tuhan
Dalam Quruan lahe nyata

Tango jinoe ma lon peugah
Fireuman Allah kalam Rabbana
Inna ma'a l-'usri yusran
Tango lon kheun ban teuma makna

Nyang payah po mapi mudah
Karonya Allah atueh hamba
Po ma bek le lon meuhabaran
Gop ngo tuan jeuet ceureuca

Teutap teuiem han le kalam
Lua dalam han le haba
Lawet lawan karonya Rabbi
Troh bak janji budak ngon ma

Buleuen Ramadan dua ploh lhee
Allah teuntee budak nyata
Tuhan peutren angen mangat
Abeh teungeut pangsan rata

Ate deundam mayoh rindu
Teungeut laju nekmat raya
Hana jithee asoe meuligoe
Pangsan sinaroe teungeut indra

Buleuenpi jroh malampi got
Budak lam pruet Allah peunyata
Malam Jumeu'at lelaton kada
Meunan haba bak calitra

Budak keulua pandang bumoe
Maneu putroe pangsan rata
Aneuk teubiet neutheepi tan
Mangat badan hana cidra

Lheueh nyan neutren malaikat
Neujak mat-mat budak baro na
Neukoh pusat neupeumanoe
Suci asoe hana leuta

Neume ngon tumpe kayen nadari
Peukayan Siti aneuk syeuruga
Teuma neubalot budak bangsawan
Lam ija nyan indah rupa

Teukeudi Allah peurintah Hadarat
Malaikat neutren u donya
Neupeurintah dum hareutoe
Teuma neuwoe bandum rata

Sare abeh malaikat woe
Teukeujot Putroe Meureudum Rakna
Nyang jeuet jaga putroe bangsawan
Budak di dalam baro keulua

Putroe neuduek neurok sumpan
Neukalon badan ka phui raya
Hana cacat cidra badan
Hana meuligan dum anggeeta

Hireuen tahe tuan putroe
Neukalon droe hana cidra
Subhanallah 'amma yasifun
Rahman Rahim Po Nyang Esa

Teuma neukalon wie ngon u neun
Neueu ayon indah that rupa
Teuma neujingeuk lam ayon nyan
Leūmah neukalon bijeh mata

Putroe neuseubot alhamdulillah
Pujoе Allah Po Rabbana
Teuma neucok neuboh lam leumueng
Ate teuleueng hana tara

Ate teuhah tuan putroe
Tamse urœ limpah cahya
Neucom di ulee neutimang-timang
Mayoh bimbang ate suka

Lheueh nyan teukeujot dum dendayang
Uroe siang ka cuaca
Abeh jaga dum sinaroe
Meugah putroe aneuk ka na

Tahe hireuen asoe meuligoe
Jikalon putroe budak baro na
Baren Nasi sinan sajan
That sukaan hana tara

Ate mayoh rindu bimbang
That sukaan nyan bandua
Tamse mbon di cong eumpeuek
Na tamse meuk di cong siganda

Tamse buleuen teungoh jikateuek
Meunan seunaleuek lakuan rupa
Lheueh nyan neucok peuduek lam leumueng
Raja uem-uem neucom neuwa

Sireuta neusujud pujoе Tuhan
Laen nibak nyan do'a sempeuna
Gusuek bak ulee neucom bak dhoe
Teuma neupujoе Tuhan Nyang Esa

Neumeuinseuen mohon tulong
Neuyue peulindong nibak banya
Ya Ilahi Polu Rabbi
Aneukku neubri meubahgia

Beuseulamat troh an dudoe
Siumu nanggroe geuseubot nama
Beuphet kulet beumangat asoe
Neukabui nyoe ban kupinta

Insya Allah bak seulamat
Beureukat mukjizat Saidil Anbia
Beumeusyeuhu jeuep-jeuep nanggroe
Aneukku putroe seumangat kuta

Do'a sempeuna meubagoe-bagoe
Neugusuek bak dhoe rahop di muka
Aneuk neupeuduek dalam leumueng
Jaroe neuleueng lakee do'a

Abeh do'a dum ka sampoe
Neurahop jaroe ateueh muka
Neupangkee aneuk neutimang-timang
Mayoh bimbang poteu raja

Teuma raja tanyong padan
Soe taboh nan budak baro na
Neutanyong bak tuan Siti
Soe tarasi taboh nama

Putroe seuot teuma sipatah
Nur Latifah taboh nama
Budak jimoe yoh masa nyan
Hana reumbang geuboh nama

Teuma geubalek nan Nur 'Aini
Jimoe sabe hana reuda
Hana jjiem jimoe yoh nyan
Geubalek nan Nuron A'la

Banlhee peue nan poteu rasi
Jimoe sabe hana reuda
Han reumbang nan lhee peue ka neuboh
Hana teudoh jimoe lanja

Raja ngon putroe lam mabok-bang
Sayang neupandang bijeh mata
Pakon jimoe aneuk boh ate
Ie mata ile troh u dada

Raja ngon putroe weueh bukon le
Tangke ate jimoe han reuda
Ate raja meunyum gundah
Mohon bak Allah nyang sijahtera

Bukon sayang budak jimoe
Ri geumanoe ro ie mata
Putroe neumueng aneuk bangsawan
Sireuta sajan ngon ie mata

Beusot ate weueh neupandang
Budak bangsawan jimoe han reuda
Raja meulakee ubak Hadarat
Weuehneu sangat keu aneukda

Ya Tuhan Poku Rabbi
Po lon neubri ban kupinta
Budak jimoe bukon bubarang
Neutulong laman ya Rabbana

Han tom jjiem meusikeujap
Sayang lon that hana tara
Weueh lon han ban hanco ate
Jimoe sabe hana reuda

Naritpi sret nyan di babah
Raja meutuah neukabui pinta
Budak jimoe hana lawan
Keudeungaran u pinto syeuruga

Malek Ridwan pangulee pinto
Neudeungo su budak baro na
Neudeungo su maken gurantang
Malek Ridwan lam syeuruga

Teuma peuseumbah malaikat
Ubak Hadarat Po Nyang Esa
Ya Tuhan Poku Rabbi
Gata Ghani ya Rabbana

Tren fireuman Tuhan Hadarat
Malaikat deungo dumna
Kadeungo he Malek Ridwan
Jakleh katren nyan u donya

Budak kapeuiem bek jimoel le
Jak katren le jinoe sigra
Kaboh nan budak bek jimoel le
Beusot ate ayah ngon bunda

Nang mbah jiboh nan Nur 'Aini
Jinoe karasi BAREN MIGA
Jakleh katren nyan u bumoe
Kajak jinoe sigra-sigra

Malek Ridwan seuon titah
Neumeulangkah tren u donya
Dua ploh droe malaikat
Neutren leugat ubak raja

'Oh sare lheueh seumbahyang suboh
Abeh tasbeh nyan ngon do'a
Raja neuduek lheueh seumbahyang
Leumah neupandang ureueng teuka

Leupah neutamong lam meuligoe
Siulah proe sang eelia
Han meune roh teuka keunan
Seun rot teudong lam istana

Raja tangah teuma u langet
Malaikat neuthee teuka
Malaikat yoh nyan meubri saleuem
Deungon sulton raja raya

Assalamu 'alaikum Baren Nasi
Gata wali pangkat eelia
'Alaikum salam warahmatullah
Hobu langkah tajak gata

Kamoe nyoe tuan malaikat
Tuhan Hadarat yue ba sabda
Raja seuot yoh masa nyan
Neukheun tuan meudeungo nyata

Aneuk gata ureueng binoe
Taboh nan Putroe Baren Miga
Raja seuot Alhamdulillah
Insya Allah lon peucaya

Habapi abeh nyan geupeugah
Gop nyanti gadoh siklep mata
Pihak ade raja keuramat
Malaikat keunan teuka

Raja neuke lam meuligoe
Neueu putroe lam leumueng ma
Aneuk neucok neutimang-timang
Neumeuhei nan Baren Miga

'Oh lheueh geuboh nan Putroe Baren
Teusinyom teukhem maneh rupa
'Oh teusinyom tuan putroe
Ban meuk uroe limpah cahya

Teudoh jimoel putroe bangsawan
'Oh geuboh nan Baren Miga
Teuma jipajoh geubri makanan
Ka jitem mom ubak po ma

Raja ngon putroe that sukaan
'Oh neupandang bak aneukda
Ilok pareh bukon bubarang
Hana wadan di atueuh donya

Tan soe bandeng bak teuladan
Cahya ruman ban bintang kala
Di yup langet di atueuh bumoe
That sambinoe Cut Baren Miga

Lawet lawan dudoe nibak nyan
Putroe budiman maken raya
Siuroe laen simalam bukan
That analan indah rupa

Mata meuceulak bibi reunom
Maneh teusinyom jahet muka
Dhoe meuangget buleuen siuroe
Cahya gigoe ban ie suasa

Nyan dum indah tan sipadan
Rab-rab saban Putroe Zalikha
Nyan peurumoh Nabi Yusuf
Raja Samus nan ayahda

Nanggroe Meuse teumpat keurajeuen
Rakyat hireuen kalon rupa
Bahkeu dumnan teuduek siat
Laen riwayat lon calitra

Amma bakdu dudoe nibak nyan
Lon kisah tuan Baren Miga
Umipi ka troh putroe lhee thon
Tuhan peutren saboh rahsia

Bak simalam putroe meulumpoe
Teuka sidroe ureueng mulia
Rupa jroh that han sibagoe
Peukayan di asoe tamse raja

Tuan putroe kalon teudong
Deuh neupandang ateueh geuta
Lheueh seumbahyang neuseumayam
Teupike yoh nyan Baren Miga

Neukalon rupa ban meuk uroe
Saleh rasui saleh eelia
Baranggasoepi kudeelat
Kubri 'idat kupeumulia

Deelat tuanku po junjongan
Seumbah laman po meukuta
Putroe tanyong teuma sipatah
Panebu langkah ya saidina

Patbu gampong tuanku sinan
Ayahneu tuan soebu nama
Kamoe geupeunan Muhammad Amin
Bani Hasyem asai bangsa

Dairah nanggroe nyan di Makah
Teumpat ayah nyan ngon bunda
Padum jameun nyan di Makah
U Madinah lon duek teuma

Abeh neupeugah dum hareutoe
Ubak Putroe Baren Miga
Hobu langkah po junjongan
Tuanku kheun meungo nyata

Nabi seuot nyan neupeugah
Ulon langkah cit bak gata
Teuhah babah putroe bangsawan
Kukeumeung kalon pakri rupa

Putroe Baren teuhah babah
Nabi ludah sigra-sigra
Lheueh jiteugok ie babah Nabi
Jicom di gaki jipeumulia

Baren Miga seumbah Nabi
Leumah teujali lumpoe rahsia
Lheueh nyan teukeudi nibak Allah
Uroepi beungoh ka cuaca

Teuma teukeujot tuan putroe
Duek teupipoe wet ngon sila
Sajan teuingat nyan keu lumpoe
Ri geumanoe ro ie mata

Baren Miga jimoepi that
Na nyum teuangkat nyawong lam dada
Sabab hana ureueng jilumpoe
Nyankeu jimoel hana tara

Adat kudapat ureueng kulumpoe
Barangri nanggroe kujak mita
Tangah u langet teukui u bumoe
Ri geumanoe ro ie mata

Na sijameung teuma dudoe
Teudoh jimoel Baren Miga
Lheueh nyan putroe tangah u manyang
Leumah jieu trang teuma cahya

Maken neupandang nyan neupeudeuh
Maken peungeuh nibak nyang ka
Pinto langet tujoh lapeh
Jinoe abeh dum teubuka

Leumah jieu loh mahfui
Teumpat meukabui lakee do'a
Neueu teusurat lhee banja sinan
Meunan habaran dum ulama

Saboh banja kalamullah
Meunan kisah siteungoh ulama
Saboh banja taeu teusurat
Asoe langet bansineuna

Saboh banja treuk teusurat nyoe
Asoe bumoe abeh dumna
Got ngon jeuheut nyang jibuat
Dalam surat Allah peunyata

Leumah jikalon 'arasy kurusi
Sangat ghani Allah Ta'ala
Dudoe nibak nyan peurintah Allah
Neupeuleumah jikalon syeuruga

Abeh jikalon adeueb Allah
Sabab leubeh Baren Miga
Lheueh nyan puleh tuan putroe
Sabab bunoe duka cita

Teungeutpi kon jagapi kon
Leumah neukalon dum peukara
Teuma jiingat eleumee Quruan
Meufom sikalian lafai ngon makna

Eleumee peuet blah abeh maklum
Meufom bandum Baren Miga
'Oh lheueh nyata dum hareutoe
Teubiet uroe putroe jaga

Allah peuleumah lahe baten
Putroe Baren mantong cit duka
Hana that le miseue bunoe
Kareuna le peue nyang ka nyata

Sabab teuingat nyan keu Nabi
Nyang jeuet Siti mantong duka
Lheueh nyan teukeujot dum dendayang
Mayoh bimbang duka cita

Pakon neumoe po cut intan
Peue dukaan po cut raja
Pakon gundah po cut boh ate
Soe boh pake keumala cahya

Dendayang cok teuma jijulang
Sira jitimang Baren Miga
Teuma jime jak peumanoe
U leuen meuligoe bak mon raya

'Oh lheuen manoe teuma jipeuwwoe
Ubak Putroe Meureudum Rakna
Ban sare troh u meuloe
Bak peuradoe laju jiba

Baren Miga mantong jimoe
Makna lumpoe goh lom nyata
Teuma tumanyong lom dendayang
Pakon bimbang po cut raja

Peugah po cut dum bak kamoe
Pakon neumoe peue kareuna
Han meusikrakpi neuseuot
Dendayang sret dum ie mata

Weueh jipandang that dukaan
Ban lakuan ureueng gila
Teuma jipeuek u meuligoe
Bak peuradoe Meureudum Rakna

Ban sare troh keunan dendayang
Seumbah yoh nyan sigra-sigra
Jipeugah hai putroe gundah
Jipeuseumbah ubak bunda

Po cut tuanku sangat bimbang
Kamoe tanyong hana haba
Cit meuneumoe meusok-meusok
Droeneu dawok duka cita

Teuma neutanyong maneu putroe
Pakon kamoe bijeh mata
Soebu pake tangke ate droe
Peugah bak kamoe boh ate ma

Teuma seuot Putroe Baren
Mayoh meusyen mangat suara
Hana soe pake ma teungku droe
Leumah lumpoe saboh rahsia

Peu kalumpoe aneuk meutuah
Cuba peugah lon deungo nyata
Lumpoe lon got ma teungku droe
Jak tapeugoe du lon raja

Lon he aneuk hana **ragoe**
Bak seumeugoe hana biasa
Han tom aneuk kupeugoe ayah
Hana ramah lon ngon raja

Lom neumarit Putroe Baren
Neupeugah ban ubak bunda
That mustahe po ma neupeugah
Patot han ramah deungon gata ma

Adat han ramah gata ngon du
Pane meulaku kamoe dua
Wahe aneuk kulop pinggang
Nyang han lon kheun ban bah lon peuhaba

Dua gata sikureueng seun neuwoe
Aduenteu sidroe limong seun saja
Teuma di gata peuet seun neuwoe
Nakah sidroe Allah peunyata

Han tom lon eu puteh hitam
Neuwoe malam watee seunia
Neubri utosan asa uroe
Teuma neuwoe 'oh lheueh 'isya

Adat na teuka lon darurat
Kukheun amanat bak ureueng ba sabda
Teuma neupreh lheueh kumanoe
Meunankeu proe poteu raja

Meunyo meunan ma neupeugah
Bit han ramah deungon gata
Kadang pat laloe duku sidroe
Siri putroe nyang jroh rupa

Siri dendayang duku bimbang
Peugah rijang wahe po ma
Hana laloe keu dendayang
Na nyum bimbang keu Allah Ta'ala

Jinoepi aneuk jak tapeugoe
Kukheun hareutoe ubak gata
Beukit jinoe tapeugoe du
Nyoe ban laku bijeh mata

Beutaceupet buju teuot
Beutaurot banja dada
Adat neubalek neugeuriwat
Ceupet beuthat nak rijang jaga

Bitpi tango lon kheun hareutoe
Han tom lon peugoe duteu raja
Bek tasangka na tom kupeugoe
Kupeurunoe aneuk keu gata

Ban nyang haba bunoe kupeugah
Tupeue faidah lon pubuet hana
Nyang na lon peugoe cit meuayah
Saiden Syarifah jeuneh bangsa

Putroc teumanyong bak dendayang
Soe na tuan ramah ngon gata
Dendayang seuot pantah-pantah
Han meujeuet ramah ngon po meukuta

Abeh jitanyong bak pahlawan dum
Di jihpi han tom ramah ngon raja
Laju neuek lam meuligoe
Bak peuradoe nibak bunda

Baren Miga putroe meutuah

Jak peugoe ayah raja raya

Laju neukek u meuligoe

Bak peuradoe poteu raja

'Oh troh keunan putroe lalu

Bak bęuradu poteu raja

Ban troh keunan putroe teungku

Neukalon du teungeut indra

Neueu teueh lam keuleumbu

Teumpat beuradu indah that rupa

Geuboh leulanget intan meutabu

Ho nyang taeu indah rupa

Tika geuleueng peureumadani

Jeuneh keurus i kasab Roma

Wie ngon uneun bantai suson

Meuato ruton dum jroh rupa

Abeh jikalon bandum sare

Ulee gaki bantai siraga

Geuboh papeuen banpeuet sagoe

Tiree meusujoe lingka dumna

Di yup tika saboh peuratah

That bit indah banpeuet panca

Geuta indah tameuhjih meuh

Geutatah di atueh intan peurmata

Jareueng jareueng geuboh intan

Cahyajih ban buleuen purnama

Raja teungeut hana padoe

Manyang uroe goh lom jaga

Baren Miga sinan teudong

Neueu mantong duneu indra

Yoh nyan teungeut raja meutuah

Nyan phon suboh troh an sinja

Lheueh seumbahyang awai suboh
Neuratebpi lheueh do'api leungka
Teuma neueh dudoe lheueh nyan
Putroe Baren keunan teuka

Neukira hana seumbahyang suboh
Putroe beungeh hana tara
Han mee tapeugoe ngon nasihat
Jikheun maksiet that duku raja

Teuma jicok lantui u jaroe
Jipeh le putroe binteh istana
Sare tam-tum jipeh binteh
Raja teungoh eh lalu jaga

Rajapi neuduek beungeh han ban
Putroe intan jiplueng sigra
Raja tanyong bak asoe meuligoe
Soe peugoe kamoe aneuk ceulaka

Hana sabohpi na soe seuot
Abeh teumakot bandum rata
Poteu raja sare kiam
Mirah padam ngon ie muka

Soe peugoe kee aneuk jalang
Peugah rijang sigra-sigra
Kuteumee cangjih beuabeh
Aneuk paleh akai hana

Raja beungeh han soe linteueng
Di jaroe peudeueng puteh that mata
Dum dendayang sangat sosah
Putroe jimarah dumjih rata

Teuma teuka dendayang dua droe
Deungon adoe sisyeedara
Teuma marit jih dua droe
Peusalah droe nibak raja

Jimeupakat bandua droe
Tagantoe putroe bek keunong meureuka
Teuma teupike uleh adoe
Pakri kee nyoe wahe po da

Pakri tanyoe gantoe putroe
Malam baroe ban lheueh keurija
Teuma marit dapoijih sidroe
Jikheun bak adoe sigra-sigra

Di keepi adoe han jeuet kugantoe
Na peue adoe sosah raya
Sayang keumuenteu nyan jimo
Mate kamoe hilang nyawa

Putroe Baren sinan neudong
Neudeungo dendayang marit adoe a
Putroe marit teuma sipatah
Neuyue minah dendayang dumna

Deesya siurang atueh siurang
Pakon that girang dumna gata
Droeku deesya droeku tanggong
Bahkeu neusurung u atueh sula

Kaiem di kah aneuk jalang
Hana sigupang geuboh hareuga
Ban jideungo haba putroe
Geunta asoe bansimua

Yoh nyan putroe jiek u lepu
Ka troh bak du raja raya
Teuma jidong di hadapan
Mukajih ban jantong muda

Deelat tuanku du teungku droe
Seumbah kamoe he du raja
Kamoe peugoe du boh ate
Neupoh matepi kurela

'Oh mee ka neupoh cit beumate
Bek payah le neupeulara
Teuma oh raya neupeukawen
Dudoе makan neubri areuta

Raja han puleh nibak masam
Putroe yoh nyan le bicara
Wahe du po deungo kamoe
Limpeuen bunoe keumeung kap gata

Han jan lon mita kayee nyang cut
Roh ulon bet lantui raya
Ban raja ngo narit meunan
Teusinyom yoh nyan poteu raja

Puleh beungeh nibak masam
Gadob hitam ngon ie muka
Teuma neucok bungong yueng-yueng
Neuboh lam leumueng Baren Miga

Neucom di muka mayoh ate
Neutanyong le bak aneukda
Rijang aneuk teuka keunoe
Peugah bak kamoe bijeh mata

Peuebu lumpoe aneuk meutuah
Cuba peugah lon ngo nyata
Lumpoe lon got syahi alam
Seumbah laman paduka aneukda

Nyang jeuet lon peugoe po junjongan
Kareuna laman tan agama
Neupeurunoe rukon syahdat
Teuma Muhammad neupareksa

Abeh neutanyong kawom ngon ayah
Ngon silsilah ibu bapa
Abeh neutanyong kubu ngon naggroe
Neukheun hareutoe keu aneukda

Ayah Nabi tuan Abdullah
Tuan Aminah nyankeu bunda
Nyang peumom Nabi tuan Halimah
Di nanggroe Makah teumpat dirinya

Kubu Nabi nanggroe Madinah
Meunankeu nyang sah tapeucaya
Dalam lumpoe cit ka deuh that
jak tueng beureukat bak ayahda

Lheueh nyan putroe seumbah ayah
Aneuk meutuah Baren Miga
Poteu raja rindu ate
Neugusuek le di keupala

Poteu pike na sijamang
Bukon sayang Baren Miga
Patot kupeugot saboh meuligoe
Teumpat duek putroe Baren Miga

Putroe Baren aneuk meutuah
Gaseh ayah deungon bunda
Amma bakdu teukeudi Hadarat
Neukrah rakyat poteu raja

Geuyue pasoe saboh beude
Raja ade gaseh Rabbana
Teuma geupasoe Sampoh Ratu
'Oh jimeusu geunta donya

Nyankeu beude that meuuntong
Lilet punggong na tujoh deupa
Ubat geupasoe dua ploh gudang
Geutet ngon tunam sigra-sigra

Suara meutaga nyum lham nanggroe
Rakyat tuloe bansineuna
Asap meubura seupot seupeuet
Klam kabot jeuet dalam kuta

Su meugop-gop na lhee uroe
Troph meubunyoe dua blah raja
Soe nyang na ngo su meuriam
Jitren curam ubak raja

Meunan adat baranggajan
Geutet beude nyan 'oh troh kutika
'Oh jan na buet nyang raya that
Geutet nubat sigra-sigra

Han peue seutot le tandi bujang
Cit ka maklumkan adat nyang ka-ka
Teukeudi Allah lheueh nyan dudoe
Rakyat lam nanggroe ban ie raya

Dua blah raja ka meusapat
Raja Bageudad meukeurija
Rakyat ka troh dum u midan
Tamong u dalam ngadap raja

Rakyat seuleusak that meudah-dah
That barollah dua blah raja
Rakyat teudong dum meureuntang
Ija bak pinggang bansineuna

Sare abeh tamong u dalam
Ngadap junjongan pujo raja
Teudong di yup peurakna seumbah
Junjong khalifah raja eelia

Deelat tuanku laman meukatoe
Pakon kamoe neuseuranta
Peue na buet po junjongan
Tuanku neukheun lon ngo nyata

Trenkeu sabda teuma di manyang
Po junjongan neumeuhaba
Tango kamoe rakyat meukatoe
Meung peugah proe dum bak gata

Nyang lon pangge gata keunoe
Hajat kamoe nyang that raya
Peuebu hajat tuanku ampon
Kamoe seuon barangpeue sabda

Kri cit narit doli hadarat
Neukheun bak rakyat dum barangna
Sabda tamita kayee jatoe
Keu meuligoe Baren Miga

Kareuna aneuk lon cit sidroe
Kupeugot meuligoe saboh nyang raya
Gaseh sayang dumteu sare
Tajak u gle dumteu rata

Dumna rakyat raja dua blah
Seuon titah sabda raja
Insya Allah dum jiseuot
Jaroe jibet atueuh jeumala

Adat na untong mangat asoe
Kayee jatoe ulon peuna
Lheueh nyan rakyat geubri makanan
Peurjamuan nibak raja

'Oh lheueh makeuen dumna rakyat
Doli hadarat neumeusabda
Raja kheun kri ubak bujang
Tabuka gudang saboh nyang raya

Teuma tacok asoe di dalam
Dina deureuh ham lom ngon ija
Tacok apiun dua blah katoe
Tapeujaroe bandum raja

Tapileh beuliong dum nyang tajam
Tacok di dalam gudang raya
Bujang seuon sabda sulotan
Jibuka yoh nyan gudang nyang raya

Teuma jimat gunci u jaroe
Jibuka peutoe sigra-sigra
Jicok di dalam dumna asoe
Jipeujaroe ubak raja

'Oh lheueh abeh dum seuleusoe
Neujok u jaroe dua blah raja
Nyan apiun dua blah katoe
Bungong jaroe poteu raja

Ceukeh galang ngon beuliong
Dum tabulueng maseng rata
Tacok ngon breueh saboh keupok
Beuabeh tajok dum peukara

Sare ase sileungkapan
Ngadap junjongan mohon bungka
Lakee idin dum sinaroe
Tuanku jinoe jadeh meubungka

Raja seuot teuma sipatah
Rakyat barollah ngadap dumna
Tajak aneuk beuseulamat
Beutroh hajat ban lon pinta

Beumeuteumeung kayee meuligoe
Teumpat Putroe Baren Miga
Sare leupah rakyat meukatoe
Teumanyong putroe ubak raja

Wahe du po du teungku droe
Rakyat meukatoe ho du seuranta
Raja seuot tuan putroe
Neupeugah proe bak aneukda

Wahe aneuk hana lon thee
Jak meukayee dum lam rimba
Jak koh kayee rakyat meukatoe
Keu meuligoe teumpat gata

Nyan surohan duteu sidroe
Rakyat meukatoe seuon sabda
Putroe Baren ngo narit meunan
Neukheun yoh nyan bak ayahda

Wahe du po du meutuah
Han neupeugah du bak hamba
Jayeh di ate kamoe inong
Han neutanyong sipatah haba

Teugoh lon sifeuet ureueng inong
Han neutanyong sapeue haba
Putroe Baren idinpi tan
Ubak Tuhan meusempeuna

Ya Ilahi wa ya Rabbi
Ya Habibi ya Rabbana
Bak neupeutroh ulon meulakee
Gata nyang mee kabui do'a

Bah bek ek jitren kayee u nanggroe
Meunan putroe meusempeuna
Bah bek lut jikoh kayee di glc
Meunan tabri ya Rabbana

Naritpi sret nyan di babah
Putroe meutuah troh ban pinta
Teuduek haba Putroe Baren
Jinoe laen lon calitra

Amma bakdu teuma dudoe
Rakyat meukatoe leupah lam rimba
Ban sare troh dumna rakyat
Pioh siat meuseunia

Lheueh geumakeuen bandum sare
Teuma beudoh le jak meumita
Jimita kayee jeuep-jeuep gunong
Cok beuliong dumjih rata

Ban sare troh saboh teumpat
Kayee le that raya raya
Bak dum sulu jroh han sakri
Raya bube-be krong limong gunca

Kayee jatoe dum ngon gahru
Rakyat seuu troh ban pinta
Kayee le that dum sinaroe
Siploh meuligoe sep dum leungka

Meunan bak pike rakyat barollah
Hana payah le tamita
Potallah bri got that langkah
Sabab meutuah poteu raja

Rakyat meukeumah peuase droe
Mat di jaroe beuliong rata
Ladom nyang leumoh bak teumeubang
Peugot seuladang jambo raya

Teumpat geupioh 'oh ka malam
Dalam hutan rimba raya
Teumpat maguen dum meulaku
Teumpat beuradu abeh leungka

Lingka jambo jiboh jeureujak
Teuma jitambak jipeurata
Raja dua blah mat beuliong
Han jijeuet dong rakyat dumna

Jicok beliong troh meuribee
Jak koh kayee keu istana
Sajan jihayak beuliong di jaroe
Kayee jatoe luka hana

Nyang na meutum sangat kiam
Beuliong tajam tumpoi mata
Nyan meukulet han jipajoh
Jeurabat putoh bansineuna

Ladom patah go mata cumeh
Rakyat beungeh hana tara
Abeh ceumarot dumna rakyat
Sabab han lukat kayee rimba

Kayee keubai han lut beusoe
Rakyat sinaroe sosah raya
Abeh jicarot pande beusoe
Beuliong nyoe tumpoi mata

Han jitem lut kulet kayee
Jitak batee bansineuna
Sajan keunong beusoe ngon batee
Meuk meuabee meubura-bura

Batee jitarah nyanjisayong
Mata beuliong tajam rata
Han meureuget maken tajam
Rakyat hiram nibak nyang ka

Rakyat payah krot-kreuet badan
Kayee sikhan hana luka
Gojih patah jeurabat putoh
Rakyat meureuoh bansimua

'Ajab tahe dum sikalian
Han tom takalon meunan nyang ka
Jinoe pakri dum geutanyoe
Tawoe u nanggroe keunong meureuka

Kayee sikhan tan tapeuwoe
Geuboh iam taloe geutiek cong sula
Teuma marit Si Bulee Kabat
Nyoe na pakat saboh bicara

Tawoe bandum keudeh u nanggroe
Pande beusoe tapoh dumna
Beuliong jipeungot han lut kayee
Taseupot di ulee pande ceulaka

Lawet troh u gle umu lhee buleuen
Geumita uteuen bansineuna
Jiwoe han jijeuet le u nanggroe
Kayee jatoe tan keu raja

Kri cit narit raja dua blah
Ka jipeugah bak rakyat dumna
Tango kamoe rakyat meukatoe
Kamoe han meuwoe le u tangga

Bahle bak mate kamoe siseun nyoe
Malee kamoe that bak raja
Kayee sikhan han ek ase
Bahle mate dalam rimba

Jakleh tawoe dum sikalian
Kamoe lam hutan sinoe meutapa
Rakyat seuot narit sulton
Kamoepi meunan po meukuta

Meunyo han neuwoe tuanku u nanggroe
Kamoe sinaroe meunan juga
Ho nyang neujak dum kamoe seutot
Adat meuwoet-wot bah lam rimba

Teuma marit Panglima Bandran
Uleebalang sapai raja
Han jeuet tuanku neuduek sinoe
Aneuk ngon binoe meuraba-raba

Peue takeumiet sinoe lam gunong
Badeuek ngon rimueng keu ngon gata
Han jeuet han neuwoe keudeh u nanggroe
Tapeugah droe ubak raja

Raja dua blah teuma kheun proe
Hana kuwoe le u tangga
Bahkeu meuduek kamoe di sinoe
Dalam gle nyoe nyan meutapa

Tawoe gata dum sinaroe
Tinggai kamoe dalam rimba
Ban nyang untong Po tallah bri
Jak woe sare dumteu rata

Teuma marit Panglima Bandran
Sireuta jikheun ban sipatah haba
Soe nyang han woe sinoe di gle
Kupoh mate bansineuna

Cuba seuot sikalian
Kuteumee antam di keupala
Cuba han tawoe nyan u nanggroe
Eu kuseudoe bansineuna

Raja dua blah yo teumakot
Nyum rasa sret ngon ie muka
Jingo narit panglima meudhot
Yo teumakot dua blah raja

Teuma panglima lon jimarit
Jikheun nyang bit ubak raja
Adat han tajeuet jak gata dilee
Tapeusak kee nyan bak raja

Bah geusula keudeh u nanggroe
Beudoh jak woe dumteu rata
Raja dua blah rakyat meukatoe
Dum abeh woe bansimua

Sira jijak dum yo badan
Pucat tuan dum ie muka
Tundok ulee dum u bumoe
Sira jiwoe tren di rimba

Ban sare troh nyan u nanggroe
Laju jiwoe ubak raja
Teudong bak pinto babah jurong
Panglima tamong teuma bak raja

Panglima jak teuma sidroe
Laju jipeutoe sigra-sigra
Panglima dong peurakna seumbah
Deelat khalifah meukuta donya

Deelat teugayu syahi alam
Seumbah laman doli sroepada
Kamoe tuanku neupoh beumate
Bandum sare neutueng nyawa

Kayee sikrak han ek meupeuwoe
Neupoh kamoe nak hilang nyawa
Teuma seuot doli junjongan
Pakon meunan tameuhaba

Pakon he aneuk meunan tapeugah
Gata bak Allah hana deesya
Rakyat bandum neuyue tamong
Neubri makanan bandum rata

Neumeusabda ubak bujang
Neuyue tamong rakyat dumna
Teuma rakyat seuon titah
Raja dua blah malee mata

Teujak teudong dumna rakyat
Teumakot that ate lia
Teuma geutamong laju u dalam
Ngadap sultanan poteu raja

Sare abeh bandum keunan
Geubri makanan sigra-sigra
Teungoh makeuen dumna rakyat
Muka pucat bansineuna

Teuma marit poteu sidroe
Makeuen beutroe dumteu rata
Bek that gundah aneuk boh ate
Makeuen sare bek that lia

Adat lon poh hana sabab
Wajeb teumpat dalam syeuruga
Makeuen bak troë aneuk meutuah
Bek that gundah bijeh mata

Teuma rakyat makeuen sinaroe
Teukui u bumoe malee mata
Hana sakon bu jipajoh
Abeh yo tuboh bansineuna

'Oh lheueh makeuen rakyat meukatroe
Poteu sidroe neumeusabda
Teuma neupangge Panglima Bandran
Neutanyong yoh nyan sigra-sigra

Peuebu haba aneuk tapeugah
Padum boh rumoh kayee ka na
Teuma seuot Panglima Bandran
Ka jikheun ban ubak raja

Raja buta geulunyueng tuloe
Kukheun tan bunoe lom pareksa
Haba han patot narit krang ceukang
Raja pandang hu ngon mata

Raja yue bet dua boh idang
Di dalam talam rante meulila
Geutop ngon sahab miseue makanan
Raja yue me nyan u keue panglima

Panglima Bandran buka idang
Jikalon meulinggang rante meulila
Panglima bet jaroe dua blah
Ampon meuah doli meukuta

Patot rante neubri keu kamoe
Deukek meudumnoe woe lam rimba
Panglima ingat asai beusoe
Rante sinaroe hanco ban sira

Abeh jeuet keu ie rante beusoe
Jijeb jinoe uleh panglima
Abeh jipajoh bandum idang
Raja pandang pucat muka

Raja neukheun teuma sipatah
Haba neupeugah inseueh lam dada
Pakon meunan aneuk teungku droe
Kamoe rugoe po bentara

Panglima seuot haba sipatah
Deungo lon peugah po meukuta
Meuka mee geubet lam idangan
Nyo makanan makeuen sigra

Meuseuki beusoe geubet u nap
Han meupeunap po meukuta
Meuka geujeuet bet lon jenet pajoh
Beuthat geuboh racon tuba

Teuma raja tanyong sipatah
Aneuk tapeugah nyang sibeuna
Peugah ban buet sabda kuseuon
Pakon han jitren kayee rimba

Peuebu sabab han ek meuwoe
Kheun bak kamoe aneuk panglima
Teuma jiseuot narit sulotan
Kheundak Tuhan po meukuta

Dumna kamoe gadoh akai
Kayee keubai hana tara
Sajan meukoh han jitem lut
Kayee kukuet keubai dum rata

Banie kulet han ek putoh
Abeh luroh beuliong dumna
'Oh sajan takoh raya meutum
Beuliong dum tumpoi mata

Gopi patah jeurabat putoh
Abeh reuloh bansineuna
Sajan meutarah meutak batee
Meuk meubree hu meunyala

Beuliong tajam hana tumpoi
Abeh syugoi kamoe dumna
Han tom tango gah nyang ka dilee
Han tom kayee keubai raya

Bek an asoc kulet han lukat
Bukon 'ajab that po meukuta
Jinoe tuanku deungo lon peugah
Nujum takrah bansineuna

Tayue jime sif ngon kitab
Jibeuet ayat jikalon angka
Saleh na maklum tayue pandang
Pakon jeuet meunan kayee lam rimba

Peue sabab nyang jeuet meunan
Kayee lam hutan keubai raya
Naritpi abeh panglima peugah
Raja neukrah nujum dumna

Ban sare troh keunan nujum
Ngadap bandum poteu raja
Deelat tuanku syahi alam
Seumbah laman po meukuta

Pakon tuanku neupangge kamoe
Neukheun jinoe siri sabda
Trankeu sabda teuma di manyang
Raja tanyong bak nujum dumna

Nyang jeuet lon pangge gata keunoe
Kareuna kamoe na peue haba
Kamoe yue jak koh kayee meuligoe
Teumpat Putroe Baren Miga

Kayee meuyue koh lut han sagai
Sare keubai hana tara
Tacuba eu dalam surat
Peue alamat tapeunyata

Nujum seuon sabda hadarat
Jibuka surat jibeuet angka
Abeh jikalon jeuep-jeuep suroh
Hana leumah dumjih rata

Teuma nujum jingadu droe
Jipeugah proe ubak raja
Deelat tuanku doli hadarat
Jeuep-jeuep surat hana nyata

Ka abeh dum nyan jeuep-jeuep on
Hana meufom kamoe dum rata
Na sidroe nujum nyang ahlillah
Rab sabe tuah ngon Baren Miga

Sajan jitilek dalam buseutan
Lam pandangan Baren Miga
Deelat tuanku doli khalifah
Raya tuah Baren Miga

Kareuna putroe lahe keuramat
Han troh hajat po meukuta
Sabab han jitren kayee u nanggroe
Han idin Putroe Baren Miga

Meunyo han idin tuan putroe
Han ek sampoe hajat meukuta
Nyankeu sabab tuanku droe
Kayee jatoe keubai raya

Jinoe tuanku lakee idinkan
Ubak tuan putroe muda
Ban raja ngo haba meunan
Neuwoe yoh nyan lam istana

Poteu neukek lam meuligoe
Ubak Putroe Baren Miga
Teuma neucok putroe neupangkee
Neucom bak ulee neurahop muka

Wahe aneuk tango kamoe
Lon tanyong proe ubak gata
Teuma seuot putroe meutuah
Narit ayah raja raya

Peue neutanyong du teungku droe
Nibak kamoe ureueng hina
Kareuna lon ureueng inong
Peue neutanyong po meukuta

Wahe aneuk bek tadapat kee
Di nap jamee dua blah raja
Peugah aneuk haba nyang teupat
Cuba kheun had bijeh mata

Putroe seuot tanyong ayah
Insya Allah po meukuta
Tango hai du ulon peugah
Bah lon kisah ubak gata

Kayee na sibak ulon lumpoe
Lam donya nyoe he du raja
Siulah pirak meuh peulanggi
Ukheuejih tinggi u laot raya

Meukon kayee nyan keu meuligoe
Hareuem kamoe han meurela
Meunyo laen hana hajat
Payah rakyat sia-sia

Teuma neutanyong doli junjongan
Pat kayee nyan tacalitra
Siri nanggroe aneuk tapeugah
Ulon ilah barangpat donya

Ulon jak koh baranggapat
Peugah beumeuhad bijeh mata
Teuma seuot putroe meutuah
Tango he ayah ulon calitra

Tango he du lon kheun hareutoe
Kon bak nanggroe nyoe keurajeuen gata
Kayee nyan he du hana jarak
Lhee reutoh thon jak pasang guda

Timoh bak Gunong Malahekeumat
Gunong manyang that u antara
Lingka kayee nyan laot barollah
Timoh di teungoh kayee raya

Raja neukheun bak tuan putroe
Pakon meunoe narit gata
Pakon meunan aneuk tameusu
Soe na umu dumnan lama

Teuma seuot tuan putroe
Tango kamoe he du raja
Nabi Muhammad mikreuet u langet
Padumna trep he du raja

Peue tapeugah Nabi Muhammad
Sinan mukjizat lahe nyata
Kri cit narit Putroe Baren
Du junjongan tango hamba

Sabet bak Nabi ngon mukjizat
Sah keuramat bak eelia
Ban raja deungo narit meunan
Mirah padam ngon ie muka

Kukheun meudeh takheun meunoe
Poteu sidroe beungeh raya
Raja neukheun dum bak rakyat
Tawoe leugat dumna gata

Ubak gata hana malee
Jiduek di abee Baren Miga
Han kupeugot le meuligoe
Di jih bunoe kee jidawa

Beuthet beumate jiduek di abee
Hankeu malee kee bak gata
Jak woe bandumteu u nanggroe
Nyang keu kamoe bek takira

Putroe Baren ngo haba ayah
Ile limpah ngon ie mata
Baren Miga kheun bak rakyat
Jak woe leugat dumna gata

Hana hajat lon keu rakyat
Laman harap aduenku Bangta
Kuteumeung duek lam meuligoe
Jakleh tawoe dumna gata

Ban jideungo narit putroe
Rakyat meukatoe keumeung bungka
Putroe neu^kheun ubak rakyat
Jak woe leugat teungku dumna

Bangta Sulotanpi na sinan
Yoh masa nyan deungo haba
Wahe adoe tapeugah jeuoh
Lon ngo adek beh tacalitra

Bek tayue jak lon puteh leusoh
Kayee jeuoh hana tara
Di lon han kujak adoe meutuah
Bahle kuweh nibak gata

Bek tayue-yue teuma dudoe
Kuweh jinoe nyan kubungka
Bangta Sulotan leugat neujak
Putroe kheun bak rakyat dumna

Tango kamoe rakyat meukatoe
Aduenku sidroe neukeumeung bungka
Tamat siat yoh goh leupah
Aduen meutuah taampeueng sigra

Teuma seuot dumna rakyat
Han meujeuet mat po cut Bangta
Wahe putroe han meujeuet ampeueng
Di jaroe peudeueng raya that mata

Han jijeuet mat le makheuluk
Nyang sabe duek dalam donya
Putroe Baren muda bangsawan
Neukheun bak Tuhan 'ala Rabbana

Ya Ilahi wa ya Rabbi
Ya Habibi ya Rabbana
Aduen ulon neujak mat siat
Tangan kudrat nyang that kuasa

Naritpi sret nyan di babah
Bumoepi beukah ji'uet cut Bangta
Bangta ji'uet uleh bumoe
Troh 'oh takue rab ngop keupala

Bumoe marit jipeudapat
Pakon kah that kuat meudawa
Baren Miga putroe bangsawan
Neukheun bak aduen putroe muda

Wahe dalem aduen teungku droe
Tadong lagoe hana tabungka
Meuka u nap han u likot
Meunan patot aduen raja

Peue lom tadong jakleh leugat
Honyang hajat jinoe bungka
Bunoe dalem cit han teumat
Jakkeu leugat he syeedara

Wahe bumoe ka'uet beuabeh
Dalem paleh kuat meudawa
Rakyat kalon dum sikalian
Sangat heran bansineuna

Ubak adoe meureuka abang
Buet di Tuhan han ek kira
Subhanallah 'amma yasifun
That bit hireuen buet Rabbana

Bangta Sulotan kheun bak putroe
Ampon adoe nibak gata
Peue nyang tayue kupeuiman
Adoe bangsawan ampon sigra

Bahle mate kujak jinoe
Ho nyang tayue uleh gata
Putroe deungo Bangta kheun meunan
Teusinyom yoh nyan Baren Miga

Sireuta neumeuhei Bangta Sulotan
Neuwoe abang keunoe sigra
Bangta Sulotan lheueh lama bumoe
Keuramat Putroe Baren Miga

Teuma neuwoe laju bak adoe
U meuligoe lanja neuhala
Teuma meuteumeung putroe bangsawan
Deungon abang Banta muda

Teuma neuduek sinan sapat
Dendayang bet idang raya
Teuma makeuen Bangta ngon putroe
Aduen ngon adoe sapat dua

Bandua droe rupa indah
Siulah-ulah buleuen purnama
Na tamse ban matauroe
Bangta ngon Putroe Baren Miga

'Oh lheueh makeuen geucok idang
Ranup jitatang dalam ceurana
Teuma neupajoh ranup sigapu
Jibeudoh hu cahya ie muka

Lheueh nyan putroe neukheun bak dalem
Sira neukhem-khem maneh muka
Tango kamoe dalem teungku droe
Neupeugot meuligoe lon le gata

Tajak koh jinoe kayee jatoe
Tango lon kheun proe ubak gata
Kayee na sibak Tuhan peulumpoe
Kon bak nanggroe keurajeuen gata

Kayee nyan jeuoh di nanggroe laen
Nanggroe raja jen di antara
Kayee nyan cut lem sangat jarak
Lhee reutoh thon jak pasang guda

Timoh bak Gunong Malahekeumat
Gunong manyang that lam awan mig
Rab gunong nyan deungon Buket Kaf
Gunong luah labang donya

Lingka kayee nyan tango lon peugah
Laot barollah luah raya
Kayee nyan dalem keu meuligoe
Jak tueng jinoe uleh gata

Bangta Sulotan seuot putroe
Kupateh jinoe ban kheun gata
Jikalee mate sikalipon
Ho tasuron lon jak lanja

Adat meunan dalem teungku droe
Tango lon kheun proe ubak gata
Raja nyang keumiet kayee jatoe
Lon peugah soe geuheu nama

Raja nyang raya sinan peuet droe
Laen meuntroe deungon panglima
Saboh geuboh nan Raja Silan
Keudua Rihan raja raya

Keulhee teuma Raja Hami
Keupeuet Izazi raja nyang beusa
Nyankeu raja keumiet kayee
Tango dilee aduen raja

Nyoe kireman surat peuet keupeng
Tajok maseng peuet droe raja
Peue nyang jibri bek tapajoh
Takheun suroh Baren Miga

Meutapajoh peue nyang jibri
Trep that nanti gata meugisa
Putroe Baren neuploh sanggoi
Neucok cumboi dalam ceumara

Sajan neumat cumboi u jaroe
Teubiet keudroe aneuk guda
Teuma jimarit guda ngon putroe
Pakon neupeugoe po cut raja

Keupeue kamoe putroe bangsawan
Guda marit ban manusia
Teuma neukheun le tuan putroe
Tango kamoe ulon raja

Nyang jeuet kupeungoe kah hai ulon
Keu ngon aduen geujak lam rimba
Neujak tueng kayee keu meuligoe
Kayee jatoe indah rupa

Sideh bak Gunong Malahekeumat
Gunong manyang that u antara
Guda marit teuma sipatah
Lon meulangkah po cut raja

Beutroh pinta po cut badan
Lon jak peungon Bangta muda
Teuma guda geuboh keukang
Bangta pasang sigra-sigra

Geuboh geunta nyan bak reukueng
Geuleueng atueuh rueng tika peureuda
Peulana guda meuh nyang mirah
Intan geutatah ngon peurmata

Syah Keureutah guda hekeumat
Pantah ban kilat ngon siklep mata
'Oh lheueh neupasang guda hekeumat
Putroe peurab bak syeedara

Wahe cut lem deungo kamoe
Lon peurunoe saboh do'a
Dalem tabeuet surat fatihah
Deungo lon peugah ubak gata

Tabeuet fatihah beutroh ngon siblet
Mata tapet nyan bandua
Mata tapet masa tabeuet
Lheueh nyan tableut peue na nyata

Bangta Sulotan beuet fatihah
Mata dua blah neupet sigra
Ban sajan troh ubak amin
Bangta yoh nyan neubleut sigra

Seun rot neukalon guda teudong
Hireueen teuceungong Bangta muda
Droeneu ka troh u yup kayee
Jen meuribee teuma ka teuka

Jime sajan peudeueng ngon taloe
Jen sinaroe kiam subra
Jipeuleumbeng deungon pusu
Jitop laju Bangta muda

Jipeulheueh sumpit ngon pusu bleuet
Bangta jilet sigra-sigra
Bunyoe rioh sang geulanteue
Iblih soseue laju teuka

Jisrom geulawa na dum hujan
Bangta Sulotan keunong hana
Bangta yoh nyan yo teumakot
Dum ujeuen sret jisrom lingka

Bangta Sulotan mata neupet
Neueu syetan let meulaksa-laksa
Badan raya hitam ban hueng
Syetan bandum jilet lanja

Jihah babah jihing gigoe
Ngon bulee dhoe na peuet deupa
Ban gunong dum teudong-dong
Panyang panyang hu ngon mata

Leumbeng di jaroe bube-be bak u
Teumakot kuyu Bangta muda
Ladom rante mat di jaroe
Ladom taloc bube-be pha

Nyang ladom mat ngon juee beusoe
Laju jipeutoe ubak Bangta
Sare rioh bunyoe tuphan
Suara syetan jen lam rimba

Ladom beude nyanjisandang
Ban-ban gunong jipeurupa
Sare 'a-'u jen ngon syetan
Bangta Sulotan neupet mata

Han neujeuet bleut neuteukui ulce
Jen meuribee laju teuka
Teukeudi Allah peurintah Tuhan
Bangta Sulotan hu meucahyo

Tamse beuneung raja timoh
That seumeuloh trang cuaca
Sigala syetan jiplueng 'a-'u
Jikalon hu Bangta muda

Abeh teumakot dum yo badan
Miseue deumam yo sang geumpa
Teuma teupike dumna syetan
Peue buet einsan keunoe teuka

Ngon jarak that jeuep-jeuep nanggroe
Lingka kaycee nyoe laot raya
Pakri tapoh ureueng nyan sidroe
Cuba kheun proe dumna gata

Dumna geutanyoe abeh teumakot
Yo ngon atot miseue geumpa
Saleh ureueng nyan that meutuah
Han jeuet tapoh keuramat raya

Tameuabeh binasa geutanyoe
Pakri jinoe toh bicara
Sangkira kon ureueng meutuah
Han troh langkah keunoe lam rimba

Adat ek tapoh ureueng nyan sidroe
Abeh geutanyoe dum binasa
Jinoe pakri tohbu pakat
Udeh tadeelat kaman sigra

Teuma tatanyong pane nanggroe
Peue buet keunoe dalam rimba
Tatanyong nan ibu ayah
U deh taseumbah dumteu rata

Teuma meupakat jen ngon syetan
Jingadap tuan Bangta muda
Deelat tuanku doli khalifah
Peuebu langkah keunoe gata

Dua lhee go syetan deelat
Doli hadarat han jeuet bleut mata
Bangta Sulotan teukui ulee
Pura han thee jiba sabda

Syetan iblih deelat leugat
Baro neubleut aneuk mata
Yoh bunoe kon Bangta takot
Jinoe neuseuot jiba sabda

Syetan tanyong bak Bangta Sulotan
Soe geuboh nan po meukuta
Patbu nanggroe soe nan ayah
Cuba peugah lon ngo nyata

Bangta Sulotan seuot sipatah
Han kupeugah dilee haba
Han kupeugah haba dilee
Kayue jak bak kee peuet droe raja

Ban jideungo haba meunan
Hireuen syetan bansimua
Lheueh nyan jiwoe dumjih sare
Jak peugah le ubak raja

Ampon tuanku doli khalifah
Ureueng meutuah keunoe teuka
Han jeuet meupoh dum yo tuboh
Hu seumeuloh u antara

Jinoe marit teuma raja jen
Pakri padan toh bicara
Hana padan nyan tapike
Gata geuturi banpeuet raja

Jinoe tuanku bah tadeelat
Nyankeu pakat kamoe dumna
Bek le taduek jak tadeelat
Takrah rakyat bansineuna

Sabda raja ubak bujang
Jak peh mong-mong ngon gong raya
Takrah bandum jeuep-jeuep teumpat
Laot darat bandum rata

Tajak beuabeh jeuep lungkiek gle
Tahei sare tren bak raja
Jeuep mata ie pat na reuhung
Jeuep linggong krueng seutot dumna

Jeuep bak kayee nyang raya that
Jak peusapat jinoe sigra
'Oh lheueh raja meuhabaran
Yoh nyan bujang meuseuranta

Abeh jikrah dum yue teubiet
Ban nyang narit nibak raja
Sare meuhimpon rakyat meukatoe
Tren sinaroe ubak Bangta

Raja peuet rakyat sigala don
Meuron-ron jak deelat Bangta
Ban sajan troh u yup kayee
Jaroe di ulee bansineuna

Deelat tuanku po junjongan
Seumbah laman po meukuta
Peue buet pu cut neujak keunoe
Ubak kamoe dalam rimba

Peue neujak tueng po cut meutuah
Nyang troeh langkah keunoe gata
Bangta neucok surat peuet keupeng
Maseng-maseng peuet droe raja

'Oh sare troh surat u jaroe
Jieu jinoe peuebu sabda
Ban jikalon surat kireman
Leumah sinan rakam Bangta

Teuma seumbah sigala syetan
Bangta Sulotan lagoe gata
Ka meukalon dalam rakam
Bangta Sulotan geuboh nama

Hoþu langkah po cut teungku droe
Cuba kheun proe lon ngo nyata
Teuma neuseuot Bangta Sulotan
Deungo tuan dumteu rata

Lon jiyue jak uleh adoe
Bak gata peuet droe keunoe lam rimba
Jipeuseumbah saleuem meuribee
Jiyue tueng kayee nyan bak gata

Teuma tanyong raja sidroe
Siri adoe po meukuta
Soe urohan geuseubot nan
Cuba kheun nyan lon ngo nyata

Teuma neujawewueb Bangta Sulotan
Bak raja nyan sigra-sigra
Tango kamoe Raja Silan
Kupeugah nan ubak gata

Lon nyoe geuheu Bangta Sulotan
Adoe geuboh nan Baren Miga
Nyan syeedara ulon sidroe
Jiyue jak kamoe ubak gata

Ban jen deungo haba meunan
Ka yo badan miseue geumpa
Kareuna jitakot keu Putroe Baren
Banpeuet raja jen gundah raja

Jinoe jimarit raja jen nyan
Jitanyong padan ubak Bangta
Nyo bit gata nibak putroe
Jakleh neuwoe po cut raja

Kayee meuintat keudeh u nanggroe
Dumna kamoe dalam rimba
Bangta deungo haba meunan
Neukheun yoh nyan bak jen rimba

He raja jen deungo kamoe
Meuwoe jinoe ban kheun gata
Beutroh rijang kayee jatoe
Keu romoh Putroe Baren Miga

Teuma seuot jen sinaroe
Jakleh tawoe dilee gata
Yoh nyan Bangta guda neupasang
Neuboh keukang sigra-sigra

Guda neugiduek neumat keukang
Seumbah datang bak jen rimba
Bangta Sulotan neulakee droe
Woe u nanggroe bak syeedara

Guda hekeumat Bangta pasang
Pantahjih ban kilat faja
Teuma neubeuet alhamdulillah
Siseun leupah nyan neubaca

Mata neupet yoh neubeuet nyan
Troh bak amin neubleut sigra
Seun rot neueu ka troh neuwoe
Keudeh u nanggroe bak syeedara

Nyankeu dum trep Bangta neujak
Seun rot meurumpok deungon ayahanda
Raja marit teuma sipatah
Padum rumah kayee tamita

Padum boh rumoh kayee tapeuwoe
Keu meuligoe Baren Miga
Bangta seuot tanyong ayah
Deungo lon peugah he du raja

Kayee hana du teungku droe
Jeuep-jeuep nanggroe lon jak mita
Jeuep-jeuep gunong abeh lon teungoh
Jeuep-jeuep paloh hana sapat na

Ban raja ngo haba meunan
Beungeh yoh nyan hu ngon mata
Neumat peudeueng neukeumeung cang
Bangta Sulotan neuplueng sigra

Bangta neujak hana jarak
Bineh tambak pageue kuta
Hingga malam le ngon uroe
Neuduek sidroe Bangta muda

Teutap sinan neuduek siat
Laen riwayat meugisa punca
'Oh sare leupah Bangta neuwoe
Jen sinaroe lon calitra

Raja peuet droe jinoe lon peugah
Rakyat jikrah bansineuna
Jeuep mata ie abeh jikrah
Jen barollah keunan teuka

Laot darat jeuep-jeuep gunong
Peh ngon mong-mong meuseuranta
Jen ngon iblih tren meuron-ron
Jak meuteumeung deungon raja

Sare meusapat dong meureuntang
Raja tanyong bak rakyat dumna
Tango kamoe rakyat meukatoe
Lon peugah proe dum bak gata

Geutanyoe jinoe that sukaran
Bangta Sulotan keunoe teuka
Aneuk Raja Baren Nasi
Adoeneu Siti Baren Miga

Neujak keunoe jak tueng kayee
Geutanyoe padee teuma goga
Kayee jatoe rumoh geutanyoe
Geuyue me jinoe ubak raja

Kayee geuyue me bak geutanyoe
Keu meuligoe Baren Miga
Sangkira han kayee taintat
Jeuet meularat geutanyoe dumna

Kareuna gop nyan ureueng meutuah
Troph ban geuhah kabui pinta
Peue nyang napsu troh ban kheundak
Hankeu jeubrak dum peukara

Jinoe toh pakri peuebu pakat
Kheun beumeuhad lon ngo nyata
Teutapi geutanyoe abeh kingkeueng
Romoh geutueng ubak raja

Pakri pakat cuba seuot
Ban nyang patot takeurija
Teuma seuot rakyat meukatoe
Jen sinaroe dalam rimba

Tuanku ampon ban nyang pakat
Kamoe nyang rakyat meuseuon sabda
Meunyo tuanku jeuet meularat
Got taintat kayee raya

Nibak binasa dum geutanyoe
Kayee raya nyoe taintat sigra
Meunankeu phon geumeupakat
Raja ngon rakyat sapeue bicara

Abeh pike musyawarat
Jitet nubat beude raya
Teuma jibeudoh dum meuree-ree
Jak bet kayee me keu raja

Peh ngon tambo yup seurune
Yup napiri sangkaikala
Canang ngon gong that meudeungong
Peh ngon mong-mong that guranta

Geupeh geundrang ngon geudumbak
Kayee geuarak geulingka-lingka
Surak meu'u-'u that peujantan
Jen lam hutan ate suka

Banyoe suara miseue tupheuen
Dalam uteuen rimba raya
Dua lhee seun jilingka kayee
Jilet peureudee meuhayak donya

Meuhayak-hayak donya meuguncang
Rasa meulinggang geumpa raya
Meunan meuhayak masa jibet
Su meugop-gop bunyoe taga

Teuma jiba rot lam awan
Su ban canang geupuh dua
Kayee jiarak dalam awan
Jen ngon syetan bansineuna

Jipeh canang meuasek-asek
Surak ngon deumpek that meutaga
Jitet beude dalam awan
Jen ngon syetan meukeurija

Kayee jibapo asa uroe
Troh bak putroe leupah 'isya
Peurasan le meubagoe-bagoe
Jen sinaroe that guranta

Ban sare troh u leuen meuligoe
Kayee jatoe teuma jipula
Kayee panyang troh lam awan
Hireuen tuan taeu rupa

Teuma teuka Bangta Sulotan
Neujak kalon kayee jen ba
Teudong sinan di leuen meuligoe
Neuhe Putroe Baren Miga

Wahe adoe tatreng dilee
Jak eu kayee teuka di rimba
Teuma seuot putroe meutuah
Bah dalem bah jinoe kusapa

Cok breueh pada mat u jaroe
Putroe sambinoe neujak seumapa
Ban deumi troh 'oh gaki rinyeun
Putroe hireuen kalon rupa

Teudong ban sot sinan di leuen
Kayeelam uteuen raja jen ba
Teuma putroe neumeubri saleuem
Teungoh hireuen ate suka

Assalamu 'alaikum kayee jatoe
Nateu keunoe kayee rimba
Kayeelam saleuem putroe
Trok meubunyoe dua blah raja

Teuma neuseupreuek ngon breueh pade
Neugusuek le kayee raya
Teuma marit Putroe Baren
Ngon raja jen dalam rimba

Ka troh taintat kayee keu kamoe
Jak woe jinoe dumna gata
Bek meusidroe tinggai sinoe
Woe sinaroe dalam rimba

Raja jen ngo haba meunan
Jaroe jiseuon atueh jeumala
Raja rakyat seuon jaroe
Han peue meuwoe po cut raja

Jakleh tawoe bek tadong le
Keudeh lam gle miseue nyang ka
Teuma raja jen woe u nanggroe
Tinggai Putroe Baren Miga

'Oh sare troh teubiet u blang
Dong meureuntang bansineuna
Teuma sinan pioh siat
Peuduek pakat laen bicara

Pakri geutanyoe dum sikalian
Tawoe tuan lom u rimba
Pakri tapateh haba putroe
Cuba kheun proe dumteu rata

Putroe neuyue woe dum geutanyoe
Bek meusidroe tinggai di sana
Adat tawoe jinoe u gle
Rumoh han le dalam rimba

Pakri tapateh nyan kheun putroe
Peugah jinoe dumna gata
Teuma jiseuot siteungoh syetan
Di kamoe han woe lam rimba

Han kupateh ban kheun putroe
Kuduek sinoe meuseunia
Pat na mata ie nyang meujam-jam
Bak-bakan bagan manusia

Meunankeu narit siteungoh syetan
Nyang ladom han woe lam rimba
Yoh nyan iblih jen ngon syetan
Beurhamburan sigala donya

Abeh meuseupreuek jeuep-jeuep nanggroe
Meunan adoe geucalitra
Sabab tan rumoh le di nanggroe
Kayee jatoe indah rupa

Abeh kingkeueng dum sigala be
Saket ate bansineuna
Amma bakdu teuma dudoe
Kisah muwoe Baren Miga

Putroe Baren muda bangsawan
Neumarit yoh nyan ngon kayee raya
Neugusuek ngon jaroe lingka bak kayee
Suara lagee miseue biula

Suara putroe leumah leumbot
Kayee jiseuot Baren Miga
Tango kamoe kayee jatoe
Peureubah droe jinoe sigra

Gata kupeugot keu meuligoe
Kuplah jinoe idin tarela
Teuma seuot kayee jatoe
Troph meubunyoe dua blah raja

Suara kayee that guentaran
Meugop-gop ban bunyoe geumpa
Trenkeu rakyat jeuep-jeuep nanggroe
Kayee jatoe jak eu rupa

Pihak leubeh Putroe Baren
Kayee raja jen intat di rimba
Meunan meugah jeuep sigala don
Rakyat jitren dua blah raja

Mideuen raja dum seuleusak
Laen teungoh jak dang-dang teuka
Kayee jikalon sinan teudong
Hireuen teuceungong rakyat dumna

Bakjih sulu meuseulipok
Miseue pucok bungong migas
Hitam mirah puteh kuneng
Ulah bangon bungong rika

Cabeueng peuet boh dalam awan
Rayajih ban krong nyang raya
Dumna rakyat keubak-keubok
Hireuen mabok bansineuna

Jieu kayee 'ajab sangat
Leubeh keuramat Baren Miga
'Oh ek jitren kayee u nanggroe
Rakyat pujoe bansimua

Putroe Baren teudong yup kayee
Idin neulakee mohon bungka
Peureubah droe kayee meutuah
Gata kuplah-plah keu istana

Lhee kri jimeusu kayee jatoe
Jiseuot Putroe Baren Miga
Lheueh nyan teuma kayee reubah
Sabab meutuah putroe muda

Subhanallah wabihamdihi
Baren Nasi raja eelia
Neukalon ka troh kayee jatoe
Hireuen laloe poteu raja

Mangat ate ka troh hajat
Neukrah rakyat sigala donya
Abeh geuseutot utoh ngon tukang
Dum sibarang abeh teuka

Teuma jitamong dum u dalam
Ngadap jinjongan raja raya
Jidong di yup peurakna seumbah
Junjong khalifah raja nyang 'ala

Ampon tuanku laman meukatoe
Pakon kamoe neuseuranta
Trenkeu sabda teuma di manyang
Teuma neutanyong bak tukang dumna

Nyang jeuet lon seutot gata keunoe
Tapeugot keu kamoe saboh istana
Tapeugot meuligoe saboh nyang indah
Teumpat lon keubah Baren Miga

Aneukku putroe cit nyan saboh
Meuligoe bak jroh nyan tarungka
Teuma utoh seuon titah
Kayee jiplah dumjih rata

Pande tukang limong ploh droe
Bandum ragoe bak rok rungka
Kayee jipuntueng jikoh reupang
Ujong ngon uram jiplah rata

Bara ngon toi ujung jiplah
Teuma jitara sigra-sigra
Ladom utoh bak teumarah
Sang geuamplah meunan rata

Ladom utoh bak jipheuet lueng
Rapat bandum reunggang hana
Ladom utoh bak meuinyoh
Bit that cidah haloh raya

Kayee dum ueh meukilat-kilat
Teusireuk lalat han jeuet jiwa
Kayee jiinyoh haloh licen
Sang utoh jen dalam rimba

Ladom utoh bak jimeurok
Barangpeue pucok jroh-jroh rika
Kayee jiculek dum sinaroe
Teumpat geupasoe ie peureuda

Saleuek kalimah la ilaha illallah
Uke cidah tukang istana
Gaseue geunulong culek sinaroe
Teumpat geupasoe nyan ie rasa

Sare abeh dum geuculek
Ladum geularek giseng panta
Binteh ngon pinto meuculek sipot
Aneuk leuek meulet ngon cempala

Sare leungkap dum sinaroe
Teuma geupasoe ie peureuda
Ladom geupasoe sidalinggam
Mirah hitam kunengpi na

Teuma nyang hijo cawareudi
Han soe tukri jroh that rupa
Teuma nyang puteh geuboh sapat
Cit indah that hana tara

Bahkeuh dumnan haba meuligoe
Lon sambat dudoe peutimang punca
Lon seubot jinoe laen habaran
Tadeungo tuan lon calitra

Amma bakdu dudoe nibak nyan
Raja Yaman teuseubot pula
Uroe malam jikrah rakyat
Nanggroe Bageudad jikeumeung goga

Jingo gah putroe rupa jroh that
Hana sapat umpamanya
Putroe nyan kutueng kuba keunoe
Kuprang nanggroe dujih raja

Meunyo talakee deungon mangat
Hana meuhad jikaronya
Di lon kujak tueng putroe Bageudad
Kungo jroh that geupeuhaba

Han tom kudeungo masa dilee
Baro kuthee gop calitra
Umu baro muda seudang
Nyum lon pandang jinoe sigra

Tango nan mantong ek yo asoe
Nama Putroe Baren Miga
Meunan mantong jisrui bulee
Kutueng keukee aneuk raja

'Oh teuingat yo that asoe
Nyum beujinoe lon eu rupa
Sabet nyo jroh ban geupeugah
Di lon kuilah aneuk raja

Adat meukon aneukjih jroh
Hankeu saboh tameh istana
Meunan narit Raja Yaman
Ureueng sinan dum ngo haba

Goh lom jieu baro jingo gah
Dumnan ulah napsu hawa
Pat nyang jiduek meunān jipeugah
Meuie babah raja ceulaka

Salang tan jieu nyan jipandang
Dumnan bimbang ate gila
Teuma raja jikrah rakyat
Timu barat abeh teuka

Banda duson abeh jikrah
Rakyat barollah tujoh ploh raja
Ase rakyat han ek kheun ban
Raja Yaman jimeusabda

Sireutoh laksa rakyat le that
Han ek himat had ngon hingga
Teuma meusabda Raja Yaman
Sireuta jikheun sipatah haba

Tango kamoe rakyat meukatoe
Lon peugah proe ubak gata
Lon keumeung prang Raja Bageudad
Pakri pakat takheun sigra

Aneukjih jroh that rupa sambinoe
Keumala nanggroe asoe istana
Nyankeu inong nyang that sambinoe
Geuboh nan Putroe Baren Miga

Lon keumeung tueng kuprang nanggroe
Tapeungon kamoe gata dumna
Meukon taprang han ek ase
Tapoh mate dujih raja

Meatalakee deungon mangat
Han troh hajat ban tapinta
Kareunajih nyan ngon geutanyoe
Laen nanggroe laen agama

Geutanyoe taseumbah beurala patong
Di jih Tuhan nyang tan meurupa
Jinoe kaman udeh taprang
Tamong rijang putroe taba

Ban sare troh nyan u nanggroe
Taintat kamoe keudeh bak raja
Meunankeu narit Raja Yaman
Sitree Tuhan kaphe ceulaka

Narit teukabo amat sangat
Raja laknat asoe nuraka
Jikrah rakyat hana hireuen
Troph sibuleuen hana reuda

Tujoh ploh raja jiba sajan
Teuma pahlawan han teukira
Sajan ngon unta gajah balohan
Guda samaran meureutoh laksa

Sare ka ase rakyat ka simban
Raja Yaman jinoe bungka
Amma bakdu teuma dudoe
Teuka putroe peurumoh raja

Jipura thee jipura han
Jijak keunan sigra-sigra
Haba ka maklum di jih dilee
Pura han thee putroe muda

Lalu jitren di meuligoe
Teuma jipeutoe ubak raja
Putroe marit deungon judo
Ho rakyat le keumeung bungka

Abeh ase dum angkatan
Ho junjongan keumeung hala
Teuma marit raja sipatah
Ka jipeugah bak judonya

Lon keumeung jak prang nanggroe Bageudad
Sajan ngon rakyat meureutoh laksa
Pakon tuanku nyan neumeuprang
Peue neujak tueng ubak raja

Lon jak tueng putroe nanggroe Bageudad
Lon meung peusapat nyan ngon gata
Adat neuba lon tuanku sajan
Han tiwasan tuanku bungka

Ban jideungo haba meunan
Yoh masa nyan putroe jiba
Gata tagiduek gajah balohan
Di lon geuritan keu kandran bungka

Bahle tajak sajan sajan
Meunan jikheun uleh raja
Han tiwasan po junjongan
Lon sipadan ngon meukuta

Bangsapi sabe ngon tuanku
Han sigeutu nyang na bida
Kukira meusampe kuseutot langkah
Judo meantuah bak ayahda

Hana neugaseh keu lon sidroe
Banhle kuwoe ubak bunda
Han meusampe kuseutot lakoe
Nyoban dudoe roh kurasa

Bek tuanku neutueng putroe
Kamoe sidroe ho keumeung ba
Peue nyang napsu na bak kamoe
Kubri jinoe dum keu gata

Kubri dendayang sireutoh droe
Nyang sambinoe muda muda
Putroe Bageudad bek neujak tueng
Di lon kutimpeueng nibak meukuta

Teuma seuot Raja Yaman
Di kamoe han ban kheun gata
Di lon hajat keu putroe laen
Putroe Baren nyang that kuhawa

Kujak tueng putroe nanggroe Bageudad
Kupeusapat deungon gata
Teuma marit Putroe Yaman
Di kamoe han tapeudua

Di lon han kutem tapeumadu
Di kamoe du raja raya
Meungon gata sabe meurtabat
Raya pangkat duku raja

Laman ka troh Putroe Bageudad
Bekle meusapat ngon po meukuta
Got bahle kuwoe bak ayah
Hanle indah lon bak gata

Lom Jimarit Raja Yaman
Ubak tuan putroe muda
Gata bak kamoepi that indah
Judo meutuah bek le that haba

Teuma seuot Putroe Yaman
Jipeugah ban ubak raja
Bek tuanku neutueng putroe
Na bak kamoe peue nyang hawa

Peue nyang napsu lon ek kubri
Kon lon faki papa hina
Le dendayang kuba di nanggroe
Sambinoe-sambinoe po meukuta

Duku raja bri keu kamoe
Kubri jinoe dum keu gata
Adat han sep ngon lon sidroe
Siploh siuroe kutalak gata

Le dendayang lon lam jaroe
Deelat meukatoe bek angkara
Meubek napsu Putroe Bageudad
Kubri meuhad dum keu gata

Lom jiseuot Raja Yaman
Di kamoe han ban kheun gata
Han kupateh ureueng binoe
Jibri keu kamoe Kleng Banggala

Han kupakon Kleng Habeusyi
Bahle bek tabri han kuhawa
Han ho kuba muka ri asee
Dua sukee hana hareuga

Bahle bek tabri han kuhajat
Beuhayeue that Kleng beulaga
Di lon napsu Putroe Bageudad
Nyang lon galak that rindu teurcinta

Baren Miga nyang that rindu
Laen han napsu bek tapeuhaba
Bayek-bayek seunampang Cina
Aneukjih ka na ngon timbak cicem

Baranggadum lon peudeuh guna
Sama-sama meuncari layen
Di gata tajak tamita putroe
Di kamoe meuwoe meumita raja

Han patot kuboh tuan putroe
Judo kamoe bak ayahda
Kujak tueng putroe nanggroe Bageudad
Lon peusapat deungon gata

Meunyo ka troh putroe Bageudad
Hana meuhad lon meuguna
Areuta di lon tapeumeuri
Han meuhad le got ngon gata

Teuma marit sidroe dendayang
Pakon bimbang po cut raja
Bek tagundah po cut badan
Peurintah Tuhan atueh hamba

Hana meuhad nyan troh hajat
Ureueng Bageudad le that peurkasa
Han mee meuhad meuteumeung putroe
Taeu dudoe nyo ban kata

Laman ka troh geuba keunoe
Bahle neuwoe bak ayahda
Boh keumili di dalam upeh
Ramah santan di dalam sahab

Haba mustahe jangan tapateh
Jarak di tangan jangan tatarap
Ban putroe deungo haba dendayang
Teuiem yoh nyan han le dawa

Amma bakdu dudoe nibak nyan
Raja Yaman lon calitra
Raja Yaman jak prang Bageudad
Jiba rakyat sireutoh laksa

Raja tujoh ploh dum pahlawan
Cokmajih ban bak u dara
Ladom peudeueng dum jisandang
Sok di badan bajee meulila

Keutupong beusoe boh bak ulee
Rakyat meuribee peunoh donya
Raja bungka rot meudarat
Jipeudieng brat dumna unta

Umu lhee buleuen jak meudarat
Jiprang Bageudad raja raya
Ban sare troh nanggroe Bageudad
Jitamong leugat dum lam kuta

Dua lapeh leupah jitamong
Sinan meuteumeung ngon Bangta muda
Droe cit ka ngon teukeudi Allah
Na meung bek leupah kaphe lam kuta

Neudong sinan Bangta Sulotan
Neueu angkatan rakyat teuka
Banta teumanyong teuma sipatah
Hubo langkah gata dumna

Ho tameung jak dum gata nyoe
Peugah bak kamoe lon ngo nyata
Teuma seuot dumna rakyat
Jikheun teupat ubak Bangta

Nyang troh langkah kamoe keunoe
Meujak tueng Putroe Baren Miga
Meunankeu narit Raja Yaman
Sireuta sajan rakyat dumna

Teuma seuot Bangta Sulotan
Bak Raja Yaman neukheun sigra
Han jeuet tuanku neutueng putroe
Nibak kamoe han meurela

Meukon tapoh ulon dilee
Han meuteumee putroe taba
Pakon gata tayue poh droe
Takheun bak kamoe meungo nyata

Nyang jeuet tuanku lon yue poh droe
Adoe kamoe Baren Miga
Nyankeu sabab nyang han lon bri
Kaphe Yahudi le bicara

Han katuri Bangta Sulotan
Nyang pahlawan that peurkasa
Ban jideungo narit meunan
Raja Yaman beungeh raya

Teuma marit Raja Yaman
Kapoh Bangta nyan kapeufana
Kapoh ngon cokma atueh ulee
Bek le lagee putroe taba

Pahlawan mat cokma di jaroe
Bangta jiseudoe hana ngon sa
Jiseupot di ulee troh u tanoh
Pahlawan geh-goh hana tara

Bangta Sulotan Allah tulong
Han meusion reubah ruma
Hana sion bulee reubah
Tulong Allah Bangta Muda

Nyandum jipoh le pahlawan
Bangta Sulotan ugah hana
Hana keunong ubak badan
Bangta Sulotan Tuhan peulara

Bek an asoe bulee han keunong
Hireuen teuceungong bansineuna
Badan payah dum pahlawan
Brat cokma nyan sireutoh gunca

Dumna pahlawan meuhah-meuhah
Sang bui payah geulet lam rimba
Han ek le jipoh Bangta Sulotan
Dumna pahlawan payah raya

Teuma marit Bangta sidroe
Peue taiem droe dumna gata
Tapoh laju ulon sidroe
Cokma beusoe tacok nyang raya

Dumna pahlawan hireuen laloe
Payah lagoe hana tara
Lom neumarit Bangta Sulotan
Bak pahlawan neukheun sigra

Ka lheueh tapoh kamoe sidroe
Cuba theun jinoe kubalah guna
Teuma marit Raja Yaman
Ngon Sulotan Bangta muda

Han kutakot baranggasoe
Gigoe beusoepi kungaza
Ban Bangta deungo narit meunan
Beungeh yoh nyan hu ngon mata

Teuma neumat peudeueng u jaroe
Neukeumeung seudoe raja ceulaka
Ban jikalon Bangta mat peudeueng
Abeh jiplueng bansineuna

Raja Yamanpi ka jiplueng
Jikalon peudeueng Bangta muda
Neumat peudeueng neutayang-tayang
Jiplueng tajam tamse guda

Bangta neumeuheu pakon kaplueng
Cuba tatheun rueng peudeueng seuba
Peudeueng lon deuck hana lom umpeuen
Aneuk bajeueng malec hana

Kapreh dilee bek le kaplueng
Gata ureueng meugah peurkasa
Yoh masa kajak kameung tueng putroe
Pakri kajeut woe malee mata

Hankeu malee 'oh troh u nanggroe
Hana putroe sajan kaba
Hajatkeu dilee masa di nanggroe
Kameung tueng Putroe Baren Miga

Nyoe ka taplueng le takajee·
Muka asee geusuen raya
Goh troh tajak eu tuan putroe
Pakon tawoe le tagisa

Bek le kaplueng kariwang dilee
Buet jaroe kee goh lom karasa
Insya Allah ngon tulong Tuhan
Kapreh sinan bandum rata

Raja Yaman jiplueng laju
'Oh jingo su Bangta muda
Dua geulunyueng kuncop sare
Jiplueng sabé bansineuna

Hana jingieng le u likot
Bangta seutot laju sigra
Peudeueng di jaroe neukilap-kilap
Su meuhap-hap ban geureuda

Raja Yaman ate kuyut
Jingo meuhuet-huet su peudeueng raya
Peudeueng neusayong bube seuladang
Rakyat lam blang plueng sang guda

Bangta Sulutan peucrok laju
Rakyat ngilu jiplueng lanja
Umu sibuleuen jeuoh jiplueng
Bangta riwang woe lam kuta

Neutiek ngon peudeueng sinan lam blang
Teuma neutamong bak ayahda
Ureueng di dalam hana geuthee
Teungoh peuteuntee peugot istana

Bangta Sulotan tamong leugat
Neupeugah rakyat le that di luar
Neupeugah teuka Raja Yaman
Troh u dalam jitamong lanja

Dua kuta leupah jijak
Seun rot meurumpak deungon hamba
Nyang troh langkah jijak keunoe
Jimeung tueng Putroe Baren Miga

Ulon jipoh hana padan
Ngon tulong Tuhan hana binasa
Jipoh ngon cokma dumjih sare
Mangat troh ate putroe jiba

Tuhan tulong hana keunong kee
Sion bulee tan na binasa
Teukeudi Allah kuasa Tuhan
Raja Yaman ka jiguda

Jinoe han le jih meusidroe
Abeh nanggroe dum plueng lanja
Ban raja deungo narit meunan
Meuhamboran ngon ie mata

Weueh neukalon Bangta Sulotan
Aneuk bangsawan bijeh mata
Jikeumeung poh le Raja Yaman
Bangta Sulotan nyang indah rupa

Yoh nyan tahe raja meumandang
Bangta Sulotan neungo calitra
Untong han leupah keunoe jijak
Tuhan tulak le jiguda

Rakyat iam kuta hireuen mandang
Bangta Sulotan peugah haba
Teuma marit Bangta ngon ayah
Mohon langkah keumeung bungka

Neukeumeung seutot Raja Yaman
Bangta Sulotan peugah bak raja
Idin tuanku keu lon sidroe
Meung jak u nanggroe raja raya

Adat na untong ngon idin Allah
Han trep langkah rijang lon gisa
Teuma marit raja sipatah
Bek talangkah bijeh mata

Dumna kamoe abeh sosah
Jiteumee poh gata le raja
Bekbu aneuk gata tajak
Nanggroe that jarak bijeh mata

Teuma seuot Bangta Sulotan
Ulon junjongan jak eu desa
Neubri idin jinoe sikarang
Lon woe rijang jak eu banda

Teungoh Bangta lakee idin
Rakyat jitren dua blah raja
Meugah teuka Raja Yaman
Bangta Sulotan ka binasa

Meunan meugah jeuep-jeuep nanggroe
Jimeung tueng Putroe Baren Miga
Han troh napsu abeh jiwoe
Bangta humeui sidroe saja

Meunan meugah dum sigala don
Rakyat jitren dua blah raja
Abeh meutamon dum u dalam
Ngadap junjongan poteu raja

Teuma jitanyong uleh rakyat
Meugah le that ureueng teuka
Meugah teuka Raja Yaman
Po junjongan jiprang kuta

Bit tuanku na troh jijak
Neupeugah bak kamoe dumna
Raja seuot tanyong rakyat
Ureueng le that keunoe teuka

Raja Yaman teuka di nanggroe
Jumeung tueng Putroe Baren Miga
Nyoe hana le abeh jiwoe
Bangta sidroe peucrok lanja

Leupah jitamong dum u dalam
Raja jahannam teuma jiguda
Deungon meuleuha kuasa Tuhan
Bangta Sulotan humeui sigra

Ban jideungon meunan raja kheun
Rakyat hireuen bansineuna
Teuma jimarit Panglima Bandran
Uleebalang sapai raja

Udeh po cut tabalah prang
Raja binatang tareuloh kuta
Talakee tulong ubak Tuhan
Bah talawan kaphe ceulaka

That teumeui-meui aneuk jalang
Udeh taprang tareuloh kuta
Takrah rakyat dum bak simban
Talakee bak Tuhan nyang sijahtera

Talakee tulong bak Hadarat
Raja laknat tabalah guna
Maka seuot Bangta Sulotan
Neupeugah ban bak panglima

Hana peue prang Raja Yaman
Tapok-pok peudeueng jiplueng lanja
Hana ngon sabe raja geusuen
Meunan bangon lon eu rupa

Bekbu taprang Jeuet keu sosah
Bah lon langkah sidroe saja
Kulakee tulong bak Hadarat
Beuseulamat bek peue mara

Lon jak dilee jinoe sikarang
Bek tajak prang raja raya
Adat na umu nibak Allah
Lon meulangkah jak eu desa

Jinoe bek tajak keu ngon kamoe
Bahle sidroe lon safari
Teuma seuot Panglima Bandran
Jipeugah ban bak cut Bangta

Idin po cut lon jak sajan
Tabeurjalan geutanyoe dua
Sira lon jak eu desa nanggroe
Neuba kamoe sajan meukuta

Teuma seuot Bangta Sulotan
Tango tuan lon peuhaba
Gata bek tajak dilee sajan
Dudoet tuan teuma tabungka

Meutrep lon woe nyan u nanggroe
Teuma dudoe tajak gata
Di lon kújak lagee musafe
Bek jituri lon le raja

Meunan dalem lon peugah proe
Teuma dudoe tajak gata
Meunan narit Bangta Sulotan
Neupeugah ban bak panglima

Teuma lom neukheun Bangta bak ayah
Idin langkah lon kubungka
Tajak aneuk beuseulamat
Bek trep lambat gata tagisa

Gata kupeujok ubak Tuhan
Uroe malam kuleueng jaroe
'Oh lheueh raja neuidinkan
Bangta Sulotan meumat jaroe

'Oh lheueh neucom teuot ayah
Teuma neuseumbah maneu putroe
Teuma meuteumeung adoe ngon aduen
Lheueh nyan neutren u seuramoe

Teuma meuteumeung raja dua blah
Rakyat barollah peurdana meuntroe
Yoh nyan Bangta neucok langkah
Aneuk meutuah bungka sidroe

Hana sapeue neuba sajan
Tinggai tuan dalam meuligoe
Alat peukayan dum neukeubah
Bangta meutuah neubalek droe

Neuubah rupa bek gop turi
Nyandum ahli muda samlakoe
Nyandum areh lhok teunuban
Alat peukayan han neupakoe

Sikin ngon peudeueng hana neulhat
Neumat tungkat reugam bak jaroe
Lheueh nyan teuma neujak leugat
Tahe rakyat jikalon proe

Bit nyo areh banyak teunuban
Bangta Sulotan rakyat pujoe
Baren Nasi raja meutuah
Neukheun bak Allah neungadu droe

Neulakee seulamat bek peue mara
Beutroh pinta aneuksu sidroe
Ho nyang jijak bek soe linteueng
Raja neuleueng dua jaroe

Teukeudi Allah karonya Tuhan
Bangta Sulotan bungka sidroe
Han soe tanyong ho kahala
Kayen ija tan bak asoe

Kupiah brok boh bak ulee
Nak bek gop thee muda samlakoe
Bajee beukah sok bak badan
Ban lakuan ureueng geumadoe

Ho nyang neujak soe tanyong tan
Neubeurjalan jeuep-jeuep nanggroe
Neuboh bak baho ngon geunandi
Tungkatneupi mat di jaroe

Laen han sapeue neuba sajan
Bangta Sulotan leupah jinoe
Teukeudi Allah umu sibulan
Troh u Yaman muda samlakoe

Teuma neutamong laju u dalam
Bak 'Raja Yaman lanja neupeutoe
Neudong di yup peurakna seumbah
Deelat khalifah raja geupujoe

Teuma raja tanyong sipatah
Pane langkah gata keunoe
Patbu gampong soe nan ayah
Cuba peugah ubak kamoe

Bangta seuot teuma sipatah
Ngadap di bawah meukuta nanggroe
Ampon tuanku doli khalifah
Nyang troh langkah lon jak keunoe

Gampong nanggroe dum syeedara
Mante rimba pucok krueng nyoe
Sinan gampong ayah ngon bunda
Dalam rimba tuanku droe

Ulonteu nyoe mante teuka
Dalam rimba jarak that nanggroe
Di lon sidroe kujak geumade
Gaseh neubri tuanku droe

Peue na mudah bu-bu sijuek
Neubri sigo suep tuanku droe
Ban jideungo haba meunan
Hireuen yoh nyan raja pindoe

Han tom jieu mante rimba
Baro teuka tren u nanggroe
Raja Yaman peudong sinan
Teutap di dalam muda samlakoe

Teuma meugah bak dum raja
Mante rimba tren u nanggroe
Rakyat teuka hana reuda
Tren bak raja geunap uroe

Jak eu mante tren di rimba
Indah rupa hana bagoe
Abeh meugah sigala don
Rakyat jitren jeuep-jeuep nanggroe

Teukeudi Allah peurintah Tuhan
Bangta Sulotan that peungaroe
Neuduek di dalam sajan raja
Lhok bicara muda samlakoe

Abeh neukalon dum bak raja
Rakyat teuka **meukatoe-katoe**
Lawet lawan neuduek sinan
Sikhan bulan hana neuwoe

Ureueng sidroe teuma teuka
Ubak Bangta keunan jipeutoe
Yoh nyan jitanyong gampong ngon ayah
Bangta peugah neuhareutoe

Gampong kamoe leupah that jarak
Lhee buleuen jak ngon nanggroe nyoe
Pakri ban ureueng dum di sinan
Cuba kheun ban ubak kamoe

Bube na luah nanggroe di sinan
Na miseue ban nanggroe kamoe
Na ngon banda keude peukan
Pakri lakuuan cuba hareutoe

Teuma seuot Bangta Sulotan
Neupeugah ban dum sinaroe
Gampong uteuen kamoe rimba
Pane banda jarak that nanggroe

Nanggroe seumak meurumohpi tan
Dawok beurjalan geunap-nap uroe
Mita peunajoh ngon makanan
On sibarangan kayee meuduroe

Pat nyang seupot nyan jipioh
Hana rumoh dum sinaroe
Mante jieh baranggapat
Beuneung siurat tan bak asoe

'Oh ka ujeuen dum wa sapai
Ie meubrai-brai hana bagoe
Meunan sabe baranggajan
Lam beurjalan geunap uroe

Ladom mante nyang le seuiet
Nyang ladom kleuet dum sinaroe
Ri nyang seuiet dum meusapat
Nyang kleuet that abeh boh droe

Di lon sidroe teukeudi Allah
Leupah langkah roh lam nanggroe
Nyang ka han tom meulon ngo gah
Teukeudi Allah keu lon sidroe

Ija bak badan sigeutu tan
Lam beurjalan geunap uroe
Bak siuroe teungoh lon jak-jak
Gop bri sikrak ija keu kamoe

Geubri teuma saboh kupiah
Nyang ka beukah han jeuet le pakoe
Teuma lon cok nyang ka geubri
Beukah meuriti jeuep-jeuep sagoe

Lumpok sare beukah meurata
Lon cop teuma dum sinaroe
Dilee cit tan ija bak badan
Yoh lam hutan masa di nanggroe

Lon tren keunoe na sibuleuen
Dalam uteuen pucok krueng nyoe
Ban jideungo Bangta peugah
Rakyat barollah tahe laloe

Han tom jikalon mante rimba
Rakyat teuka hana lheueng uroe
Nyandum areh lhok teunuban
Bangta Sulotan muda samlakoe

Abeh neukalon dum peurbuetan
Keulakuan raja pindoe
Teukeudi Allah dudoe nibak nyan
Bangta Sulotan lon kheun hareutoe

Sidroe ureueng sangat ahli
Nyang turi muda samlakoe
Jipeuseumbah nyan bak raja
Geutanyoe buta dum sinaroe

Tango kamoe po junjongan
Bangta Sulotan teuka keunoe
Nyandum arch lhok bicara
Mante rimba jipeugah droe

Panyang teunuban that beudakwi
Jikeumeung taki dum geutanyoe
Jialeh droe jibalek rupa
Tuanku raja ingat meupaloe

Ban raja ngo haba meunan
Bit nyo kaman ban hareutoe
Adat nyo nyan Bangta Sulotan
Tadrop tuan taboh taloe

Taboh rante dum beuteugoh
Teuma tasroh lam leusong beusoe
Meunan jikheun Raja Yaman
Jiyue poh tuan Bangta sidroe

Teuma beudoh dumna rakyat
Jikeumeung ikat muda samlakoe
Teuma jipeurab bacut-bacut
Nap ngon likot rakyat meukutoe

Ban deumi troh keunan rakyat
Bangta jiikat jiboh taloe
Neuiem mantong neueu jiikat
Uleh rakyat dum sinaroe

Sare king-keueng jiboh rante
Meulawan le muda samlakoe
Rante krap-krup putoh sare
Rakyat plueng le dum jiboh droe

Bangta neudeumpek ngon neulumpat
Teumakot rakyat dum sinaroe
Raja Yaman ka teumakot
Yo ngon atot geunta asoe

Bangta Sulotan kheun bak rakyat
Jakleh ikat peurab keunoe
Rakyat meutamon dum sikalian
Teuka pahlawan teuma peuet droe

Jikheun bak rakyat dum pahlawan
Bit han sakon dumna geutanyoe
Ngieng lon jak drop kuboh keukang
Kutop lam leusong jingki beusoe

Teuma jipeurab pahlawan keunan
Bangta Sulotan mantong neuiem droe
Teuma jidrop han ek jimat
Pahlawan that muda samlakoe

Lom jiriwang teuma jigisa
Neutampa mukajih ban peuet droe
Teubiet ngon meuk dalam mata
Meugisa jungka luroh gigoe

Pahlawan peuet droe ka jiguda
Lheueh nyan teuka laen sinaroe
Teuma teuka laen pahlawan
Jipeurab keunan lom jipeutoe

Lom jimarit uleh pahlawan
That analan kamoe dua droe
Nibak laen lon nyang atueh
Ingar sineulheueh bak uroe nyoe

Jimat ngon rante beusoe meulila
Jipeurab lanja le jipeutoe
Ngon jideumpek that meutaga
Jikira geunta muda samlakoe

Sireuta jikheun jibri ingat
Saleh kiamat gata uroe nyoe
Bangta Sulotan hana haba
Droeneu lanja Tuhan neupujoe

Dumna pahlawan laju teuka
Jidroep Bangta jimeung peutaloe
'Oh sare troh keunan teuka
Bangta tampa dum sinaroe

Luroh gigoe deungon jungka
Teubiet meuk mata dum sinaroe
Abeh jiplueng dum u lua
Neuseutot lanja muda samlakoe

Teuma marit Raja Yaman
Bak pahlawan jikheun hareutoe
Wahe pahlawan dumna gata
Kaikat Bangta kaboh taloe

Kaboh rante nibak gaki
Upah kubri meuh sinaroe
Watee malam teuka sinja
Kadrop Bangta kaboh taloe

'Oh lheueh kadrop keunoe kaba
Kusalen gata dum sinaroe
Teuma seuot dumna rakyat
Bah kamoe ikat muda samlakoe

Adat matepi kungaza
Kudrop Bangta ngon jeue beusoe
Meunan narit dum pahlawan
Bangta Sulotan jimeung boh taloe

Narit teukabo dimjih rata
Allah peumeureuka kaphe pindoe
Hana jimeumat nibak Tuhan
Jikira troh ban nyang kheundak droe

Bangta Sulotan that meutuah
Tulong Allah han lut beusoe
Baranggasoe han troh kheundak
Keunong timplak dum ateueh droe

Bangta jiikat deungon rante
Putoh sare dum sinaroe
Kaphe bajeueng gundah sangat
Han ek jimat Bangta sidroe

Luroh ngon gigoe dum ngon jungka
Bangta tampa hana padoe
Takue meupaleng dum u likot
Abeh teumakot kaphe pindoe

Teuma jiuroh rakyat le that
Timu barat na dum anoe
Miseue sidom meuleulaksa
Rakyat teuka jeuep-jeuep uroe

Rakyat teudong sama teungoh blang
Uleebalang dum ngon meuntroe
Tujuh ploh tamon uleebalang
Cokma ngon peudang dum bak jaroe

Jiglet Bangta sinan di blang
Rakyat meukeumang peunoh nanggroe
Bangta sidroe ngoneupi tan
Rakyat sikalian dum yo asoe

Jidrop han ek abeh neutampa
Reuloh jungka dum ngon gigoe
Duman tuah Bangta that kha
Rakyat neutampa dum sinaroe

Reuloh ngon mieng teusuet jungka
Teupeuro mata kaphe pindoe
Rakyat lam blang keubit le that
Ladom me jrat ladom jeue beusoe

Han ek Bangta jiteumee ikat
Sabab kuat pahlawan han soe
Raja Yaman beungeh keu rakyat
Han ek kaikat Bangta sidroe

Bit dum gata hana sakon
Keupeue dum ngon meurubee katoe
Bangta sidroe han ek tababat
Han guna rakyat dum sinaroe

Meuek kadrop nyan kaikat
Kaba leugat teuma keunoe
Teuma jiseuot dumna rakyat
Bangta kha that hana bagoe

Kamoe abeh dum jitampa
Reuloh muka runtoh gigoe
Han ek soe drop Bangta Sulotan
Jiteumee simpan dum geutanyoe

Khajih sangat hana tara
Rakyat jitampa deungon jaroe
Pakri tadrop meuteumeung han
Neukheun padan tuanku droe

Raja kheun bak dumna pahlawan
Nyoban padan tango kamoe
'Oh ka seupot jula malam
Talingka dum ngon jeue beusoe

Droe cit ka ngon teukeudi Tuhan
Bangta Sulotan lam blang sidroe
Teuma jiteubiet dumna pahlawan
'Oh jula malam watee sunyoe

Teuma jiluem Bangta Sulotan
Jime sajan ngon jeue beusoe
Ban sare rab ka meuteumeung
Jitiek rijang le jeue beusoe

Hana ek roh pantah neulumpat
Pahlawan that hana bagoe
Teuma jiluem lom jilingka
Bangta sigra neulumpat droe

Mata lisek neueu keunan
Bak pahlawan dum sinaroe
Simalam suntok jiluem laju
Han roh teungku Bangta sidroe

Teukeudi Allah troh rab faja
Bangta muda leumoh asoe
Leubui mata keumeung teungeut
Bangta neuduek nibak bumoe

Neupioh sinan teuma siat
Mata teungeut that hana padoe
Teuma teusio Bangta muda
Pahlawan teuka me jeue beusoe

Sare jieu teungeut teurhanta
Pahlawan teuka nyan jipeutoe
Ban jikalon teungeut Bangta
Jitiek lanja le jeue beusoe

Ban meugrum jeue Bangta jaga
Badan geunta brat han bagoe
Han ek meulawan jeue geuhon that
Neuduek teutap tahe keudroe

Teutap ka roh troh ban pinta
Bangta muda han ek yo droe
Teuma jikeubah sinan di blang
Malampi siang teuka uroe

Teukeudi Allah peurintah Rabbi
Tuan Siti lon peugah proe
Bahren Miga putroe budiman
Leumah pandangan dalam lumpoe

Neukalon aduen Bangta Sulotan
Ka roh tuan lam jeue beusoe
Sare jaga putroe bak tido
Pujoey syuko hana padoe

Teuma neubeuet saboh hekeumat
Mata u langet neuleueng jaroe
Sare abeh neubeuet do'a
Neurahop muka tuan putroe

Teuma neutren lam istana
Neujak lanja teuma sidroe
Neucok peudeueng Bangta Sulotan
Neume sajan tuan putroe

Teukeudi Allah putroe meutuah
Troh le langkah bak aduen droe
Ban neukalon Bangta Sulotan
Putroe bangsawan lanja neupeutoe

Neukalon teuduek meumot han ek
Putroe tarek le jeue beusoe
Lheueh nyan teuma neuseumbah aduen
Neuceupet di rueng mangat asoe

Teuma neuduek dua sapat
Jieu le rakyat dum sinaroe
Peudeueng bak jaroe Bangta muda
Rakyat geunta gli that asoe

Rakyat teumakot ban saboh blang
Bangta jipandang ka na dua droe
Teuma seumbah dum pahlawan
Bak Raja Yaman jikheun hareutoe

Ampon tuanku laman sroepada
Tango haba tuanku droe
Bangta sidroe han ek soe teuntang
Jiteumee cang dum sinaroe

Peudeueng yoh jeh ka troh keunan
Jimat di tangan panyang han soe
Teuma seuot Raja Yaman
Pakri padan takheun jinoe

Cuba peugah dumna gata
Toh bicara tapeugah proe
Teuma seuot dumna rakyat
Han jeuet tajrat ngon jeue beusoe

Tadrop han ek pahlawan that
Taboh ikat putoh taloe
Jinoe han le jeuet tapeurab
Peudeueng raya that nibak jaroe

Jiteumee abeh geutanyoe simpan
Han le padan tuanku droe
Ngon kuat that han soe teuntang
Peudeueng panyang hana bagoe

Hantom Bangta nyoe that pahlawan
Jiteumee simpan bandum nanggroe
Nyang got tuanku sep ka pakat
Udeh tadeelat dumna geutanyoe

Peue na padan lom tapakat
Bandum rakyat geunta asoe
Sabab jitakot Bangta Sulotan
That pahlawan atueh bumoe

Rumoh jitet binoeteu jiba
Uleh Bangta nyan jipeuwoe
Meugahpi han geutanyoe talo
Gadoh ngon beuhe dum sinaroe

Han ek talawan Bangta Sulotan
Bek le padan tuanku droe
Han ek ase ban tahajat
Nyandum taikat deungon taloe

Padum ngon jeue han peue peugah
Hana meuugah Bangta sidroe
Laen pakri tatkri let
Nyandum taglet ngon jeue beusoe

Ek cit leupah han soe tuban
Po junjonjan tuanku droe
Peue jeuet padan han troh napsu
Got tangadu udeh jinoe

Bek sapeue le dua cita
Tuanku raja talo geutanyoe
Han ek tatheun Bangta Sulotan
Po junjonjan beuthat bak sidroe

Hana faidah le talawan
Abeh simpan asoe nanggroe
Di kamoe dum han ekmeu le
Meuhad mate atueh bumoe

Geutanyoe mate binoeteu jituen
Abeh jibaplueng teuma jipeubloe
Kareuna kuat that pahlawan
Han le padan teuma dudoe

Meunankeu bangon Bangta Sulotan
Nyang got tuan jak peujok droe
Adat takeumeung lom keurajeuen
Sangkira han lawan,jinoe

Kamoe han le meujak sajan
Meutakot simpan dum sinaroe
Kamoe tuanku han meumate
Soe beurani jakleh jinoe

Peuet droe nyang beuhe dumteu tuan
Jak tameuprang ngon ureueng bunoe
Troph ban napsu nyan talawan
Meunan bangon dum geutanyoe

Meunyo ngon Bangta han ek tameutheun
Jipeupeudeueng dum sinaroe
Nyang jeuet lon kheun han ek tateuntang
Yoh tajak prang keudeh u nanggroe

Di jih sidroe ugahpi tan
Dum pahlawan plueng sinaroe
Meunankeu narit dum uleebalang
Bak Raja Yaman jikheun hareutoe

Teuma marit Raja Yaman
Pakri padan kaman jinoe
Bak kamoe dum got tadeelat
Tajak leugat tayue poh droe

Tajak laju talakee meuah
Nyang ka salah dum geutanyoe
Alat bek tame sakin takeubah
Reukueng tapeucrah dum sinaroe

'Oh sare keumah pakat syawarat
Laju jipeurab ka jipeutoe
Jijak deelat Bangta Sulotan
Raja Yaman rakyat meukatoe

Jilakee ampon hana tara
Deesya nyang ka lheueh buet jaroe
Raja Yaman nyang jak dilee
Rakyat meuribee di likot droe

Raja Yaman lakee amponan
Bangta Sulotan mantong neuiem droe
Ampon tuanku syahi alam
Kamoe sikalian meungadu droe

Takue neukoh han meudawa
Kamoe ceulaka dum jeuep nanggroe
Neupeuampon po junjongan
Deesya laman dilee ngon dudoe

Buet nyang ka lheueh bek neuhaloh
Nyang goh lom roh ampon kamoe
Bangta Sulotan that peurasat
Neuiem siat peubeungeh droe

Dua lhee seun raja deelat
Neuseuot bacut muda samlakoe
Yoh nyan raja deungon rakyat
Bangta jideelat dum sinaroe

Raja Yaman han le teumakot
Com bak teuot sigra jinoe
Jigule-gule hana tara
Di keue Bangta jiyue poh droe

Takoh takue po junjongan
Raja Yaman cula-caloe
Bangta Sulotan seuot yoh nyan
Pakon tuan tayau poh droe

Jimoe meu'u'u hana tara
Ro ie mata meataloe-taloe
Basah ngon mieng ro ie mata
Hana reuda laju jinoe

Bangta neukheun bek tamoe le
Meuah sare dum sinaroe
Ampon bak Allah ngon bak Nabi
Bek meunan le dum geutanyoe

Singoh-singoh uroe lusa
Beugot bicara deungon budoe
Bek teukabo gata raja
Allah Ta'ala beuthat tapujoe

Jinoe tamasok agama Islam
Nak bek karam page dudoe
Jak tamasok agama Allah
Bek taseumbah patong pindoe

Takheun jinoe kupeusyahdat
Gata ngon rakyat dum sinaroe
Kupeutamong agama Islam
Bek le adlam nyang tapujoe

Droe han ek troh ban takheundak
Tuhan timplak gata sidroe
Sabab teukabo nyan keu Tuhan
Iblih syetan nyan tapujoe

Bak takheun le jinoe sunggoh
Mohon kukoh teukui sinaroe
Kheun bak rijang bek trep lambat
Ucap syahdat yoh goh paloe

Jinoe takheun kalimah dua
Nyan agama nyang seureuloe
Teuma jiseuot Raja Yaman
Po junjongan neukheun jinoe

Han meutu'oh ucap syahdat
Jinoe neukheun had kamoe meurunoe
Bangta Sulutan neukheun syahdat
Seuot rakyat dum sinaroe

Lheueh jiseubot kalimah dua
Teuma raja mumat jaroe
Dumna rakyat that barollah
Seumbah di bawah muda samlakoe

Mangat ate rakyat ngon raja
Lam sijahtra geunap uroe
Han le sidroe seumbah beurala
Allah Ta'ala teuma jipujoe

Sabab meutuah po cut Bangta
Rakyat ngon raja han le laloe
Abeh jitamong agama Islam
Inong agam dum sinaroe

Uroe malam lam seulamat
Hana laknat le meusidroe
Raja nyang raya abeh taklok
Islam trok jeuep-jeuep nanggroe

'Oh nyang geunggam Raja Yaman
Bandum Islam nyan sinaroe
Bangta Sulotan mangat ate
That meusampe peugang nanggroe

Teuma marit Raja Yaman
Bangta Sulotan jinoe maba woe
Deelat tuanku doli khalifah
Udeh langkah u meuligoe

Ubak kamoe hamba saya
Tuanku raja udeh jinoe
Dumna kamoe neupeuhamba
Po meukuta keumala nanggroe

Ho nyan neujak neuba sajan
Po junjongan teuma dudoe
Jan tuanku neuwoe u nanggroe
Neuba kamoe di likot droe

Neudong sinoe neukeurajeuen
Dalam mideuen dum hukom droe
Tuanku beudoh nyan bak rijang
Uroe ka manyang he po cut droe

Teuma seuot Bangta Sulotan
Udeh tuan tajak jinoe
Teuma marit Raja Yaman
Yue cok geuritan taba keunoe

Teumpat bak duck Bangta Sulotan
Geuarak tuan u meuligoe
Jime ngon gong tambo geundrang
Arak geuritan muda samlakoe

Geuyup seurune ngon sangkaikala
Jiarak Bangta woe u meuligoe
Bangta neuduek lam peudati
Rakyat hue le dum sinaroe

Rakyat ireng Bangta Sulotan
Raja Yaman sapat dua droe
Dum peurasan han ek kira
Arak Bangta u meuligoe

Rakyat barollah that sukaan
Bangta Sulotan jroh han bagoe
Rakyat pujoe Bangta Sulotan
Galak tuan dum sinaroe

Dumjih sare pujoe Bangta
'Ajab liga dum sinaroe
Ban meuk uroe baro keulua
Jroh han tara cahya ban uroe

Rakyat gaseh bandum rata
Rakyat meulaksa dum jipujoe
Tamse buleuen cahya trang-bandrang
Bangta Sulotan jroh han bagoe

Angget bak dhoe bintang raja
Ilok rupa tan wadan nyoe
Rupa maneh beungehpi tan
Rakyat sikalian ate laloe

Le that rakyat enseueh sayang
Rupa sang bintang ban meuk uroe
Teukeudi Allah peurintah Tuhan
Bangta Sulotan troh u meuligoe

Neudong di leuen Bangta Sulotan
Tren dendayang dum sinaroe
Teuma geupeuek lam istana
Geuba lanja bak peuradoe

Troh le keunan Putroe Yaman
Me ngon puan nibak jaroe
Ngui peukayan ngon bee-beewan
Boh bak badan dum sinaroe

Sare ase alat peukayan
Sileungkapan dum bak asoe
Sok ngon subang bak geulunyueng
Cahya jiplueng intan ngon pudoe

Lheueh nyan jimati saboh puan
Jitren rijang u seuramoe
Ban sare troh ubak leupu
Seumbah laju tuan putroe

Yoh nyanjisapa Bangta Sulotan
Nateu tuan teuka keunoe
Saweue cutda ureueng hinaan
Bangta Sulotan muda samlakoe

Teuma neuseuot po cut Bangta
Na meuteuka cutda teungku droe
Teuka adoe saweue cutda
Nyoho teuka lam meuligoe

Kru seumangat Bangta muda
Peugawe donya keumala nanggroe
Gata ngon kamoe meusyedara
Teusinyom muka muda samlakoe

Neudeungo narit putroe meuhaba
Sabet syeedara dua geutanyoe
'Oh lheueh haba geumeucakri
Beudoh beurdiri putroe sambinoe

Jiek u rumoh peugot idang
Peurjamuan muda samlakoe
Tama geubet ngon peunuman
Talam pingan meuh sinaroe

Dalong keurikeue tulak bawo
Bangta pajoh bu teuma sidroe
'Oh lheueh makeuen Bangta Sulotan
Tren le rijang tuan putroe

Jijak ngadap Bangta muda
Dendayang lingka dum sinaroe
Bangta neuduek sinan teurhanta
Ateueh geuta meuh sinaroe

Tamse buleuen indah rupa
Tamse peurmata lawan pudoe
Raja Yaman sinan sajan
Duek seunumpan lam meuligoe

Teuma marit Raja Yaman
Meututo ngon muda samlakoe
Ampon tuanku po junjongan
Deungo lon tuan kheun hareutoe

Tuanku ampon mat khalifah
Kamoe di bawah bandum nanggroe
Neukeurajeuen sinoe neuraja
Po meukuta bek le neuwoe

Peu nyang napsu lon peureugam
Mideuen dalam lon peujaroe
Istana meuligoe dumpeue lon bri
Judo isteuri lon hareutoe

Teuma seuot Bangta Sulotan
Tango tuan lon peugah proe
Di lon sinoe han kuraja
Ayah bunda tinggai di nanggroe

Meunan neukheun Bangta Sulotan
Bak Raja Yaman neupeugah proc
Teukeudi Allah peurintah Tuhan
Bangta Sulotan trep that neuwoc

Laloe deungon Raja Yaman
Trep di sinan han meuteumeung woe
Abeh neukrah dum sibarang
Neuyue seumbahyang geunap uroe

Agam inong tuha muda
Suroh teuka jeuep-jeuep nanggroe
Neuyue ibadat buet Quruan
Suroh Tuhan Poteu sidroe

Teuma neuyue peugot meuseujid
Ubak rakyat dum lam nanggroe
Seumbahyang Jumeu'at dum neusuroh
Agama kukoh that seureuloe

Dumna rakyat suka rasa
Jikalon Bangta jroh that budoe
Hana sidroepi nyang na sa
Rakyat puja jeuep-jeuep nanggroe

Bicara jroh hana tara
Asoe syeuruga teuma dudoe
Rakyat sikalian galak suka
Jikalon rupa muda samlakoe

Yoh nyan nanggroe jroh han tara
Meutuah Bangta dum jipujoe
Meunan jikheun dumjih sare
Hana sabe lam donya nyoe

Lom ngon narit leumak mameh
Muka rumeh hana bagoe
Akai jroh that sang eelia
Meunan haba rakyat sinaroe

Ho neusuroh uleh Bangta
Abeh teuka geunap uroe
Raja Yaman gaseh sayang
Han tom leukang meusiuroe

Lam jiireng ho nyang neujak
Ate galak hana padoe
Duekpi sapat baranggajan
Ho beurjalan bandua droe

Le that nikmat karonya Tuhan
Bangta Sulotan peugang nanggroe
Umu nam buleuen neudong sinan
Bak Raja Yaman dalam meuligoe

Ngon meuleuha Tuhan Hadarat
Rakyat sipakat jeuep-jeuep nanggroe
Sare teutap han le goga
Meuseujid lingka rata jeuep sagoe

Teutap agama nyan ka meusra
Neumohon bungka woe u nanggroe
Bangta Sulotan lakee idinkan
Bak Raja Yaman neupeugah droe

Idin dalem lon woe siat
Trep that lambat lon di sinoe
Ayah bunda saleh sosah
Janji langkah rijang lon woe

Nyoe 'oh lawet hana meugisa
Idin sigra lon woe jinoe
Bak panyang umu neubri le Allah
Lom troh langkah lon jak keunoe

Nyoe peuneusan lon bak gata
Tango haba lon hareutoe
Agama beukong bek taubah
Timplak Allah teuma dudoe

Rakyat tayue dum seumbahyang
Bek that **bimbang** ngon donya nyoe
Peubuet ibadat bandum takrah
Peugot meunasah jeuep-jeuep sagoe

Teumpat seumeubeuet lom ngon deyah
Seumbah Allah malam uroe
Nyan lon wasiet nibak gata
Dalem raja cutda putroe

Bek taubah dumteu sare
Meureuka page uroe dudoe
Nyankeu dalem beugot pike
Idin tabri lon woe jinoe

Teuma seuot raja sipatah
Insya Allah po cut teungku droe
Deumi Allah deumi kalam Allah
Han lon ubah wasiet adoe

Troh an page han lon ubah
Hareuem sumpah keu lon sidroe
Laman lon ubah ban tapeujok
Tuhan kutok ateueh kamoe

Mangat ate rindu deundam
Agama Islam that seureuloe
Meunan narit Raja Yaman
That sukaan muda samlakoe

Abeh janji sumpah seutia
Ngon cut Bangta di meuligoe
Yoh nyan neumarit Bangta Sulotan
Bak Raja Yaman neupeugah proe

Wahe dalem Raja Yaman
Idin lon tuan jinoe lon woe
Lon woe siat saweue ayahda
Dudoe teuka lon jak keunoe

Lon saweue dalem gata ngon cutda
Sah syeedara gata dua droe
Hana ubah ban peuneugah
Idin langkah lon woe jinoe

Pakri tawoe adoe meutuah
Pat takeubah dumna kamoe
Po cut neuwoe nyan neugisa
Lon takot goga teuma sinoe

Kamoe sinoe sangat sosah
Pakri peurintah neuhareutoe
Bangta seuot teuma sipatah
Gata bak Allah lon peujok jinoe

Sinan lon keubah gata bandua
Dalem ngon cutda tuan putroe
'Oh lheueh haba Bangta Sulotan
Jinoe tuan jadeh neuwoe

Geubri salen teuma bak raja
Keu cut Bangta geupeujaroe
Jeuneh intan ngon peurmata
Mutiara laen pudoe

Nyoe na po cut saboh meutia
Lon bri keu gata muda samlakoe
Nyoekeu nyang na adoe meutuah
Laen barollah cit le bak droe

Bangta sambot teuma hadiah
Alhamdulillah Tuhan neupujoe
Jinoe dalem meuhad lon gisa
Talakee do'a keu lon sidroe

Bak seulamat bek meumara
Lam safara jinoe lon woe
Insya Allah beuseulamat
Beuna rahmat roh keu kamoe

Jakkeu tawoe Bangta meutuah
Beutroh bak ayah nyan u nanggroe
Neuba kamoe meuhan sajan
Meujak eu tuan desa nanggroe

Teuma seuot Bangta Sulotan
Bekbu tuan tajak jinoe
Jeuet meularat kamoe sukaran
Tango tuan lon hareutoe

Kareuna kamoe teungoh sibok
Rakyat dawok peugot meuligoe
Nyankeu lon kheun dalem meutuah
Bek talangkah gata jinoe

Bukon lon glak dalem keu gata
Bek tasangka beunci kamoe
Bahle dudoe teuma tajak
Adat na heundak taeu nanggroe

Lheueh neukheun nyan Bangta Sulotan
Idin tuan kamoe meuwoe
Han peue salah po cut Bangta
Tidak apa nibak kamoe

Do'a beuthat keu lon sijahtra
Wahe Bangta troh an dudoe
Lheueh neukheun nyan com meuwa-wa
Raja ngon Bangta meumat jaroe

Teuma meuteumeung ngon putroe muda
Neutren Bangta di meuligoe
Bangta Sulotan marit sipatah
Neupeumeuah deesya kamoe

Teuma neutren laju leugat
Raja jak intat muda samlakoe
Sare leupah teubiet u blang
Laju seunang Bangta neuwoe

Raja intat sikhan uroe jak
Hireuen galak dum sinaroe
Teuma neukheun Bangta Sulotan
Sep ka tuan taintat kamoe

Bahkeu 'oh noe dalem taintat
Jak woe leugat dum sinaroe
Teuma meuteumeung dumna rakyat
Lheueh nyan leugat Bangta neuwoe

Bungka sidroe ngonneupi tan
Raja Yaman hireuen laloe
Sare leupah Bangta bungka
Ro ie mara dum sinaroe

Rakyat jimoe bandum lam blang
Bangta jipandang bungka sidroe
Siteuntang mata jieu leugat
Sayangjih that muda samlakoe

Sang mayet tren uroe sinja
Meunan duka dum abeh moe
'Oh hanle leumah nyan jipandang
Rakyat lam blang dum abeh woe

Teukeudi Allah peurintah Tuhan
Bangta Sulotan troh u nanggroe
Lheueh nyan neutamong laju u dalam
Neungadap tuan duneu sidroe

Sare meuteumeung ayah ngon bunda
Ngon syeedara tuan putroe
Baren Nasi neumoe han tara
Neueu aneukda muda samlakoe

Neucom bak ulee moe meuwa-wa
Sret ie mata meataloe-taloe
Weueh neukalon Bangta muda
Trep meugisa jeh 'oh uroe

Umu nam buleuen jarak di mata
Sulotan Bangta baro neuwoe
Aneukku baro muda seudang
Nyum kupandang geunap uroe

Abeh jipoh-poh aneuk meutuah
Raja beudeubah han thee keudroe
Jijeue ngon beusoe miseue eungkot
Aneukku cut muda samlakoe

Hana sayang jieu rupa
Kaphe beudeuga buta tuloe
Raja eelia neumoe leugat
Aneukneu jroh that tamse pudoe

Bangta marit teuma ngon ayah
Bek le gundah tuanku droe
Pakri han gundah ro ie mata
Boh ate ma cre di nanggroe

Abeh gop poh hana reuda
Jilek gata ngon jeue beusoe
Tango he du ulon peugah
Bek le gundah du teungku droe

Hana jipoh lon le raja
Tuhan peulara kamoe sidroe
Bit na cit hana binasa
Tuhan peulara geunap uroe

Ngon meuleuha doli hadarat
Han roh jiikat putoh taloe
Droe cit ka ngon teukeudi Tuhan
Dum pahlawan abeh jiboh droe

Han ek jimat Tuhan bri kuat
Beureukat keuramat tuanku droe
Beureukat mukjizat Nabi Muhammad
Deungan beureukat adoeku putroe

Ulon sidroe han ek jitak
Tuhan timplak meuwoe keudroe
Bandum rakyat meugisa jungka
Tuhan bri kha nyan keu kamoe

Lheueh nyan dudoe teukeudi Allah
Teuma jiseumbah dum sinaroe
Abeh jitaklok agama Islam
Teuka eleuham dum sinaroe

Teuma jipeudong lon trep lambat
Lon peubeuet rakyat dum sibagoe
Lon peurunoe agama Allah
Nyang jeuet trep langkah kamoe meuwoe

Sare seuleusoe dum meusyahdat
Tuhan Hadarat leungkap jipujoe
Abeh teugoh agama teutap
Sigala rakyat jeuep-jeuep nanggroe

Nyankeu hai du nyang jeuet lambat
Bek gundah that sep ka neumoe
Ban raja deungo Bangta peugah
Ate teuhah teudoh neumoe

Neucom di ulee ate suka
Neudeungo Bangta kheun hareutoe
Teutap puleh ate raja
Neueu aneukda that samlakoe

Geupeusijuek Bangta Sulotan
Sempeuna tuan ureueng binoe
Beureuteh bungong ka geusimbak
Bee meuhayak lam meuligoe

Geupeubreueh pade sempeuna maja
Laen calitra karangan meuwoe
Nyoe teuseubot haba meuligoe
Punca saboh roe lon sambat haba

Kayee meuligoe ase leungka
Dum peukara abeh seuleusoe
Amma bakdu dudoe nibak nyan
Bangta Sulotan lon calitra

Bangta marit teuma sipatah
Neukheun bak ayah raja raya
Jinoe toh pakri keu meuligoe
Ase sinaroe he ayahda

Teuma neumarit raja sipatah
Ban nyang titah bak aneukda
Cit ka cukop jeh 'oh uroe
Gata sidroe lon preh teuka

Jinoepi aneuk tapeudong meuligoe
Teumpat putroe Baren Miga
Takrah rakyat dum sinaroe
Tapeudong meuligoe aneuk raja

Sabda tatet beude nubat
Seuranta rakyat peudong istana
Bangta Sulotan seuon titah
Sabda ayah duneu raja

Sabda neuyue tet Sampoh Ratu
Troph deungo su dua blah raja
Neuboh ubat dua ploh kadot
Abeh neuangkot uleh cut Bangta

Teuma neutet beude meuriam
Suara geumeuntam subra donya
Suara gum that meu'u-'u
Troph jingo su dua blah raja

Teuma jitren rakyat barollah
Mideuen meudah-dah banda raja
Uleebalang peurdana meuntroe
Nujum sinaroe abeh teuka

Teuma geutamong laju u dalam
Ngadap junjongan poteu raja
'Oh troh u yup peurakna seumbah
Deelat khalifah meukuta donya

Teuma seumbah dumna rakyat
Jaroe jiangkat ateueh jeumala
Ampon tuanku syahi alam
Nyang mee geunggam alam donya

Peuebu sabda neupangge kamoe
Neukheun jinoe po meukuta
Tango kamoe rakyat meukatoe
Tapeudong meuligoe Baren Miga

Nyankeu lon pangge dum sinaroe
Rijang keunoe lon yue teuka
Teuma neupangge dumna nujum
Sabda maklum nibak raja

Neuyue kalon tuah bumoe
Teumpat meuligoe nyang geurungka
Cuba kalon dum lam surat
Jibeuet ayat kalon angka

Sajan jitilek lam pandangan
Sama teungoh blang mahajana
Teuma nujum peukek seumbah
Junjong khalifah po meukuta

Tuanku deungo ulon kheun proe
Neupeudong meuligoe lam blang raya
Sinan tuanku tuah bumoe
Dumna kamoe abeh nyata

'Oh lheueh nujum meunan peugah
Raja neukrah rakyat dumna
Neuyue kueh tanoh siribee hah
Neuyue amplah dum beurata

Kakueh parek tanoh katambak
Suroh nibak raja raya
'Oh lheueh jikueh tanoh jitambak
Rakyat seuleusak lam blang raya

Ase teumpat dum seuleusoe
Geupeudong meuligoe that bit cela
Meuligoe geupeudong han peue daleh
Saboh tameh troh u donya

Hana bandeng meuligoe indah
Teumpat geukeubah Baren Miga
Di ateueh bumoe jeuep-jeuep nanggroe
Hana meuligoe meunan geurungka

Pucak meugisa sulubayong
Na bagoe tanglong peuneugot Cina
Sama teungoh blang sinan geupeudong
Hireuen teuceungong taeu rupa

Jipot angen meugisa pucak
Bee meuhayak sigala donya
Binteh ngon bara meuculek sipot
Aneuk leukek meulet ngon cicem pala

Culek keurawang dum sinaroe
Teumpat geupasoe ie peureuda
Lingka nyan geuboh silang beude
Geucang ceuradi meusrudiwangga

Meuligoe indah han soe tukri
Teumpat Siti Baren Miga
Geuboh keu binteh dum ceureumen
Tulak angen pirak suasa

Pinto lingka mata kakap
Hireuen 'ajab soe eu rupa
Sare leungkap lheueh meuligoe
Rakyat sinaroe peugot kuta

Lingka istana rab meuligoe
Parek sinaroe raya raya
Kuta geupeugot tujoh lapeh
Rakyat abeh dua blah raja

Pihak keuramat Putroe Baren
Rakyat jitren sigala donya
Jipeugot mon teuma saboh
Rupa that jroh hana tara

Di leuen meuligoe mon geuturab
Tahe 'ajab soe eu rupa
Geuturab mon batee peulinggam
Ie di dalam maneh rasa

Bak sawak tima bukon le indah
Pihak cidah Baren Miga
Taloe tima su meukring-krang
Na bagoe canang suara geunta

Sajan geumat taloe bak jaroe
Su meubunyoe sang biula
Jan geucok ie han payah tren
Meunan bangon neupeurupa

Han payah tren le u bumoe
U meuligoe teuma geuhila
'Oh lheueh leungkap dum sinaroe
Rakyat jiwoe bansineuna

Poteu raja ate laloe
Neueu meuligoe indah that rupa
Amma bakdu dudoe nibak nyan
Tango tuan lon calitra

Tango lon kisah sidroe syiah
Ulon Allah atueh donya
Bak nanggroe nyan cit that meugah
Teungku syiah ulama beusa

Bak simalam teukeudi Allah
tuan syiah leumah rahsia
Neulumpoe teuka Rasulullah
Nyan neupeugah sigra-sigra

Tango kamoe wahe syiah
Kapeubeuet di kah Baren Miga
Meunan neukheun Nabi Muhammad
Syiah teukeujot lalu jaga

Syiah beudoh bak beuradu
Duek teupako wet ngon sila
Teuma teupike sinan sidroe
Takbi lumpoe pakri makna

Sare maklum takbi lumpoe
Teubiet uroe ka cuaca
Teuma neubeudoh nibak tido
Neutren laju syiah raya

Neujak bak kulah tueng ie seumbahyang
Lheueh nyan neubang sigra-sigra
Neuseumbahyang watee suboh
Ngon do'a jroh le neubaca

Uroepi teubiet nyan ka siang
Syiah datang ubak raja
'Oh sare troh tamong leugat
Neujak deelat raja raya

Troh ka u yup peurakna seumbah
Jaroe dua blah atueh jeumala
Deelat tuanku po junjongan
Seumbah laman po meukuta

Trenkeu sabda nibak hadarat
Bek tadeelat teungku peundita
Bek tadeelat Teungku Syiah
Neumeulangkah keunoe sigra

Teuma neukek teungku syiah
Raja beudoh peumulia
Ban sare troh ka neupeutoe
Meumat jaroe deungan raja

Teuma marit raja sipatah
Hobu langkah rijang teuka
Peue saleh buet nyang sukaran
Cuba kheun ban lon ngo nyata

Teuma seuot teungku syiah
Nyang troh langkah lon bak gata
Ulon beuklam lon meulumpoe
Tuhan sidroe bri rahsia

Ulon lumpoe Rasulullah
Nyan neupeugah ubak hamba
Putroe Baren aneuk sultonan
Tapeubeuet tuan uleh gata

Nyankeu narit Rasulullah
Kon beurakah po meukuta
Sabet beuna ban lon peugah
Rasulullah beuklam teuka

Nyankeu jeuet troh rijang langkah
Lon jak peugah bak meukuta
Teuma neuseuot raja meutuah
Insya Allah tidak meungapa

Han peue salah nibak kamoe
Tapeurunoe Baren Miga
Jinoe tapeubeuet aneuk kamoe
Talakee jinoe ubak bunda

Insya Allah po junjongan
Meunyo ka idin po meukuta
Han peue idin le bak kamoe
Taek jinoe ubak bunda

Teuma neubeudoh teungku syiah
Neuek leupah lam istana
Ban sare troh lam meuligoe
Ubak putroe le neuhalo

Sajan meuteumeung syiah ngon putroe
Neumeumat jaroe sabe mulia
Teuma neuleueng peureumadani
Syiah neuduek le sigra-sigra

Teuma geubet ranup lam puan
Lheueh nyan makanan jabet keuruma
Teuma neumakeuen tuan syiah
Ate teuhah dalam dada

'Oh lheueh makeuen dum peunajoh
Dendayang boh ranup sigra
Teuma geubet ranup lam karah
Intan neutatali ngon peurmata

'Oh lheueh syiah ranup geubri
Tuan Siti neumeuhaba
Putroe tanyong ubak syiah
Hobu langkah keunoe teuka

Teungku peugah ubak kamoe
Neukheun jinoe lon ngo nyata
Teuma seuot tuan syiah
Nyang troh langkah lon bak gata

Ulon beuklam kumeulumpoe
Teuka bak kamoe Rasul anbia
Lon lumpoe teuka Nabi Muhammad
Neuyue peubeuet aneuk gata

Putroe Baren aneuk junjongan
Nibak laman neuyue aja
Neuyue peubeuet bak lon tuan
Rasul Tuhan meunan kata

Ban putroe ngo haba syiah
Neukheun pantah neuboh dawa
Wahe teungku tango lon peugah
Nyoe lon kisah ubak gata

Aneukku putroe cit nyan sidroe
Pakri jinoe talakee ba
Di lon han kubri aneukku cut
Takeumeumng peubeuet uleh gata

Teungoh rindu mayoh ate
Hankeu lon bri ubak gata
Adat barangkrip han lon bri
Tapoh matepi lon rela

Kareuna aneukku goh lom seudang
Nyum bek leukang cre di mata
Siat nyum tan bak lon pandang
Bukon bubarang ate gila

Nyankeu narit tuan syiah
Ka lon peugah ubak gata
Bek talakee di lon han kubri
Baranggakri han kurela

Adat tapoh nyawong tasuet
Aneukku cut han kubri ba
Ban neudeungo haba putroe
Hireuen laloe syiah raya

Syiah kalon tahe keudroe
Neudeungo putroe meusuara
Teuma marit Syiah Kilan
Tango lon tuan putroe muda

Baren Miga rupa sambinoe
Kuba jinoe peubeuet aleh ba
Adat han tabripi cit lon cok
Peue teujalok lom di gata

Nyang got tabri lon ba jinoe
Meupeurunoe aneuk gata
Lom-lompi nyan cit tapeugah
Teungku syiah pungo gila

Nyang got jinoe jakleh riwang
Bek le wayang Teungku ngon hamba
Meuka han kubri peue faidah
Takeumeung ijazah Baren Miga

Tujoh seun matepi han kubri
Jak keumbali woe u tangga
Syiah deungo haba meunan
Beungeh yoh nyan dalam dada

Saket ate hana padoe
Jinoe putroe jadéh kuba
Jinoe kucok aneukteu putroe
Kuba jinoe ho nyang kucinta

Syiah neubeuet saboh hekeumat
Teungeut mangat Meureudum Rakna
'Oh neukalon putroe ka pangsan
Beudoh yoh nyan syiah raya

Teuma neucock putroe bangsawan
Syiah Kilan neutren sigra
Baren Miga ka neubaplueng
Neucok lam leumueng yoh teungeut ma

Neuba putroe ubak ayah
Sira neupeugah haba bunda
Tuanku ampon laman meuribee
Jaroe di ulee lon bandua

Nyoe leupeue tuanku putroe sambinoe
Lon cok bunoe bak teungeut ma
Putroe beungeh amat sangat
Lon boh hekeumat saboh do'a

Raja deungo haba syiah
Kon beurakah bit nyoe beuna
Teuma neukheun haba sipatah
Ubak syiah teungku peundita

Teungku tapeubcuet aneukku sidroe
Bak meuligoe nyang kucinta
Syiah seuot pantah-pantah
Insya Allah po meukuta

Jinoe lon ba ho nyang titah
Idin langkah nibak raja
Teuma seuot raja sipatah
Han peue salah neupeuhamba

Teuma neutren teungku neuwoe
Lheueh meumat jaroe deungon raja
Neuba sajan tuan putroe
Bak meuligoe nyang indah rupa

Meuligoe saboh sama teungoh blang
Syiah datang keuman sigra
'Oh sare troh u meuligoe
Neupeubeuet putroe Baren Miga

Neucok ngon loh saboh u jaroe
Neukheun jinoe beuet aleh ba
Umu lhee uroe syiah peubeuet
Han jitem jeuet meusibanja

Bek an sibanja sikrakpi tan
Beungeh tuan syiah raya
Syiah Kilan ka teusureut
Sabab han jeuet beuet aleh ba

Teuma neucarot sireuta beungeh
Ate paleh batat raya
Lhee uroe sabe lam kupeubeuet
Sikrak han jeuet meualeh ba

Pakri si jih nyoe sapeue han leupah
Meusaboh harah han jitem meusra
Meunan narit Syiah Kilan
Neumarah tuan Baren Miga

Putroe seuot teuma sipatah
Sireuta beungeh hu ngon mata
Tango kamoe Syiah Kilan
Pakon meunan neumeuhaba

Hana pike dalam ate
Miseue bangke narit gata
Narit teungku teubiet lam pawo
Kon meutako gata tuha

Pakon teungku meunan neupeugah
Padumna cidah eleumee gata
Eleumee teungku troh peungeutahan
Eleumeeteu tan lon eu rupa

Adat meuna teungku eleumee
Han dumnoe kee teungku peuhaba
Kutanyong saboh masalah
Tacuba peugah teungku di gata

Kon lam kitab dalam Quruan
Masalah nyan dalam aleh ba
Peue hareutoe takheun aleh
Tohkeu takreh nyang takheun ba

Peugah beurijang teungku pangulee
Nak meusah kee syubhat raya
Meunyo han jeuet masalah nyan
Hana iman teungku di gata

Ban neudeungo haba meunan
Syiah Kilan beungeh raya
Putroe kalon beungeh teungku
Neukheun laju ka na peukara

Peue ban teungku beungeh lagoe
Peue hareutoe peugah sigra
Pakon beungeh peue faidah
Han jeuet tapeugah meualeh ba

Peue cit alem gata syiah
Lom ngon meugah atueh donya
Meunyan sikrak han jeuet tapeugah
Teungku beurakah eleumee hana

Maken beungeh hana padoe
Neungieng bak putroe hu ngon mata
Teungku neukheun ubak bileue
Tatueng keunoe kitab nyang na

Meunyo han jeuet nyan jibeuet le
Kukoh lihe kupeufana
Teuma seuot Putroe Baren
Bukon canden bak meuhaba

Bek tahirpon kitab Allah
Kitab ayah ulon rela
Nyan kitab du taba keunoe
Tapeubeuet kamoe uleh gata

Teuma marit tuan syiah
Bukon beurakah Baren Miga
Panc di du kitabpi tan
Patkeu tuan soe peuhaba

Meunyo hana ban lon peugah
Ingat piah kupeunyata
Meuna euntreuk ban lon peugah
Tatheun kuplah ubak muka

Teuma seuot tuan bileue
Baranggapeuc lon bicara
Teuma marit tuan putroe
Ingat keudroe nyan di gata

Tango kamoc hai tok bileue
Bek teumeui-meui that kreueh jungka
Jak tasurot nyan taboh droe
Meukreueh gigoe kuteumcung tampa

Bileue deungo tuan putroe dhot
Yo teumakot ureueng tuha
Teuma jijak suroh syiah
Jak cok di rumoh kitab raya

Ban sare troh u rumoh syiah
Jiek leupah sigra-sigra
Lapan droe ureueng nyan jak sajan
Suroh tuan teungku peundita

'Oh troh u rumoh ureueng lapan
Jimita tuan kitab raya
Leupah jiek ureueng lapan droe
Leumah kitab nyoe di atueuh bara

Teukhop di yup beulangong beusoe
Ureueng lapan droe teuma hila
Teuma jieu kitab Allah
That bit sosah han jeuet tabaca

Kitab raya hana bagoe
Ureueng lapan droe pueh ek jiba
Ban sare troh u meuligoe
Jijok bak Putroe Baren Miga

Putroe neulop kitab Allah
Neuhei syiah jinoe sigra
Hoka gata teungku syiah
Kitab ayah jak tabaca

Titekpi han barehpi tan
Toh pakri ban jeuet tabaca
Ban syiah eu kitab Allah
Meugrak tuboh yo anggeeta

Putroe neukheun peurab keunoe
Bak kitab nyoe tapeubeuet hamba
Neujak rijang bek yo asoe
Tapeubeuet kamoeuleh gata

Syiah Kilan ngo narit putroe
Neukheun meunoe pantah sigra
Insya Allah tuan putroe
Ulon pakoe ban kheun gata

Han kubantah troh an dudoe
Ulon pakoe atueh jeumala
Gantoe ajimat ulon seuon
Meunan bangon narit gata

Putroe seubot alhamdulillah
Beumeutuah teungku gata
Jinoe simak ulonteu beuet
Keunoe beurab taduek gata

Syiah peurab duek meuneuntang
Kitab neupandang bube raya
Teuma putroe peubeuet syiah
Phon neukisah neubeuet do'a

Nyoeban lafai do'a neubeuet
Tango lon seubot meusibanja
A l-lahumma salli 'ala Muhammad
Wa 'ala ali Muhammad

A l-lahumma akhrijni
Mina zulumati l-wahmi
Wa akrimni bi qawlika
A l-lahumma iftah 'alaina

Wansyur min haza inni ammuka
Birahmatika ya arhamha r-rahimin
A l-lahumma naggi ila tariqat na
Nyankeu do'a putroe neubaca

Lheueh neubeuet do'a neurahop jaroe
Seulaweuet pujo abeh dumna
Lheueh nyan neuseubot ngon bismillah
Neupubeuet syiah ulama raya

Putroe Baren neubaca kitab
Yo meukhap-khap syiah peundita
Teungku simak kitab Allah
Putroe di babah jeuet neubaca

Cit ka maklum ijazah Nabi
Abeh neutukri lafai ngon makna
Nyang musyeuke dum neutakwi
Nyang teubuni neupeunyata

Lafai di babah sang geuato
Makna neuhambo sang meutia
Surah meukeutum sangat tajam
Ceureudek fam Baren Miga

Sangka teuduek surah neuboh
Ngon su haloh tamse biula
Lagam jitren bagoe bangsi
Ladat beureuhi ate suka

Tujoh blah bagoe balek surah
Tahe dahsyah syiah ulama
Tango suara hireuen laloe
Siploh bagoe nibak biula

Neulafai kitab hana gante
Syiah tahe deungo suara
Teukeudi Allah peurintah Tuhan
Nyang milek dum alam donya

Umu lhee buleuen putroe bri fam
Abeh maklum bansineuna
Eleumee peuet blah abeh maklum
Meufom bandum syiah raya

Tapeuse hadih eleumee pakeh
Dumpeue sareh jeuet neubaca
Jeuet keu alem teungku syiah
Mohon langkah woe u tangga

Putroe seuot han peue salah
Meunyo talangkah sep meumada
Jeuet ka taduek jinoe bak teumpat
Jak woe leugat nyan u tangga

Syiah neuwoe teuma u nanggroe
Tinggai putroe lam istana
Neuduek sinan hana laloe
Lam neupujoe keu Rabbana

Neubeuet Quruan dum neulafai
Hana sagaipi na reuda
Kari tujoh lagee le ban
Suara tuan sang biula

Suara mangat hana bagoe
Siulah proe su syeuruga
Bangon na cit budiadari
Suara Siti Baren Miga

Ladat beureuhi suara mangat
Tamse ibarat aneuk syeuruga
Bahkeu dumnoe teuduek siat
Laen riwayat lon calitra

Amma bakdu keumudian dudoe
Lon kisah Putroe Baren Miga
Meuwoe riwayat maneu sajan
Putroe bangsawan Meureudum Rakna

Ban teukeujot nibak pangsan
Neueu ka tan Baren Miga
Putroe beungeh muka mirah
Abeh neumarah syiah ulama

Jicok aneukkee ka jibaplueng
Hareuga jituen Baren Miga
Jitueng ijazah aneukku putroe
Syiah pindoe tan bicara

Kee jipeungeut rasa jipoh
Aneukku saboh teuma jiba
Le bicara that beudawi
Kee jitaki syiah geusula

Teungku paleh that beurakah
Jitueng ijazah Baren Miga
Putroe beungeh gundah han ban
Sang lakukan ureueng gila

Teuma neubuka saboh peutoe
Neucok asoe peue hade na
Dumna peukayan alat keurajeuen
Neungui tuan bansineuna

Neusok siluweue meuseulipok
Bajee neusok meukasab Roma
Ngon tangkulok seulap bayong
Ija kasab mbon palet bak dada

Neulhat ngon ganja nibak keuieng
Di jaroe peudeueng bube raya
Teuma neutren lam meuligoe
Laju neupeutoe ubak raja

Ate saket hana bagoe
Neumeung jak kheun proe ubak raja
'Oh ban sare troh nyan u rambat
Raja neudeelat sigra-sigra

Deelat tuanku judoku putroe
Tagantoe kamoe bak ri rupa
Ala keurajenen abeh sibagoe
Hokeu jinoe keumeung jak gata

Putroe seuot raja ranyong
Ate meubeung-beung beungeh raya
Pakon tuanku tanyong meunan
Aneuk Ion tuan ho ka neuba

Aneukku putroe ho neubaplueng
Peugah rijang po meukuta
Poteu seuot tanyong putroe
Aneuteu sidroe ka teungku ba

Putroe Baren ka bak syiah
Neutueng ijazah aneuk gata
Sabet tuanku ban neupeugah
Nyankeu gadoh kamoe gila

Putroe deungo haba meunan
Beungeh yoh nyan hu ngon mata
Neupet mata neukap gigoe
Neutak jinoe poteu raja

Neutak di ulee sret u baho
Sang kulet tho keubai raya
Lhee go neutak raja meutuah
Peudeueng parah meukhan dua

Wahe putroe kureueng iman
Tatak lon tuan peue kareuna
Pakon tatak ulon sidroe
Gata putroe darohaka

Ban neudeungo haba sulotan
Teukeujot yoh nyan Meureudum Rakna
Kareuna neutakot adeueb dudoe
Page geupasoe dalam nuraka

Putroe teuduek lam meuligoe
Neutren neuwoe raja raya
'Oh troh bak teumpat batee keurajeu
Tahe hireuen sikutika

Teupike keudroe ka sret deurajat
Jithee lon that keuji nama
Utoh inong nibak agam
Kee jiantam han kareuna

Lheueh teupike na sijamang
Neumeuhei bujang sigra-sigra
Wahe bujang tajak keunoe
Lon peugah proe saboh haba

Bujang deungo sabda sulton
Neubeurjalan sigra-sigra
Ban sare troh keunan bujang
Seumbah datang junong sabda

Amon tuanku doli hadarat
Peuebu pakat po meukuta
Tango jinoe lon peugah proe
Peurdana meuntroe taseutot sigra

Sajan panglima tame banpeuet droe
Lon meung tanyong proe haba rahsia
Teuma bujang seuon titah
Jimeulangkah sigra-sigra

Ban sare troh bujang keunan
Jipeugah yoh nyan sabda raja
Tuan neupangge bak hadarat
Neujak siat bek trep jula

Lheueh nyan jijak pantah-pantah
Seumbah di bawah raja raya
Ampon tuanku po junjongan
Seumbah laman po meukuta

Peuebu haba neupangge kamoe
Neukheun jinoe lon ngo nyata
Sabda raja taek keunoe
Nibak kamoe saboh rahsia

Teuma jick peurdana meuntroe
Panglima peuet droe sajan sireuta
Teuma waki tandi bujang
Ek dum keunan tuha muda

Ban sare troh teuduek ngadap
Doli hadarat neumeusabda
Tadeungo he bujang meuntroe
Nibak kamoe saboh rahsia

Ulon sidroe teuboh mantong
Ureueng inong cang han tom nyang ka
Jitak bak ulee dcungon peudeueng
Ulon teugageueng reubah teurhanta

Jinoe ulon tanyong padan
Takheun tuan toh bicara
Teuma seuot peurdana meuntroe
Panglima peuet droe le peusuna

Tango kamoe po junjongan
Nyoe na padan po meukuta
Patot tuanku taboh rante
Jaroe gaki taboh singkla

Kareuna putroe darohaka that
Patot taglap jinoe sigra
Adat meurakyat tapoh mate
Taboh bangke atueuh sula

Meunan tuanku tahareutoe
Gaki jaroe taboh singkla
Meunan padan ureueng peuet droe
Jiyue glap putroe jinoe sigra

Le that fitnah jiboh laku
Dum jingadu ubak raja
Banpeuet droejih sapeue pakat
That khianat boh reuncana

Han ek jieu jih banpeuet droe
Peurdana meuntroe ngon panglima
Kareuna napsu han ek sampoe
Jalang bisoe ba peusuna

Jikeumeung meu'en deungon putroe
Han ek sampoe napsu hawa
Kareuna raja jareueng that neuwoe
Jikeumeung gantoe le panglima

Hana neutem putroe bangsawan
Takot salaham bak Rabbana
Nyankeu sabab jiboh fiteunah
Jimita ilah jiboh daya

Masa neuseutotjih banpeuet droe
Meunankeu proe jibicara
Jiyue boh lam glap putroe bangsawan
Ubak sultan raja raya

Hana patotjih nyan peuet droe
Ie jaroe putroe le that jirasa
Pihak napsu han ek sampoe
Siploh bagoe jeuet jidaya

Raja neupateh peurdana meuntroe
Han neutupeue jih nyan peusuna
Raja yue cok tuan putroe
Jak glap jinoe uluh gata

Teuma jijak rijang-rijang
Hanajisayang meusiblah mata
Banpeuet droejih sigo datang
Jak cok bintang dalam istana

Ban sare trohjih banpeuet droe
Ubak putroe le jihala
Teuma marit peurdana meuntroe
Deungon putroe jimeuhaba

Tango po cut kamoe peugah
Harap di bawah patot meureuka
Gata po cut raya salah
Suroh langkah jinoe bak raja

Gata neuyue tueng nibak kamoe
Tajak jinoe keudeh sigra
Putroe deungo haba meunan
Neumarit yoh nyan ro ie mata

Neuthee meureuka bak hadarat
Teumakot that pucat muka
Neumoe yoh nyan meusok-meusok
Putroe ilok ro ie mata

Pike keu untong geuboh rante
Jaroe gaki geuboh singkla
Teuma neujak putroe leugat
Trok bak deelat poteu raja

Neudong di keue doli hadarat
Raja beungeh that hu ngon mata
Putroe neudong neutop ulee
Kareuna malee nibak raja

Teuma raja kheun bak meuntroe
Kaikat putroe kaboh lam singkla
Ban neudeungo haba meunan
Teukeujot yoh nyan putroe muda

Meuntroe paleh panglima bajeueng
Nyankeu ureueng ba peusuna
Ban jideungo meunan hareutoe
Rante beusoe jicok sigra

Teuma jidrop tuan putroe
Peurdana meuntroe tan bicara
Putroe neuiem hana kalam
Jaroe jireugam le panglima

Nyang na neumoe meusok-meusok
Meuneupreh trok mawot teuka
Putroe teutap nyan neuiem droe
Jiboh taloe le panglima

Nyang na neukheun alhamdulillah
Pujo Allah Tuhan Nyang Esa
Geuboh rante nyan bak gaki
Kheundak Rabbi keunong meureuka

Geuboh bak jaroe taloe puta lhee
Geuboh bak singkee puta dua
Geuboh bak takue lom ngon pasong
Geuboh bak lambong klah teumaga

Jiboh lam glap seupot seupeuet
That keulumat hana tara
Teuma jiboh on geulatang
Meuntroe suang that ceulaka

Sidom seurabee ngon geumeutoe
Jipeusaho dum nyang bisa
Kala limpeuen unoé jangat
Jiboh lam glap dum simua

Jipeuduek ateueh tuan putroe
Sidom sinaroe nyang bisa-bisa
Sidom apui sidom mirah
Nyang that juah limpeuen ngon kala

Abeh jikap badan putroe
Peurdana meuntroe that ceulaka
Uleue limpeuen kala peusan
Abeh tuan dum jimita

Nyandum pie meuntroe bajeueng
Mit na ureueng sibagoenya
Hana sayangjih meubacut
Nyandum-dum buet jikeurija

Teugoh ka neuyue uleh sulotan
Jipeubuet tuan han jikira
Di jih nyang jeuet jipeulaku
Sabab napsu han troh pinta

Jipeusuna raja sidroe
Jiglap putroe pantah sigra
Rajapi salah akai kureueng
Asoe leumueng tatem enaya

Meuinong tak padumna adat
Meukulet jangatpi han luka
Padumna bisa jikap le ikan
'Oh tapeureulan mayoh meurasa

Ka meuploh thon tameueh sapat
Hana teuingat nekmat tarasa
Kureueng bicara akai budueng
Ka meuploh thon tameueh dua

Kri han teuingat keu guna putroe
Dum-dumnan bagoe neuusaha
'Oh taeh malam neuramah kulet
Adat nyang saket mita peunawa

Hana teuingat putroe taguen bu
'Oh tameunapsu hana meudawa
'Oh watee tawoe gaki jisrah
Adat nyang payah jipot ngon ija

Sijuek jitop hugop jipeuhah
Hana ek leumah guna bak raja
Teutap putroe dalam ikat
Neiduek lam glap seupot buta

Dawok neumoe sinan sidroe
Malam uroe hana reuda
Bu han sapeue ie tan sagai
Pike keu hai ro ie mata

Nyang na neuseubot ahad ahad
Allahussamad nyan neubaca
Kala limpeuen abeh jiweh
Han jitem coh gadoh bisa

Jangat geumeuto sidom seurabee
Bisa han le bansineuna
Jikap han jitem abeh jiminah
Sabab meutuah putroe muda

Sidompi jiplueng han sapeue le
Ladom mate hilang nyawa
Peurdana meuntroe lheueh jiboh nyan
Jiweh sinan sigra-sigra

Pinto jitop jiboh gunci
Jeuheut that bagi si ceulaka
Jiweh di jih tinggai putroe
Teuduek keudroe ro ie mata

Teukeudi Allah peurintah Tuhan
Bangta Sulotan lon calitra
Bangta teungeut tujoh uroe
Han soe peugoe aneuk raja

Tujoh uroe tujoh malam
Sikeujap han jitem jaga
Putroe geurante neutheepi tan
Droe nyan pangsan teungeut indra

Sare jaga bak beuradu
Duek teupako wet ngon sila
Na sikeujap Bangta pioh
Dendayang boh ie₄ srah muka

Lheueh srah muka Bangta Sulotan
Lakee makanan ubak bunda
Ma tabri bu keu lon bacut
Pruet lon that deuek hana tara

Teuma dendayang jibet idang
U hadapan Bangta muda
Bangta neukheun han kupajoh
Meukon maku boh han kurela

Teuma seuot dendayang sidroe
Jipeugah proe ubak Bangta
Po cut bunda ka lam ikat
Geuboh lam jrat padum lama

Jeh 'oh lawet ka tujoh uroe
Mateu sidroe geuglap le raja
Banta deungo haba meunan
Beungeh yoh nyan hu ngon mata

Soebu saleh rante makee
Kuplah ulee beukah dua
Po cut nyang rante ayahneu putroe
Ayahneu sidroe raja raya

Ban Bangta ngo haba dendayang
Neutren rijang pantah sigra
Teuma neujak laju leugat
Troph ubak had geudong bunda

Neutrom pinto abeh beukah
Bangta gagah that peurkasa
Teuma neutamong laju u dalam
Meuteumeung yoh nyan deungan bunda

Neuseumbah neucom troh bak teuot
Ie mata sret Bangta muda
Teuma neupeulheueh dumna taloe
Bangta sidroe beungeh raya

'Oh lheueh neuploh rante
Neutanyong bak putroe peue kareuna
Pakon gata ma meutuah
Pakon salah bak ayahda

Peue na salah gata bak du
Lon eu laku adeueb seksa
Peugah he ma jinoe bak lon
Kulakee ampon salah gata

Pakon geurante gata lam glap
Peuebu sabab teumeureuka
Wahe aneuk Bangta Sulotan
Lon salahan bak meukuta

Sabab kutanyong adoeteu putroe
Jeh 'oh uroe han meuho ka
Teuma neupeugah ubak syiah
Neutueng ijazah adoe gata

Ban kudeungo neukheun meunan
Beungeh lon han ban dalam dada
Hana teuingat akai lon ka dak
Duteu kutak di keupala

Lhee go kutak peudeueng patah
Nyankeu salah asai mula
Nyankeu aneuk nyang jeuet meunoe
Geuglap kamoe nyan kareuna

Teuma marit Bangta Sulotan
Neukheun yoh nyan ubak bunda
Wahe po ma beudoh jinoe
Jak udeh tawoe dalam istana

Beudoh neuwoe bek le sinoe
Soh meuligoe hana gata
Kuthee gata bunoe lon woe
Jeh 'oh uroe geuglap po ma

Adat lon thee ma teungku droe
Kon meunoe bagoe geupeugot gata
Bah lon gantoe keunong rante
Gata han kubri geupeuseksa

Insya Allah ngon tulong Tuhan
Ek lon sagang bek meureuka
Jinoe teukeudi lon theepi tan
Keusalahan deesya gata

Beudoh neuwoe rijang sinoe
Bak rueng kamoe po ma neuwa
Putroe deungo haba meunan
Beudoh yoh nyan sigra-sigra

Reubah reuboh leumoh badan
Pucat tuan ngon ie muka
Tujoh uroe tujoh malam
Sianeuk tan bu neurasa

Han sigeutu ie na neujep
Droe nyan galeb ro ie mata
Dendayang bri bu jisuleueng
Dalam reukueng doe meucula

Han ek leupah reukuengneu doe
Miseue duroe meunan rupā
Hana sianeuk bu na neu'uet
Di dalam pruet ka meuputa

Pruetneu lipeh badan pijuet
Sang neukhaluet meunan nyum rasa
Sianeuk bu hana neupajoh
Pijuet tuboh leumoh raya

Uroe malam dawok theun droe
Sira neumoe ro ie mata
Teuoh keuuntong roh lam rante
Malee keuji ateueh donya

Nyankeu sabab bu han neupajoh
Dawok gundah ro ie mata
Badan layee atot leumoh
Reubah reuboh keurawat pha

Buet lam teuduek jaroe u likot
Dumna atot ka meugisa
Urat ceukang meugrakpi tan
Keuboh badan jeuep anggeeta

Euncit taloe dum geukat
Han jeuet teupat ceukang raya
Bangta Sulutan cok neububoe
Laju neupuwoe sigra-sigra

Teuma neuba jak peumanoe
Neupleu asoe jeuep anggeeta
Teuot badan neuboh beudak
Jaroe neurinthak le cut Bangta

Ka neuurot ubak badan
Teuploh yoh nyan urat anggeeta
Abeh neuurot neupeuteupat
Dumna urat nyang meusingkla

Neupleu kalang dum neupeugleh
Suci abeh jeuep anggeeta
Teuma neuboh ngon ie muko
Bangta cuco atueh bunda

'Oh lheueh manoe ngui peukayan
Salen basahan bak anggeeta
Sare leungkap dum u asoe
Puleh putroe miseue nyang ka

Jibeudoh seuri muka rumeh
Han le beungeh putroe muda
Teuma neungui minyeuk ulee
Nyang mangat bee meunyeuk ata

Sare abeh dum sinaroe
Bangta peuwoe lam istana
Troh u rumoh lam meuligoe
Muda samlakoe neumeuhaba

Wahe po ma tamakeuen jinoe
Sajan kamoe sapat dua
Pruet lon deuek that hana bagoe
Tujoh uroe ma lon tapa

Lon preh gata bri makanan
Lon laparan hana tara
Teuma marit tuan putroe
Han di kamoe bijeh mata

Han kupajoh makanan di lon
Meugoh ampon bak meukuta
Makeuen gata aneuk meutuah
Ma gata bah dudoe teuma

'Oh lheueh ampon kamoe bak du
Lon pajoh bu sajan gata
Teuma seuot Bangta Sulotan
Bek gundahan wahe po ma

Lon peumeuah gata bak du
Jak pajoh bu jinoe sigra
'Oh lheueh makeuen lon lakee ampon
Gata kapeutren meuah dessya

Sangkira han geupeuampon
Tadeungo lon wahe po ma
Bah lon top du kupeumate
Beunyo han le ampon gata

Lheueh mate du teuma saboh
Lheueh nyan kupoh gata po ma
Lheueh nyan teuma kupoh adoe
Teuma kutop droe mangat fana

Bahle mate nyan beuabeh
Tuboh lapeh tan bahgia
Meunan narit ma lon peugah
Bahle kupoh duku raja

Jak duek keunoe tamakeuen bacut
Di lon deuek pruet kupreh gata
Meunyo han neumakeuen sajan kamoe
Beuhareuem bu nyoe han kurasa

Ban putroe ngo haba meunan
Neiduek yoh nyan sigra-sigra
Teuma neumakeuen dua sapat
Ate mangat dalam dada

'Oh lheueh makeuen geucok idang
Marit yoh nyan Bangta muda
Udeh he ma jinoe bak du
Tajak laju sinan dua

Ulon dilee gata di likot
Bek tatakot tajak lanja
Teuma jiboh ranup lam karah
Nyang meutatah meupeurmata

Teuma jicok siwah barat
Laju jilhat sigra-sigra
Han got baten Bangta Sulotan
Jimeung top tuan dujih raja

Meunyo han ampon deesya ibu
meunan laku Bangta keurija
Siwah jilhat nyan bak pinggang
Bangta Sulotan beungeh raya

Teuma neutren di meuligoe
Maneu putroe sajan neuba
'Oh sajan troh bak hadarat
Bangta deelat sigra-sigra

Raja sambot pantah rijang
Neueu birang Bangta muda
Wahe aneuk Bangta Sulotan
Ampon sikalian barangpeue deesya

Raja neuplueng laju-laju
Malee sipu aneuk ka raya
Neuweh rijang neusurot u likot
Ate teumakot neukalon Bangta

Rijang neusambot neukheun ampon
Deesya bak lon deungon bunda
Teuma neupeurab tuan putroe
Neubet jaroe ateueh jeumala

Ampon tuanku deesya lon tuan
Nyang salahan bak meukuta
Sireuta seumbah meucom di teuot
Lom neusambot meuah deesya

Raja sambot seumbah putroe
Ampon bak kamoe barang deesya
Teuma neumarit haba sipatah
Judo meutuah meubahgia

Tango lon peugah tuan putroe
Gata sidroe keunong meureuka
Sabab fiteunah peurdana meuntroe
Panglima peuet droe ba peusuna

Teutapi jinoe lon kheun bi'at
Lon amanat ubak gata
Bek takheun bak Bangta Sulotan
Nyawong gop tuan jikeulua

Got tuanku han lon peugah
Ampon di bawah po meukuta
Tuanku neumbri keu lon ijazah
Jinoe lon peugah bak sroepada

Tuanku di lon han le kuputroe
Malee kamoe atueuh donya
Tuanku meukawen ngon putroe laen
han lon ngeuren dum nyang hawa

Meubek tuanku lon neutalak
Keunong timplak bak Rabbana
Neubri idin jinoe lon khaluet
Sira preh mawot ajai teuka

Han lon pajoh le makanan
Idin junjongan lon jak tapa
Raja seuot teuma sipatah
Insya Allah han meungapa

Han peue takhaluet gata jinoe
Idin kamoe he nang nyawa
Di lon jinoe tuan putroe
Lon peugah proe ubak gata

Di lon han le kumeukawen
Ngon nyang laen dalam donya
Sep ngon gata lon meukawen
Ureueng laen han lon hawa

Kalee na untong Po tallah bri
Budiadari dalam syeuruga
Ngon nyan dudoe lon meunikah
Kalee na tuah Po karonya

Jinoe meung khaluet idin kamoe
Jakleh tawoe u istana
'Oh lheueh raja idin neubri
Tuan Siti teuma gisa

Neuseumbah raja com di gaki
Woe keumbali sigra-sigra
Laju neujak teumpat khaluet
Keunan neulop putroe muda

Teumpat seupot keulumat that
Sidroe meuhad duek di sana
Neukurok tanoh 'oh lot badan
Neiduek tuan meuseunia

Uroe malam sinan teutap
Dawok ibadat keu Rabbana
Ate mayoh pujoe Tuhan
Sikeujap tan na tom reuda

Dawok meurateb ngon seumbahyang
Uroe malam nantiasa
Meunankeu buet baranggajan
Putroe bangsawan dalam takwa

Umu tujoh thon putroe khaluet
Han meubacutpi na reuda
Dalam tujoh thon putroe khaluet
Teuka mawot ka troh masa

Suroh Tuhan Rabbon 'Alamin
Malaikat tren nyan u donya
Jibrai tren nyan u bumoe
Ubak putroe neupeuteuka

Sajan 'Izrai malek mawot
Suroh Hadarat nyan bandua
Geuyue cok nyawong hambaNeu sidroe
Nyawong Putroe Meureudum Rakna

Ban sajan troh dalam khaluet
Malaikat teuma meusabda
Neumeubri saleuem deungon putroe
Bandua droe sama-sama

Assalamu'alaikum ya waliyullah
Kamoe meulangkah ubak gata
kamoe nyoe tuan malaikat
Titah Hadarat tren u donya

Tuhan neupeuet keu gata saleuem
Mayoh deundam Allah Ta'ala
Gata troh had bak uroe nyoe
Tawoe Jinoe bak Rabbana

Neuyue pinah lam donya nyoe
Tawoe jinoe nanggroe baka
Putroe seuot malaikat
Bit Hadarat yue tueng hamba
Jikalee bit alhamdulillah
Han peue salah ulon rela
Ulon minah bak nanggroe nyoe
Jinoe lon woe bak Rabbana

Teuma neumoe putroe bangsawan
Weuehneu tuan keu aneukda
Weueh keu aneuk bandua droe
Bangta ngon Putroe Baren Miga

Teuma teumanyong malaikat
Pakon tamoe that kueu gata
Saleh han rela hukom Tuhan
Pakon teulindanteu keu donya

Pakon tamoe nyang jeuet gundah
Cuba peugah peue kareuna
Pakri tawueh keu donya nyoe
Kueu tamoe hana reuda

Putroe seuot teuma sipatah
Hana gundah lon keu donya
Nyang jeuet lon moe bacut teulindan
Aneuk lon tuan Baren Miga

Sangkira na aneuk lon sinoe
Jimueng kamoe Baren Miga
Teuma marit malaikat
Bek gundah that aneuk hana

Ulon jak tueng aneukteu sidroe
Lon ba keunoe ubak gata
Lheueh neukheun nyan malaikat
Gadob siat nyan bandua

Ban sare troh lam meuligoe
Ubak putroe le neuhalo
Tatop Quruan tuan putroe
Kuba jinoe ubak bunda

Mateu jinoe abeh langkah
Tuhan pinah dalam donya
Putroe deungo haba meunan
Neutop Quruan sigra-sigra

Tapet mata tuan putroe
Beudoh keunoe ulon bawa
Putroe Baren mata neupet
Sare neubleut ka troh bak ma

Seun rot teudong le lam khaluet
Putroe sujud ubak bunda
Sajan neucom nyan di teuot
Tuan putroe sret ngon ie mata

Putroe sujud lakee ampon
Deesya ulon ma bak gata
Putroe seuot teuma sipatah
Ampon bak Allah bijeh mata

Wahe aneuk tango lon pagah
Han le langkah lon lam donya
Jinoe teupike keu rahmatullah
Abeh langkah cre ngon gata

Bak uroe nyoe aneuk kumate
Tuhan pangge lon lam donya
Bek tawueh-weueh keu lon mate
Aneuk boh ate talakee do'a

Do'a talakee nibak Rabbi
Peutang pagi bek na reuda
Uroe nyoe sineulheueh lon tapandang
Aneuk jeunulang cre ngon gata

Putroe Baren marit yoh nyan
Deungo lon kheun ban ma bak gata
Taba ngon lon ma teungku droe
Meunyo neuwoe bak Rabbana

Han le kuudep di lon sidroe
Neuba kamoe sajan gata
Teuma neuseuot tuan putroe
Deungo kamoe he aneukda

Gata aneuk raseuki mantong
He aneuk bungong jantong ate ma
Han jeuet lon me sajan-sajan
He bungong peukan asoe istana

Langkah panyang raseuki mantong
Bala sikureueng goh lom di gata
Bala sikureueng aneuk goh sampie
Tuhan sidroe nyang peunyata

Meunan leumali nyang lon pandang
Tuhan peutren nyan di gata
Putroe Baren deungo meunan
Neukheun yoh nyan ubak bunda

Bit ma han jeuet neuba sajan
Kheundak Tuhan Po Nyang Esa
Toh sikureueng ma neupeugah
Bala takisah lon ngo nyata

Tango aneuk jinoe lon peugah
Bah lon kisah ubak gata
Peurtama bala nibak Kadi
Keudua pake bak syeedara

Aduenteu poh gata sidroe
Jikoh takue uleh syeedara
Keu lhee bala bak Jibrai
Gata geujak ci jan lam rimba

Keupeuet bala jiprang nanggroe
Keulimong meuntroe di laot raya
Keunam bala nanggroe jen pari
Nibak kaphe asoe nuraka

Keutujoh bala nanggroe Mulabri
Roh bak kaphe seumbah beurala
Keulapan bala wahe putroe
Aneukteu lhee droe ka burak ba

Sikureueng bala teuma dudoe
Nibak Putroe Siti Nurela
Nyankeu bala aneuk goh sampo
Tuhan sidroe bri keu gata

Meugoh lom nyan bala sikureueng
Han jeuet kutueng sajan kuba
Putroe marit teuma sipatah
Kheundak Allah bri keu hamba

Ka bak azai masa dilee
Tuhan teuntee neupeurasa
Pakri tabah meunan bagi
Tuhan keutahwi dum peukara

'Oh lheueh marit aneuk ngon nang
Abeh peuneusan haba bala
Jinoe kueh han beudoh le
Dudoe page sigo jaga

Neumueng ulee bintang peureuseh
Teumpat neupeugleh bak eh bunda
Teuma neueh bak teumpat droe
Di leumueng Putroe Baren Miga

Neuyue top droe ngon ija puteh
Peukayan leubeh bungong syeuruga
Sare seunang neuyue peuteupat
Malaikat teuma teuka

Dilee neuwoe bak Hadarat
Nibak khaluet putroe muda
Dum abeh tren malaikat
Titah Hadarat Tuhan Esa

Sare peunoh dalam khaleuet
Malaikat peuet sajan sireuta
Geujak tueng nyawong tuan putroe
Woe u nanggroe keukai baka

Geuduek lingka malaikat
Malek mawot teuntang dada
Sajan Jibrai dua sapat
Malek mawot neutueng nyawa

Neutueng nyawong waliyullah
Deungon mudah teubiet keulua
Hana saket mangat badan
Nyawong neutueng di keupala

Lheueh nyan neucok nyawong nyang suci
Ubak Rabbi neume sigra
Jak peuseumbah bak Hadarat
Malaikat me dum nyang na

Nyawong geupeuek geuboh lam reuhab
Hireuen 'ajab putroe muda
'Oh lheueh mate tuan putroe
Nyawong geupeuwoe bak Rabbana

Geuarak nyawong dalam jannah
Geupeuleumah dengon syeuruga
Amma bakdu lon peuduek siat
Laen riwayat lon calitra

Bah teuduek nyan saboh ulah
Jinoe lon kisah Baren Miga
Ban neukalon maneu mate
Yoh nyan neumoe le putroe muda

Malaikat kheun ubak putroe
Bek le tamoe ro ie mata
Bek that gareb muda bangsawan
Hukom Tuhan beutarela

Jinoe bek tamoe beudoh jak woe
U meuligoe teumpat nyang ka
Tapet mata tuan putroe
Ulon peuwoe teuma gata

Baren Miga neupet jinoe
Malaikat peuwoe sigra-sigra
Teuma neubleut ka troh neuwoe
Lam meuligoe miseue nyang ka

Putroe Baren gundahneu tan
Pujo Tuhan hana reuda
Ban peurintah buet di Tuhan
Nyang peujeuet alam sigom donya

Ban peurintah han soe teugah
Buet di Allah bek meuleuta
La ilaha illallah
Tuhan peurintah alam donya

Kata sahib empunya rawi
Tango akhi lam katanya
Teutap putroe lam e meuligoe
'Oh troh neuwoe nibak bundanya

Jinoe teuseubot Bangta Sulotan
Neujak tuan saweue bunda
Nyang ka dilee geunap uroe
Muda samlakoe keunan teuka

Jak saweue ma dalam khaluwat
Meunan adat Bangta muda
Siuroe sigo baranggajan
Han tom tuanpi na lupa

Horeumat ibu ayah sajan
Bangta Sulotan meubahgia
Bak uroe nyan laju neujak
Neutamong bak khaluet bunda
Ban sare troh droeneu keunan
Neueu yoh nyan tan le bunda
Neukalon bundaneu ka mate
Bangta moe le ro ie mata

Nyang ka dilee 'oh troh keunan
Marit yoh nyan ngon aneukda
Nyoe ka mate maneu sidroe
Muda samlakoe limpah dada

Neumoe jamong ma neupangkee
Neucom ulee troh bak muka
Neumat badan leumiek mantong
Baro nyawong nyan keulua

Teuma neuwoe ubak ayah
Nujak peugah mate bundā
Sira neumoe tahe gante
Ie mata ro sret bak dada

Ban sajan troh ubak ayah
Bangta peugah sigra-sigra
Wahe ayah du teungku droe
Ma lon putroe ka tinggai donya

Ma ka mate geutanyoe tinggai
Weueh lon sagai hana tara
Ban raja ngo Bangta peugah
Ile limpah ngon ie mata

Teuma neukheun pakri tabah
Kheundak Allah Po Nyang Esa
Nyang ka mate pakri tabah
Aneuk meutuah bijeh mata

Bah jipioh aneuk badan
Mateu tuan payah tapa
Sayang taeu geunap uroe
Mateu sidroe han sapeue na

Geutanyoe tapajoh dum makanan
Ma gaya han na jihawa
Sira neukheun nyan poteu sidroe
Ri neumanoe ro ie mata

Weueh keu judoneu ka mate
Beusot ate meugrak rasa
Teuma neujak laju leugat
Trok bak teumpat putroe tapa

Trok bak khaluet ka neutamong
Poteu jamong limpah dada
Teuma neucok putroe neupangkee
Neucom bak ulee trok bak muka

Neuboh lam leumueng neumat baho
Wahe judo tan suara
Gata mate sinoe sidroe
Tatueng kamoe sajan taba

Peue jeuet tinggai ulon sidroe
Gata putroe ka tabungka
Raja bae that meujamong
Sirasa nyawong nyum keulua

Ate sosah weueh neupandang
That bit sayang dalam dada
Teuma beudoh Bangta Sulotan
Peuwoe rijang mayet bunda

Ban sare troh u meuligoe
Peuduek jinoe sigra-sigra
Teuma neupeueh lam keuleumbu
Teumpat beuradu dilee nyang ka

Puteu raja marit jinoe
Tajak tueng Putroe Baren Miga
Tapeugah majih ka mate
Jak beudoh he Bangta muda

Bangta Sulotan seuon titah
Neumeulangkah bak syeedara
Sira neujak tahe gante
Ie mata ro hana reuda

Troh sikhan rot Bangta neujak
Teuma meurumpak tuan panglima
Panglima marit teuma sipatah
Pakon gundah po cut raja

Pakon po cut gata tamoe
Han tom meunoe dilee nyang ka
Peue dukaan po cut gundah
Cuba peugah ubak hamba

Ho neumeung jak po cut sidroe
Pakon neumoe peue kareuna
Teuma seuot Bangta Sulotan
Ma lon tuan ka tinggai donya

Maku mate dalem teungku droe
Kujak tueng Putroe Baren Miga
Bah lon jak tueng tuan putroe
Ulon gantoe langkah meukuta

Bangta deungo narit meunan
Neuwoe yoh nyan sigra-sigra
Leupah panglima jijak sidroe
Ubak putroe le jihala

Ban sare troh u yup meuligoe
Jihei Putroe Baren Miga
Wahe po cut tatop Quruan
Mateu tuan ka tinggai donya

Mateu mate po cut teungku droe
Jinoe tawoe sigra-sigra
Teuma seuot Putroe Baren
Pajan cut lem mate bunda

Pajan mate maku sidroe
Siri uroe dalem raja
Panglima seuot tanyong putroe
Jipeugah proe sigra-sigra

Saleh baroe saleh bunoe
Silap kamoe po cut raja
'Oh lon kalon cit hana le
Ka lheueh mate nyan teurhanta

Putroe tanyong nyan neusukreuet
Neuthee sulet jimeuhaba
Neueu lagee bak jimarit
Neuthee sulet si ceulaka

Jijakpi goh lom troh keunan
Panglima nyan sulet raja
Putroe Baren ureueng haloh
Dum ase deuh leumah nyata

Buet nyang goh lomi ka neutuban
Sikalian dum peukara
Panglima nyan neuthee fitnah
Droe ka leumah neueu rupa

Abeh neuthee nyang teubuni
Dum neutukri sulet beuna
Teuma marit tuan putroe
tango kamoe dalem panglima

Adat ka mate maku sidroe
Tahareutoe uleh gata
Tayue tanom ma beurijang
Gaseh sayang aduenku raja

Takheun bak ayah ngon bak dalem
Tayue tanom ma beusigra
Panglima deungo haba meunan
Jiwoe yoh nyan ubak raja

Ban sare troh bak hadarat
Panglima deelat sigra-sigra
Ampon tuanku syahi alam
Seumbah laman po meukuta

Lon tuan jak tueng tuan putroe
Han neutem woe Baren Miga
Aneukneu putroe that bantahan
Hana padan jimeudawa

Abeh lon peugah dum hareutoe
Han jitem woe ubak gata
Adat ka mate maneu sidroe
Neuyue hareutoe sigra-sigra

Neuyue tanom maneu rijang
Meutrep neucang barangsoe gata
Meunan narit tuan putroe
Ubak kamoe bunoe haba

Ban raja ngo narit meunan
Beungeh yoh nyan hu ngon mata
Antara jih teubiet lam tulang
Jilakee cang aneuk ceulaka

Han tom meunan di gop laen
Putroe Baren tan bahgia
Nyankeu aneuk that srang-manyang
Katanom ngon nang saboh keureunda

Raja meupot-pot that amarah
Keu putroe indah Baren Miga
Adat na teuka euntreuk jijak
Ok ka rinthak bak keupala

Kapoh mate ulee kaantok
Kamat bak ok dum ka hila
Bahle mate aneuk srang-manyang
Katanom ngon nang saboh keureunda

Kamat ngon kayee dum bak jaroe
Kapoh Putroe Baren Miga
Adat na teuka jijak keunoe
Nyan taseudoe di keupala

Aneuk paleh seutia tan
Han peue tuan tapeulara
Meunan narit poteu sidroe
Neucarot Putroe Baren Miga

Hana geutanom maneu putroe
Ureueng nanggroe le that teuka
Agam dara teuka jeuep gampong
Geujak kunjung putroe muda

Yoh masa nyan dum ka meupho
Ureueng moe bae kiam subra
Raja yue seutot ureueng binoe
Dum sinaroe tuha muda

Ureueng tuha soe peurunoe
Nyang muda moe hana tara
Pho meuguncang meuligoe pho
Sang peuraho bakat timpa

Aneuk jikeubah saboh sagoe
Ureueng binoe suroh raja
Nak bek bicah nyan meusak-sak
Pho meuhayak lam istana

Tumbok dada garo ulee
Ladom lagee pungo gila
Jilumpat-lumpat dum sinaroe
Ureueng binoe muda muda

Kayee di jaroe rata jimat
Jimeung poh meuhad Baren Miga
Bah teuduek nyan dilee siat
Dudoe lon sambat peutimang punca

Amma bakdu dudoe nibak nyan
Laen karangan jinoe lon rika
Na sidroe¹ ureueng di nanggroe Syam
Siti Hanban geuboh nama

Nyankeu raja ureueng binoe
Peutimang nanggroe mat neuraca
Siti Hanban han soe teuntang
Tarek geudubang hana tara

Peudeueng di jaroe bube on pisang
Ngon peunanyang na tujoh deupa
Leumah jieu ureueng mate
Jih nyan wali pangkat eelia

Ngon keuramat hana sabe
That juhari atueh donya
Ka tan wali nanggroe Bageudad
Jimeung beurangkat ubak raja

Keumeung jak kunjong ureueng mate
Ka jithee le balee raja
Saleh neutem tueng ulon sidroe
Kujak jinoe kaman sigra

Kadang geutem meukawen ngon kamoe
Ka tan Putroe Meureudum Rakna
Siti Hanban meunan pike
Jibungka le ubak raja

Jime sajan peurseumbahan
Alat peukayan jroh-jroh rupa
Jeuneh intan deungon pudoe
Bungong jaroe me keu raja

Jibeurjalan payah sangat
Rot jeuoh that hana tara
Sibuleuen jak 'oh nan jeuoh
Saleh trep troh bak geukira

Putroe seumbahyang dua raka'at
Seumbahyang hajat lakee do'a
Lheueh seumbahyang do'a bacakan
Ubak Tuhan meusempeuna

Tren fireuman nibak Hadarat
Malaikat peugang donya
Neuyue peukeuot urat bumoe
Tuhan sidroe bri karonya

Teuma putroe bungka leugat
Trok le siat ubak raja
Antara Syam deungon Bageudad
Sibuleuen di rot jak ngon guda

Pihak ade putroe keuramat
Trok le siat ngon siklep mata
Ban sare trok tamong leugat
Raja jideelat sigra-sigra

Peurseumbahan bungong jaroe
Poteu sidroe sambot sigra
Lheueh nyan geupeuek u meuligoe
Bak teumpat droe poteu raja

Ubak mayet tuan putroe
Laju neupeutoe junjong sigra
Sinan neudeuk ateuch kaso
Ureueng binoe le teuma teuka

Jak meuteumeung deungon putroe
Meumat jaroe tuha muda
Na sikeujap neudeuk sinan
Neutanyong yoh nyan Baren Miga

Putroe Baren hana sinoe
Hana lagoe lon eu rupa
Teuma marit dumna inong
Cuma tanyong putroe muda

Baren Miga hana sinoe
Jeh 'oh uroe hana teuka
Kamoe sinoe jeh 'oh lawet
Hana siblet lon eu rupa

Maneu mate neueupi tan
Han sipadan jeuheut bicara
Ka geujak teungpi han jijak
Kreueh tangkurak jimeudawa

Peue tayue preh kamoe sinoe
Adat na dudoe teuma teuka
Neuyue poh putroe dum ngon kayee
Ok di ulee neuyue hila

Meunan marit dum jipeugah
Putroe meutuah deungo calitra
Teuma rakyat lom jimeupho
Meuhubo-hubo lam istana

Leubam-leubum jitumbok droe
Dara pindoe pungo gila
Siti Hanban hireuen tahe
Jikalon pho lam istana

Amma bakdu teuma dudoe
Kisah Putroe Baren Miga
Peue nyang haba abeh neuthee
Neueu lagee buetan raja

Goh geutanom maneu sidroe
Teungoh geumoe kiam subra
Teuma neukheun bak dendayang
Jakleh datang kaeu sigra

Pakri laku peue na padan
Kamoe tuan keunoc sigra
Meureubok Barat Meureubok Silan
Jih nyan jantan adoe ngon po da
Putroe peungui bandua droe
Peukayan di asoc na yum sibara
Ikai peurmata subang intan
Cahyajih ban bintang rusa

Bungong sanggoi intan meukarang
Areuta peunulang nibak po ja
Nyankeu kusyik putroe meutuah
Saiden Syarifah jeuneh bangsa

Neubri ngon euncien bandua droe
Tuan putroe neupeuhamba
Putroe salen dendayang dua droe
Ngon sambinoe muda muda

Nyan peunulang nibak ayah
Soe peurintah putroe muda
Cit han tom cre baranggajan
Jih nyan tuan soe peulara

Sisyeedara bandua droe
Sajan putroe han cre sama
Sare leungkap ngui peukayan
Toe sipadan Baren Miga

Bangon rupa that peungaroe
Meujeulih budoe that got basa
'Oh lheueh jingui alat peukayan
Teuma beurjalan jih bandua

Jitren di rumoh bak meuligoe
Suroh Putroe Baren Miga
Teuma jijak laju leugat
Troh bak deelat poteu raja

Ban deumi troh 'oh gaki rinyeun
Lemah meubayeuen lam istana
Beudoh beurata dum sinaroe
Tuan putroe jeh ka teuka

Jime ngon kayee mat di jaroe
Jimeung poh putroe Baren Miga
Dum jijingeuk u leuen meuligoe
Jisangka putroe nyan ka teuka

Ladom jikheun kon nyan putroe
Dendayang pindoe bak ri rupa
Siteungoh kheun nyo siteungoh kheun kon
Beursalahan dua haba

Adat nyo putroe peue han kapoh
Geutanyoe suroh poteu raja
Teuma marit Meureubok Barat
Jikheun pakat bak syeedara

Wahe po da taweh jinoe
Geupoh geutanyoe dumgeu rata
Kayee di jaroe dum ka simban
Jiteumee antam geutanyoe teuka

Di gop meupakat dum sinaroe
Geupoh geutanyoe taweh sigra
Bek le taek u meuligoe
Peunyaket tabloe utang tapeuna

Udeh tawoe bek tadong le
Geupoh mate hilang nyawa
Teuma marit Siti Hanban
Ngon dendayang jimeuhaba

Hana putroe jijak keunoe
Jeh 'oh uroe hana teuka
Bukon jayeh kamoe sinoe
Di jih sidroe han jiteuka

Kamoe jayeh sang Yahudi
Jih sang nabi bako raya
Peue cit meugah that juhari
Tan sibagi na bicara

Dendayang seuot teuma sipatah
Tango kupeugah nyan bak gata
Tango kamoe he Yahudi
Lon jak tueng nabi keunoe lon ba

Sira jikheun nyan jiwoe leugat
Meureubok Barat sisyeedara
Ban sare troh ubak putroe
Neutanyong jinoe sigra-sigra

Wach ulon cuba peugah
Na troh langkah tapeuteuka
Treh ban napsu ulon meutuah
Cuba peugah lon ngo nyata

Teuma seuot dendayang dua droe
Deungon adoe sisyeedara
Wahe po cut muda bangsawan
Lon peugah ban ubak gata

Hana ase po cut badan
Geupreh tuan teuka gata
Kamoe po cut rab toe keumah
Geukeumeung poh nyan bandua

Kayee jimat dum sinaroe
Gata sidroe jimeung poh fana
Meunankeu narit dum meupakat
sigala rakyat lam istana

Po cut bunda goh geutanom
Teungoh geuhudom bansimua
Teungoh geumeupho lam jeuligoe
Ureueng binoe tuha muda

Teuma marit Putroe Baren
puteh licen asoe istana
Tamse donya ka kiamat
Lon ka troh had tren bak raja

Ban nyang untong pakri kubah
Bahle geupohpi lon rela
Putroe cinta saboh hekeumat
Pahlawan that hana tara

Lheueh nyan neungui ngon peukayan
Sileungkapan dum anika
Teuma neugrop di meuligoe
Bak u sinaroe abeh neuhila

Wie ngon uneun dum teureuban
Abeh tuan bak teue nyang na
Peue meulinteueng abeh neubet
Neutop u laot bansineuna

Meuligoe ngon laot han that jarak
Siploh uroe jak pasang guda
Ban sare troh tuan putroe
Neugrop rot sagoe neureuloh kuta

Meuhayak kuta putroe lumpat
Dumna rakyat abeh subra
Jisangka geumpa that meulinggang
Bumoe meuguncang meugisa-gisa

Sigala rakyat dum teumakot
Ie muka sret dumjih rata
Jiduek jidong reubah-reuboh
Rakyat kiroh agam dara

Jieu meuligoepi meuhapit
Rakyat teugeutit bansimua
Putroe Baren bumoe neuguncang
Ka meulinggang meugisa-gisa

Teukeudi Allah eumpa teudoh
Putroe ka troh u leuen istana
Neumat ngon peudeueng Bangta Sulotan
Putroe bangsawan that peurkasa

Ban jikalon putroe kha that
dumna rakyat abeh bungka
Nyang dilee plueng Bangta Sulotan
Di likot nyan poteu raja

Rakyat barollah agam inong
Plueng meudeungong ka jiguda
Peurdana meuntroe uleebalang
Jigrop rijang u lua kuta

Ladom meukeumat ucong pageue
Ija siluweue beukah rata
Nyang ladom jamprong dalam parek
Teungoh-teungoh ek u cong junga

Dalam parek suda pacang
Dum ureueng nyan tan binasa
Po tallah bri han luka asoe
Keuramat Putroe Baren Miga

Suda tajam han jitem lut
Patah krap-krup bansineuna
Meuligoe manyang na 'oh bak u
Jigrop laju hana reuda

Hana sidroepi na patah
Leubeh tuah Baren Miga
Dumna inong abeh 'ak-'euk
Meutuka aneuk jimeudawa

Nyan aneuk kee tame keunoe
Nyoe aneuk nyoe nyang di gata
Peue takheun kon mantong kiam
Di gata agam di kamoe dara

Yoh masa nyan jampu-bau
Han jan jieu jiplueng lanja
Bak cok aneuk nyang na gante
Sabab tahe le meutuka

Nyang tan aneuk han peu kheun le
Jiplueng sare dum jiguda
Ija sawak sret di badan
Jihiro tan dumjih rata

Han saboh le bandum jiplueng
Jieu peudeueng Baren Miga
Putroe neudong that peurasat
Neueu rakyat laen rupa

Ladom teulanjang badan teulhon
Plueng meuron-ron tuha muda
Putroe Baren di leuen meuligoe
Peudeueng di jaroe na tujoh deupa

Muka beungeh han tajeuet pandang
Barangri ensan yo meugeumpa
Teumakot rakyat dum sinaroe
Jikalon putroe hibat that rupa

Amma bakda dudoe nibak nyan
Meuwoe karangan laen calitra
Meuwoe kisah Siti Hanban
Nyang bayek ruman putroe muda

Ban jikalon lam meuligoe
Rakyat meukatoe plueng simua
Teuma marit Siti Hanban
Peue jeuneh nyan sangat subra

Abeh jiplueng dumna ureueng
Han soe linteueng Baren Miga
Bit han sakon aneuk bajeueng
Dumna ureueng hana guna

Siti Hanban jikeumeung tren
Putroe Baren neuek lanja
Ban sare troh u seuramoe
Putroe sambinoe meurumpok dua

Roh meuampeueng sinan meurumpok
Yoh nyan teukhok putroe muda
Siti Hanban sapa putroe
Neukheun bit ragoe bijaksana

Assalamu'alaikum wahe adoe
Nyoe 'oh uroe baro teuka
'Alaikum salam wahe da Ti
That juhari lon eu gata

Teuma marit Siti Hanban
Putroe Baren peuñgo haba
Peue ban gata putroe bangsawan
Trep that tuan keunoe teuka

Jeh 'oh lawet ulon sinoe
Bak uroe nyoe lon eu gata
Bukon jroh budoe that juhari
Han sibagi manusia

Mateu mate jeh 'oh uroe
Gata adoe tan seutia
Gata adoe hana eleumee
Kureueng malee jahe raya

Meujeulihpi tan nyak puteh lumat
Bit nyo jeuheut that peurangui gata
Teuma seuot tuan putroe Ti
That juhari gata po da

Marit leugat po da badan
Nyang na tatuban tacalitra
Sigo kucop kheun bak leugat
Bukon mangat that narit bak cutda

Kheun beuabeh nyang na tatkri
He po da Ti mangat that haba
Bah lon cop sigo lon seuot
That meupatot narit gata

Ka abeh narit po da badan
Sangkira han kehun bak lanja
Adat ka abeh dum hareutoe
Ingar keudroe kubalah guna

Fireuman Allah hana lon rawi
Hadih Nabi lon calitra
A d-dinu bi s-saifi
Deungo da Ti lon peuhaba

Kuat agama deungon peudang
Meukek tacang teudong agama
Sabet ulon takheun jahe
Gata kaphe tan agama

Cuba cai seuot meusipatah
Taeu kuplah di keupala
Di ulee kontroh u gaki
Kuplah da Ti beukah dua

Peue taiem mantong po da badan
Seuot tuan meutacuba
Meusigo treuk cuba seuot
Kutak meuhuet ulee gata

Siti Hanban yo teumakot
Di jaroe sret peudeueng raya
Teuma marit Putroe Baren
Po da canden tan suara

Peue gata han soe teuntang
Tarek geudubang hana tara
Nyoel pakon yo kueu atot
Peue tatakot yo sang geumpa

Gata meugah han soe linteueng
Dumna ureueng dalam donya
Nyoel pakon yo ho ka peudeueng
Gata linteueng ulon teuka

Hana lagoe nyan tapeugah
Kuteumee plah di keupala
Teuma jimarit Siti Hanban
Tango lon tuan adoe raja

Wahe adek lon kumasok
Jinoe kutaklok ubak gata
Jinoe kupateh han kubantah
Ban tapeugah kupeucaya

Putroe Baren ngo haba meunan
Marit yoh nyan sigra-sigra
Wahe po da peurab keunoe
Tameumat jaroe meuah deesya

Siti Hanban teuma peutoe
Jak mat jaroe Baren Miga
Meuah deesya po da jeunulang
Bunoe wayang tameuseunda

Teuma marit Putroe Baren
Nyang jroh canden asoe istana
Gaseh sayang po da badan
Tajak tuan kuseuranta

Tajak cok ie he po da Ti
Tame guci saboh nyang raya
Siti Hanban seuon titah
Hana bantah jak cok sigra

Ho putroe yue jijak leungat
Jitakot that keu Baren Miga
Siti Hanban sangat ahli
Jicok guci teuma nyang raya

Teuma jipeutren u leuen meuligoe
Ie jipasoe limong gunca
Lheueh jipasoe teuma jipeuwwoe
Tatang ngon jaroe guci raya
'Oh sare troh u meuligoe
Neukheun le putroe sep ka po da
Jeuetkeu dumnan po da badan
Udeh tuan peumanoe m

Teuma jiseuot insya Allah
Han peue salah jak udeh ta
Teuma beudoh tuan putroe
Jak peumanoe mayet bunda

Siti Hanban nyang peusuci
Neuple ie le Baren Miga
'Oh lheueh peumanoe suci badan
Neucriek gafan sigra-sigra

Gafan putroe tujoh lapeh
Meukasab meuh meupeurmata
Teuma neugantoe uleh putroe
Neuboh jinoe 'oh meumada

Dua lapeh gafan neuboh
Ija haloh puteh safra
Teuma neubalot tuan putroe
Lheueh nyan neupasoe dalam keureunda

Neutop keureunda ija pirak singgi
Keureunda Siti Meureudum Rakna
Keureunda indah yum sikatoe
Laen neugantoe le putroe muda

Neucok ceukeh pheuet gogajoe
Tuan putroe tarah keureunda
'Oh sare lheueh keureunda putroe
Teuma neupasoe mayet sigra

Siti Hanban mat di gaki
Tuan Siti bak keupala
'Oh lheueh neupasoe ka neuseumbahyang
Teuma lheuh nyan neupeutren sigra
Keureunda neupeuren di meuligoe
Mayet Putroe Meureudum Rakna
Leugat neume laju u kandang
Keureunda neutatang putroe muda

Ban sare troh ka neupeuduek
Bineh uruek sikutika
Lheueh nyan neupeutren dalam uruek
Putroe tamuek mat keureunda

'Oh lheueh neutanom beuet teuleukin
Putroe salihin lakee doa
Do'a abeh kakeu simpan
Beudoh tuan Baren Miga

Beudoh bak neuduek neukeucap-keucap
Peudeueng neumat tujoh deupa
Lheueh neutanom putroe bangsawan
Bangta Sulotan dudoe teuka

Rajapi sajan rakyat meukatoe
Jikalon putroe yo anggeeta
Teuma marit Bangta Sulotan
Neukheun tuan bak syeedara

Wahe adoe tatiek peudeueng
Dumna ureueng takot keu gata
Putroe deungo haba meunan
Neutiek yoh nyan peudeueng raya

Teuma neupeurab Bangta Sulotan
Meuteumeung tuan deungan syeedara
Putroe seumbah teuot aduen
Sireuta neukheun meuah deesya

Rakyat barollah dum meukatoe
Seumbah Putroe Baren Miga
Lheueh nyan marit tuan putroe
Tango kamoe dalem raja

Bangta Sulotan seuot yoh nyan
Cuba kheun ban lon ngo nyata
Wahe aduen nyang meutuah
Tabri seudeukah uleh gata

Keu seudeukah maku putroe
Dua blah peutoe meuh di po ma
Nyan meuh huri dua blah peutoe
Tajok jinoe dum beurata

Teuma Bangta bri seudeukah
Meuh barollah meugunca-gunca
Deureuham dina dua blah peutoe
Neupeujaroe le cut Banta

Faki miseukin ulama syiah
Tueng seudeukah Bañgta muda
Jeuneh ija dua boh geudong
Bangta yue bulueng bansineuna

Rakyat 'a - 'u dum seuleusak
Ijak jirinthak dumjih rata
Ladon sikrak ladom dua krak
Meurinthak-rinthak meuhila-hila

Soe nyang pantah le meuteumee
Soe nyang dunghee han sapeue na
'Oh lheueh seudeukah dum ka geubri
Woe keumbali bandum rata

Ate mangat dum sinaroe
Bangta jipujoe hana tara
Teukeudi Allah teuma dudoe
Teuka bak putroe rakyat dumna

Ureueng alem ulama syiah
Bube kai seupah dum geuteuka
'Oh geudeungo le that seudeukah
Tinggai kupiah bak cok ija

Geume sajan ngon Quruan
Hajat tuan lakee do'a
'Oh sare geukheun ngon bismillah
Teuka teugah bak Baren Miga

Wahe teungku nyang pangulee
Tango dilee lon calitra
Bekbu neubeuet teungku meutuah
Neantueng seudeukah dumneu rata

Nyang na neubri Bangta Sulotan
Tatueng tuan dumna gata
Bahle bek tabeuet jakleh tawoe
Bahle keudroe kulakee do'a

Laman tabeuet karang marot
Sang tajak tete jeurat po ma
Ban jideungo putroe kheun meunan
Jiwoe tuan bansineuna

Kareuna malee nyan bak putroe
Abeh jiwoe bandum rata
Teukeudi Allah lheueh nyan dudoe
Neuwoe putroe Baren Miga

Neuwoe bak teumpat lam meuligoe
Tuan putroe lakee do'a
Neubeuet Quruan uroe malam
Ate deundam putroe muda

Simalam kheun tamat Quruan
Uroe tuan ka cuaca
Beungoh neupuphon sinja tamat
Putroe keuramat lakee do'a

'Oh lheueh tamat teuma neukhatam
Uroe malam meunan sama
Silawet mate maneu putroe
Do'a bak droe Baren Miga

Meunan kayem baranggajan
Sikeujap tan na tom reuda
Lawet lawan peurintah Rabbi
Laen rawi lon calitra

Malam geunap peuet ploh uroe putroe
Neumeulumpoe poteu raja
Neulumpoe neujak ubak ka'bah
Nabiyullah meuteumeung sigra

Meuteumeung tuan Nabi Muhammad
Bak dhoe teusurat buleuen purnama
Teuma neuyue jak nyum u Makah
Ubak ka'bah neuyue peuteuka

'Oh lheueh abeh leumah lumpoe
Raja sidroe teuma jaga
Raja beudoh nibak tido
Duek teupako wet ngon sila

Malampi rab ka toe beungoh
Baro leumah ngon cuaca
Sare beungoh uroe siang
Tandi bujang neupangge sigra

Raja yue seutot rijang-rijang
Uleebalang dum peutua
Raja dua blah peurdana meuntroe
Imum nanggroe ngon panglima

Sabda raja suroh bujang
Beusigra datang dum peutua
Ban sare troh bujang keunan
Jipeugah yoh nyan sabda raja

Tuan teupangge dum u dalam
Syahi alam neumeung sabda
Beurijang troh bek trep lambat
Doli hadarat yue beusigra

'Oh lheueh bujang khen harentoe
Teuma jiwoe ubak raja
Tren di ikot uleebalang
Dumna tuan nyang peutua

Ban sare troh tamong u dalam
Ngadap junjongan poteu raja
Jidong di yup peurakna seumbah
Jaroe dua blah atueh jeumala

Deelat tuanku syahi alam
Nyang mee geunggam alam donya
Pakon tuanku neupangge kamoe
Neukheun jinoe siri sabda

Teuma seuot doli khalifah
Tango lob peugah ubak gata
Ulon han le kukeurajeuen
Dalam mideuen hukom gata

Ulon jinoe jak u Makah
Taboh khalifah laen raja
Soe nyang patot taboh gantoe
Rela kamoe han meunga pa

Nyang jeuet han le kukeurajeuen
Tango kukheun jinoe sigra
Ulon lumpoe Nabi Muhammad
bak dhoe teusurat buleuen purnama

Neuyue jak ulon nyan u Makah
Ubak Ka'bah nyang mulia
Dumna nabi rasul Allah
Lon geuuroh genyue teuka

Jinoe lon jak lon boh nanggroe
Taboh geunantoe laen raja
Teuma seuot peurdana meuntroe
Nyang that ragoe bijaksana

Pakon tuanku neuboh nanggroe
Ho troh kamoe po meukuta
Bek tuanku neuweh sinoe
Teuboh nanggroe tan meukuta

Hara pat le kamoe peugah droe
Jampang na dudoe jawueub dawa
Teuma seuot raja sipatah
Deungo lon peugah ubak gata

Lon han jeuet han kujak jinoe
Taboh gantoe laen raja
Taeu nyang sehat jroh peurangoe
Taboh jinoe nyan keu raja

Bek nyang ceuken muka beungeh
Nyang na rumeh got bicara
Nyang nyan taboh tameupakat
Teuma tadeelat dumna gata

Peurdana meuntroe seuon titah
Ka jipeugah ubak raja
Patot tuanku mat khalifah
Gantoe ayah Bangta muda

Nyan tuanku muda samlakoe
Peutimang nanggroe mat neuraca
Nyang laen dum tan na sidroe
Nyang jeuet gantoe po meukuta

Abeh meukalon jeuep-jeuep rakyat
Hana sapatpi na nyata
Jinoe tuanku nyan geunantoe
Rela kamoe bandum rata

Teuma marit raja sipatah
Deungo lon peugah ubak gata
Tango kukheun dumteu tuan
Bangta Sulotan bek jiraja

Bek tabohjih keu geunantoe
Akai goh sampoe aneuk miet muda
Bangta Sulotan akai goh peunoh
Hana jitu 'oh guna-gana

Umu baro bicara tan
Bek jih tuan taboh keu raja
Peutimang donya meusaket that
Ingar-ingat dumna gata

Ade raja lam donya nyoe
Tango jinoe lon peuhaba
Tujoh boh dalong apui dudoe
Tuyan sidroe nyang karonya

Raja ade nyang meumeunan
Sangkira han peue takira
Nyankeu lon kheun dum he teelan
Bangta Sulotan bek jiraka

Jinoe taboh baranggasoe
Idin kamoe nyan keu gata
Taboh Kadi Rabbon Jali
Hukom ade han tilek muka

Nyankeu taboh tameupakat
Teuma tadeelat dumteu rata
'Oh lheueh neumarit nibak sultonan
Geuboh tuan Kadi keu raja

Abeh meupakat dumna rakyat
Kadi jideelat sigra-sigra
Uleebalang raja dua blah
Kadi di atueh raja raya

Raja peuutang jih lhee ribee
Keu jeunamee badai raja
'Oh lheueh neuboh Kadi sidroe
Neuwoe bak Putroe Baren Miga

Ban sare troh lam meuligoe
Neukheun hareutoe bak aneukda
Wahe aneuk muda sambinoe
Tango kamoe kheun bak gata

Teuma seuot tuan putroe
Neukheun jinoe he du raja
Idin he aneuk putroe sambinoe
Meubungka jinoe Makah mulia

Lon keumeung jak ubak ka'bah
Kon jak ziarah kudu anbia
Meujak ziarah kudu nabi
Idin tabri jinoe lon bungka

Nabi Muhammad meuhei kamoe
Neuyue jak jinoe Makah mulia
Teuma neumarit tuan putroe
Tago kamoe he du raja

Pakri hai du neubungka jinoe
Ho tok kamoe sidroe saja
Maku han la gatapi tan
Dalem ku sajan teuma neuba

Hokeu tok lon ureueng binoe
Tinggai sidroe aneuk gata
Soe kalon tan du boh ate
Gata han le ka tabungka

Laman he du neuba sajan
Meujak tuan Makah mulia
Teuma marit raja sipatah
Deungo kupeugah ubak gata

Han jeuet hai aneuk kuba sajan
Gata tuan bek tabungka
Teuma seuot tuan putroe
Neupeugah proe ubak raja

Adat ka tajak du teungku droe
Soe geunantoe taboh keu raja
Soe geunantoe mat khalifah
Du neupeugah ubak hamba

Raja seuot narit putroe
Kadi geunantoe mat neuraca
Nyankeu aneuk badai kamoe
Kadi sidroe raja raya

Gata keunan lon peujaroe
Badai kamoe raja raya
Sangkira mate kamoe dudoe
kadi sidroe wali gata

Teuma marit tuan putroe
Tango kamoe he du raja
Bekbu taboh Raja Kadi
Jeuheut that bagi si ceulaka

Han meusoe-soe neuboh badai
Kadi beubai asoe nuraka
Bek nyan he du neuboh gantoe
Kadi pindoe paleh raya

Ateh hitam sang ngeu apui
Jroh aneuk bui dalam paya
Taboh ulon du teungku droe
Peutimang nanggroe mat neuraca

Ulon gantoe mat khalifah
Kadi bedeu'ah bek jiraja
Raja seuot teuma sipatah
Deungo lon peugah aneuk bak gata

Gata he aneuk ureueng binoe
Han jeuet tagantoe mat neuraca
Han jeuet gata mat khalifah
Le di bawah raja raja

Sikureueng reutoh raja di baroh
Han jeuet kuboh gata keu raja
Teuma seuot tuan putroe
Tango kamoe he du raja

Adat han neutueng bak nanggroe nyoe
Laen nanggroe ulon raja
Teutapi he du saleh meunyeusai
Kamoe tinggai hana gata

Sabet he du ban lon peugah
Teutapi Allah thee sibeuna
Meunyo Kadi keu geunantoe
Neuyue poh kamoe bak syeedara

Sabab neuyue pohpi ka meupeue
Neuyue boh takue Baren Miga
Han sigeutu nyang na salah
Ban lon peugah han meutuka

Cuba kalon akhe dudoe
Nyo ban kamoaa nyan peuhaba
Teuma seuot raja sipatah
Aneuk meutuah bek le peue kira

Kadi saleh hana bagoe
Pakon meunoe narit gata
Adat na untong na peurteumuan
Kadi tuan wali gata

Bek le narit aneuk meutuah
Idin langkah lon kubungka
Pakri hai du tajak jinoe
Ho tok kamoe aneuk gata

Aneuk kupeujok gata bak Tuhan
Laen nibak nyan ubak raja
Kuyue kawai gata sidroe
Ubak meuntroe nyang peurdana

Kuyue kawai banpeuet sagoe
Ubak meuntroe raja panglima
Uroe malam baranggajan
Ureueng sikalian kawai gata

Putroe Baren neudeungo meunan
Neumoe yoh nyan ro ie mata
Weuehkeu ate tinggai sidroe
Ureueng binoe hana guna

Teuma seuot raja sipatah
Deungo lon peugah ubak gata
Bekbu tamoe aneuk teungku droe
Kutueng dudoe teuma gata

Putroe Baren seumbah ayah
Lakee meuah ampon deesya
Lheueh nyan neuseumbah Bangta Sulotan
Muda bangsawan ro ie mata

Putroe Baren that meutuah
Seumbah ayah ngon Bangta muda
Banpeuet gop nyan eelia Allah
Waliyullah atueh donya

Lheueh nyan teuma putroe neumoe
Ri geumanoe ro ie mata
Poteu raja ate wah-woe
Neueu Putroe Baren Miga

Weuehkeu ate bintang timu
Neudeungo su sang biula
Putroe jimoe mayoh rindu
Neutren laju poteu raja

Han jeuet neudeungo weueh that ate
Nyum-nyum han le leupah bungka
Enseueh sayang suara mameh
Nyum bek jadeh nyan neubungka

Droe cit ka ngon teukeudi Allah
Nyang langkah han ek sangga
Poteu raja doe geulunyueng
Leugat neuplueng ka neubungka

Bek neudeungo suara putroe
Deungon jaroe neudoe teulinga
Neuplueng laju poteu sidroe
Ili jinoe u kuala

Leupah ayah putroe neumoe
Ri geumanoe ro ie mata
Teuma ili rakyat meukatoe
Intat jinoe poteu raja

Geuba kapai tujoh blah boh
Kapai jroh-jroh geucat ráta
Teuma raja neumeulayeue
Angenpi kheue reumbang pasa

Layeue geuboh tumbok kurong
Kapai jamprong na ban guda
Teukeudi Allah peurintah Tuhan
Leumah pandangan Baren Miga

Putroe neudong nibak tingkap
Teuma neupeunap u laot raya
Neukalon du nyan ka leupah
Putroe meutuah ro ie mata

Neukalon kapai dum meulayeue
Angenpi kheue reumbang pasa
Abeh neukalon dum hareutoe
Neuduek putroe dalam istana

Lawet lawan peurintah Rabbi
keuramat Siti Baren Miga
Sikhan uroe jak goh lom leupah
Peurintah Allah teuka bala

Kapai teungoh plueng abeh teudong
Layeue mantong angan timpa
Layeue meusie kapai han jiplueng
Tahe ureueng dalam bahtra

Kapai meukeumat geusaoh tan
Pakon meunan peue kareuna
Pat meukeumat cuba kalon
Han meukon-kon peue jeuneh bala

Abeh sosah ureueng lam kapai
Angen that jai reumbang pasa
Kapai teudong han jitem plueng
Meukeumat kong saoh hana

Teuma raja suroh bak nujum
Neuyue eu dum surat kutika
Pakon geutanyoe jeuet meukeumat
Peue alamat taeu tanda

Yoh nyan nujum buka surat
Jibeuet ayat kalon angka
Abeh jakalon jeuep-jeuep kurah
Teuma leumah teuka bala

Nujum peugah bak hadarat
Nyoe alamat po meukuta
Tuanku ampon laman meukatoe
Tuanku sidroe han troh ban pinta

Tuanku bungka neucre di nanggroe
Han idin Putroe Baren Miga
Meunyo han idin aneukneu putroe
Han ek sampoe u Makah mulia

Teuma seuot poteu sidroe
Pakri cit jinoe toh bicara
Udeh tawoe dum geutanyoe
Taboh putroe nyan keu raja

Nak meung leupah teutanyoe tajak
Bek meutimplak keunong bala
Teuma jimirit peurdana meuntroe
Nyang that ragoe bijaksana

Han jeuet tuanku taboh geunantoe
Tuan putroe badai raja
Hana meupakat dum ureueng nanggroe
Ureueng binoe taboh keu raja

Kri cit padan takheun jinoe
Kapai sinaroe meukeumat rata
Jinoe pakri aneuk teungku droe
Han lheueh geutanyoe aneuk tabungka

Saleh mate bak siseun nyoe
Han tom meunoe teuka bala
Kapai lon eu meuisseuk tan
Meukeumat tuan kong lagoina

Angen jipot pasa reumbang
Kapai meulinggang mantong nyang na
Poteu raja deungon rakyat
Muka pucat bansineuna

Kri cit narit ahli nujum
Seumbah maklum ubak raja
Tuanku neuek atueh kurong
Mohon tulong bak Rabbana

Tuanku meuinseuen ubak putroe
Beutroh u nanggroe Makah mulia
Sabab neubungka han idin putroe
Nyang jeuet geutanyoe keunong bala

Teutapi kon putroe khianat
Lahe keuramat Baren Miga
Meukon sinan tangadu droe
Han ek sampoe nyan tabungka

Ban raja deungo haba meunan
Neuteubiet yoh nyan sigra-sigra
Teuma neuduek atueh kurong
Neumohon tulong bak Rabbana

Ya Ilahi wa ya Rabbi
Keu lon neubri ban kupinta
Beureukat keuramat aneuukkù putroe
Beutroh u nanggroe Makah mulia

Naritpi sret nyan di babah
Raja meutuah kabui pinta
Kapai jiplueng that meudeungong
Pasa keunong bagi dua

Layeue meuasoe hana teudoh
Kapai jiguroh tamse guda
Leumah-leumbot angen teureubang
Kapai jeumeurang u laot raya

Ureueng lam kapai mayoh deundam
Uroe malam ate suka
Meujipreh-preh troh u Makah
Bandum dahsyah dalam bahtra

Teukeudi Allah Rabbon 'Alamin
Raja salihin troh ban pinta
Limong uroe peulayaran
Troph kapai nyan atueh kuala

Teuma geutamong laju u lhok
Kapai jirundok bansimua
'Oh troh u lhok geutiek saoh
Beude geucuh meugeumpita

Seun-seun siploh lheueh meuriam
Rasa nyum lham alam donya
Troph geungo su nyan u Makah
Lheueh nyan meugah raja teuka

Ka troh raja nanggroe Bageudad
Rakyat le that sajan neuba
Meunan meugah bak raja Makah
Rakyat barollah le that teuka

Ban raja deungo haba meunan
Neutren yoh nyan sigra-sigra
Neuba ngon unta guda samaran
Gajah balohan han ek takira

Leupah neujak Raja Makah
Rakyat barollah sajan sireuta
Neujak ampeueng Raja Bageudat
Neuba ngon rakyat balatantra

Ureueng lam kapai teungoh u darat
Raja Bageudad deungon Bangta
Abeh teungoh dum sinaroe
Muda samlakoe teuma bungka

Bangta Sulotan bungka sidroe
Rakyat meukatoe sajan raja
Troph sikhan rot Bangta neujak
Teuma meurumpak Rakyat meulaksa

Meurumpok ngon Raja Makah
Rakyat barollah sajan sireuta
Neutanyong le Raja Makah
Pane langkah keunoe gata

Patbu gampong siri ayah
Cuba peugah lon ngo nyata
Teuma seuot Bangta Sulotan
Kamoe tuan aneuk raja

Nyokeu aneuk Raja Bageudad
Sabe meurtabat deungon gata
Ayah kamoepi na sajan
Sideh tuan di kuala

Ban raja deungo haba meunan
Deelat yoh nyan Bangta muda
Teuma geupeuwoe u meuligoe
Lheuch nyan dudoe geutueng raja

Geujak tueng raja nanggroe Bageudat
Geuba rakyat meulaksin laksa
Ban sare troh u banda Jeudah
Raja Makah meuteumeung muka

Meuteumeung ngon Raja Bageudad
Seumbah deelat sigra-sigra
'Oh lheueh meuteumeung mumat jaroe
Dilee dudoe meulumba-lumba

Teuma geupeuwoe nyan u Makah
Rakyat barollah ireng dumna
Raja Bageudad atueh gajah
Raja Makah atueh guda

Rakyat nyang laen han soe tukri
Jak ngon gaki ladompi na
Ladom cong unta ladom keuleude
Rakyat rame ban ie raya

Ban sare troh raja u Makah
Ubak ka'bah laju neuhala
Neujak tawaf lingka ka'bah
Lheueh nyan u rumoh teuma geuba

Raja geupeuek u meuligoe
Geupeudeuk jinoe bak singgasana
Geuleueng tika duek peuneugot Yaman
Di atueh nyan meusrudiwangga

Teuma neuduek Raja Bageudad
Dumna rakyat ngadap lingka
Raja Bageudad mulia sangat
Umat Muhammad deelat sigra

Raja Makahpi duek ngadap
Neubri horeumat tanda mulia
Sare teutap raja pioh
Geubet peunajoh jabet keuruma

Teuma geubet lom ngon ruti
Minyeuk sapi abin unta
Nyankeu teumon lawan ruti
Laen kanji ngon harisa

Lheueh makeuen nyan jep ie zamzam
Mon rab makam Ibrahim
Bah teuduek nyan siat jinoe
Rakyat lam nanggroe sare subra

Keubeue ngon lumo kameng kibah
Raja Makah meukeurija
Neupeujamee Raja Bageudad
Dageng le that han teukira

'Oh lheueh neubri ngon makanan
Teutap sinan raja raya
Ate suka mayoh limpah
Ka troh u Makah nanggroe mulia

Amma bakdu dudoe nibak nyan
Laen karangan meugisa punca
Jinoe lon seubot Raja Makah
Ulon Allah meubahgia

Seulawet troh Raja Bageudad
Raja Makah that neupeumulia
Ate beureuhi mayoh deundam
Uroe malam rindu beurcinta

Teuma marit Raja Makah
Deungo lon peugah po meukuta
Tuanku ampon laman meukatoe
Tuanku sidroe mat neuraca

Tuanku raja nyan leupeue nanggroe
Dumna kamoe neupeuhamba
Teuma seuot Raja Bageudad
Tango pakat po meukuta

Kuweh di nanggroe lon jak keunoe
Han le kamoe nyan meuraja
Dalam ngon mideuen dum kukeubah
Kuweh u Makah keunoe lon bungka

Di lon han le kumat nanggroe
Taraja keudroe miseue nyang ka
Bek tapeujok bak kamoe nanggroe
Nyang mee go nyoe gata raja

Kamoe meuduek nyan ibadat
Sira preh mawot ajai teuka
Teuma marit Raja Makah
Tango lon peugah po meukuta

Kheundak Allah pakri tabah
'Oh noe tuah poteu raja
Neuboh nanggroe neujak keunoe
Bak nanggroe nyoe lom neuraja

Nyang ka Tuhan bri bek tabantah
Pakri tabah po meukuta
Raja Bageudad han le narit
Neuiem sabet ban nyang haba

Teupike lam ate na sikeujap
Kheundak Hadarat Po Nyang Esa
Kuboh keurajeuen nyan di nanggroe
Lom troh keunoepi kuraja

Buet di Tuhan pakri tabah
Meunan Allah bri keu hamba
Teuma seuot raja sipatah
Insya Allah han meungapa

Ulon rela mangat ate
Jinoe bahle kamoe raja
Bandum mangat ate kamoe
Tuanku sinoe mat neuraca

Teutap keurajeuen di nanggroe Makah
Raja meutuah meubahgia
Rakyat lam nanggroe mangat ate
Raja nyan wali pangkat eelia

Hukom teupat ade sangat
Umat Muhammad gaseh rata
Salehpi that hana lawan
Takot keu Tuhan dalam dada

Lawet lawan peurintah Rabbi
Baren Nasi raja eelia
Buetneu lawi seumbah Tuhan
Han teulindan nyan keu donya

Dawok neutawaf ka'bah Allah
Ate dahsyah dalam dada
Subhanallahal 'adim
Raja maken meugah raya

Troh meusyeuhu timu barat
Raja Bageudad keurajeuen raya
Baren Nasi keurajeuen di Makah
Raja khalifah atueh donya

Meurtbat manyang deurajat tinggi
Karonya Rabbi Po Nyang Esa
Rakyat junjung geunap hari
Peutang pagi rok-rok masa

Teukeudi Allah Tuhan Rahman
Teumpat mohonkan barang deesya
Umu lhee thon raja di Makah
Aneuk meutuah dalam wara'a

Buet lam suntok seumbah Tuhan
Sikeujap han na tom lupa
Lawet leupah raja u Makah
Han tom neupajoh makanan nyang na

Bu han makeuen ie han neujep
Droeneu galeb pujoe Esa
Droe cit ka ngon peurintah Rabbi
Raja Kadi keunan teuka

Kakeu troh ban dilee janji
Deungon Kadi teuka bala
Jijak saweue putroe bangsawan
Jitamong tuan dalam kuta

Jijak sidroe ngonjihpi tan
Jidong tuan di yup istana
Jingo putroe beuet Quruan
Kadi pangsan ngon suara

Jideungo su that bit mangat
Kadi laknat teungeut indra
Teuma puleh nibak pangsan
Yoh masa nyan ate liga

Ate lam dada sangat wah-woe
Harok keu Putroe Baren Miga
'Oh jideungo su hana bandeng
Tiwah suleng ngon biula

Tujuh blah lagee suara neuboh
Lagam leusoh hana tara
Raja Kadi tahe laloe
Jideungo putroe meusuara

Han tom jideungo nyang ka dilee
Raja seudee ate gila
Mabok beureuhi raja pindoe
Yo ngon asoe tamse geumpa

Na nyum bak jiek dalam meuligoe
Kadi wah-woe ate lam dada
Trep that jidong di yup meuligoe
Meujih sidroe laen hana

Putroe Baren hana neuthee
Kadi seudee di yup istana
Neubeuet laju Quruan neuafai
Hana sagaipi na reuda

Hantom neuiem meusijameung
Raja mantong deungo suara
Napsu rindu ateneu that
Jiteuka ladat bak ngo suara

Teukeudi Allah han ek dong le
Kuweut gaki keuboh raya
Jicok lantui mat u jaroe
Jilantui jinoe tameh istana

Ban meukeutum tameh meuligoe
Teukeujot Putroe Baren Miga
Teutiek Quruan sret bak jaroe
Teukeujot putroe lam istana

Badan lia ate meubhok-bhok
Putroe tundok sikutika
Teuma marit tuan putroe
Saleh soe-soe jak ci hamba

Neuyue kalon bak dendayang
Kacuba pandang di yup istana
Pane ureueng teuka keunoe
Jak ci kamoe lam istana

Dendayang beudoh rijang-rijang
Teuma jipandang ban seulingka
Deumi jikalon uleuen meuligoe
Leumah jinoe teudong raja

Teuma jipeugah ubak putroe
Raja sidroe keunoe teuka
Kacuba tanyong ulon meutuah
Hobu langkah poteu raja

Han meujeuet tanyong po cut teungku droe
Neutanyong keudroe sabe mulia
Leubeh kureueng han soe tu'oh
Lam karinah guna biasa

Sabe makruh lam karinah
Kamoe han ramah ngon po meukuta
Nyang got po cut neubeudoh jinoe
Neusapa keudroe raja raya

Teuma beudoh Putroe Baren
Rumeh teukhem-khem asoe istana
Neutimpeueng tiphiiek neungieng u leuen
Leumah meubayeuen poteu raja

Putroe deelat Raja Kadi
Saleuem neubri yoh nyan neusapa
Deelat tuanku meuah ampon
Han jeuet lon tren po meukuta

Beurayek meuah tuanku droe
Kareuna kamoe hana biasa
Raja Kadi seot rijang
Bak lon tuan hana deesya

Lheueh neudeelat raja pindoe
Neuweh Putroe Baren Miga
Neucok ranup saboh batang
Neubri rijang nyan keu raja

Nyoe na tuanku ranup sigapu
Pakri tuanku lon bri keu gata
Tatiek keunoe tuan putroe
Nibak kamoe ateueh jeumala

Teuma neutiek le tuan putroe
Raja jinoe sambot sigra
Ranup bateueng roh lam jaroe
Raja pindoe ate suka

Teuma jipajoh ranup putroe bri
Raja Kadi suka rasa
Beureuhi ate mayoh bimbang
Putroe jipandang rindu beurcinta

Teuma marit putroe bangsawan
Meuhabaran ngon raja raya
Tuanku ampon doli khalifah
Hobu langkah doli meukuta

Hobu neujak cuba peugah
Doli khalifah meukuta donya
Ngonneupi han neujak sidroe
Ubak kamoe han tom nyang ka

Peuebu hajat po junjongan
Cuba kheun ban lon ngo nyata
Teuma seuot Raja Kadi
Peurangoe deungki asoe nuraka

Tadeungo kamoe tuan putroe
Meukheun jinoe ubak gata
Nyang troh langkah lon jak keunoe
Napsu kamoe that keu gata

Ate mayoh rindu deundam
Uroe malam theun beurcinta
Dalam lon cinta malam ngon uroe
Adek sambinoe Baren Miga

Nyankeu sabab troh lon keunoe
Rindu kamoe akan adekda
'Oh lon eh malam teulumpoe-lumpoe
Keu gata putroe han teungeut mata

Badan lon sideh ate lon keunoe
Dalam meuligoe sapat ngon gata
Bak meusampe lon mat nanggroe
Gata keu putroe kamoe keu raja

Teuma seuot tuan putroe
Tango kamoe po meukuta
Kamoe tuanku hana meuputroe
Meuduek keudroe dalam isatana

Peunajoh makanan dumpeue sampie
Tuhan sidroe nyang karonya
Lom jimarit Raja Kadi
Lon peugah kri ubak gata

Di lon napsu kon peue laen
Hajat meukawen deungon adekda
Jeunamee lon ba dum talakee
Dua lhee ribee lon me keu gata

Teuma seuot tuan putroe
Tango kamoe po meukuta
Wasiet ayah yoh neujak haji
Neuyue dong wali ubak gata

Meunyoe jeuet meukawen deungon ayah
Jeuet meunikah deungon gata
Pakon meunan tuan putroe
Taboh duroe di rot raya

Teungoh mangat lon keumeung jak
Pakon hai nyak taboh suda
Di lon hajat tuan putroe
Gata sidroe that kucinta

Hana teunguet malam dan uroe
Ate teugoe-goe di dalam dada
Putroe seuot teuma sipatah
Deungo lon peugah po meukuta

Bek tuanku marit meunan
Di kamoe han meutem rela
Raja jawueb teuma sipatah
Tango lon peugah wahe adekda

Adat han jeuet lon meukawen
Bah buet laenpi kurela
Meunyo han jeuet trep tatem meusiat
'Oh troh hajat lon ngon gata

Putroe Baren deungo meunan
Neukheun yoh nyan sigra-sigra
Pakon meunan tuanku droe
Gata sidroe raja raya

Han teumakot nyan keu Tuhan
Pakon meunan po meukuta
Teuma marit Raja Kadi
Bek le cakri jaweueb dawa

Lon that napsu gata sidroe
Malam uroe lam kucinta
Sabe teuingat teungeut lon tan
Nyum-nyum sajan lon ngon gata

Jinoepi ka troh lon jak keunoe
Napsu kamoe peutroh pinta
Lon meukawen ngon gata putroe
Tapeutroh jinoe ban nyang hawa

Konpeue laen putroe meutuah
Lon meunikah deungon gata
Adat han tatem lon meukawen
Bah buet laen bahle dina

Nyanpi lon tem wahe putroe
Meuka sampoe napsu hawa
Wahe putroe cut tangieng keu abang
Beuta pandang meusiblah mata

Peue nyang lon lakee tabri beurijang
Tapeujampang wahe adekda
Meu'oh lheueh nyan bahle bek le
Ka troh ate napsu hawa

Soe theepi han dua geutanyoe
Wahe sambinoe intan peurmata
Teuma seuot tuan putroe
Neukheun meunoe ubak raja

Sireuta beungeh ate seungkoe
Neucarot jinoe Kadi raja
Pakon meunan Raja Kadi
Narit keuji tameusuara

Haba han patot raja suang
Mate geucang raja ceulaka
Han meupeue-peue nyan tapeugah
Laknat Allah asoe nuraka

Biek sigeucang bangsa kureueng
Saleh bajeung gajah sula
Han lon jinoh meukawen ngon kah
Kutok Allah asoe nuraka

Putroe ceumarot bagoe ceuracap
Raja rigap marit lanja
Dumnan geucarot hirojih tan
Dum manisan maneh rasa

Di jih dawok jihei putroe
Tango kamoe he adekda
Bek le kiam tuan putroe
Tango kamoe kheun bak gata

Keu jeunamee dum talakee
Dua lhee ribeepi ek lon ba
Teuma seuot bungong keumbee
Le that lagee gata raja

Peue han ek le taba jeunamee
Areuta dukee dum bak gata
Han kujinoh meukawen ngon kah
Laknat Allah asoe nuraka

Bangsa kureueng biek geupubloe
Saleh soe-soe ibu bapa
Peurangoe abeh buta tuloe
Han sibagoe raja ceulaka

Adat nyo biek ureueng meubudoe
Han sidum noe tameuhaba
Kadeungo he Raja Kadi
Jeuheut that bagi asee ceulaka

Dum ruman kah meukawen ngon kee
Adat meubee bek karasa
Raja paleh hana malee
Muka ri asee humeui rusa

Putroe ceumarot tamse boh bareh
Bintang peureuseh ate ka luka
Barangsoe deungo atejih beungeh
Na nyum bak tameh taantok muka

Raja deungo haba meunan
Ate lam badan amat geumbira
Saket that ate putroe carot
Teuma jiseuot sigra-sigra

Allah putroe tacarot kamoe
Ingar jinoe gata binasa
Putroe seuot rijang-rijang
Mate geucang rimueng seuba

Peue he raja tapeuingat kamoe
Tapeubuet jinoe ban nyang hawa
Han troh napsu gata ngon kamoe
Po sula nyoe le bicara

Peue nyang heundak pubuet jinoe
Ateueh kamoe mee geucuba
Raja Kadi makan seungkoe
Jideungo putroe meuseurapa

Dalam ate sare wah-woe
Di jih putroe cit jihawa
Pakriban kucok putroe sidroe
Lam meuligoe manyang raya

Bit that paleh raja si geupoh
Jiboh saboh tameh istana
Siuroe sinaleh minyeuk jicuco
Tameh that glue hana tara

Kuek han jeuet rinyeunpi han
Toh pakri ban kubicara
Raja Kadi ate wah-woe
Siulah proe ureueng gila

Teuma jikheun marit sidroe
Seurapa droe Kadi raja
Beuek jeuet lon nyan keu ranup
Mangat lon lop lam ceurana

Beujeuetkeu kee nyan keu bungong
Mangat kutamong lam ceumara
Beuek jeuet lon nyan keu angen
Mangat kumeuen lam istana

Adat jeuet kee Kitab Quruan
Kuteumeung sajan Baren Miga
Meunan bangon Raja Kadi
Han jitukri gundah raya

Putroe Baren ka neuiem droe
Raja pindoe pungo gila
Jimeuhei-meuhei neuseuot han
Neubeuet Quruan putroe lanja

Raja meuhei hana sakri
Ulee ili yup istana
Mata u ateueh neungieng u manyang
Bukon bubarang gundah raya

Adat na sayeuep jiteureubang
Kadi suang pungo gila
Sabe neuhei hana padoe
Putroe iem droe hana haba

Teuma jikheun Raja Kadi
Ubak Siti Baren Miga
Pakri laku tuan putroe
Napsu kamoe nyan keu gata

Han tapeutroh kheun beumeuhad
Ingat beuthat gata binasa
Siploh ilah kupeulagee
Meuhan kuteumee barang pinta

Ingat keudroe gata jinoe
Meuhan sampie napsu hawa
Teuma seuot tuan putroe
Kango kamoe he ceulaka

Han ban kheun mate geucang
Raja suang le bicara
Le peusuna Jalang bisoe
Han ek sampie ban nyang pinta

Han thee keudroe badeuke cacah
Si gajah plah rimueng seuba
Ban jideungo putroe kheun meunan
Kadi yoh nyan hiram muka

Teuka beungeh ate saket
Ka bicah phet dalam dada
Putroe carot hana padoe
Raja pindoe beungeh raya

Teuma jicok batee u jaroe
Jisrom meuligoe nyum meugisa
Bube-be boh u batee jisrom
Sare tam-tum keunong istana

Jisrom meuligoe na dum ujeuen
Kadi bajeueng pungo gila
Sare geh-goh raja seudee
Jicok batee jisrom lanja

Meuligoe putroe meuguncang-guncang
Batee jirajam bube-be raga
Raja Kadi sare wah-woe
Hana padoe jisrom istana

Lompi jikheun ubak putroe
Ingam keudroe gata binasa
Adat meuleukang saboh papeuen
Kutheun rinyeun kucok gata

Teuma kupeujeuet gata keu biduen
Bah jeuep-jeuep kuen teuma kuba
Jeuep-jeuep rangkang jambo geundrang
Keu dara blang kupeujeuet gata

Sira jikheun nyan jisrom leugat
Raja lakanat pungo gila
Putroe Baren deungo meunan
Gundah yoh nyan hana tara

Neutakot leukang binteh meuligoe
Tuan putroe meusempeuna
Neulakee tulong ubak Tuhan
Putroe yoh nyan lakee do'a

Nyoban lafai do'a neukheun
Bah lon bayeuen deungon makna
A l-lahumma unsurni 'ala l-a'dai nasra yuizzuni
Tango tuan lon boh makna

Ya Tuhanku neutulon kamoe
Ateueh sitree nyoe raja ceulaka
Sibagoe tulong keumuliaan
Nibak sitree nyan darohaka

Raja paleh jisrom kamoe
Tulong jinoe ya Rabbana
Tren fireuman nibak Hadarat
Malaikat junjong sabda

Kadeungo he malaikat
Katreng siat nyan u donya
Jakleh katren nyan u bumoe
Bak meuligoe dumna gata

Lheueh fireuman bak Hadarat
Malaikat tren le sigra
Teudong lingka malaikat
Raja sisat jisrom lanja

Jisrom meuligoe han keunong le
Gundah ate raja ceulaka
Teuma jikheun raja pindoe
Kusrom meuligoe keunong hana

Pakon han keunong le meuligoe
Paleh Putroe Baren Miga
Geunap lhee go jikheun paleh
Malaikat tapih batee bak muka

Keunong ulee toi ulak bak dhoe
Reubah teupipoe raja ceulaka
Sinan meugule reubah teudu
Di yup bak u di leuen istana

Sinan teugageueng di leuen meuligoe
Raja pindoe bah geurasa
Teuma jitren seurabee jangat
Yoh nyan jikap poteu raja

Unoé geumeuto peunoh badan
Jiseungat tuan Kadi meureuka
Yoh nyan teuka sidom ceungeh
Nyang that beungeh sidom seureunga

Sidom apui sidom mirah
That barollah troh meugunca
Abeh jilop lam geulunyueng
Lam lam idong han teukira

Weuehkeu ate tuan putroe
Kadi pindoe sinan teurhanta
Putoh buleepi kusambat
Han khianat lon keu raja

Cok ie mawo nyan u jaroe
Neuseupreukek jinoe atueuh raja
Sare keunong ie nyang bak badan
Teukeujot yoh nyan poteu raja

'Oh ban puleh nibak pangsan
Jimeuhei tuan Baren Miga
Jaroe di ulee mata u manyang
Putroe jipandang dalam istana

Wahe putroe cut pakri jinoe
Napsu kamoe that keu gata
Tatem po cut lon meukawen
Di lon meusyen napsu hawa

Teuma seuot putroe canden
He Kadi jen bek le haba
Han kujinoh meukawen ngon kah
Kutok Allah asoe nuraka

Judo lon ka na di nanggroe Syam
Nyang mat geunggam dua blah raja
Nan geuseubot Raja Abdullah
Eelia Allah atueuh donya

Kah meunapsu keu lon sidroe
Han di kamoe meudum-dum gata
Lom jimarit Raja Kadi
Raja deungki that ceulaka

Di lon ngeuren kueu gop woe
Ubak Putroe Baren Miga
Teuma neumarit tuan putroe
Meututo ngon dendayang dua

Kango kukheun he Dang Santan
Dua sajan Dang Rabia
Kacok ie ju nyan di dapu
Kajak sibu muka raja

Raja paleh han mee kungo su
Karo ie ju ateuuh muka
Mangat jiweh bek kiam le
Jak laju he Dang Rabia

Dendayang ngo haba meunan
Beudoh yoh nyan sigra-sigra
Teuma jicok ie teungoh ju
Jiple laju ateuuh raja

Ban jirasa angoh tuboh
Han jituho bloh tutong raya
Badan reudom sang boh jantong
Ie that tutong ju meubura

Kulet teupluek sang cicak lhu
Keunong ie ju ateuuh muka
Yoh masa nyan Raja Kadi
Miseue babi keunong suda

Beungeh raya saket ate
Jicarot le putroe muda
Mate aneuk tuan putroe
Ingar keudroe kupeubinasa

Jinoe kupoh kah bak mate
Kaingat he Baren Miga
Meuligoe kutet gata mate
Han udep le ateuuh donya

Katet beututong raja bajeueng
Kahkeu ureueng asoe nuraka
Han troh meukeusud Allah tulong
Katet beututong he ceulaka

Nak mangat ate bek le sosah
Kutok Allah kaphe beulaga
Raja Kadi beungeh han soe
Jideungo putroe meuseurapa

Teuma jikheun ingat keudroe
Kutet meuligoe sajan gata
Teuma jiweh Kadi sinan
Jimita yoh nyan cabeueng keuruma

Cabeueng keuruma cabeueng tusam
Ri nyang tajam dum jimita
Sare ase sua di jaroe
Jitet meuligoe Baren Miga

Hu le apui tutong meuligoe
Raja pindoe galak raya
Troph ban napsu nyum ek sampoe
Tutong meuligoe hu meubura

Droe cit ka ngon teukeudi Tuhan
Keuramat tuan Baren Miga
Neupeutren ujeuen sangat leubat
Apui hu that len dum nyang na

Abeh jicueh apui hu that
Raja laknat duka cita
Meuligoe jroh tutong silapeh
Rambee abeh dum cut raya

Bubong meuligoe yoh geupeudap
Tan geuratap rambee dumna
Jinoe tutong sang geuratap
Maken jroh that nibak nyang ka

Cit meurambee hu cong bubong
Nyang na tutong **laen hana**
Raja Kadi hireuen bimbang
Meuligoe jipandang jroh bak nyang ka

Tuan putroe marit yoh nyan
Neukheun tuan ubak raja
Geumaseh that raja pindoe
Jitet meuligoe nak troh pinta

Jiratap bubong meuligoe kamoe
Geusula nyoe geumaseh raya
Raja Kadi that meupot-pot
Teuma jicarot Baren Miga

Bukon that paleh po meuligoe
Apui sinaroe len dum rata
Han ek tutong kutet meuligoe
Paleh Putroe Baren Miga

Peueku untong **keu kee jinoe**
Meuligoe nyoe han ek binasa
Teuma jiteubiet jiwoe leugat
Atejih that saket raya

Jimita ilah Kadi pindoe
Jipoh Putroe Baren Miga
Ban sare troh jiwoe pantah
Jicok keureutah sion nyang raya

Teuma jijak u meunasah
Ubak Syiah ulama raya
Ban deumi troh tamong leugat
Dumna rakyat tahe simua

Jikalon raja teuka sidroe
Teukap jaroe bansineuna
Han tom nyang ka dilee puroe
Neujak sidroe poteu raja

Raja neukek nyan u bale
Neuheu leube nyang peutua
Neujak keunan bagah-bagah
Tuan langkah sigra-sigra

Laju neujak Teungku syiah
Horeumat di bawah Kadi raja
Lheueh meuteumeung ranup neubri
Neumarit le raja raya

Tango kamoe tuan syiah
Nyoe lon peugah ubak gata
Baren Miga aneuk junjongan
Sabet si jih nyan ka binasa

Kulet bui di muka ngon kulet asee
That bit malee geutanyoe dumna
Kon meusaboh bangta jitroh
Tujohtujoht dalam istana

Siuroe simalam meuh sitahe
Mudai jibri nyan keu bangta
Nyang han jitem dum jiupah
Dawok meumukah dalam istana

Baren Miga that meuteuntee
Jiboh aneuk lhee dalam paya
Peurangui Habsyi suletjih that
Neupeugot surat saboh keu raja

Lon keumeung peuet nyan u Makah
Ubak ayah **Baren Miga**
Ban lon peugah taboh beuabeh
Mangat meuceh ubak raja

Raja Makah aneukneu sidroe
Hana bagoe sulet raya
Aneuk sulet dalam meuligoe
Malam uroe jimeudina

Teuma neuseuot tuan syiah
Tango lon peugah po meukuta
Ulon kalon uroe malam
Cahya iman Baren Miga

Pakri neukheun tuanku meunan
Nyum di lon han po meukuta
Dali lon kalon dalam buruhan
Cahya iman hu meunyala

Teuma marit Raja Kadi
Raja deungki asoe nuraka
Bukon paleh syiah asee
Jidawa kee salang kuraja

Kuteumee tampa meuasek ulee
Bek deungon kee panyang haba
Han kutakot baranggasoe
Syeekah bak droe dum peukara

Peue nyang kuyue kapeugot rijang
Meuhan kucang ingat binasa
Adat tapeugot surat pantah
Kubri upah dua bara

Tuan syiah peugot surat
Han jitem mat keureutah Cina
Lom neusurat lom han jimat
Gundahneu that hana tara

Teuma marit tuan syiah
Ka neupeugah ubak aja
Pakri tuanku lon peugat surat
Han jitem mat keureutah Cina

Teuma seuot raja sipatah
Syiah nyoe wah le bicara
Lon yue peugot surat beurjiang
Kuteumee reupang lihe keudua

Kamoe seuon laot darat
Meutasurat nyan di gata
Salah beuna droeku tanggong
Dua geudong kubri keu gata

Tuanku di lon bahle bek upah
Lon meupayah keu po meukuta
Tuan syiah yo teumakot
Di jaroe sret keureutah safra

Neutakot keu raja keunong taloe
Neutakot keu putroe keuramat raya
Yoh nyan syiah mohon bak putroe
Beuek sampoe surat keu raja

Ya Ilahi Poku Rabbi
Gata nyang tukri dum peukara
Bit deungon kon salah beunaran
Abeh neupandang dum simua

Di lon sidroe kutu'oh han
Surat kireman suroh raja
Beureukat keuramat tuan putroe
Beuek sampoe surat keu raja

Naritpi sret nyan di babah
Tuan syiah kabui pinta
Teuma neucok keureutah u jaroe
Neusurat jinoe sigra-sigra

Kalam jinari atueuh keureutah
Tuan syiah kabui pinta
Phon-phon neuboh tuan syiah
Deumi Allah seubot mula

Teuma neubeuet ngon khuteubah
Lheueh nyan geukisah haba raja
Lheueh geusurat dum seuleusoe
Geujok u jaroe poteu raja

Raja sambot mangat ate
Neubeudoh le neuwoe lanja
Sare leupah raja neuwoe
Syiah neumoe ro ie mata

Neuthee fiteunah Raja Kadi
Jeuheut that bagi hana tara
Raja neujak teuma sidroe
Ili jinoe u kuala

Ban sare troh raja u pasi
Leumah le jieu kapai teuka
Teuma jikawot deungon jaroe
Raja pindoe ate suka

Ureueng lam kapai leumah u darat
Jikayoh leugat jalo tinda
Ban sare troh teungoh u darat
Raja jideelat dumjih rata

Sireuta jikheun haba sipatah
Deungo lon peugah po meukuta
Tango lon kisah kapai lhee boh
Trep ka gadoh u Banggala

Umu lhee thon cre di nanggroe
Geunap uroe meuraba-raba
Teuma marit raja sipatah
Deungo lon peugah ubak gata

Nyoe kireman surat sipucok
Ulonteu jok ubak gata
Tame siat nyan u Makah
Bak khalifah raja raya

Tajok bak raja surat lon nyoe
Tawoe keunoe teuma gata
Tawoe keunoe beurijang troh
Gata kuboh keu panglima

'Oh lheuen jijok surat u jaroe
Bungka jinoe tuan nahuda
Ban sare troh keudeh u laot
Jiek leugat dalam bahtra

Teuma nahuda jimeulayeue
Angenpi kheue reumbang pasa
Angen jipot barat teupat
Kapai leugat miseue guda

Amma bakdu jinoe laen
Putroe Baren lon calitra
Putroe neumarit teuma sidroe
Ulonteu nyoe teuka bala

Meunyo ka troh jime surat
Keujiku that ateueh donya
Beubekkeu troh surat jiintat
Lon 'ayeb that bak ayahda

Ban deumi sret nyan di babah
Putroe meutuah kabui pinta
Kapai teudong dalam laot
Angen jipot mantong lanja

Kapai meukeumat jiplueng han le
Gundah ate tuan nahuda
Teuma nahuda jimeuinseun
Nyoban jikheun lam calitra

Ya Ialahi wa ya Rabbi
Tuhanku neubri ban kupinta
Beureukat keuramat poku putroe
Beutroh kamoe Makah mulia

Ban deumi sret nyan di babah
Ie meucrah-crah jiplueng bahtra
Bahtra jiplueng that meudeungong
Pasa keunong barat daya

Siseun Jumeu'at kapai meulayeue
Angenpi kheue reumbang pasa
Teukeudi Allah peurintah Tuhan
Troh kapai nyan ateueh kuala

Teuma jitamong laju u lhok
Kapai ka tok keunan lanja
'Oh troh u lhok jitek saoh
Beude jicoh meugeumpita

Dua seun tujoh lheueh meuriam
Meusu u dalam keudeh bak raja
Sabda raja ubak bujang
Bukon bubarang beude guranta

Tajak rijang ili u baroh
Saleh musoh keunoe teuka
Jak takalon rijang-rijang
Wahe bujang tapeunyata

Bujang ili teuma u baroh
Jalo jikayoh u kuala
Ban sare troh bujang keunan
Jilakee yoh nyan adat kuala

Nahuda seuot rijang-rijang
Tango he bujang lon calitra
Kamoe nyoe tuan ureueng Bageudad
Meuba surat nyan keu raja

Ban jideungo ureueng ba surat
Peutamong leugat ubak raja
Ureueng lam kapai teungoh u darat
Teuma beurangkat sigra-sigra

Ban sare troh tamong u Makah
Junjong khalifah raja raya
Jidong di yup peurakna seumbah
Junjong khalifah raja meukuta

Deelat tuanku po junjongan
Seumbah.laman doli sroepada
Raja eu teuka aneuk keumueng droe
Taek keunoe sigra-sigra

Nahuda jiek u meuligoe
Meuteumeung jinoe deungon raja
Teuma neubri ngon makanan
Nahuda yoh nyan makeuen sigra

'Oh lheueh makeuen geucok idangan
Marit yoh nyan poteu raja
Hobu langkah gata keunoe
Ubak kamoe nyan tateuka

Peuebu na buet aneuk di nanggroe
Peugah bak kamoe lon deungo nyata
Nahuda seuot teuma sipatah
Tango lon peugah po meukuta

Suroh tuanku Raja Kadi
Surat neuyue me keu meukuta
Saleuem takzim keu junjongan
Surat kireman keu po meukuta

Wallahu a'lam tuanku ampon
Kamoe ka lhee thon di Banggala
Jeh 'oh lawet dalam laot
Angen bapot meuraba-raba

Goh troh meuwoe nyan u nanggroe
Neuyue kamoe uleh raja
Ban raja deungo narit meunan
Yoh masa nyan neupareksa

Tohbu surat peue habaran
Tacok tuan lon eu rupa
Teuma nahuda jijok kireman
Ubak tangan po meukuta

Kareuna surat bak Raja Kadi
Han neuthee deungki si ceulaka
Teuma neutroh dalam peutoe
Indah han soe neupeumulia

Teuma marit nahuda sipatah
Tango lon peugah po meukuta
Idin tuanku lon woe u nanggroe
Treo that kamoe meuraba-raba

Han peue salah aneuk teungku droe
Jak woe jinoe sigra-sigra
'Oh troh gata keudeh u nanggroe
Tasaweue Putroe Baren Miga

Insya Allah po junjongan
Meusawee tuan putroe muda
Lheueh nyan nahuda neubri salenan
Ban siseun tren leungkap dumna

Seumbah raja ka jideelat
Jitren leugat sigra-sigra
Lawet lawan peürintah Rabbi
Troh bak haji rakyat meulaksa

Lheueh seuleusoe haji 'umrah
Rakyat barollah meuhimpon dumna
Syam ngon Meuse dum ngon Yaman
Meuhimpon keunan Makah mulia

Sigala ulama deungon syiah
Waliyullah **ateueh** donya
Abeh meuhimpon lam meuseujid
Dumna rakyat meuribee laksa

Teuma neuteubiet Raja Makah
Bak baitullah neujak lanja
Teuma neupeurab bak Syiah Zamzam
Nyang duek bak makam Deyah Mon Para

'Oh ban meuteumeung deungon syiah nyan
Po junjongan neumeuhaba
Neucok kireman nyan bak jaroe
Surat di nanggroe bak syeedara

Teuma neujok ubak syiah
Teungku peugah peuebu haba
Surat nyoe teungku nibak Kadi
Teungku rawi peuebu haba

Ban sare troh surat u jaroe
Marit jinoe syiah raya
Tuanku ampon laman meukatoe
Lon peugah proe bak meukuta

Bek tuanku neuyue beuet surat
Di nap rakyat meulaksin laksa
Bah jan seungue teuma dudoe
Lon hareutoe bak meukuta

Teuma seuot raja sipatah
Tango lon peugah ubak gata
Bek tatakot tabeuet surat
Soe nyang troh had hilang nyawa

Nyang hak mate han jeuet udep
Teungku bak wajeb surat neubaca
Lom neumarit Teungku Syiah Zamzam
Droeneu troh fam dum peukara

Tuanku ampon laman meukatoe
Lon peugah proe bak meukuta
Haba lam surat neuyue hareutoe
Geukheun putroe ka binasa

Geukheun putroe bangta neutroh
Tujoh-tujoh dalam istana
Siuroe simah malam sitahe
Madat neubri nyan keu bangta

Soe nyang han tem neupeuupah
Buet meumukah lam istana
Baren Miga that meuteuntee
Neuboh aneuk lhee dalam paya

Neuboh aneuk lhee droe budak
Meunan layak lam surat haba
Meunan narit dalam surat
Neuploh lipat neupeunyata

Ban raja deungo teungku peugah
Raja Makah ro ie mata
Teuma neuwoe laju u rumoh
Sare meh-moh neumeuhaba

Asoe Makahpi abeh moe
Ri geumanoe ro ie mata
Allah Allah wahe teelan
Ureueng meuiman ka binasa

Rakyat teuseupok dum sinaroe
Weuch keu Putroe Baren Miga
Sigala ulama asoe Makah
Rakyat barollah moe dum rata

Amma bakdu dudoe nibak nyan
Laen karangan lon calitra
Tango lon kisah Raja Bageudad
Neumoe leugat hana tara

Weuch keu aneuk Putroe Baren
Rupa canden bijaksana
Poteu raja neumoe leugat
Akai dahsyat pungo gila

Teuma neuek u meuligoc
Neucok jinoe alat seunjata
Kreh ngon peudeueng ganja sajan
Abeh neusimpan dum simua

Poteu raja keumeung top droe
Leumah bak Putroe Baren Miga
Ya Tuhanke du lon sidroe
Bek lut beusoe dalam donya

Raja neureugam kreh bak jaroe
Teuma neukiloe nyan bak dada
Krehpi patah ulee meulipat
Neutiek leugat sigra-sigra

Teuma neusuet cokma lam sarong
Neutop meulambong lom bak dada
Nyanpi patah teutiek ujung
Neusuet peudeueng puteh mata

Lheueh nyan neutak neukiloe droe
Reubah teupipoe sinan teurhanta
Yoh nyan teugule reubah pangsan
Han neutujan teungeut indra

Teuma teuka Bangta Sulotan
Neueu pangsan duneu raja
Teuma neucok duneu sidroe
U meuligoe leugat neuba

Peudeueng ngon kreh neupeusapat
Neupeuwoe leugat uleh Bangta
Ban sare troh u meuligoe
Teuma neupeugoe duneu raja

Neucok ie mawo neuurot badan
Raja pangsan lalu jaga
Ban teukeujot nibak pangsan
Leumah neupandang Banta muda

Teuma neumarit raja sipatah
Deungo kupeugah nyan bak gata
Ka tamakeuen aneuk bangsawan
Bangta Sulotan seuot sigra

Ka lon makeuen he du bacut
Peuebu na buet kheun bak hamba
Adat ka lheueh aneuk tamakan
Jeh pat kireman tacok sigra

Cuba buka surat kireman
Taeu sinan peuebu haba
Bangta Sulotan jak cok surat
Nibak teumpat keuneubah raja

Ban neubuka surat u jaroe
Neubeuet jinoe Bangta muda
'Oh sare abeh neubeuet kireman
Dum peurbuetan maklum simua

Neutiek sinan **surat** bak jaroe
Seumbah jinoe duneu raja
Neubet jaroe neucom di gaki
Idin neubri keu lon sigra

Idin tuanku lon woe u nanggroe
Jak poh adoe Baren Miga
Raja seuot muda samlakoe
Jakleh tawoe **bijeh mata**

Ban sare troh keudeh u nanggroe
Tapoh putroe uleh gata
Han peue sidek bak ureueng nanggroe
Harok geutanyoe keu ade raja

Uroe tapoh malam taseubee
Nak bek gop thee keuji nama
'Oh lheueh tapoh adoeteu putroe
Tawoe keunoe teuma gata

Sare abeh neukheun hareutoe
Muda samlakoe seumbah bapa
Teuma neutren lam meuligoe
Ate seungkoe tamse roh tuba

Teuma neupeurab ubak ka'bah
Bangta meutuah meusempeuna
Neulingka ka'bah dua lhee seun
Teuma neukheun sumpah seutia

Deumi Allah deumi Baitullah
Ulon roh sah Baren Miga
Sangkira han kupoh adoe
Hareuem di kamoe bee syeuruga

Dua lhee seun neumeusumpah
Bak Baitullah nyang that mulia
Lheueh nyan teuma bungka leugat
Han jan siat u kuala

Ban sare troh bineh pasi
Leumah neueu le jalo tuha
Keumodoepi tan dayongpi han
Neuhue tuan sigra-sigra

Teuma neuduek Bangta u ateueh
Jiplueng that kreueh miseue guda
Teukeudi Allah na sikhan uroe
Muda samlakoe weueh han tara

Neumoe yoh nyan dalam laot
Ie mata sret hana reuda
Weueh keu adoe Putroe Baren
Rupa canden bijaksana

Hana bagoe Bangta weueh leupah
Ubak Allah meusempeuna
Ya Ilahi wa ya Rabbi
Keu lon neubri kabui pinta

Neubri bak mate ulon sidroe
Bek troh lon woe bak syeedara
Neubri angen puteng beuliong
Bak meulambong u antara

Naritpi sret nyan bak babah
Bangta meutuah kabui pinta
Jitren le angen puteng beuliong
Bangta jilambong u antara

Jalo meulayeue sideh lam awan
Bangta Sulotan troh ban pinta
Teukeudi Allah peurintah Tuhan
Hana neutuban dum peukara

Limong blah uroe jalo di manyang
Sret le teuntang babah kuala
Bangta Sulotan hireuen tahe
Ie mata ro meulumba-lumba

Bit kreueh mawot adoeku putroe
Ek troh u nanggroe angen peuba
Lheueh nyan Bangta teungoh u darat
Uroepi seupot le ka sinja

Sare leupah jilop uroe
Muda samlakoe neuwoe lanja
Sidroe ureueng meurumpok tan
Sipanyang jalan troh lam kuta

Teuma neutamong laju sidroe
U yup meuligoe Baren Miga
Bangta neuduek yup meuligoe
Neuluem adoe lam istana

Neudeungo putroe beuet Quruan
Bangta Sulotan hireuen liga
Pakri cit jikheun adoeku sulet
Mantong jibeuet hana reuda

Phon sinja kon datang suboh
Hana teudoh sikutika
Sare beungoh siang uroe
Neujak som droe Bangta muda

Trep nyang meunan neuluem putroe
Hana sidroepi na teuka
Malam uroe neuluem sabé
Bangta duek le bak sagoe kuta

'Oh ka malam seupot uroe
U yup meuligoe le neuhalá
Geunap lhee malam Bangta keunan
Marit yoh nyan Baren Miga

Wahe dalem taek keunoe
Jeh 'oh uroe lon preh gata
Rindu ate mayoh deundam
Uroe malam lon meucinta

Bek le taluem cut lem meutuah
Neumeulangkah keunoe sigra
Kabuka pito he Dang Santan
Jeh pat abang lon ka teuka

'Oh lheueh jibuka pinto meuligoe
Muda samlakoe neukek lanja
'Oh sare troh lama meuligoe
Tajo putroe seumbah Bangta

Neucom di teuot Bangta Sulotan
Muda bangsawan ro ie mata
Tamse donya ka kiamat
Lon ka troh had teuka bala

Teuma neuduek Bangta Sulotan
Putroe sinan sapat dua
Neumarit le Bangta Sulotan
Han lon makan wahe adekda

Pakon han dalem tamakeuen bacut
Putroe neubet bu sigra-sigra
Han ek lon makeuen wahe adoe
Jameun uroe lon kutapa

Padumna jameun dalem teungku droe
Limong blah uroe cit di gata
Tango kupeugah buet di adoe
Lon kheun jinoe ubak gata

Seulawet leupah cut lem u Makah
Han tom kupajoh makanan nyang na
Sititek ie han tom lon jep
Adoeneu galeb dalam takwa

Han tom kupajoh hakkon Adam
Lon takot karam iman lam̄ dada
Nyang na lon pajoh hakkon Allah
Lhee than lhee ploh boh nyan deulima

Sibuleuen saboh pajoh jambee
Leubeh han mee kupeumada
Uroe malam han tom kueh
Takot fiteunah bak manusia

Salang dumnan ulon had droe
Ateueh kamoe teuka bala
Han tom lon kalon malam uroe
Ureueng kaloe ateueh donya

Droe cit bagi Tuhan teuntee
Dalam eleumee cit ka nyata
Jinoepi dalem tapoh kamoe
Asoe nanggroe bek keunong ceureuca

Uroe tapoh malam taseubee
Nak bek gop thee keuji nama
Tapoh lon jinoe dalem teungku droe
Han le kamoe udep lam donya

Teuma seuot Bangta Sulotan
Tango lon kheun ban he adekda
Di lon han kupoh gata he adoe
Gata sidroe hana deesya

Putroe Baren seuot nyoban
Tango lon tuan dalem raja
Di lon deesya dalem bak Tuhan
Teutapi nyang tan bak meudina

Ek lon theun droe lam donya nyoe
Ureueng lakoe han lon hawa
Di lon han kupoh adoe meutuah
Gata bak Allah hana deesya

Putroe seuot teuma meunoe
Deungo kamoe he kakanda
Han jeuet han tapoh ulon sidroe
'Ayeb bunyoe dalam donya

Abeh meusyeuhu jeuep-jeuep nanggroe
Meugah putroe ka binasa
Wahe dalem kueh siat
Uroe kiamat page jaga

Tadeungo he aduen teungku droe
Kueh jinoe lam leumueng gata
Teuma neueh putroe bangsawan
Lam leumueng aduen Bangta muda

Sare teupat han meumet le
Sirasa mate lagee rupa
Badan leumiek roh hana le
Malaikat me dalam syeuruga

Neujak peuleumah dum meuligoe
Aruah Putroe Baren Miga
Jeuep-jeuep pangkat neupeutamong
Hireuen teuceungong putroe muda

'Ajab sukaan nekmat han padoe
Le that bagoe lam syeuruga
Abeh neukalon dum peurasan
Nekmat Tuhan Po Rabbana

Teuma teumanyong tuan putroe
Supo teumpat nyoe indah that rupa
Yoh nyan seuot malaikat
Nabi Muhammad po areuta

Nyankeu syeuruga Nabi Muhammad
Sajan umat nyang eelia
Teuma neutamong teumpat laen
Putroe Baren lom beurkata

Supo teumpat nyoe sangat indah
Cuba peugah lon ngo nyata
Teuma seuot malaikat
Lon peugah had ubak gata

Nyankeu teumpat ureueng madlum
Yakni ureueng geuinaya
Abeh neukalon dum meuligoe
Hireun Putroe baren Miga

Lheueh nyan neuteubiet di dalam jannah
Geujak peuleumah teuma nuraka
Nuraka tujoh pinto teuhah
Putroe meutuah teumakot raya

Suara geumeuntam amat sangat
Apui hu that meunyala-nyala
Leumah neukalon saboh pangkat
Cit ubit that hana tara

Peunoh di dalam nyan geupasoe
Ureueng binoe bansineuna
Jaroe geutupang gaki bak takue
Ok meurui-rui nyan bak muka

Lidah meukuien mata geulabang
Jaroe geutupang dum geusingkla
Teuma teumanyong tuan putroe
Peue jeuneh nyoe adeuep seksa

Soe ureueng binoe adeuebjih that
Malaikat seuot sigra
Nyankeu ureueng carot lakoe
Tuhan sidroe peumeureuka

Abeh jeuep-jeuep pat dum neupandang
Putroe budiman meubahgia
Neuweh sinan neujak leugat
Troph bak teumpat dum anbia

Sigala nabi rasul Allah
Abeh leumah neueu rupa
Abeh meuteumeung dum ngon putroe
Nabi tanyong soe that mulia

Supo aneuk taba keunoe
Ureueng binoe jroh that rupa
Malaikat seuot tanyong Nabi
Aruah Siti Baren Miga

Aneuk Raja Baren Nasi
Nyankeu abi putroe muda
Jinoe mantong sideh di bumoe
Nyawong keunoe ulon bawa

Droe cit ka ngon kheundak Tuhan
Tuan putroe nyan geuenaya
Nabi deungo meunan geukheun
Neuiem siseun bandum rata

Sigala nabi that sukaan
Marit yoh nyan sigra-sigra
He malaikat deungo kamoe
Peuleumah jinoe keujih syeuruga

'Oh lheueh haba sudi-sudi
Tuan Siti suka rasa
Lawet lawan dudoe nibak nyan
Meuwoe karangan Bangta muda

Tujoh uroe putroe pangsan
Bangta Sulotan ro ie mata
Dawok neumoe geunap uroe
Weueh keu putroe Baren Miga

Mata balok bulee luroh
Hana teudoh neumoe lanja
Ie mata tijoh keunong bak putroe
Teukeujot jinoe lalu jaga

Teuma neubeudoh tuan putroe
Duek teupipoe sikutika
Teuma neumarit putroe bangsawan
Deungo cut abang Bangta muda

Pakon neumoe dalem teungku droe
Tapoh lon jinoe he syeedara
Bek le taweueh keu lon sidroe
Neupoh jinoe wahe kakanda

Kango lon peugah he Dang Santan
Nyoe lon peusan ubak gata
Lon hak mate bak uroe nyoe
Bek kamoe-moe ulon raja

Kangieng bak deuh kakalon bak pueh
Bek kawueuh-weueh singoh lusa
Lheueh neukheun nyan tuan putroe
Peureubah droe bak leumueng Bangta

Neupoh dalem lon uroe nyoe
Han le kamoe udep lam donya
Teuma marit Bangta Sulotan
Tango lon kheun ban adoe raja

Di lon han kupoh wahe adoe
Gata sidroe hana deesya
Teuma seuot tuan putroe
Neukheun meunoe sigra-sigra

Han jeuet han tapoh kamoe sidroe
Sumpah saboh roe pat teurhanta
Masa tadong ubak ka'bah
Neumeusumpah he syeedara

Meunyo han kupoh adoeku putroe
Hareuem di kamoe bee syeuruga
Hana neukheun cuba peugah
Lon kabui sumpah lakee do'a

Peuneusah ayah neuwoe u nanggroe
Tajak poh adoe Baren Miga
Han peue sidek bak ureueng nanggroe
Harap geutanyoe ade raja

Lompi dalem aduen bangsawan
Surat kireman hana tabuka
Teuma marit Bangta Sułotan
Surat kireman hana soe baca

Han soe thee geubeuet surat
Dumna rakyat bansineuna
Pakon tasom dalem teungku droe
Nibak kamoe han tapeuhaba

Han tom tadeungo hadih Nabi
Tadeungo akhi nyoe lon baca
A l-kizbu la ummati
Kon umat Nabi nyang sulet raya

Dalempi kon umat Nabi
Gata pakri sulet raya
Teungku Syiah Zamzam nyang beuet surat
Dalam lipat jeuet neubaca

Pakri takheun han soe beuet surat
Gata bit that sulet raya
Masa geubeuet surat kireman
Rakyat sikalian ro ie mata

Dumna ureueng abeh jipoh droe
Meugah adoe ka binasa
Jinoe peue dalem aduen teungku droe
Tapoh kamoe uleh gata

Bek le tagaseh keu lon sidroe
Meureuka dudoe teuma gata
Karena gata ka lheueh sumpah
Ubak Allah han neurela

Peue jeuet han tapoh ulon sidroe
Syeuruga dudoe han di gata
Bee syeuruga hareuem neucom
Gata ka sum sumpah seutia

Peue jeuet tagaseh dalem bangsawan
Han le Tuhan nyan di gata
Adat meutapoh ulon sidroe
Gata dudoe lheueh meureuka

Ulon angkee gata sidroe
Kubri meuligoe dalam syeuruga
Page kubri uroe akhirat
Tujoh pangkat meuligoe syeuruga

Ulon lakee ubak Tuhan
Kubri tuan nyan keu gata
Kupreh gata dalem teungku droe
Page dudoe di padang masya

Bak rot simpang lhee kupreh sinan
Kamoe sajan ireng gata
Ie krueng kalkausa kubri dudoe
Nekmat hansoe ngon tapeusa

Rot simpang lhee na tatuban
Rasul Tuhan nyang calitra
Saboh simpang dalem yup 'arasy
Ureueng nyang kusuh tamong syeuruga

Rot siuneun ureueng **mukmin**
Nyang salihin atueuh donya
Si nyang rot wie ureueng jahe
Rot sikaphe tamong nuraka

Sinan lon preh gata dudoe
Tapoh kamoe jinoe sigra
Bek syok ate nyan lon peugah
Teutapi Allah thee sibeuna

Teuma neumarit Bangta Sulotan
Muda bangsawan meubahgia
Wahe adoe putroe meutuah
Deungo lon peugah ubak gata

Sabet adoe ban tapeugah
Han beurakah haba gata
Putroe neukheun teuma **sipatah**
Astaghfirullah nyan neubaca

Subhanallah walhamdulillah
Han bedeu'ah ban lon kata
Sabet ban lon kheun dalem teungku droe
Gata dudoe wajeb syeuruga

Wahe adoe jinoe pakri
Wajeb janji lon ngon gata
Meunyo wajeb janji ngon kamoe
Kupoh jinoe adoe gata

Teuma seuot putroe canden
Hana teukhem neubeurkata
Wahe dalem janji kamoe
Page dudoe lon preh gata

Lom neumarit Bangta Sulotan
Adoe bangsawan beudoh sigra
Keudeh tajak eh atueuh tilam
Nak meung meusom nibak donya

Leumah jikalon euncit darah
Jeuet fiteunah keunong ceureuca
Bahle bak guha keudeh neukoh
Nak sret u tanoh darah hamba

Adat teuboh meuligan darah
Mangat tasrah dalem raja
Teuma seuot Bangta Sulotan
Beudoh rijang keudeh bak guha

Putroe Baren deungo meunan
Beudoh yoh nyan sigra-sigra
Teuma neueh tuan putroe
Aduenneu sidroe mueng keupala

Teuma neumat sakin bak jaroe
Muda samlakoe neupet mata
Weueh neukalon adoeneu putroe
Sira neumoe hana reuda

Tuan putroe muda bangsawan
Han neujeuet pandang seumilu mata
Ubak sakin han neujeuet pandang
Yoh masa nyan neupet mata

Neupreh-preh jap sakin bak reukueng
Han neujeuet ngieng putroe muda
Droe cit ka ngon teukeudi Allah
Neuyue pinah Baren Miga

'Oh lheueh geupinah tuan putroe
Tuhan gantoe saboh rupa
Neutiek u gunong Putroe Baren
Neugantoe laen nyang sama rupa

Sakin neupeujap Bangta Sulotan
Putoh meukhan takue adekda
'Oh ban putoh neukoh takue
Darah meuhambo dalam guha

Bangta Sulotan neumoe han ban
Kareuna sayang akan syeedara
Takue putoh meugrakpi tan
Teutiek tuan dalam guha

Bangta Sulotan kheun hareutoe
Jak peumanoe mayet syeedara
Yoh nyan neutren lam meuligoe
Bangta neuwoe alet ie mata

Sare leupah Bangta neuwoe
Dendayang peumanoe putroe muda
Bangta Sulotan troh u pasi
Ka neucok le jalo tuha

Ban neukalon sapeuepi tan
Neuhue tuan sigra-sigra
Teuma neukek Bangta u ateueh
Jiplueng that kreueh tamse guda

Ban sare troh u nanggroe Makah
Bangta meutuah neuwoe lanja
Sira neujak neumoe jamong
Han soe tanyong teumakot raya

Ban sare troh ubak ayah
Teuma neupeugah le ngon sigra
Wahe du po du junjongan
Sudah laman poh adekda

Teutapi sayang that keu adoe
Kareuna putroe hana deesya
Teuma neumarit raja sipatah
Tango kupeugah bijeh mata

Pakon cit aneuk tapoh adoe
Han taba keunoe Baren Miga
Dilee tayue poh jinoe tatham
Raja jahanam ingat binasa

Ban neudeungo Bangta kheun meunan
Teumakot yoh nyan poteu raja
Sira neukheun sipatah kalam
Ate lam badan teumakot raya

Pakri tabah aneuk bangsawan
Kheundak Tuhan ka troh masa
Ban nyang kheundak soe linteueng tan
Saba tuan buet Rabbana

Got tasaba aneuk boh ate
Tuhan Kade soe peulara
Cit jipeugah masa dilee
Bak lon jibri thee teuka bala

Pakri tabah droe buet Tuhan
Saba tuan atueuh bala
Teutap raja lam dukaan
Bangta Sulotan amarah raya

Ate tutong rasa angoh
Dawok teungoh limpah dada
Adat ureueng nyang tem meupake
Cit neutop le meunan rasa

Han neutuho jak murok ate
Ie mata ile sret u dada
Weueh lagoina nyan keu adoe
Rupa sambinoe asoe syeuruga

Hanco ate muda samlakoe
Malam uroe ro ie mata
Bahkeu dumnan saboh atot
Jinoe lon seubot laen calitra

' Ajayeb subhanallah
Tango lon kisah Baren Miga
Ban deumi neubleut tuan putroe
Uteuen sinaroe dalam rimba

Droe cit ka ngon kheundak Tuhan
Rabbon 'Alamin nyang peujeuet donya
Sipeurti ban fireuman Tuhan
Dalam Quruan lahe nyata

Inna l-laha la ghaniyyun 'ani l-alamin
Tango tuan teuma makna
Kaya Tuhan sigala alam
MilekNeu nyan sigom donya

Neutiek putroe u gunong Syam
Sinam makam meuseunia
Teuma beudoh tuan putroe
Neujak sidroe dalam rimba

Teuma neucok kayee sikhan
Neulingka karang ie meumata
Yoh nyan neutueng ie seumbahyang
Neubayeue utang dum neukala

'Oh lheueh seumbahyang tuan Siti
Ubak Rabbi mohon pinta
Ya Tuhanku nyang that ghani
Keu lon neubri ban kupinta

Sangkira na mantong hayat
Neubri teumpat nyang samporeuna
Lheueh neukheun nyan putroe bangsawan
Kheundak Tuhan Po Nyang Esa

Meuleuha kdrat Tuhan Rahmat
Neupeutren keunan meuligoe syeuruga
Tren bak Allah ngon bak Nabi
Meuligoe teurjali dalam rimba

Meuligoe indah hana bagoe
Meuh sinaroe jroh that rupa
Tuhan karonya ngon iradat
Nyankeu teumpat Baren Miga

Pihak that gaseh Tuhan Hadarat
Meuligoe jroh that neukaronya
Padum ngon kuta tujoh lapeh
Meujeuneh-jeuneh lakuan rupa

Lapeh nyang phon kuta beusoe
Hana bagoe ngon umpama
Kuta teumaga keudua lapeh
Nyanpi meuceh jroh lagoina

Lapeh nyang keulhee meuh nyan mirah
Subhanallah jroh that rupa
Lapeh nyang keupeuet kuta pirak
Hu meuhalak puteh safra

Lapeh nyan limong intan ngon pudoe
Baranggasoe hireuen liga
Teuma nyang keunam indah han bagoe
Yakut sinaroe ngon meutia

Lapeh nyang tujoh manikam mirah
Hilam leupah hu meucanya
Meuligoe peungeuh hana lawan
That trang-bandrang ngon cuaca

Na saboh mon rab meuligoe
Jeurijak beusoe jampu teumaga
Monpi indah hana bagoe
Teunurab pudoe batee meutia

Bak giseng droe nyan manikam
Jampu pualam mutiara
Bak sinteue ok zaburujat
Cit indah that hana **tara**

Bak tiek **sapai jan adee droe**
Teumpat putroe aneuk syeuruga
Teumpat putroe budiadari
Tuhan Ghani nyang karonya

Dum makheuluk hana lawan
Teumpat sukaan mayen mata
Baranggasoe eu hireuen mandang
Hana lawan atueuh donya

Bak sawak tima bukon that indah
Pihak meutuah Baren Miga
Taloe tima pirak sanggi
Meuh meuteupi ngon suasa

'Oh ban geumat ubak taloe
Hana bagoe mangat suara
Suara crang-crang meuhayak-hayak
Genta meukeupak ban biula

Dalam istana bunyoe meuhayak
Barangsoe galak atejih suka
Amma bakdu keumudian lagi
Tuan Siti lon calitra

Putroe Baren puleh pangsan
Hireuen tuan neukalon rupa
Droe nyan teuduck dalam meuligoe
Hireuen laloe mayen mata

Keuleumbu tiree leulanget sajan
Blet-blot intan hu meucahya
Ija tiree meuh seunujoe
Keuleumbu Putroe Baren Miga

Dum peurasan meubagoe-bagoe
Hireuen laloe pandang mata
Alat meuligoe han sapeue tan
Talam peunuman bate suasa

Bandum intan cawan pingan
Bantaipi meunan indah rupa
Dalong keurikeue tulak bawo
Aweuek ngon cinu parak suasa

Dien ngon tanglong kande meureuntang
Miseue bintang hu meucahya
Binteh meuligoe meuh meupatam
Mirah hilam jroh that rupa

Meuligoe syeuruga turon u bumoe
Teumpat Putroe Baren Miga
Pinto kuaroe intan geuseundi
Han tatucripi calitra

Lingka meuligoe silang beude
Geuboh ceuradi kayen sutra
Ija sinteue kasab pirak
Hireuen galak taeu rupa

Allah Allah subhanallah
Meuligoe indah hana tara
Pinto meusurat dum kalimah
La ilaha illa I-lah Muhammad Rasulu I-lah

Subhana I-lah wa I-hamdu li I-lah
wa la ilaha illa I-lah wa I-lahu akbar
La hawla wa la quwwata illa bi I-lahi
I'-aliyyi I'-azim, Tuhan Karim Po Nyang Esa

Nyan kalimah dum meusurat
Nama Hadarat Allah Ta'ala
Putroe Baren mayoh bimbang
Ho neupandang mayen mata

Han le gundah tuan putroe
Ka na meuligoe indah rupa
Peurasan le **meubagoe-bagoe**
Hireuen Putroe Baren Miga

Teuma neutren lam meuligoe
Neujak sidroe putroe muda
Ban sare troh u leuen meuligoe
Pinto sinaroe dum teubuka

Kuta tujoh pinto teuhah
Putroe meutuah neujak lanja
Ban sare troh tuan putroe
Neulingka jinoe bandum kuta

Jeuep-jeuep lapeh **laju neujak**
Hireuen galak mayen mata
Le peurasan dum bak kayee
Cicem meuribee bak cabeuengnya

Bak kayee jroh sulu-sulu
Bungong dum hu mirah rata
Laeu nibak nyan lom peurasan
Karonya Tuhan Po Nyang Esa

Neupeuleumah keubeusaran
Ubak tuan putroe muda
Kareuna putroe pangkat wali
Gaseh Rabbi dalam donya

Peue nyang napsu neupupeunoh
Neupeuleumah tanda kuasa
Putroe Baren that sukaan
Nekmat Tuhan hana tara

'Oh lheueh hireuen putroe bimbang
Leumah neupandang saboh rupa
Leumah neukalon saboh kulam
Ie di dalam maneh rasa

Lingka kulam jroh meudeune
Tamse bale meunan rupa
Putroe hireuen kalon peurasan
Pujo Tuhan 'ala Rabbana

Putroe seubot nama Tuhan
Teungoh heran mayen mata
Alhamdulillah subhanallah
Kaya limpah Po Nyang Esa

Kuta luah hana bagoe
Tujoh uroe pasang guda
Lheueh nibak nyan teuma neuwoe
Lam meuligoe indah rupa

Ban sare troh lam meuligoe
Neuduek sidroe ateueh geuta
Teuma teupike tuan putroe
Neueu meuligoe jroh han tara

Peue jeuet kuduek dalam gunong
Kon lam gampong miseue nyang ka
'Oh teupike teuka sosah
Mohon bak Allah nyang sijahtra

Ya Tuanku Poku Rabbi
Gata ghani sangat kaya
Tabri keu lon kitab Quruan
Lon keumeung kalon ya Rabbana

Lheueh neukheun nyan cut putroe jroh
Neupeutren loh indah rupa
Nyan loh pirak ie meuh seunurat
Cahya jroh that mangat tabaca

Kitab Quruan nyang di nanggroe
Woe bak putroe Baren Miga
Putroe Baren gundahneu tan
Kitab Quruan abeh teuka

Teuma neuduek neuibadat
Pujo Hadarat Tuhan Nyang Esa
Uroe malam murakabah
Ate mayoh hana tara

Teutap neuduek tuan putroe
Lam meuligoe indah rupa
Amma bakdu teuma dudoe
Karangan meuwoe laen calitra

Jinoe lon peugah malaikat
Bak Hadarat neumeusabda
Ya Tuhanku Poku Tuhan
Deungo lon kheun ban ubak gata

Ureueng binoe rumoh syetan
Pakon tapeutren meuligoe syeuruga
Tren fireuman nibak Hadarat
Malaikat deungo sabda

Kadeungo he malaikat
Katreng siat nyan u donya
Jakleh katren nyan u bumoe
Kaci Putroe Baren Miga

Malaikat ngo sabda meunan
Neutren yoh nyan sigra-sigra
Jibrai deungon Mikai
Duaneu ade neuba sabda

Tuhan suroh tren u bumoe
Jak ci Putroe Baren Miga
'Oh sare troh nyan u bumoe
Neutamong jinoe dalam kuta

Rupa indah hana bagoe
Ban meuk uroe limpah cahya
Peukayanpi jroh meuh ngon intan
Di ulee syeureuban kulah kama

Ban deumi troh u leuen meuligoe
Neueu le Putroe Baren Miga
Putroe gundah hana padan
'Oh neupandang ureueng dua

Neutop rijang pinto meuligoe
Uleh Putroe Baren Miga
Nak bek neukek ureueng dua droe
Pinto meuligoe neutop sigra

Pinto meuligoe gunci neuboh
Seun rot ka troh ureueng dua
Neueu teudong bandua droe
Rupa samlakoe hana tara

Tiwah buleuen ngon matauroe
U meuligoe trang cuaca
Teuma geuduek bandua droe
Teuka putroe neujak sapa

Assalamu'alaikum dalem meutuah
Hobu langkah keunoe neuteuka
'Alaikum salam warahmatullah
Kamoe langkah cit bak gata

Lheueh meubri saleuem tuan putroe
Minah jinoe sigra-sigra
Putroe gundah hana lawan
Neukheun bak Tuhan Po Nyang Esa

Ulee ili lam meuligoe
Teuma neusom droe putroe muda
Na sikeujap geuduek keudroe
Teupike Putroe Baren Miga

Pakri untong keu lonsidroe
Ho kusom droe ya Rabbana
Salang kuduek sinoe lam gunong
Na cit ureueng keunoe teuka

Hana daya ngon kuilah
Meunan Allah neupeurasa
Lheueh neukheun nyan tuan putroe
Neutren jinoe sigra-sigra

Neume ngon ranup dalam puan
Teuma makanan sajan neuba
Ban sare troh u seuramoe
Neubet jinoe idang raya

Teuma marit tuan putroe
Neubet jaroe ateueh jeumala
Dalem teungku neumakeuen jinoe
Makanan kamoe ureueng hina

Tabeue masen bek sapeue neukheun
Kamoe lam uteuen han tom eu banda
Kru seumangat putroe bansawan
Han ek meumakan kamoe dua

Teuma marit tuan putroe
Ho cit jinoe tajak gata
Meunyo tajak ubak kamoe
Peugah jinoe lon ngo nyata

Teuma seuot malaikat
Ngon nasihat neubeurkata
Tadeungo kamoe tuan putroe
Meukheun jinoe ubak gata

Nyang troh keunoe lon meulangkah
Keumeung meunikah deungon adekda
Wasiet ayah neuyue meukawen
Ngon Putroe Baren dalam rimba

Kamoe nyoe dua adoe aduen
Neyue meukawen deungon gata
Teuma seuot Putroe Baren
Pakri cut lem meunan haba

Tango lon kheun dalem teungku droe
Han di kamoe paleng muka
Han lon meukawen dalem meutuah
Kaoi ayah lon that raya

Masa saket lon saboh roe
Ayah sidroe nyang meunada
Nyankeu jeuet han dalem meutuah
Kaoi ayah deungon bunda

Meugoh troh kaoi duku sidroe
Beuhareuem lakoe lon lam donya
Nyankeu dalem ka lon kheun proe
Han di kamoe cut lem raja

Lom neumarit malaikat
Tango lon kheun had ubak gata
Han jeuet han tatem tuan Siti
Kamoe suami judo gata

Adat han jeuet tameukawen
Bah buet laenpi kurela
Meuhan tatem ban nyang hajat
Gata meumat kamoe dua

Gata sidroe dua kamoe
Meumat jinoe peue tasangka
Putroe Baren marit yoh nyan
Tango lon kheun ban dalem raja

Bek antara takheun tamat
Adat u langet tageulawa
Pakon hai dalem tameuayang
Bahle tacang lon bak fana

Lom neumarit malaikat
Putroe bek that duka cita
Putroe Baren sangat lisek
Abeh neutilek dum peukara

Neueu karinah keulakuan
Hana makan ureueng dua
Ranup neubri neupajoh han
Teusawo yoh nyan putroe muda

Saleh gop nyoe malaikat
Suroh Hadarat yue ci hamba
Putroe Baren tangah u manyang
Neuthee yoh nyan malaikat teuka

Pinto langet tujoh lapeh
Bandum abeh nyan teubuka
Lheueh nyan teuma tuan putroe
Seumbah jinoe ureueng nyan dua

Sireuta neumoe tuan putroe
Ri geumanoe ro ie mata
Teuma neukheun ya Jibrai
Kamoe tajak ci uleh gata

Lom neumarit malaikat
Bek gundah that putroe muda
Kamoe dua malaikat
Suroh Hadarat yue ci gata

Neugusuek ulee neumat badan
Putroe bangsawan bek le duka
Tamoe bek le tuan putroe
Soe ngon sinoe taduek gata

Meuligoe saboh gata sidroe
Laen sinaroe rimba raya
Putroe Baren marit sipatah
Sireuta joh-jah ngon ie mata

Weueh that ate tuan putroe
Dawok neumoe hana tara
Teuma seuot tuan putroe
Kamoe sidroe laen hana

Teuma neukheun malaikat
Putroe bek that duka cita
Tuhan tulong gata sidroe
Geunap uroe neupeulara

Kamoepi sajan bek tagundah
Harap keu Allah mara bahaya
Taduek beuteutap lam meuligoe
Judo dudoe teuba bak gata

Nyankeu lon kheun bek tagundah
Harap keu Allah Tuhan Nyang Esa
Tuhan intat nyan suami
Raja wali judo gata

Waliyullah leubeh pangkat
Gaseh Hadarat atueuh donya
Putroe Baren deungo meunan
Pat ureueng nyan neucalitra

Raja nyan gampong di nanggroe Syam
Ureueng taslem dua blah raja
Nan geuuroh Raja Abdullah
Eelia Allah atueuh donya

Lheueh neukheun nyan malaikat
Neuwoe u langet nyan bandua
Sare leupah malaikat woe
Tinggai Putroe Baren Miga

Putroe Baren beuet Quruan
Pujo Tuhan Po Nyang Esa
Daem kayem lam ibadat
Hana si~~nt~~pi na lupa

Subhanallah Poku Rabbi
Laen rawi lon calitra
Amma bakdu laen riwayat
Tango he sahbat dumna syeedara

Sidroe raja di nanggroe Syam
Taklok keunan dua blah raja
Asai dilee phon raja nanggroe nyan
Nabi Sulaiman nyang that raya

Masa keurajeuen Nabi Sulaiman
Marit yoh nyan mareugasitua
Cicem binatang sakalian
Jimarit ban manusia

Saboh calitra han jeuet jimirit
Jitupeue keubit Nabi beurkata
Nabipi neufam basa binatang
Kareuna Sulaiman bijaksana

Ie ngor^t angen jen ngon syetan
Hukom Sulaeman raja raya
Di syreb ngon meugreb sigala alam
Taklok keunan ubak raja

'Oh lheueh wafeuet Nabi Sulaiman
Padum jaman hana raja
Trep that meulheueng hana geunantoe
Geuboh sidroe raja raya

Raja jimeunan Saiden Bakhe
Dilee jahe tan agama
Pat na meugah ureueng ibadat
Jiyue ikat uleh raja

Jiyue rante ureueng seumbahyang
Raja suang jahe raya
Jeuep-jeuep nanggroe ureueng ibadat
Jiyue sasat uleh raja

Ureueng seumbahyang pat na meugah
Abeh jiyue poh uleh raja
Ladom jigantung ladom jitupang
Ureueng seumbahyang tuha muda

Dumna rakyat jaroe jiseuon
Lakee ampon ubak raja
Han le tuanku kamoe seumbahyang
Bek neugantung po meukuta
Teuma marit Raja Bakhe
Raja jahe tan agama
Pakri jinoe lom kaseumbahyang
Mangat kutupang dumna gata

Han le tuanku seumbahyang kamoe
Ampon jinoe sibarang deesya
Teuma jipeulheueh dumna rakyat
Jiwoe leugat bansineuna

Bitpi meunan jiseumbahyang
Ate bimbang dalam dada
'Oh sare troh dum u nanggroe
Meupakat jinoe rakyat dumna

Pakri geutanyoe taweh jinoe
Aneuk ngon binoe sajan taba
Bek tadong le tabungka dum
Supaya meusom nibak bahya

Nanggroe paleh raja suang
Geutanyoe seumbahyang jipeumeureuka
Bahle tinggai raja paleh
Weh beuabeh jinoe tabungka

Sare santeut keumah pakat
Bungka rakyat bansineuna
Han saboh **le** dong di nanggroe
Bungka jinoe agam dara

Ban sare troh ujung nanggroe
Meuteumeung sidroe ureueng tuha
Gop nyan nujum lhok teunuban
Marit yoh nyan sigra-sigra

Tadeungo he tuan rakyat
Ho beurangkat dumna gata
Hobu tajak taweh jinoe
Takheun bak kamoe lon ngo nyata

Teuma seuot dumna rakyat
Tango lon kheun had ubak gata
Kamoe han le meudong di nanggroe
Raja pindoe that ceulaka

Nanggroe paleh jeuet keusumbang
Kamoe seumbahyang jipeumeureuka
That ceulaka raja suang
Hana iman dalam dada

Gotkeu meujak nyan meuboh droe
Raja pindoe that ceulaka
Teuma seuot ureueng tuha nyan
Tango laman lon calitra

Bek tabungka taboh nanggroe
Na bak kamoe saboh bicara
Nyoe na padan lon peugah proe
Tawoe u nanggroe dumna gata

Tameupakat teubiet u blang
Taseumbahyang lakee do'a
Tameurateb deungon tahle
Ubak Rabbi tamohon pinta

Seulaweuet bak le keu Muhammad
Do'a tabeuet dum peukara
Tameulakee ubak Tuhan
Nyan sulton raja raya

Beujitem masok agama Islam
Meunan tuan talakee do'a
Sangkira han lakee bak mate
Bek maksit le ateueh donya

Meunan talakee ubak Tuhan
Jak woe tuan dumteu rata
'Oh lheueh nujum kheun hareutoe
Rakyat jiwoe bansineuna

'Oh sare troh dum u nanggroe
Teubiet sinaroe u blang raya
Agam inong teubiet u blang
Jak seumbahyang lakee do'a

Rateb tahle ngon seulaweuet
Do'a tabeuet bandum rata
Do'a jilakee hana bagoe
Malam uroe hana reuda

Ate kusyuek hadap Allah
Sireuta jojah ngon ie mata
Jaroe u langet miup manyang
Rakyat dalam blang lakee do'a

Geunap lhee malam hana jiwoe
Rakyat meukatoe dalam blang raya
Tuhan kabui do'a ensan
Leumah buruhan saboh rahsia

Leumah jieu hu ateueh meuligoe
Siulah proe beuneung raja
Di langet kon troh u bumoe
Rakyat meukatoe suka rasa

Rakyat lam blang mangat ate
Jisangka mate poteu raja
Adat kon mate ka neuislam
Meunan waham rakyat dumna

Lheueh nyan rakyat woe u rumoh
Teuma suboh ka cuaca
Saret beungoh uroe siang
Rakyat lam blang teubiet dumna

Bak teumpat sot jak seumbahyang
Inong agam tuha muda
Lheueh seumbahyang woe u gampong
Maseng-maseng woe u tangga

Troh u gampong na sijamang
Seun rot bujang keunan teuka
Suroh Raja Saiden Bakhe
Neuyue pangge rakyat dumna

'Oh troh bujang kheun hareutoe
Rakyat meukatoe tren bak raja
Raja dua blah peurdana meuntroe
Peutua nanggroe abeh dumna

'Oh meusapat dumna rakyat
Teuma beurangkat tren bak raja
Ban sare troh tamong u dalam
Ngadap junjongan raja raya

Jidong di yup peurakna seumbah
Jaroe dua blah atueh jeumala
Ampon tuanku laman meukatoe
Pakon kamoe neuseuranta

Peue jeuneh buet po junjongan
Tuanku kheun ban meungo nyata
Trenkeu sabda teuma di manyang
Raja tanyong nyan bansineuna

Tadeungo he rakyat meukatoe
Lon peugah proe ubak gata
Nyang kuyue seutot gata keunoe
Leumah bak kamoe saboh rahsia

Ulon beuklam kumeulumpoe
Teuka nyum sidroe rasul anbia
Nabi Muhammad keunoe datang
Neuyue seumbahyang geutanyoe dumna

Nyankeu haba lon peugah proe
Seumbahyang jinoe dumteu rata
Bek tinggai le dum seumbahyang
Dum sikalian taseuranta

Meusoe nyang han tem tapoh beumate
Suroh Nabi ubak hamba
Jinoe tawoe dumteu sare
Seumbahyang bek le tinggai gata

Soe nyang tinggai dum seumbahyang
Page teelan lam nuraka
Rakyat deungo haba sulotan
That sukaan ate lam dada

Mangat ate han le sosah
Rakyat barollah galak suka
Han le maksit agama kukoh
Raja suroh ban sineuna

Raja saleh hukom ade
Hana jahe miseue nyang ka
Alempi that ijazah Nabi
Eleumee neubri dum peukara

Eleumee peuet blah dum neutukri
Karonya Rabbi Po Nyang Esa
Geunap sithon nyang meumeunan
Wafeuet yoh nyan poteu raja

Mate Raja Saiden Bakhe
Hankeu soe le peukong agama
Teuma jitren dumna rakyat
Jimeupakat dum peutua

Raja dua blah uleebalang
Tren dum rijang bansineuna
'Oh sare troh tamong u dalam
Pioh tuan di yup istana

Geuduek sinan geumeupakat
Dumna rakyat tuha muda
Soe mee taboh jinoe khalifah
Cuba peugah dumna gata

Cuba taeu dumteu sare
Toh nyang jadi taboh keu raja
Siri nyang mee mat keurajeuen
Tacuba kheun dumteu rata

'Oh meupakat dum sinaroe
Geuboh gantoe laen raja
Aneuk raja aneuk meuntroe
Nyang samlakoe bijaksana

'Oh ka geuboh ka meupakat
Teuma geudeelat sigra-sigra
Sare teutap atueh batee
Meuasek ulee ladom buta

Badan keurawat yo meugam-gam
Tamse deumam badan meugeumpa
Kapinah nyan kaboh laen
Ban siseun tren dua-dua

Yo ngon teuot ceukang jaroe
Buta tuloe meuraba-raba
Hana saboh jeuet keu geunantoe
Sireutoh siuroe geuboh raja

Ri nyang geuboh dum yo badan
Sidroepi tan jeuet keu raja
Teuma geuboh ureueng laen
Tujoh blah seun tren han jeuet keu raja

Han meusidroe nyang na teutap
Yo meugap-gap miseue geumpa
Rab troh ribee geuboh gantoe
Aneuk barangsoe pileh hana

Siri nyang jeuet nyan geudeelat
Bandum rakyat dua blah raja
Sare abeh geuboh keunan
Sidroepi han jeuet keu raja

Droe cit ka ngon teukeudi Allah
Raja tuah aneuk raja
Raja dua blah rakyat meukatoe
Lheueh nyan geuwoe bansineuna

'Oh sare troh nyan u nanggroe
Maseng-maseng woe dum-u tangga
Han sidroe le tren u dalam
Geupreh na tuan aneuk raja

Dumna raja han le geuboh
Ka geupioh bandum rata
Bahle teiduek haba nyan siat
Dudoe lon sambat peutimang punca

Amma bakdu dudoe nibak nyan
Lon kisah tuan aneuk raja
Tango lon kisah Raja Abdüllah
Eelia Allah atueuh donya

Geunap peuet buleuen dalam pruet ibu
Teuma mate du raja raya
'Oh lheueh mate ayah sidroe
Geuboh gantoe laen raja

Han sidroe jeuet mat khalifah
Leubeh tuah aneuk raja
Lawet lawan peurintah Tuhan
Budak bangsawan pandang donya

Buleuen haji malam Seunayan
Yoh masa nyan budak keulua
Nakeu aneuk ureueng lakoe
Ateueh bumoe han sabe sa

Rupa indah hana bagoe
Tanse uroe baro keulua
Hana sidroe na teuladan
Bak masa nyan atueuh donya

Lheueh nyan meusyeuhu jeueh-jeuep **nanggroe**
Meugah putroe aneuk ka na
Rupa indah hana sabe
Aneuk putroe Ti peurumoh raja

Nama bunda Putroe Diwi
Hana sakri ban meutia
Nyankeu bunda Raja Abdullah
Saiden Bakhe mbah raja raya

Teuma jitren raja dua blah
Putroe meugah aneuk ka na
Ban sare troh tamong leugat
Raja ngon rakyat na peuet laksa

Leupah geutamong u yup meuligoe
Neutren Putroe Diwi Muda
Teuma meuteumeung raja dua blah
Rakyat barollah abeh dumna

Neupeuleumah Raja Abdullah
Rupa indah sang meutia
Raja dua blah mangat ate
Jikucup le atueuh jeumala

Hana sakri jipeuindah
Rakyat barollah suka rasa
Dumna rakyat sijuek ate
Jicom-com le jipeumulia

Ladom di gaki ladom di ulee
Ladom bak singkee jaroe dua
Gaki ngon jaroe jiboh lam babah
Rakyat barollah ate suka

Geupeuduek atueuh batee keurajeuen
Rupa sang buleuen teungoh purnama
Raja dua blah dumna rakyat
Tema jideelat bansinua

Raja Abdullah teusinyom-sinyom
Maneh reunom ngon ie muka
Maneh beurseuri ilok pareh
Rakyat abeh suka rasa

Ate mayoh dum sinaroe
Peugawe nanggroe mat neuraca
Lheueh oboh raja jitet meuriam
Nyum rasa lhan alam donya

Teuma jiwoe raja dua blah
Raja jiseumbah jipeumulia
Teuma meuteumeung deungon putroe
Rakyat sinaroe dua blah raja

Sare leupah rakyat jiwoe
Tinggai putroe ngon aneukda
Raja Abdullah maken samlakoe
Siuroe-uroe jiek peuet ganda

Ho siuroe maken rayek
Lom ngon bijak hana tara
Akai lisek that areh billah
Ulon Allah meubahgia

Umum dua thon baro sampoe
Indah han soe aneuk raja
Dua thon umum Raja Abdullah
Deungo lon kisah ubak gata

Han tom sianeuk bu neumakan
Ie minoman han neurasa
Teuma marit maneu sidroe
Tango kamoe bijeh mata

Wahe aneuku Abdullah
Pakon di kah pajoh deulima
Bu han tapajoh ie han tapakoe
Pakon meunoe aneuk di gata

Di gop geupajoh dum makanan
Di gata han peue kareuna
Di gop ija dum geungui di badan
Di gata tuan hana sapeue na

Pakon meunan aneuk bangsawan
Han tamakan peunajoh bunda
Peue nyang kubri han tatem cok
Pakon he aneuk meunan gata

Layak tangui aneuk peukayan
Tameu'en tuan sabe muda
Teuma seuot Raja Abdullah
Deungo lon peugah ma bak gata

Han kupajoh di lon makanan
Ngon peukayan areuta gata
Kareuna gata hana syahdat
Ngon hadarat duku raja

Tuhan peuhareuem keu lon sidroe
Han kupakoe areuta gata
Teuma seuot tuan putroe
Beungeh han soe hu ngon mata

Mate aneuk haram jadah
Kapeutan mbah deungon bunda
Adat han kangui areuta kamoe
Cok areuta droe he ceulaka

Teuma neuweh Raja Abdullah
Neukalon sangat beungeh bunda
Neutren di rumoh neujak u bale
Jroh meudeune hana tara

Teuma neuek u bale nyan
Neueh sinan sikutika
Sare teungeut raja sidroe
Teuma neulumpoe saboh rahsia
Neulumpoe teuka Nabi Sulaiman
Neumarit yoh nyan sigra-sigra
Kadeungo he Raja Abdullah
Kupeugah bak kah saboh haba

Bek le kaeh beudoh rijang
Kacok galang lam parek kuta
Kajak cok rijang dalam parek
Kakoh bak iliek kangui keu ija

'Oh sare lheueh Nabi peugah
Raja Abdullah teuma jaga
Neubeudoh raja nibak tido
Duek teupako sidroe saja

Teuma neujak Raja Abdullah
Bak geupeugah keunan lanja
'Oh sare troh raja keunan
Leumah le yoh nyan galang raya

Teuma neucok le u jaroe
Neujak sidroe sigra-sigra
Yoh nyan neujak koh kulet iliek
Teuma neuciek-crick neungui keu ija

Sare leungkap ngui peukayan
Neuwoe le rijang ubak bunda
'Oh sare troh u meuligoe
Marit jinoe raja muda

Wahe ma po ka lon ngui peukayan
Nak mee takalon uleh gata
'Oh ban neudeungo uleh putroe
Neupaleng droe neueu rupa

Bah neukalon Raja Abdullah
Sangat beungeh hu ngon mata
Kri cit narit maneu putroe
Aneuk bisoe kuteumeung tampa

Han mee kukalon kapeuayeb kamoe
Aneuk bisoe na ri sempeuna
Kaweh beujeuoh aneuk paleh
Bukon abeh jeuheut lagoina

Na ban mante rimba tasek
Kulet iliek kangui keu ija
Han mee kueu aneuk jalang
Kaweh rijang keudeh sigra

Teuma marit Raja Abdullah
Eelia Allah meubahgia
Han mee taeu keu lon sidroe
Tayue weh kamoe po ma raja

Sabah han lon ngui kayen bak asoe
Tayue weh kamoe nibak gata
Menyo cit beuncu ma meutuah
Bahle lon minah jinoe sigra

Kaweh beujeuoh beunciku sangat
Mante meuhad tren lam rimba
Teuma neutren lam meuligoe
Neujak sidroe raja muda

Neukalon dalam ka jeuet uteuen
Neukalon mideuen timoh bak capa
Han tom soe jak abeh seumak
Rot ka apak meuri hana

Naleueng panyang apoh ulee
Cicem meuribee kiam subra
Naleueng misek naleuen pisang
Panyang-panyang na 'oh dada

Naleueng ceumeucet jeuet tasom droe
Tulo sinaroe jipajoh bohnya
Miriek meuribee leukek ngon puyoh
Abeh jipaloh boh naleueng dumna
'Oh ka seupot asa uroe
Crap-crip bunyoe binatang dumna
Nyankeu dum trep han tom soe jak
Mideuen seumak ka jeuet rimba

Raja Abdullah tahe laloe
Kuta sinaroe ka jeuet rimba
Teuma neuteubiet neujak laju
Troph bak pinto nyang that raya

Neukalon beude dum meuato
Raja tahe sikutika
Bube bak u panyang-panyang
Ladom bube krong limong gunca

Hijo-hijo dum meusiseuk
Meuleuek-kapeuek rab troh laksa
Abeh neukalon beude sinaroe
Teuma jinoe neulingka kuta

Neujak sidroe ngonneupi tan
Raja budiman meubahgia
Lapan uro e jak lingka sabe
Nyankeu dum he luah kuta

Banpeuet sagoe geuboh pupaleh
Mangat geupreh musoh teuka
Beude geuato meuribee-ribbee
Kuta batee beude lingka

Pupaleh geupeudong banpeuet sagoe
Labo sinaroe geuturab bata
Teuma neukalon jeuep-jeuep lapeh
Beude teueh-eh bube-be raya

Ka troh neujak bak pinto khop
Teuma neulop raja muda
Pinto batee culek sinaroe
Teuma geupasoe ie peureuda

Di ateueh pinto miseue kubah
Rupa indah hana tara
Pinto geuuke hana bagoe
Baranggasoe hireuen liga

Lapeh sineulheueh rab meuligoe
Beude sinaroe dum cut raya
Beude iku bue panyang lampoe
Laen sinaroe meuriam lila

Na saboh beude that meuuntong
Lilet punggong nam blah deupa
Beude jimeunan Sampoh Rantu
Troph tango su dua blah raja

Raja Abdullah neulop keunan
Lam beude nyan nyang that raya
Neulop laju troh bak pusat
Seupotpi that neujak lanja

Lheueh nyan neuteubiet teuma sinan
Neuangkot yoh nyan ubat dumna
Dua reutoh tujoh ploh kadot
Neupasoe neutet beude raya

Ubat neuboh ka rab peunoh
Han neutu'oh raja muda
Teuma neucok tunam u jaroe
Raja sidroe meusempeuna

Ya Ilahi wa ya Rabbi
Keu lon neubri ban kupinta
Beukit na tuah lon keurajeuen
Beujitren ureueng dua blah raja

Sangkira han neubri tuah
Beude bak patah lon beufana
Raja Abdullah neuduek u ateueh
Hankeu na weueh tinggai donya

Lheueh nyan teuma neutet beude
Raja ade meusempeuna
Ban deumi neulhiet tunam u jaroe
Meuhayak nanggroe na nyum meugisa

Suara meugop-gop sikhan uroe jak
Donya meuhayak na tamse geumpa
Asap meubura seupot seupeuet
That keulumat dalam kuta

Ureueng deungo rab meuligoe
Abeh tuloe dum teulinga
Maneu putroe ngon dendayang
Mabok bimbang dalam istana

Abeh teukeujot sare 'a-'u
Han tom geungo su beude raya
Masa keurajeen Nabi Sulaiman
Geuet beude nyan jan troh kutika

Jan nyang na buet nyang raya that
Geuhei rakyat sigala donya
Raja Abdullah teumakot tan
Neuduek ateuh nyan mantong liga

Di gop teukeujot dum sinaroe
Raja sidroe hana geunta
Lheueh nyan jitren raja dua blah
Rakyat barollah sajan sireuta

Baro teuingat jeh 'oh uroe
Han tomjisaweue ubak raja
Umu dua thon trep that meulheueng
Sidroe ureueng ham tom teuka

'Oh lheueh mate raja sidroe
Jiboh gantoe teuma aneukda
Lheueh jiboh nyan teuma jiwoe
Rakyat sinaroe abeh lupa

Hana teuingat jeh 'oh lawet
Han tom siblet tren bak raja
Nyoe baro phon ka teuingat
Dumna rakyat sangat lupa

Jikira tan le geunantoe
Nyankeu jeuet laloe tren bak raja
'Oh jideungo su beude nubat
Baro teuingat rakyat dumna

Lheueh nyan jitren dum sinaroe
Tamong jinoe ubak raja
'Oh sare troh tamong u dalam
Pioh tuan bansineuna

Duek bak bale raja dua blah
Raja Abdullah teuma teuka
Neuek u bale Raja Abdullah
Neujak seumbah dumna peutua

Hana jibri jak meuteumeung
Jipoh bang-beueng ngon jitampa
Tumbok di ulee tampa di mieng
Leumah neungieng uleh bunda

Putroe neutren lam meuligoe
Neubet jaroe sigra-sigra
Teungku ampon dum sinaroe
Aneuk kamoe ureueng hina

Bek le tapoh teungku boh ate
Jiteumee mate aneuk hamba
'Oh jingieng putroe neubet jaroe
Abeh yo asoe bansineuna

Yo teumakot dumna rakyat
Jithee keuramat raja muda
Teuma jisujud raja dua blah
Lakee meuah ampon deesya

Jicom di teuot seumbah di gaki
Han meuturi po meukuta
Beubai ngon silap dumna kamoe
Ampon jinoe barang deesya

Teuma seot Raja Abdullah
Ampon bak Allah barang deesya
Rakyat teuseupok yo meukhap-khap
Sabab keuramat raja muda

Raja Abdullah teuseungeh-seungeh
Muka rumeh hana tara
Lidah paseh suara mameh
Rakyat gaseh bansimua

Lom ngon rancak sangat pindoe
Neumarit jinoe ngon peutua
Tango kamoe dum he teungku
Geunantoe du bandum gata

Soe ka taboh keu geunantoe
Peutimang nanggroe mat neuraca
Badai ayah mat keurajeuen
Cuba takheun dumna gata

Teuma seuot raja dua blah
Sireuta jiseumbah raja muda
Hana laen nibak laman
Po jungjongan nyang that a'la

Beukit nyo bit a'la kamoe
Meukheun jinoe ubak gata
Tabri idin lon ku khaluet
Barangpeue buet hukom gata

Badai ulon gata geunantoe
Taduek sinoe dumna gata
Lon kutapa dua blah buleuen
Lheueh nibak nyan ulon keulua

Teuma seuot rakyat barollah
Insya Allah po meukuta
Han peue tuanku neukhaluet jinoe
Idin kamoe bansineuna

Teuma raja tamong khaluet
Rakyat keumiet dum di luar
Sidroe nahuda teuka keunan
Jime yoh nyan kayen ija

Nyang hajatjih cit ka dilee
Ija sikayee jibri keu raja
Ban sare troh ija u jaroe
Neukucuep jinoe sigra-sigra

Neucop siluweue deungon bajee
Tangkulok di ulee saboh punca
Lheueh nyan neucop ngon geunanoe
Lheueh seuleusoe neukeulua

Siluweue bajee ngon tangkulok
Dum neutumpok han neubawa
Neungui peukayan kulet kayee
Miseue dilee meunan rupa

Raja neuteubiet bak malam nyan
Rakyat sinan kawai lingka
Hana jithee ureueng keumiet
Raja teubiet ka neubungka

Nyandum lisek Raja Abdullah
Dilee neupeugah droeneu tapa
Teuma neubungka sigala nanggroe
Rakyat meukatoe kawai kuta

Waham rakyat hana neuteubiet
Mantong lam khaluet nyan jisangka
Rakyat lam kuta dum ceumeucah
Raja Abdullah ka neubungka

Kuta peungeuh tamse padang
Abeh jiteubang kayee rimba
Teuma jitjet naleueng ngon kayee
Rakyat meuribee dum lam kuta

Jiboh paseh ngon tanaman
Laen nibak nyan jagong keutila
Jipula gule macam-macam
Pik timon phang han teukira

Tanaman baro le that bagoe
Dum jipasoe jeuep-jeuep kuta
Sira jikeumiet raja khaluet
Bandum jipubuet jipeumula

Raja Abdullah lawet lawan
Laju beurjalan dalam rimba
Rakyat keumiet malam uroe
Takyar nyang ka woe jinoe teuka

Jinoe neukhaluet dua blah buleuen
Meunan neukheun raja muda
Uroe neutamong malam neuteubiet
Rakyat keumiet bansineuna

Masa neuteubiet soe theepi tan
Teuma beurjalan poteu raja
Neujak geumade segala nanggroe
Sandang geunanoe bak bahonya

Tungkat neureugam mat bak jaroe
Neujak sidroe raja muda
Jeuep-jeuep ureueng nyang na tok jakeuet
Keunan raja cut neupeuteuka

Adat na geubri neuteurimong
Sangkira han neuweh sigra
Neujak ho laen neuweh sinan
Meunan-meunan rok-rok masa
Trok sibuleuen meugeumadoe
Jeuep-jeuep nanggroe neupeuteuka
Meuteumeung breueh abeh neupubloe
Teuma neupeutoe bak ureueng teumeumpa

Ban sare troh neujak keunan
Neumarit yoh nyan raja muda
Tuan-tuan nyang peh beusoe
Tabri lon bloe cangkoi bak gata

Teuma seuot pande beusoe
Pane nanggoe gata teuka
Keupeue cangkoi talakee bloe
Peugah bak kamoe meungo nyata

Yoh nyan neuseuot Raja Abdullah
Tango lon peugah ubak gata
Ulon teungku pucok krueng nyoe
Ulon sidroe mante rimba

Ban jideungo geukheun mante
Teuma jieundru poteu raja
Areuta jicok raja jitumbok
Ngon jiteupuek teubiet meuk mata

Alat teumpeuen abeh jisimpan
Jipuwoe tuan dum u tangga
Raja Abdullah jitiek lam parek
Meubalek-balek meusalah lam pha

Han ek neuteungoh leumoh that asoe
Tinggai sidroe raja muda
Teutap teueh sinan siat
Teungoh u darat hana kuasa

Teuma neutren malaikat
Neujak leugat keunan sigra
Neukalon raja teiduek lam parek
Meubalek-balek leumoh raya

Malaikat cok Raja Abdullah
Teuma neurajah sigra-sigra
'Oh sare puleh mangat badan
Lom beurjalan poteu raja

Bah lon peuduek nyoe jinoe siat
Laen riwayat ulon calitra
Na sidroe syiah deungo lon kisah
Eelia Allah di atueh donya

Nan geuseubot Teungku Syiah Kilan
Umu jaman trep ka lama
Layeue keurajeuen Nabi Sulaiman
Tuan Syiah nyan dumnan tuha

Bak siuroe Nabi Sulaiman
Neujak meuen meusuka-suka
Peuet droe ureueng neuba sajan
Teungku Kilan nyang that raya

Teuma marit ureueng peuet droe nyan
Bak Sulaiman raja raya
Ya Rasulullah tango kamoe
Meukheun jinoe ubak gata

Kamoe dahaga deuek laparan
Neubri makanan ya saidina
Talakee bak Tuhan Nyang Po Hadarat
Ngon mukjizat gata anbia

Teuma neulakee ubak Tuhan
Nabi Sulaiman meusempeuna
Neuleueng jaroe mohon bak Tuhan
Neubri makanan ya Rabbana

Lheuch neubeuet do'a neurahop jaroe
Teuka jinoe idang raya
Peunoh di dalam ruti meususon
Idang geupeutren dalam syeuruga
Ie krueng kalkausa saboh peunuman
Nabi Sulaiman minom sigra
Teuma neumeuheu ureueng peuet droe
Makeuen jinoe dumteu rata

Bek tatroh-troh pajoh beuabeh
Idang nyoe sideh nibak Rabbana
Teuma geumakeuen makanan nyan
Nekmat Tuhan jatirasa

Lheueh geumakeuen ladat beureuhi
Tinggai ruti saboh saja
Hana abeh bak geumakan
Nekmat Tuhan han ek kira

Lheueh nyan neucok ruti lam pingan
Nabi Sulaiman teuma beurkata
Tango kamoe Teungku Syiah Kilan
Nyoe taruhan ion bak gata

Ruti saboh ie nyan bacut
Jinoe kuwasiet ubak gata
Pade siare cangkoi saboh
Ulon yue troh ubak gata

Kareuna gata jameun umu
Tateumee eu Nabi kita
Tateumeung kalon Nabi Muhammad
Nyankeu dum had umu gata

Tateumeung meuteumee ngon Raja Abdullah
Eelia Allah atueh donya
Ie ngon ruti ulon keubah
Raja Abdullah nyang eumpunya

Keunan tajok page dudoe
Areuta kamoe nyan bak gata
Nyoe alamat 'oh meuteumeung
Keulua bak geulunyueng ie kalkausa
'Oh meuteumeung gata dudoe
Ie lon sinoe teuma keulua
Nyan ureueng tueng teuma dudoe
Ie lon pasoe bak mieng gata

Teuma seuot tuan syiah
Insya Allah po meukuta
Ban nyang wasiet droe nibak lon
Ulon seuon atueuh jeumala

Teuma neukeubah Nabi Sulaiman
Bak syiah nyan dum peukara
Ruti ngon ie cangkoi ngon pade
Syiah troh le sigra-sigra

Neuboh lam peutoe cangkoi ngon pade
Ruti sare sapat bantiga
Ie nibak mieng Nabi keubah
Raja Abdullah po areuta

Lawet lawan peurintah Tuhan
Lon kisah tuan raja muda
Raja Abdullah neujak geumadoe
Jeuep-jeuep sagoe neupeuteuka

Jeuep-jeuep gampong abeh neujak
Seun meurumpak syiah raya
Teuma raja meubri salam
Syiah Kilan seuot sigra

Teuma teumanyong Syiah Kilan
Pane tuan tajak gata
Patbu gampong pane nanggroe
Ayahteu soe geuhei nama

Teuma seuot Raja Abdullah
Deungo lon peugah ubak gata
Ulon teungku jeuoh nanggroe
Pucok krueng nyoe dalam rimba

Sinan gampong rumoh kamoe
Ulonteu nyoe mante rimba
Trep meuranteut ulon sidroe
Jeuep-jeuep nanggroe meuraba-raba

Ban neudeungo haba meunan
Syiah Kilan ro ie mata
Teungoh-teungoh syiah teumanyong
Ie nibak mieng yoh nyan keulua

Ban neukalon ie ka ile
Peuneusan Nabi nyankeu tanda
Teuma neumarit tuan syiah
Raja Abdullah lagoe gata

Nyoe alamat teubiet ie bak mieng
Lheueh meuteumeung lon ngon gata
Udeh tuanku tamong u gampong
Neujak tueng bulueng po meukuta

Areuta taruhan Nabi Sulaiman
Neuyue bri tuan nyan keu gata
Gata tuanku Raja Abdullah
Pakri neupeugah mante rimba

Tateumeung meukawen teuma dudoe
Deungon Putroe Baren Miga
Lheueh neukheun nyan tuan syiah
Udeh meulangkah ubak hamba

Raja seuot teuma sipatah
Insya Allah jak udeh ta
Teuma neuwoe tuan syiah
Raja Abdullah sajan sireuta

Syiah di keue raja di likot
Meukot-ikot neujak dua
Sikhan rot troh baro meujak
Teuka aneuk syiah raya

Teubiet di gampong laju u blang
Jimeuteumeung deungon ayahda
Teuma jimarit deungon ayah
Deungo lon peugah du bak gata

Tawoe beurijang du teungku droe
Ruti lam peutoe teubiet u lua
Soe buka tan ngon aneuk gunci
Mantong han meukri ruti teupanca

Teuma seuot teungku syiah
Tango lon peugah aneuk bak gata
Tamse ruti teubiet lam peutoe
Nyawong kamoe meunan keulua

Teuma neuwoe pantah-pantah
Raja Abdullah sajan sireuta
Ban sare troh syiah neuwoe
Ruti lam peutoe neucok sigra

Cankoi saboh siare pade
Syiah jok le nyan keu raja
Nyan nibak lon Raja Abdullah
Areuta keuneubah nabi mulia

Ruti saboh dalam pingan
Neubet yoh nyan u keue raja
Ie nibak mieng nabi pasoe
Neucok jinoe sigra-sigra

Neuboh lam bate neuteurimong
Ie nibak mieng maneh rasa
Ruti ngon ie neujok le syiah
Raja Abdullah sambot sigra

Teuma neumakeuen ie ngon ruti
Nekmat beureuhi mangat rasa
'Oh lheueh makeuen Raja Abdullah
Idang geupinah sigra-sigra

Teuma marit tuan syiah
Deungo lon peugah po meukuta
Ulon jinoe abeh raseuki
Ka troh janji bak Allah Ta'ala

Ulon tuanku mate jinoe
'Oh lheueh kamoe meuteumeung ngon gata
Lheueh neukheun nyan syiah mate
Raja moe le ro ie mata

'Oh lheueh mate geupeumanoe
Raja neumoe hana tara
Lheueh peumanoe geuseumbahyang
Teuma geutanom sigra-sigra

'Oh lheueh geutanom teungku syiah
Raja Abdullah lakee do'a
Neubeuet di jeurat dua lhee uroe
Teuma neuwoe raja muda

Kon u gampong raja neuwoe
Neujak sidroe dalam rimba
Troph u gunong Pante Paloh
Seun rot leumah paya raya

Teuma neupeutoe laju keunan
Neue paya nyan luah lagoina
Timoh naleueng ngon jeujulok
Panyang han tok ngop keupala

Naleueng sialet awe tabeue
Dum teu'eue'-eue peuno h paya
Raja Abdullah neubloh keunan
Neucangkoi yoh nyan paya raya

Peureudee jeujulok abeh neuumpoe
Cangkoi bak jaroe raja muda
Abeh neureuet dum bak awe
Neutak sabé paya raya

Sibuleuen suntok neutak laju
Teuka bantu raja muda
Tren di langet malaikat
Keunan leugat dalam paya

Sireutoh droe malaikat
Paya raya that peungeh dumna
Awe ngon naleueng han sibak le
Masak sare bansineuna

Teuma neupula pade siare
Raja lale dalam paya
Neutajok pade sianeuk sapat
Jarak meuhad na dua deupa

'Oh nan jareueng pade neutajok
Neuboh sianeuk bandum rata
Paya peunoh bandum sare
Neupula pade uleh raja

Pade sare luah han ban
Peunoh paya nyan na nam gunca
'Oh lheueh raja pade neutajok
Sinan suntok neuweh hana

Neupeugot bak eh lam banie kayee
Neumeusilee 'oh ujeuen raya
Teukeudi Allah raja keuramat
Pade jroh that hana tara

Onjih hitam hijo sare
Bak ube-be raya-ray
Aneukpi le jroh that rampak
Pade meuhayak dalam paya

Umu lhee buleuen peunoh sampoe
Payapi doe pade rata
Tanoh han leumah on meulampee
Deungon peureudee han troh tawa
Masa neutajok dua deupa jarak
Jinoe meusak bak ji'eue lanja
Umu nam buleuen pade masak
Mupi rampak bakpi raya

Bube-be sapai mu teureueng-reueng
Pade jareueng yoh geupala
Dua blah buleuen pade sampoe
Dum sinaroe mirah rata

Teuma neuwoe Raja Abdullah
Eelia Allah meubahgia
Troh u gampong raja neuwoe
Malam uroe teuka sinja

Teuma neutamong raja u dalam
Laju malam watee seunia
Neukalon ureueng abeh teungeut
Neutamong lam khaluet sigra-sigra

Ureueng teungeut jithepi tan
Raja yoh nyan tamong lanja
Teukeudi Allah beungoh uroe
Neuteubiet jinoe raja u lua

Neubuka pinto rijang-rijang
Rakyat teuceungang jieu raja
'Oh ban deumi keuluaran
Rakyat yoh nyan seumbah sigra

Com bak teuot ladom bak jaroe
Dilee dudoe meulumba-lumba
Ladom bak gaki nyan jiseumbah
Raja Abdullah that mulia

"Oh lheueh meuteumeung bandum rakyat
Jinoe beurdeelat neumeusabda
Wahe teungku dalem meutuah
Jinoe lon peugah dumna gata
Gaseh sayang teungku boh ate
Tajak koh pade umong hamba
Pade bacut tajak koh jinoe
Tapeuwoe keunoe dumteu rata

Teuma jiseuot rakyat sakalian
Pat pade nyan po meukuta
Pajan meumeugoe tuanku sinoe
Sajan kamoe bansineuna

Pane pade neuyue jak koh
Siri umong toh po meukuta
Raja seuot rakyat tanyong
Sideh lam gunong pade hamba

Po tallah jok na bacut pade
Bak lungkiek gle dalam paya
Sinan teungku pade kamoe
Tapeuwoe keunoe dumteu rata

Tajak beuabeh jinoe siat
Pade taangkat uleh gata
Rakyat deungo raja peugah
Sang beurakah bak geukira

Pane pade neuteubiet han tom
Neuyue koh bak ngom dalam paya
Dumna rakyat bungku u gle
Geujak eu pade poteu raja

Sira jijak sare kiroh
Peue neuyue koh uleh raja
Pane pade keunoe lam uteuen
Meugeuko kheun haba peurbula

Teuma marit sidroe ureueng
Bek takheun-kheun sapeue haba
Taeu beudeuh tajak bak troh
Bek that kiroh kiam subra

Teuma jijak bandum sare
Jinoe jiek gle gunong raya
'Oh sare leupah u atueuh gle
Jieu pade mirah rata

Pade jroh that hana bagoe
Rakyat pujoe poteu raja
Bit nyoe keuramat Raja Abdullah
Gaseh Allah atueh donya

Ban nyang neukheun hana ubah
Raja Abdullah bit eelia
Teuma jijak laju leugat
Dumna rakyat tuha muda

Ban sare troh jikoh pade
Bek lale le he syeedara
'Oh troh keunan bak paya nyan
Meukeumah yoh nyan sigra-sigra

Mat ngon sadeuep nibak jaroe
Jikoh jinoe pade raja
'Oh lheueh jikoh teuma jilho
Siseun brat sapo jime rata

Troh u gampong pade jipeuwoe
Ureueng binoe jak krui sigra
'Oh gleh pade teuma geusukat
Geuboh jakat peuet reutoh gunca

Nyan dum meuteumeung siare bijeh
Karonya Allah Po Nyang Esa
Pihak keuramat raja meutuah
Karonya Allah meubahgia

Lheueh nyan teuma Raja Abdullah
Rakyat neukrah bansineuna
Tren meu'u-'u ureueng lam nanggroe
Tamong jinoe ubak raja

Jijak ngadap Raja Abdullah
Eelia Allah atueh donya
Abeh bandum ka meusapat
Jinoe deelat neumeusabda

Tango kamoe rakyat meukatoe
Dum sinaroe tuha muda
Areuta ulon tujoh geudong
Soe na tem tueng dumna gata

Beurandang pade krong ngon keupok
Bandum kujok bansineuna
Kubri keu gata soe nyang tem tueng
Seuot bandum teuku peutua

Meunyo han tatueng takheun beurijang
Meuhat lon buang lam blang raya
Kuboh u krueng dum sakalian
Kheun beurijang sigra-sigra

Teungoh raja kheun hareutoe
Pande beusoe teuma teuka
Raja meuhei pande beusoe
Dalem peutoe keunoe sigra

Na peue lon tanyong haba sipatalah
Dalem peugah ubak hamba
Teuma jipeurab pande beusoe
Neumat di jaroe uleh raja

Pande beusoe yo meugam-gam
Miseue deumam badan meugeumpa
Teuma neumarit Raja Abdullah
Dalem tapeugah tanyong hamba

Pakon tapoh ulon sidroc
Yoh lon lakee bloe cangkoi bak gata
Cangkoi han tabri ulon tatumbok
Lon tateupuck rab reuloh jungka

Dalam parek lon talambong
Teubiet ie idong ile ie mata
Dalem peugah rijang-rijang
Ulon tanyong ubak gata

Han meukon-kon tapoh di ulee
Cangkoi lon lakee tabri hana
Kon cit mantong lon lakee bloe
Lon taseudoe peue kareuna

Pande beusoe yo teumakot
Han jijeuet seuot tanyong raja
Teukui u bumoe mata malee
Rakyat meuribee seungap rata

Raja timplak pande beusoe
Rakyat meukatoe deungo haba
Neuyue uroh dum pande beusoe
Taba keunoe bansineuna

Teuma jijak tueng dumna pande
Raja hei le sigra-sigra
Tadeungo he pande beusoe
Kukheun jinoe ubak gata

Meunyo sulet ngon khianat
Beutroh kiamat kah bak papa
Beubek meuteumeung keu meunangat
Ingat-ingat dumna gata

Beutroh bak cuco bak teueng-bayeung
Beubek kateumeung nyang meubahgia
Meunyo sulet ngon khianat
Bak roh laknat kah bak fana

Gop jak bloe saboh sadeuep pade
Yum takheun le lhee ploh rupia
Parang meukrueng leubeh reutoh
'Oh geuyue seupoh limong ploh rupia
Abeh neuseurapa pande beusoe
Trok an dudoe kiamat donya
Lheuëh neukheun nyan pande jimoë
Ri geumanœ ro ie mata

Teuma jiseumbah Raja Abdullah
Lakee meuah sibarang deesya
Raja peumeuah dumna pande
Bek meunan le singoh lusa

Ingat-ingat dumna pande
Nuraka page teumpat gata
Meuroh hak gop meusaboh pruet
Gata geutet lam nuraka

Kutok Allah Poku Rabbi
Ureueng deungki khianat raya
Meunan neuseurapa Raja Abdullah
Rakyat barollah teumakot raya

Sabab keuramat hana bagoe
Abeh yo asoe bansineuna
Lheueh nyan neumarit Raja Abdullah
Tango lon peugah ubak gata

Tajak peusoh beurandang ngon krong
Pade tatueng dumna gata
Teuma rakyat jak peusoh krong
Pade jisinthong bansineuna

Teuma teuka tuan putroe
Neukheun jinoe bak aneukda
Wahe aneuk tangke ate
Pakon pade tabri gop ba

Abeh jeuep keupok dum gop peuwoe
Toh di tanyoe aneuk raja
Peue kupajoh di kee jinoe
Pade dumnoe abeh gop ba

Maka seuot Raja Abdullah
Bek tagundah wahe po ma
Nakeu laen Po tallah bri
Tuhan ghani sangat kaya

Pade gop peuwoe bek tagundah
Keu seudeukah duku raja
'Oh lheueh abeh bandum soh krong
Pade geusinthong bansineuna

Le neupasoe pade keunan
Lam keupok nyan raya-raya
Abeh sare dum neupasoe
Miseue saboh roe peunoh rata

Lheueh nyan raja pajoh makanan
Dileekon han tom neurasa
'Oh na pade hareukat droe
Tujoh thon sampoe umu raja

'Oh nankeu phon bu neumakeuen
Dumnan jameun trep neutapa
Teutap keurajeuen Raja Abdullah
Eelia Allah meubahgia

Lawet lawan peurintah Rabbi
Raja wali maken raya
Geunap umu limong blah thon
Tuhan peutren saboh rahsia

Bak simalam raja meulumpoe
Leumah putroe dalam rimba
Neueu teud'.ek dalam meuligoe
Rupa sambinoe hana tara

Abeh neukalon dum sileungkap
Hireuen 'ajab raja muda
Sare beungoh deungon uroe
Raja sidroe teuma jaga

Lheueh nyan neubeudoh nibak tido
Duek teupako wet ngon sila
Teuma teupike leumah lumpoe
Syetan pindoe kee jidaya

Han kupateh lumpoeku nyan
Peue-peue syetan jipeurupa
Geunap lhee buleuen neulumpoe leugat
'Oh jan teuingat nyum-nyum di mata

'Oh jan teungeut malam uroe
Leumah putroe dalam rimba
Han neupateh Raja Abdullah
Rahsia Allah neupeunyata

Neutakot iblih han neupateh
Raja saleh hana tara
Teuma neutilek uleh Tuhan
Ateueh raja nyan han sapeue deesya

Lheueh nyan teuma raja keumeurah
Rakyat barollah dua blah raja
Sigala panglima uleebalang
Wadi sikalian nyang raya raya

Tamong u dalam seuon titah
Raja Abdullah deelat simua
Ban sare troh tamong u dalam
Ngadap junjongan meukuta donya

Jidong di yup peurakna seumbah
Jaroe dua blah ateueh jeumala
Deelat tuanku syahi alam
Keumala nanggroe Syam nyang that mulia

Pakon tuanku neupangge kamoe
Neukheun jinoe po meukuta
Trenkeu sabda teuma di manyang
Rakyat sikalian dengungo rata

Teuma neumarit Raja Abdullah
Tango lon peugah ubak gata
Gaseh sayang gata sinaroe
Tapeungon kamoe jak lam rimba

Ulon keumeung jak u gle jinoe
Harok kamoe keu sie rusa
Soe na gaseh gata aduen
Tapeungon lon keudeh lam rimba

Peukek seumbah panglima prang
Uleebalang sampai raja
Insya Allah po jungjongan
Kamoe peungon jak lam rimba

Soe nyang han jak singoh lam hutan
Kubalek nan bansineuna
Meunan narit panglima prang
Meuhabaran deungan raja

Dumna rakyat geunta asoe
Panglima sidroe jitakot raya
Ban nyang jikheun hana ubah
Lom ngon gagah that peurkasa

'Oh lheueh raja kheun hareutoe
Rakyat sinaroe junjong sabda
Teuma rakyat jilakee droe
Woe u nanggroe maseng rata

Raja yue woe dilee jinoe
Singoh uroe keunoe teuka
Bek trep gata teuka keunoe
Lusa kamoe jak lam rimba

Tame ngon areng jeumboh bupalot
Ban nyang patot ngon tham rusa
Taba asee nyang that utoh
Nyang that makruh humeui rusa

Lheueh neukheun nyan doli khalifah
Rakyat barollah woe dum rata
Ban sare troh keudeh u nanggroe
Jimita jinoe asee rusa

Jimita areng ngon bubalot
Jipeusapat bansineuna
Sare ase sileungkapan
Rakyat sakalian tuha muda

Peurdana meuntroe uleebalang
Di lua di blang ureueng geuba
Dumna wadi ka meusapat
Tamong leugat ubak raja

Ban sare troh tamong u dalam
Ngadap junjonjan poteu raja
Rakyat teudong di yup meuligoe
Dum sinaroe bansineuna

Peukek seumbah dumna rakyat
Yoh nyan jideelat raja muda
Syahi alam tuanku ampon
Sabda meuseuon po meukuta

Kamoe ka ase dum sinaroe
Pajan mee jinoe jadeph tabungka
Pajan tuanku bungka geutanyoe
Neukheun jinoe meungo nyata

Trenkeu sabda teuma di manyang
Raja teumanyong sigra-sigra
Meunyo ka ase han sapeue le
Jinoe u gle geutanyoe bungka

'Oh lheueh sabda nibak sulotan
Rakyat sikalian meukeumah sigra
Dumna rakyat beudoh dum abeh
Cok ngon bingkeh bansineuna

Nyang me areng nyang seuon breueh
Dum meuseueh-seueh geupeujeumba
Nyang hue asee cit meuteuntee
Saboh sukee geuboh jeumba

Raja neutren dalam meuligoe
Neukalon sidroe Si Kate bak guda
Teuma neumarit Raja Abdullah
Bek kajak kah dalam rimba

Bahle tinggai kah hai ulon droe
Kaduek sinoe dalam kuta
Dudoe teuma ulon kajak
Nyang jinoe bek tajak gata

Maka jiseuot Si Kate yoh nyan
Di kamoe han po meukuta
Di lon kujak sajan jinoe
Neuba kamoe dalam rimba

Raja Abdullah ka neuiem droe
Hana sapeue neubri dawa
Kajakkeu ulon sajan kamoe
Kaek jinoe lam istana

Peulana guda taloe keukang
Jak cok rijang ulon raja
Geuntapi kame keunoe sajan
Tika hamparan lapek rueng guda

Si Kate deungo haba meunan
Jiek yoh nyan sigra-sigra
Ban sare troh dalam meuligoe
Jihei le putroe Si Kate muda

Keunoe kajak ulon teungku
Kame keuleumbu teumpat raja
Nyan tika eh kame sajan
Teumpat tidoran raja muda

Putroe neujok tika keuleumbu
Teumpat beuradu dalam rimba
Teuma jitren lam meuligoe
Peurab jinoe ubak guda

Jiikat taloe jiboh keukang
Jileueng atueuh rueng tika peureuda
'Oh lheueh guda jiboh keukang
Teuma neupasang uleh raja

Teuma marit Raja Abdullah
Jadeh langkah jinoe tabungka
Beudoh jinoe dum beuabeh
Cok ngon bingkeh maseng rata

Teuma geutet beude nubat
Raja beurangkat jak lam rimba
Teuma teubiet dum di dalam
Laju curam u lua kuta

Ka geujak dum jinoe sare
Bungka u gle jak meurus
Sikhan uroe jak troh u gunong
Teuma geutamong dalam rimba

Ban sare troh bak padang luah
Geupeudong kimah dumgeu rata
Geupeugot jambo teumpat geupioh
Teuma geuboh taren lanja

Geutheun areng ngon bupalot
Lheueh nyan geuteubiet jak meurus
Sigo geuhop rusa geuparoh
Sireutoh tujoh ploh nyang raya raya

Teuma teupike Raja Abdullah
Eelia Allah meubahgia
Ulon sidroe keunong timplak
Kupajoh hak manusia

Teuma neuwoe ubak kimah
Raja Abdullah meusempeuna
Raja neuduek di yup payong
Neumohon tulong bak Rabbana

Ya Ilahi wa ya Rabbi
Bak Tuhan bri teuka rusa
Lheueh neumohon Raja Abdullah
Poteu Allah kabui pinta

Raja keuramat gaseh Tuhan
Rusa keunan abeh teuka
Na siribee peunoh padang
Rusa teudong-dong raya raya

Jijak tok takue dum sinaroe
Jiyue sie droe nibak raja
Teuma neupileh nyang meureugoh
Neusie tujoh nyang raya raya

Lheueh neupeusieng teuma neutaguen
Rakyat bandum ate suka
Sare masak neupeulaku
Neutaguen bu sigra-sigra

Bupi masak dum sinaroe
Neubet jinoe nyan keu raja
Teuma neumakeun sie dua krak
Ka meunyum glak raja muda

Han ek neupajoh sie teunaguen
Neucok neupanggang sigra-sigra
Ban neupajoh nyanpi han lot
Neukeubah bak sot raja muda

Amma bakdu teuduek nyan siat
Jinoe rakyat lon calitra
Rakyat kiam sare kiroh
Raja ka gaduh han meuho ka
Teungoh pajoh bu han meuho le
Gundah ate rakyat dumna
Abeh gundah dum sinaroe
Raja sidroe jijak mita

Dilee sinoe sajan-sajan
Jinoe ka tan ho neubungka
Mita keudeh mita keunoe
Raja sidroe leumah hana

Teuma jihkeun sabe keudroe
Pike geutanyoe ho tamita
Sabab hana Raja Abdullah
Rusa gadoh bansineuna

Sireutoh tujoh ploh rusa reubah
Abeh gadoh lheueh lam rimba
Nyankeu sabab rusa han meuteumee
Rusa siribee han meuho ka

Teuma jiwoe ubak kimah
Seun rot leumah jieu raja
Jikalon bu dum ka masak
Rakyat teungoh jak ro ie mata

Bukon sayang Raja Abdullah
Neumeupayah dum keu hamba
Teuma jimirit dum sinaroe
Pakon meunoe po meukuta

Hana patot tuanku maguen
Nyoe kamoe dum sia-sia
Teuma seuot Raja Abdullah
Tameulangkah keunoe sigra

Bek tagundah nyan buet kamoe
Tamakeuen jinoe nyan sie rusa
Sireutoh sidroepi ek lon bri
Ubak dali Allah karonya

'Oh lheueh raja kheun hareutoe
Rakyat meukatoe makeuen rata
Pruetjihpi troe sare peunoh
Rusa tujoh ploh abeh jiseuba

'Oh lheueh makeuen dum sinaroe
Neumarit jinoe raja muda
Tango kamoe dalem teungku droe
Pat geutanyoe meuseunia

Pat tapioh geutanyoe sinaroe
Kheun bak kamoe sigra-sigra
Teuma seuot panglima prang
Uleebalang sapai raja

Tuanku ampon bahle u krueng
Keudeh tadom po meukuta
Iepi mudah mangat seumbahyang
Gotkeu u krueng meuseunia

Raja seuot nyokeu meunan
Udeh kaman dumteu rata
Yoh goh seupot jilop uroe
Udeh jinoe u krueng raya

Teuma beudoh rakyat meukatoe
Raja sidroe pasang guda
Jinoe geujak seutot gunong
Trophkeu u krueng pante raya

Teuma geupioh rab bineh krueng
Ladom seumbahyang sigra-sigra
Watee leuho peuteungohan
Troph bak krueng nyan ureueng dumna

Ladom manoe ladom srah droe
Rakyat meukatoe kiam subra
'Oh leheueh manoe dumna rakyat
Geupeugot teumpat meuseunia
Geupeugot keunawat deungon jambo
Teumpat tido bansineuna
Bak bineh krueng ateueng pante
Jambo sare peunoh rata

Teuma jipeugot keunawat saboh
Teumpat pioh poteu raja
Di ujung kayee that meucakap
Buboeng geupeudap deungon on kala

Binteh ngon aleue jiboh jalen
Jiboh ngon rinyeun bak ek raja
Sare cukop lheueh seuleusoe
Jilop uroe teuka sinja

Si Kate ek rijang-rijang
Jak leueng hamparan sigra-sigra
Tika peureuda peureumadani
Bineh keurusi jroh that rupa

Lheueh nyan jiikat deungon keuleumbu
Teumpat beuradu poteu raja
Lheueh jiikat tiree keuleumbu
Jroh that laku hana tara

Teuma neukek Raja Abdullah
Eelia Allah meubahgia
Tiree keuleumbu that meucakap
Pioh sikeujap Si Kate di sana

'Oh sare troh neukek keunan
Marit yoh nyan raja muda
Salang lam gunong na cit keurajeuen
Nekmat Tuhan han ek kira

Sa ngon di gampong keulakuan
Sinoe lam hutanpi kuraja
Teuma marit Si Kate sidroe
Deungo kamoe po meukuta
Ampon tuanku doli hadarat
Angen darat sijuek raya
Meuna keuleumbu na cit padok
Kureueng sijuek po meukuta

Teuma marit Raja Abdullah
Eelia Allah saleh raya
Bahle taeh kaman sinoe
Dua geutanyoe sapat dua

Si Kate deungo narit sulotan
Di ulon han po meukuta
Bahle u yup bek di sinoe
Keudeh kamoe u krueng raya

Bah u pante kueh di lon
Tuanku ampon idin hamba
Teuma marit Raja Abdullah
Deungo lon peugah ubak gata

Meuhan kaeh kah di sinoe
Sajan kamoe sama-sama
Jakleh kawoe kaman jinoe
Hana di kamoe meuba gata

Cit han lon bri jak yoh di nanggroe
Taseutot kamoe uleh gata
Si Kate marit teuma jinoe
Tuanku kamoe kureueng bangsa

Han meulaku lon eh sajan
Jeuet teulahan po meukuta
Hana patot po junjongan
Ulon teumon po meukuta

Han mee lon eh ngon tuanku
Han meulaku gop eu rupa
Gadob hibat kureueng horeumat
Kamoe namiet sajan meukuta

Adat han kaeh ulon sinoe
Sajan kamoe sapat dua
Kaweh sinoe jakleh kawoe
Gata sidroe hana lon ba

Meunoe kupeugah meudeh kakheun
That bantahan le peue haba
Meuka kuidin pakon teulah
Bek kapeugah le peue haba

Si Kate deungo haba meunan
Jieh sinan sajan raja
Dalam keuleumbu dua sapat
Laen rakyat di krueng dumna

Teuma geueh ateueh pante
Mangat sare bansineuna
Abeh seumeunga teungeut pangsan
Han jitujan nyan ka indra

Nafah teubiet miseue pupot
Ladom hat hut dum suara
Teukeudi Allah peurintah Tuhan
Rakyat pangsan dum simua

Reudokpi han ujeuenpi tan
Han meuban-ban teuka ie raya
Droe cit ka ngon kheundak Hadarat
Hanyot leugat rakyat dumna

Meuumpang **breueh** deungan kanot
Abeh hanyot bansineuna
Han sidreo thee yoh masa nyan
Teungeut pangsan rakyat dumna

Dumnan ie raya jitheepi tan
Kheundak Tuhan Po Rabbana
Ban sare troh ie raya keunan
Ureueng pangsan baro jaga

Teuma jibeudoh bak tidoran
Hireuen yoh nyan bansineun
Jieu keudeh jieu keunoe
Peue geutanyoe ie raya ba

Hana tathee cubaan Tuhan
Dum sikalian geutanyoe hamba
Abeh tahe dum sinaroe
Cuba eu soe sinoe hana

Soe na gadoh cuba kalon
Soe-soe nyang tan geutanyoe dumna
Teuma jikalon dumjih sare
Peunoh pante ie raya ba

Mantong bandum hana gadoh
Kheundak Allah Tuhan Nyang Esa
Ija bak badan mantong limbot
Areng bupalot gadoh hana

Breueh ngon kanot mantong bak sot
Dum mantong got miseue nyang ka
Miseue takeubah yoh saboh roe
Dum na keunoe bansineuna

Bandum mantong sikalian
Si Kate tan deungon raja
Nyan nyang hana keunoe sajan
Mantong tuan dalam rimba

Teuma meupakat dumna rakyat
Jimita deelat po jih raja
Ban sare troh dalam uteuen
Jimita dum raja muda

Mita keudeh mita keunoe
Rakyat sinaroe meuraba-raba
Jeuep-jeuep lungkiek padok gunong
Hana meuteumeung poteu raja

Jiek gunong jitren paloh
Rakyat kiroh dalam rimba
Siploh go saho mita sabe
Jeuep lungkiek gle meuteumeung hana

Jeuep bak kayee jeuep pante krueng
Hana meuteumeung raja muda
Abeh bicah ban saboh gle
Jeuep-jeuep pante pat na guha

Hana leumah Raja Abdullah
Abeh gundah rakyat dumna
Rakyat kiroh dum meuseupreuek
Rimueng badeukek abeh bungka

Jideungo 'a - 'u jeup-jeup gunong
Plueng meudeungong binatang rimba
Kiam bunyoe 'a - 'u sabe
Jeuep lungkiek gle meraba-raba

Han jituho plueng dumna gajah
Uteuen bicah bansineuna
Nyankeu dum le rakyat lam gle
Uteuen sare peungeuh rata

Umu lhee uroe mita laju
Ie deungon bu han soe kira
Kareuna bandum abeh gundah
Raja Abdullah han meuho ka

Droe cit ka ngon teukeudi Allah
Raja Abdullah leumah hana
Droeneu sinan mantong bak sot
Cong keunawat mantong di sana

Tuhan peusilap bek jitupat
Neupeusisat raja muda
Dumna rakyat gundah ate
Raja han le dalam rimba

Teuma jiriwang woe u likot
Sangkot pawot meuraba-raba
Jeuep lungkiek gle panteng-panteueng
Dumna ureueng dalam rimba

Sare meusaho dum meusapat

Ka meupakat bansineuna

Pakri padan takheun lagee

Han meuteumee raja muda

Geutanyoe payah dumteu sare

Jeuep lungkiek gle tajak mita

Abeh tamita jeuep-jeuep sawang

Pat na lubang meuteumeung hana

Han sapat na pakri tabah

Geutanyoe payah arong rimba

Abeh ekhtieue dum geutanyoe

Udeh tawoe dumteu rata

Bek le tamita udeh tawoe

Tuhan sidroe nyang peulara

Umu lhee thon hana neuwoe

Taboh gantoe laen raja

'Oh lheueh padan ka meupakat

Geuwoe leugat bansineuna

Teuduek haba ureueng hanyot

Jinoe lon seubot raja muda

Kata rawi sahib kisah

Raja Abdullah meuwoe calitra

'Oh sare jaga raja sidroe

Neukalon uroe watee duha

Si Kate teueh mantong teungeut

Lam keunawat sajan raja

Raja Abdullah teuduek sidroe

Teuma neupeugoe Si Kate muda

Ulon ka beudoh nyan beurujang

Uroe that manyang ka cuaca

Gop ka leupah jeh 'oh uroe

Di geutanyoe goh lom jaga

Neumat bak jaroe neuyok-yok badan
Jaga yoh nyan Si Kate muda
Teuma jibeudoh nibak teungeut
Raja marit sigra-sigra

Kajak cok ie keu lon bacut
Bukon dueuk pruet lapar dahaga
Si Kate deungo haba meunan
Jitren yoh nyan jime ngon tima

Jicok saboh tima u jaroe
Jijak jinoe u krueng raya
Ban sare trohjih u pante
Leumah jieu le beukah ie raya

Teuma jipeurab laju keunan
Ie jieu tan bansineuna
Krueng abeh tho ie hana le
Miseue pante bansimua

Deungon sikeujap hana meukri
Bandum tuwi tho dum rata
Masa jitren lam keunawat
Ie raya that hana tara

Nyoe hana le krueng abeh tho
Hireuen tahe Si Kate muda
Teuma jiwoe rijang-rijang
Seumbah yoh nyan raja muda

Ampon tuanku syahi alam
Tuanku beuklam teuka ie raya
Tuanku rakyat saleh ka mate
Ie raya me bansineuna

Abeh hanyot dumna rakyat
Ie raya that beuklam teuka
Teuma marit Raja Abdullah
Kango kupeugah ulon raja

Kajak taguen bu bek trep lambat
Pruetku deuek that hana tara
Si Kate seuot sireuta beungeh
Amarah that jih nyan keu raja

Di tuanku lagee tan sosah
Muntah darah nyang neukira
Han teuingat keu rakyat mate
Dudoe page pat neuraja

Abeh ie me dum ka hanyot
Breueh ngon kanot han sapeue na
Peue kutaguen breueh hana le
Abeh sare ie raya ba

Kruengpi ka tho miseue pante
Ie hana le pat tamita
Nyankeu sabab teukabo droe
Tuhan sidroe peumeureuka

Raja neukheun pakri jinoe
Mate geutanyoe dalam rimba
Kajak cok ie kame keunoe
Dahaga kamoe hana tara

Saleh mate lon siseun nyoe
Kajak jinoe ulon raja
Si Kate tren rijang-rijang
Jak cok tuan ie keu raja

Ie hana le rata bandum
Jeuep sagoe krueng tho simua
Abeuek-abueuk dum abeh crah
Tanda Allah that kuasa

Ie neupeutho rata kubang
Dum pucok krueng abeh tho mata
Ngon sakeujap abeh seungap
'Ajab sangat buet Rabbana

Si Kate jijak jeuep-jeuep pahok
Dumna calok abeh tho mata
Lam-lam alue krueng jijak bloh
Jeuep-jeuep paloh ie jimita

Hana sapat dum abeh tho
Jiwoe laju ubak raja
Ban nyang jieu meunah jipeugah
Bak Abdullah raja raya

Hana tuanku ie abeh tho
Raja tahe deungo haba
Pakri he ulon pruetku deuek that
Ie han sapat kapeuhaba

Breuehpi hanyot nyan hana le
Jiteumee mate geutanyoe dua
Pakri cit jinoe ngon tailah
Cuba peugah ulon raja

Mate geutanyoe dalam uteuen
Peue tamakeuen han sapeue na
Nyoer na padan ulon teungku
Kukheun laku ubak gata

Kacuba ek kayee manyang
Kacuba pandang an siseun lingka
Pat na cicem kaeu meutamon
Di yup kayee nyan na teulaga

Si Kate deungo haba meunan
Jiek yoh nyan kayee raya
Jijak lam uteuen laju beurjalan
Teukeudi Tuhan Po Nyang Esa

Leupah uteuen troh le u blang
Jieu meureuntang le ngon kuta
Si Kate that hireuen bimbang
Kuta jipandang jroh that rupa

Sare blet-blot hu jipandang
Cahya intan ngon meutia
Teuma jipeurab Si Kate keunan
Teubuka yoh nyan pinto kuta

Ban sare troh jih nyan keunan
Jipeurab bak mon sigra-sigra
Jikeumeung crong ie tima jicok
Si Kate teukhok 'ajab liga

Sajan jimat tima u jaroe
Suara meubunyoe u istana
'Oh ban meusu tima bak jaroe
Neuheu le Putroe Baren Miga

Wahe Kate ulon meutuah
Bek that pantah tame tima
Seuot Si Kate jikheun meunoe
Tango kamoe po cut raja

Adat han tabri lon me tima nyoe
Tajok keu kamoe peue hade na
Putroe Baren peugot idang
Geupreh sinan ulon raja

Sare ase dum sinaroe
Tuan putroe hei Si Katera
Kepeurab keunoe ulon rijang
Kacok idang sigra-sigra

Teuma jipeurab Si Kate keunan
Neubet yoh nyan idang raya
Ban sare troh idang bak ulee
Gakijih puree han jikira

Idang jibaplueng bukon bubarang
Troph le rijang ubak raja
Raja tanyong rijang-rijang
Pane idang keunoe kaba

Ampon tuanku troh ban lumpoe
Ka na meuligoe indah rupa
Idang tuanku lon me keunoe
Nibak putroe dalam rimba

Ban raja ngo narit meunan
Neumakeuen yoh nyan sigra-sigra
'Oh lheueh raja makeuen makanan
Jipeurab yoh nyan Si Kate muda

Nekmat beureuhi hana macam
Karonya Tuhan Po Nyang Esa
Ban sare lheueh Si Kate makan
Jigiduek kandran dua ngon raja

Jipasang guda sajan junjongan
Jiteureubang u leuen istana
Putroe neutren lam meuligoe
Neujak som droe bak kayee raya

Beukah kayee yoh masa nyan
Kheundak Tuhan Po Nyang Esa
Putroe neulop lam bak kayee
Tinggai dua peue nyan keu tanda

Ok bak ulee ija bak badan
Si Kate yoh nyan sampie ngon raja
'Oh sare troh jih nyan keunan
Jilingka yoh nyan kayee raya

Teuma leumah Si Kate pandang
Nyan di badan jieu tanda
Si Kate keumeung tarek rijang
Beungeh yoh nyan poteu raja

Wahe ulon kammat peukayan
Sa ngon badan putroe rimba
Allah Tuhan Poku sidroe
Kupaban cok putroe lam kayee raya

Adat na lon me beuliong galang
Bah lon teubang bak kayee raya
Adat na lon me sakin lipat
Kayee kreueh that patah mata

Ulonteu nyoe bukon jahe
Na cit ade bak keukira
Ban putroe deungo haba meunan
Neumeubri salam nyan ngon raja

Assalamu'alaikum warahmatullah
Panebu langkah tuanku teuka
Patbu gampong soebu ayah
Cuba peugah po meukuta

Wa 'alaikum salam warahmatullah
Tango lon peugah wahe adekda
Kamoe tuan ureueng nanggroe Syam
Bak lon taseulem dua blah raja

Ulon geuheu nan Raja Abdullah
Saiden Bakhe mbah geuboh nama
Hobu neujak syahi alam
Keumala nanggroe Syam keunoe lam rimba

Raja peugah sigra jinoe
Neuhareutoe bak putroe muda
Ureueng hanyotpi na neupeugah
Ban peurintah dilee nyang ka

Abeh neupeugah deungon idang
Neyue me rijang troh bak hamba
Tren di langet malaikat

Suroh Hadarat Tuhan Yang Esa

Geuyue me idang keu gata putroe
Dilee saboh roe yoh asai mula
Teuma seuot putroe bangsawan
Sireuta neukheun meunoe haba

Pakri neutupeue po junjongan
Tuanku kheun ban lon ngon nyata
Adat na untong nibak Allah
Lon meunikah deungon adekda

Pakri tuanku meukawen ngon kamoe
Le that kaoi po meukuta
Kaoi lon nyoe that mustahe
Ureueng nyang ade ek lon peuna

Nyankeu kaoi doli khalifah
Narit payah **tabicara**
Peue nan kaoi tuan putroe
Peugah bak kamoe po jroh rupa

Lon lakee mbon nyang keunong areng
Lon lakee leubeng nyang keunong suda
Lon lakee cicak nyang peh geundrang
Lon lakee tirom lingka kuta

Ureueng top pade deungon duroe
Neuba keunoe po meukuta
Asee meupok mie ba ringget
That meusaket payah bicara

Nyankeu kaoi tuanku droe
Ayah kamoe nyang meunada
Keu jeunamee han lon tuban
Sautimbang badan neuba dina

Laen nibak nyan hana lon lakee
Dalong meuribee pirak suasa
Raja seuot neukheun meunoe
Deungo kamoe bintang kala

Insya Allah tuan putroe
Tuhan sidroe nyang ek peuna
Di lon tuanpi na kaoi
Lon kheun jinoe ubak gata

Kaoi kamoe he adek buleuen
Saboh peudeueng sikureueng mata
Lam kuta nyoe lon kalon seungue
Hajat bak le manusia

Teuma jaweweueb tuan putroe
Deungo kamoe doli baginda
Insya Allah neukheun le putroe
Tuhan sidroe nyang ek peuna

Poteu raja kheun sipatah
He putroe indah asoe istana
Tadeungo he po bintang Zahrah
Buleuen peuet blah nama purnama

Euntreuk he putroe lon meunikah
Jinoe peue bah lon keulua
Raja neuteubiet sigra rijang
Sajan-sajan ngon Si Katera

Raja seumbahyang dua raka'at
Jihei malakat uleh sahya
Abeh teukeujot sigala jen
Bandum jitren ubak raja

Ampon tuanku syahi alam
Keumala nanggroe Syam nyoho ka teuka
Saleh tuanku geuprang nanggroe
Nyang troh keunoe han tom nyang ka

Teuma seuot Raja Abdullah
Deungo lon peugah dum bak gata
Nyang lon pangge gata keunoe
Kaoi putroe that bit raya

Abeh neupeugah dum sinaroe
Iblih pindoe jijak mita
Kakeu ase sileungkapan
Linto yoh nyan raja muda

Teiduek haba raja siat
Meuwoe ayat keu putroe muda
Neuseumbahyang dua raka'at
Malaikat tren u donya

Rahman Katibin dong keu saksi
Jibrai wali Baren Miga
'Oh leueh putroe geupeunikah
Hukoh Allah ureueng nyan dua

Dudoe teuma geupeuek linto
Dara baro dalam istana
Neukalon jido rupa samlakoe
Neupuwoe keudroe bangta muda

Putroe sambot yoh masa nyan
Neuba tuan atueh geuta
'Oh sare lheueh adat jamuan
Marit yoh nyan Baren Miga

Napsu tuanku padum bagi
Gatapi ahli po meukuta
Teuma seuot raja bangsawan
Deungo lon kheun ban putroe muda

Napsu he po geubagi lapan
Tango tuan lon calitra
Saboh napsu bak ureueng lakoe
Bak ureueng binoe tujoh peukara

Napsu inong umpama laot
Tamse seupot buni cahya
Tamse malam buni uroe
Tamse teutanyoe buni deesya

Nyankeu napsu ureueng binoe
Umpama peutoe han ek buka
Meunankeu napsu ureueng binoe
Baranggasoe judojih muda

Sajan geusurung aneuk gunci
Masa nyan le peutoe teubuka
Yoh masa nyan sare met-mot
Tamse ulat nibak luka

Akai tuanku padum bagi
Gata nyan ahli po meukuta
Akai he putroe geubagi lapan
Sipeurti ban dilee nyan ka

Saboh akai di ureueng binoe
Pruetjih beutroe lakoejih beuna
Peukayan beugot bu bak mangat
Meunan adat atueh donya

Di ureueng lakoe akaijih tujoh
Bandeng jeuoh jipeuteuka
Saket mangat payah mudah
Geumita ilah dum peukara

Saleh na neubeuet tuan putroe
Lon eu ragoe bak meuhaba
Soebu pubeuet deelat meukatoe
Lon nyoe sidroe dalam rimba

Sireuta raja neukheun meunoe
Kadeungo kamoe wahe Katera
Kacok loh pirak lam baluem keunoe
Kupubeuet putroe po da gata

Si Kate cok teuma loh pirak
Jijok ubak poteu raja
Raja sambot nyan u jaroe
Neujoh keu Putroe Baren Miga

Ban sare troh loh u jaroe
Neupubeuet Putroe Baen Miga
Phon neuseubot ngon bismillah
Teuma neukisah ngon aleh ba

Dua harah neupeubeuet putroe
Neubet jaroe atueh jeumala
Sepkeu dumnan meudua harah
Peue geutakreh nyan geukheun ba

Peue hareutoe takheun aleh
Neupeugah bak gleh po meukuta
Adat han tathee ngon isyarat
Han sah syahdat po meukuta

Ban raja deungo narit meunan
Hireuen yoh nyan sikutika
Si Kate tangah teuma u manyang
Leumah jipandang kitab raya

Si Kate marit teuma sipatah
Jiamarah nyan keu raja
Alem gata Raja Abdullah
Han soe meugah atueh donya

Taeu kitab poku putroe
Adat tabloe abeh areuta
Ban raja eu kitab Allah
Meugrak tuboh yo sang geumpa

Teuma neusujud ubak putroe
Tapubeuet kamoe uleh gata
Pakri tuanku kamoe pubeuet
Hana patot po meukuta

Kareuna kamoe keubaroan
Bak junjongan dum peukara
Hana peue salah tuan putroe
Rela kamoe dum peukara

Barangpeue napsu tuan putroe
Kheun bak kamoe he nang nyawa
Kamoe peutroh hajat guree
Peue talakee lon karonya

Teuma neupubeuet ulah putroe
Judoneu sidroe raja raya
Umu dua thon teutap sinan
Hana jap badan ngon putroe muda
Droe nyan lale lam ie seumbahyang
Pagi peutang meunan juga
Lompi malee amat sangat
Han neujeuet bleuet aneuk mata

Lam neuteukui geunap uroe
Han tom putroe neueu rupa
Dawok neutilek kitab Quruan
Keunan neupandang rok-rok masa

Umu dua thon putroe bri fam
Alem han ban Si Kate ngon raja
Bak siuroe peurintah Tuhan
Leumah yoh nyan neukalon rupa

Rupa indah hana bagoe
Meuangget dhoe bintang raja
Tamse buleuen jiarak awan
Jroh that padan bangon rupa

Raja neumise narit lhee patah
Jinoe neupeugah bak putroe muda
Na tadeungo tuan putroe
Lon kheun bagoe ubak gata

Na sidroe ureueng jijak lam blang
Uroe siang angoh anggeeta
Teuma meuteumeung kayee sibak
Reului rampak jroh han tara

Di yup kayee nyan saboh peunuman
Ie di dalam maneh rasa
Adat meugeubri ie nyan siteugok
Meusrapi tok jeuep-jeuep anggeeta

Grah ka gadoh sijuek ate
Ladat beureuhi jatirasa
Mangat asoe gundah han le
Nyankeu tamse he adekda

Teuma seuot tuan putroe
Deungo kamoe wahe kakanda
Sireuta putroe neukheun nyoban
Tango lon tuan po meukuta

Lam teumpat nyoe han jeuet situboh
Meuligoe jroli lam syeuruga
Bukon han lon bri tuanku ampon
Kareuna lon hukom meukuta

Udeh tawoe u nanggroe Syam
Sideh makam teumpat neuraja
Pakri tawoe nyan u nanggroe
Nyoe meuligoe ho ka taba

Tcuma neupeugah le putroe intan
Po junjongan lon peuhaba
Meuligoe meuwoe lom bak Tuhan
Geupeutren tuan siat u donya

Pakri tawoe tuan putroe
Gadol kitab nyoe dalam rimba
Bek neugundai tuanku droe
Ulon sidroe pawang rimba

Ban nyang utong insya Allah
Bek neugundai po meukuta
Wahe Kate deungo lon kheun ban
Lon meuhabarban deungan gata

Jakleh takoh awe batee
Taputa lhee sigra-sigra
Putroe simpan le kitab Quruan
Neuhei angen neuseuraya

Abeh neutamon bandum keunan
Sikalian di leuen istana
Neubeureukah kitab Quruan
Angen tuanpi ka teuka

Wahe angen si raja angen
Gata kusuron keunoe sigra
Kitab kaintat u nanggroe Syam
Keubah di leuen bale rasa

Naritpi sret nyan di babah
Putroe meutuah kabui pinta
Angen bapo yoh masa nyan
Troh le u leuen bale rasa

Dumna rakyat abeh hireuen
Kitab jikalon han teukira
Abeh jitren dum sinaroe
Banpeuet sagoe kawai kuta

Jipreh teuka Raja Abdullah
Kitab barollah jikalon tanda
Kitab Quruan ka troh u nanggroe
Kisah meuwoe jinoe keu raja

Yoh nyan guda geuboh keukang
Putroe pasang deungon raja
Putroe di teungoh namiet di likot
That meupatot po meukuta

Na sikeujap ka troh nanggroe Syam
Khalikon 'alam nyang po kuasa
Keuramat raja deungon putroe
Ka troh u nanggroe woe u tangga

Rakyat jitren that barollah
Jideungo gah ka woe raja
Neupeuwoe putroe dalam uteuen
Rupa ban buleuen teungoh purnama

Uleebalang peurdana meuntroe
Rakyat sinaroe jiseumbah raja
Jiseumbah raja sireuta putroe
Nyang baro woe dalam rimba

Raja neuduek lam meuligoe
Ngon judo droe Baren Miga
'Oh lheueh rakyat abeh jiwoe
Tinggai putroe deungon raja

Teutap raja deungon putroe
Geunap uroe meusuka-suka
Balah dilee han tom meusapat
Nibak teumpat meuligoe syeuruga

Raja Abdullah peupuleh meusyen
Putroe Barenpi meunan juga
Rotnoepi deuek rotdehpi grah
Bandua blah gaseh that meusra

Lawet lawan teuma dudoe
Kisah meuwoe keu Baren Miga
Putroe Baren le peukateuen
Neupok teupeuen ija sutra

Neuboh curak meusigak ragam
Di nanggroe Syam hana ngon peusa
Neurika curak tuleh kalimah
Mayas Allah indah lagoina

Neubloe seunam meubagoe-bagoe
Puteh sinaroe laenpi na
Ladom hijo adom mirah
Subhanallah kunengpi na

Siteungoh ri neubloe hitam
Jeuneh seunam lagee ruap
Alat teupeuen karonya Tuhan
Yoh masa nyan neuboh sigra

Pasa meugeunta geutatah intan
Karonya Tuhan Po Nyang Esa
Peunok turak meuh dum mirah
Suripi indah hana tara

Jroh ngon taloe teureuek meuhalak
Suasa pirak ngon mutiara
Dumpeue ase le sinaroe
Keuramat Putroe Baren Miga

Yoh nyan putroe sutra neusuet
Cahya blet-blot hana tara
Siretoh panyang sireutoh pinggang
Sigo neureuntang putroe muda

Neuboh ragoe hitam mirah
La ilaha illallah meunan geuba ca
Dilee seunaleuek 'arasy keurus i
Neusaleuek le syeuruga nuraka

Teuma neubalek loh ngon kalam
Abeh neufam dum anika
Lheueh nyan neusaleuek langet tujoh
Lheueh nyan neuboh pinto donya

Abeh leungkap dum sikalian
Neupok yoh nyan ija sutra
Suara teupeuen that meukrang-krang
Sigo neutimang bunyoe biula

Putroe Baren teupeuen neuanak
Suara meuhayak deungon geunta
Nak jiek ceuko neugrak suri
Tiwah bangsi deungon biula

Sutra meulu cahya blet-blot
Cahya meuhad sang meutia
Teukeudi Allah peurintah Tuhan
Umu sibulan ijapi leungka

'Oh sare neukoh nibak teupeuen
Peuet reutoh khan ija sutra
Teuma neucok ija dua khan
Neujoh bak tangan Si Kate muda

Sikhan jisawak sikhan jipinggaang
Neuyue jak rijang hadapan raja
Laju jijak Si Kate yoh nyan
Suroh tuan putroe muda

Mangat neukalon uleh sulotan
Si Kate yoh nyan jak le sigra
Ban aja eu kayen jipakoe
Raja neumoe ro ie mata

Putroe neutren di meuligoe
Teuma na sidroe Si Kate muda
Neucok ija uleh putroe
Neujok u jaroe poteu raja

Nyoe na peue tuanku buet lon sidroe
Nyan buet jaroe ureueng hina
Insya Allah tuan putroe
Ijateu nyoe sangat mulia

Bah kupeuet keu tiree ka'bah
Kareuna indah hana tara
Ulon tinggai meudua khan
Gantoe gafan he nang nyawa

Teutap raja lam meuligoe
Sajan Putroe Baren Miga
Bandua droe teutap sinan
Pajoh makan peue nyang hawa

Masa lam rimba hana neulurong
'Oh troh u gampon ban nyang suka
'Aiayeb subhanallah
Tango lon kisah saboh calitra

Deungo lon peugah saboh nanggroe
Sinan sidroe raja raya
Nanggroe jih luah rakyat meukatoe
Raja nyan sidroe that angkara

Nanggroe jimeunan Hiran Gareb
Nanggroe nyan bit luah raya
Raja Sindon geuseubot nan
Sitree Tuhan kaphe ceulaka

Mungkejih that bukon bubarang
Abeh jiprang sigala donya
Ho nyang jipeunap dum teureuban
Hana soe lawan kaphe meureuka

Rakyat barollah meulaksa katoe
Raja nyan sidroe nyang that raya
Raja nyang taklok bak raja nyan
Bak bilangan tujoh laksa

Sireutoh tujoh ploh aduen adoe
Nyan di nanggroe bandum raja
Ek jigeunggam dum u jaroe
Ateueh nanggroe han soe sangga

Ho nyan jipeukeue abeh ranap
Ho jipeunap dum teureupa
Putroe jitawan jeuep-jeuep nanggroe
Jih hana soe ek timang padra

Jitawan putroe dalam meuligoe
Tujoh ploh droe nyan nyang ka na
Rupa sambinoe dum jipileh
Jitueng abeh aneuk raja

Teukeudi Allah teuma dudoe
Meugah Putroe Baren Miga
Trok meusyeuhu bak Raja Sindon
Putroe geupeutren dalam rimba

Rupa indah hana bagoe
Tiwah pudoe ngon meutia
Nan geuuroh Putroe Baren
Rupa canden hana tara

Hana sidroe nyang sipadan
That analan atueh donya
Phon dilee kon nyang na putroe
Troh an dudoe kiamat donya

Hana nyang sa bak gop peugah
Bit nyo indah aneuk raja
Di lon kutueng kuprang nanggroe
Kuba keunoe putroe muda

Meunan mantong ek yo asoe
Nama Putroe Baren Miga
Lom ngon rupa sang buleuen trang
Bah kujak prang nanggroe raja

That teumeui-meui jitroh putroe
Han thee keudroe le bicara
Tunangan kee jih keumeung tueng
Jinoe kuprang bah jirasa

Meuhan jiintat keunoe keu kee
Kuplah ulee jeuet keu sira
Han thee keudroe bube leubeng
Nanggroe kutunggeng ngon siklep mata

Kon rumanjih meukawen ngon nyan
Hana padan putroe muda
Meunankeu narit Raja Sindon
Jinoe ka phon prang jimula

Jikrah rakyat banda duson
Raja Sindon that guranta
Na nyum beutroh le ngon siat
Guransang that raja ceulaka

'Oh jingo gah Putroe Baren
Peue-peue laen han jikira
Napsujih tan keu putroe laen
Putroe Baren cit jihawa

Meujingo gah dumnan mabok
Kaphe kutoh asoe nuraka
Adat na jieu teusuet lidah
Tijoh ie babah meunan nyum rasa

Teuma jiseubot ama putroe
Raja pindoe suka rasa
Rupa bayek that peungaroe
Meuangget dhoe buleuen purnama

Badanpi jeunjang that meutrieng blang
Raya u manyang sang geuteumpa
Badan cut tek baho keumang
Jroh meuchang-chang putroe muda

Takue meuariet jroh teularek
Dhoejih leuntek ban geujangka
Bulee keuneng sangat hibat
Nyang leuntek that bullee mata

Bibijih renumom sang biduri
Cahya gigi sang meutia
Gigoe jroh that sabe-sabe
Bangon tamee aneuk deulima

Paleuet jaroe sang on buni
Paleuet gaki sang on buga
Phajih dua meujeundrang pade
Paleuet gaki meukawoh Cina

Mom bak dada meuduroe panjoe
Jroh sambinoe hana tara
Barangdum jroh cicem laen
Leubeh canden cicem pala

Barangdum jroh putroe laen
Leubeh canden Baren Miga
Ie maneh di atueh dulang
Bungong lawang dalam keutumbu

Nyan putroe jroh lagoe seudang
Umpama meuh siploh mutu
Meunankeu narit Raja Sindon
Sitree Tuhan Asoe nuraka

Abeh jiseubot sifeuet putroe
Raja pindoe that guranta
Jikrah rakyat jeuep sagoe be
Raja kaphe that angkara

Bah teuduek nyan jinoe laen
Putroe Baren lon calitra
Amma bakdu dudoe nibak nyan
Deungo tuan lon peuhaba

Bak simalam putroe meulumpoe
Tuhan sidroe nyang peunyata
Neumeulumpoe malam Jumeu'at
Leumah alamat saboh tanda

Neulumpoe ie raya teuka di laot
Abeh jiglet deungon istana
Ie jimudek troh u tunong
Abeh ngop gunong bansineuna

Nyang hana ngop puncak meuligoe
Neuduek putroe pucak istana
Putroe cok kayee neutumpang tingkap
Yoh nyan sikeujap ngop istana

Putroe keumeung tueng ie seumbahyang
Leumah neupandang najih meubura
Teukeujot putroe neukalon bangke
Teuma neuek le cong istana

Neupeugot amak neuboh ngon leugat
Putroe thee that nyan ie raya
'Oh lheueh abeh leumah lumpoe
Teukeujot putroe lalu jaga

Teuma neubeudoh nibak tido
Duek teupako wet ngon sial
Abeh neutupeue takbi lumpoe
Neuyue som droe bak Rabbana

Neuleueng ngon jaroe tangah u langet
Lakee rahmat nyang sijahtera
Lheueh nyan teuma neujak u dapu
Neujak taguen bu sigra-sigra

Teuma neuboh bu lam idang
Eungkot panggang meureutoh mata
'Oh lheueh ase bu lam idang
Neupeugoe yoh nyan poteu raja

Dilee neuceupet buju teuot
Teuma neuurot troh 'oh dada
Teukeujot raja nibak tido
Duek teupako wet ngon sila

Laju neutanyong poteu sidroe
Pakon tapeugoe he nang nyawa
Peuebu haba takeumeung peugah
Judo meutuah keumala donya

Tuanku beudoh nyan beurijang
Bu lam idang jipreh gata
Peugah ban buet tuan putroe
Lon tapeugoe peue kareuna

Malam Jumeu'at meunan peuneuga
Malam nyan indah hana tara
Lailaton kada bak malam nyan
Teuseubot meunan lam calitra

Sinan teuduek ngon suami
Ateueh keurusi seunda beurseunda
Raja neutanyong laju bak putroe
Pakon tapeugoe he judo muda

Teuma seot tuan putroe
Tango kamoe judo raja
Tuanku ampon geutanyoe geuprang
Geucok bintang dalam istana

Tuanku geuprang ubak thon nyoe
Geutueng kamoe geupoh meukuta
Pane ureueng jak prang keunoe
Siri nanggroe tohbu raja

Nanggroe tuanku Hiran Gareb
Nanggroe nyan bit luah raya
Raja Sindon tuanku geukheun
Nyang keurajeuen sigala donya

Limong laksa raja jak keunoe
Laen adoe han teukira
Sireutoh tujoh ploh aduen adoe
Nyan di nanggroe dumjih raja

Sidroe-droejih dumna rakyat
Dalam himat tujoh laksa
Abel bandum jak di nanggroe
Rakyat meukatoe meulaksin laksa

Nyan nyang jiba asoe peukan
Ureueng ladang tinggai sumua
Ureueng duson na tatukri
Dumjih sare raya-raya

Ban raja ngo narit putroe
Geuta asoe yo sang geumpa
Raja neumoe bukon bubarang
Basah ngon mieng nyan bandua

Pakri laku tuan putroe
Ho geutanyoe he nang nyawa
Teuma seuot tuan putroe
Pakon neumoe po meukuta
Pakon tuanku kureueng akai
Hana tawakkai keu Rabbana
Tuan putroe neucungke darah
Neuboh bak gapeueh sigra-sigra

Neujok keu raja neuyue pajoh
Nak teuga tuboh pahlawan raya
'Oh lheueh neupajoh darah putroe
Geunta asoe na ban geumpa

Timoh bulee nyum sang kabat
Sigo neulumpat troh siploh deupa
Yoh nyan neumarit paduka sulotan
Meunoe neukheun ban bak putroe muda

Insya Allah ngon tulong Tuhan
Jinoe kulawan kaphe ceulaka
Raja neutren lam meuligoe
Neujak pasoe beude raya

Neumeuinseuen ubak Tuhan
Raja yoh nyan meusempeuna
Ya Ilahi wa ya Rabbi
Poku neubri ban kupinta

Kalee na tuah kukeurajeuen
Rakyat bak jiren dua blah raja
Sangkira han neubri tuah
Beude beupatah lon beufana

Raja giduek atueh beude
Hana weueh le tinggai donya
Beude neupasang apui di jaroe
Neusliet jinoe meuriam raya

Ka neugom droe ateueh beude
Raja ade meusempeuna
Ban deumi neulhiet tunam di jaroe
Geunta bumoe suara meugeumpa

Suara meugop-gop siuroe jak
Donya meuhayak na nyum meugisa
Troh sigala be su meuriam
Tren le curam rakyat dumna

Uleebalang peuet uleebalang lapan
Tenr le rijang dum bak raja
Siblah nanggroe peurise beusoe
Siblah nanggroe peurise teumga

Siblah nanggroe teuliki nibong
Siblah gampong teuliki bagka
Ban sare troh tamong u dalam
Ngadap junjongan raja muda

Deelat tuanku syahi alam
Keumala nanggroe Syam nyang that mulia
Pakon tuanku neupangge kamoe
Neukheun jinoe siri sabda

Siri gampong nyang meusugang
Toh siri blang nyang tan musara
Tadeungo lon wahe teelan
Kheundak Tuhan bri keu hamba

Ulon geuprang dalam thon nyoe
Jitueng putroe uleh raja
Teuma seuot panglima prang
Uleebalang sapai raja

Siri ureueng jak prang keunoe
Siri nanggroe tohbu raja
Nanggroe jimeunan Hiran Gareb
Rakyat keubit le lagoina

Nama geusebot Raja Sindon
Tuanku ampon raja raya
Limong laksa nyang jak keunoe
Laen adoe han teukira

Padum uroe treuk keunoe jiprang
Neukheun rijang po meukuta
Bek tatanyong nibak kamoe
Keudeh bak putroe tapareksa

Keudeh tatanyong dum sibarang
Putroe tuban dum peukara
Teuma jijak dum sinaroe
Ubak Putroe Baren Miga

Ban sare troh ubak putroe
Teumanyong jinoe dumna peutua
Tuan putroe dum hareutoe
Rakyat sinaroe deungo sabda

Limong buleuen treuk dudoe nibak nyan
Buleuen Syakban troh jiteuka
Teuma neumarit Raja Abdullah
Tango lon peugah ubak gata

Nyankeu haba wahe rakan
Lon peugah ban ubak gata
Peue meupakat wahe teelan
Cuba kheun ban dumna gaat

Beukit geutanyoe han tatem lawan
Keudeh tuan taplueng lam rimba
Teuma seuot panglima prang
Nyang analan that peurkasa

Pane ureueng jak prang keunoe
Siri nanggroe tohbu raja
Limong laksa raja jak keunoe
Kuniet sidroe po meukuta

Laman neutulong Allah ngon Nabi
Meunyoe cit neubri ban nyang pinta
Raja dua blah teuma marit
Sigala rakyat dum barang na

Ya Ilahi wa ya Rabbi
Lon lawan Yahudi asoe nuraka
Adat han meulawan bak siseun nyoe
Taleuek kamoe ngon asoe syeuruga

Tuanku bek that meugundah
Poteu Allah soe peulara
Beuteutap neuduek lam meuligoe
Sajan Putroe Baren Miga

Laman goh mate kamoe lawan
Po junjongan bek neungaza
Abeh narit raja dua blah
Raja Abdullah peugah haba

Jakkeu tawoe gata u nanggroe
Umu lhee uroe beutroh tateuka
Abeh rakyat jilakee droe
Woe u nanggroe bansineuna

'Oh sare troh nyan u nanggroe
Abeh jikheun droe bak asoe tangga
Tadeungo kamoe wahe judo
Meukheun laku ubak gata

Tapeumanoe umu lhee uroe
Kumeung jak meubloe kuala raya
Tapeudoli gaca jaroe gaki
Saleh mate geantueng nyawa

Adat mate lon jak syahid
Taibadat ateueh donya
Bek tapeubuet teughah Tuhan
Tameukawen dumteu rata

Abeh narit ka jibi'at
Jitren leugat u blang raya
'Oh sare troh jiteubiet u balang
Teumanyong yoh nyan tuha muda
Patbu tatueng mudai tamuprang
Takheun rijang dumna gata
Teuma seuot raja dua blah
Ka jipeugah bak rakyat dumna

Tatueng ripee buet meupakat
Sigala rakyat tuha muda
Abeh jijak dum sigala be
Jitueng ripee sigala donya

Nyang kaya bacut jitueng sikatoe
Nyang kaya that jitueng sibara
Ladom peuet mah ladom sigupang
Bandum tuan sigala donya

Ban nyang laku miyup manyang
Kaya gasien jipeubida
Sare abeh jitueng ripee
Le that ase Allah karonya

Jibri beulanja bak prang sabi
Dumjih sare santeut rata
Hana sidroe nyang na tinggai
Ban laku hai ureung kaya

Lheueh nyan abeh rakyat ili
Dum u pasi bansineuna
Teuma meupakat dum sinaroe
Neuyue bloe beusoe dumjih rata

Jiboh linteueng kuta beusoe
Tujoh uroe pasang guda
Buju teuma kuta beusoe
Limong uroe han troh lingka

Teuneutai kuta cit ka meuhad
Adat taspat na nam deupa
Silabohan pukat jiboh pancang
Lam krueng jiglong junga ngon suda

Rata jiboh ngon papaleh
Mangat jipreh boh beude teuka
Krueng tujoh pat jiboh rante
Jiboh gunci bansineuna

Bineh kuta beusoe jiglong
Lam krueng geupeudong junga ngon suda
Ureueng nanggroe Syam that ɭeureuhi
Raja kaphe jipreh teuka

Abeh jiangkot kitab Quruan
Jime keunana dalam kuta
Rakyat puasa yoh masa nyan
Jibeuet Quruan dumjih rata

Umu sibuleuen jibeuet Quruan
Leumah jikalon saboh tanda
Jinoe ka meuri Allah tulong
Ie meupayong ateueh kuala

Reudokpi tan ujeuenpi han
Karonya Tuhan Po Nyang Esa
Mangatkeu ate dumna rakyat
Jithee keuramat Allah peunyata

Leumah buleuen dudoe nibak nyan
Troph angkatan keunan teuka
Padum bidok ngon kuangkang
Sajan beunjalan nyang raya-raya

Padum-padum nyan ngon kapai
Saboh pasai nyang di bahtra
Ka jisaoh bandum lam lhok
Raþ mata jok di mieng kuala

Siblah laot peunoh meudah-dah
That barollah si ceulaka
Jitet beude meugeureupoh
Nyum ka runtoh alam donya

Rakyat lam kuta mangat asoe
Peudeueng di jaroe dumjih rata
Meuucap syuko dum keu Tuhan
Bandum tuan hana reuda

Raja yue aklon bak mualem
Ureueng eseulam dum barang na
Mualem jimat teureupong di tangan
Yoh nyan jipandang sigala donya

Jikalon rakyat ka soh nanggroe
Abeh jipasoe dalam kuta
Nyankeu nujum nibak kaphe
Rakan Yahudi asoe nuraka

Jipeuek seumbah ahli nujum
Jaroe jiseuon atueuh jeumala
Tuanku rakyat han le lam nanggroe
Ka jipasoe dalam kuta

Areutajih teutap nibak teumpat
Tanda kuat jilawan ngaza
Tacuba kalon dalam meureudan
Taeu iman rakyat raja

Santeuet pakat po junjongan
Tuanku jilawan dumjih rata
Adat mate ureueng lakoe
Ureueng binoepi jingaza

Dumna rakyat jimeuase
Jicoh beude dalam kuta
Jipeubeude meugeureupoh
Rasa runtoh kuta raja

Adat sangkira kuta tanoh
Hanco luroh siklep mata
Sajan keunong sabe beusoe
Jipko meuk adoe meugunca-gunca

Side meutum sinoe meutam
Boh meuriam seum silaksa
Ureueng di darat hana jitaleh
Di jih jipreh mantong saja

Masa nyan beungeh Panglima Bandran
Jiteubiet rijang u lua kuta
Boh beude sret dum jisambot
Jitiek u likot dum boh lila

Umu lhee uroe rakyat di baroh
Beude jicoh **hana reuda**
Raja Abdullah dalam khaluet
Tuan putroe cut meunan juga

Putroe marit deungon jido
Neukheun laku sigra-sigra
Neudeungo lon po junjongan
Seumbah laman pance nyang hina

Bek le tuanku neuduek di ruloh
Kareuna musoh jeh ak teuka
Ban raja ngo narti putroe
Geulunyueng tuloe ro ie mata

Sireuta neukheun he bungong pade
Intan meurungke meuh geuteumpa
Wahe judo tangke ate
Saleh troh janji Allah Ta'ala

Pat lon keubah judoku putroe
Kareuna nanggroe ka haro-hara
Tuanku ampon deelat meukatoe
Tuhanteu sidroe nyang peulara

Tuanku peujok bak Po tallah
Nyang peurintah alam donya
Yoh nyang raja neufatihah
Keu nabiyullah dum eelia

Masa nyan raja neumeulangkah
Sigra pantah troh lam kuta
Ka jibuka ngon pinto khop
Poteu neulop yoh nyan sigra

Na sijameung raja teudong
Hu ceumeurlang peungeuh cahya
Jipeubeude meugeureupoh
Hana ek roh dalam kuta

Raja kaphe teuma jitanyong
Soe na keunong dalam kuta
Teuma seuot ahli nujum
Ban nyang maklum jicalitra

Tuanku ka troh Raja Abdullah
Nyang meutuah hana tara
Sireuta jikheun haba sipatah
Kaphe bedeuah asoe nuraka

Bit ka pungo Raja Abdullah
Jilawan gajah teungoh meunta
Jih ban kameng kee ban rimueng
Barangho jipluengpi kumita

Hana patot jijak lawan
Jih dua khan dua blah raja
Jinoe tapeugot saboh surat
Taboh naritku bak raja

Meunyo na napsu bek hanco nanggroe
Jiintat keunoe Baren Miga
Meuhan jiintat keunoe putroe
Kuhanco nanggroe beujeuet keu sira

Nanggroe di jih bak bineh gle
Kuhayak gaki jiek ie raya
Bek kasurat ngon basa Pari
Han jitukri raja muda

Bek kasurat bahasa 'ajam
Payah jifam dumjih rata
Kapeugot surat bahasa Arab
Nak meumangat jifam makna

Suratpi lheueh abeh kalam
Geubri utosan ubak raja
Soe nyang geuyue intat surat
Bandum singkat jimeudawa

Nyang hana dawa ureueng lapan droe
Jisambot jinoe surat bak raja
'Oh sare troh nyan u darat
Jiteungoh leugat u pinto kuta

Tuan-tuan nyang kawai pinto
Tabri meulalo u dalam kuta
Pane gata wahe teelan
Takheun rijang lon ngo nyata

Kamoe nibak Raja Sindon
Meuba kireman ubak gata
Adat gata ureueng musohan
Peuseumbah rijang ubak raja

Nyang kawai pinto tamong leugat
Jijak deelat po jih raja
Ampon tuanku syahi alam
Keumala nanggroe Syam nyang that mulia

Ureueng nibak Raja Sindon
Surat kireman keunoe jiba
Sabda neuyue tueng rijang-rijang
Neuyue tamong u dalam kuta

Troh jitamong bujang keunan
Geuyue duek yoh nyan bansineuna
'Oh lheueh geuleueng ngon hamparan
Lheueh nibak nyan deelat raja

Raja Abdullah neuyue pioh
Duek di baroh atueh tahta
Poteu neubri ranup lam puan
Teuma makanan jatirasa

Lheueh jimakeuen ban lapan droe
Jijok u jaroe surat nyang jiba
Poteu kalon surat kireman
Han meuban-ban ro ie mata

Yoh nyan hireuen Panglima Bandran
Jitanyong kalam ubak raja
Pakon tuanku gundah sangat
Peue alamat surat nyang geuba

Teuma meusabda syahi alam
Neukheun yoh nyan bak panglima
Nyan na peue surat tacuba pandang
Peue habaran nibak raja

Panglima Bandran buka surat
Yo meukhap-khap tamse geumpa
Jibeudoh bulee na tame kabat
Siseun neulumpat na peuet ploh deupa

Idin tuanku lon balah surat
Lon kaleh narit raja ceulaka
Neucok jeundaiwan teuma u jaroe
Ureueng lapan droe jipeuseksa

Kulet ulee jisalop u dhoe
Teutop jinoe aneuk mata
Tinggai ureueng nyan teuma sidroe
Soe jak kheun proe ubak raja

Nyankeu dali tanda kulawan
Keubit deungon han sinan nyata
Teuma jipeudieng dalam sampan
Jiyue woe rijang ubak raja

Ban jikalon ka meudarah
Abeh gundah dumjih rata
Jiyue teungoh nyan u darat
Jiboh ubat sigra-sigra

Uroe jiboh malam jinoh
Han le gundah si ceulaka
Maka jiboh ubat peuranggi
Cit jinoh le ngon siklep mata

Dudoe nibak nyan jipeubeude
Sigala kaphe tahat guranta
Jipeubeude nyan u darat
Dum ujeuen that teungoh keunong sa

Teuma marit Raja Abdullah
Poteu Allah balah guna
Lheueh nyan teuma geupasoe beude
Dumgeu sare ase leungka

Tapreh tuan 'oh reubah uroe
Kutika geutanyoe goh lom teuka
Lheueh nyan teuma geuseumbahyang
Teuma geumakan dumgeu rata

Sare abeh rakyat makan
Dudoe junjongan neumeusabda
Tango kamoe dumna rakyat
Meukheun amanat ubak gata

Ulon kueh bak siseun nyoe
Kueu lumpoe ngon kutika
Jikalee teungeut dua lhee uroe
Bek tapeugoe uleh gata

Bek antara talo nanggroe
Adat putroe bahle geuba
Lheueh nyan neueh doli hadarat
Teungeut mangat hana tara

Leumah neukalon **Nabi Muhammad**
Bak dhoe teusurat buleuen purnama
Neumeusabda Rasulullah
Ka neupeugah ubak raja

Tango kamoe Raja Abdullah
Kubantu kah dum peukara
Kaphe kutoh got kalawan
Rela Tuhan asoe nuraka

Ban teukeujot bak beuradu
Beudoh laju poteu raja
Teuma neutatang Sampih Ratu
Hana laku kuat raja

Beude nyang laen bukon bubarang
Jikoh tihang kapai dumna
Suara beude han le meutum
Meutadeungo grum seun silaksa

Beude di laot han ban lagee
Le that sukee raja ceulaka
Eungkot di laot jilakee rahmat
Jimohon syafaat keu raja muda

Beuseulamat Raja Abdullah
Neubri peunajoh geutanyoe dumna
Beuseulamat raja muprang
Tulong Tuhan dum peukara

Eungkot di laot that barollah
Peunoh meudah-dah di mieng kuala
Padum pawoh meuribee-ribbee
Padum deungon yee meuploh laksa

Jinoe geuprang that meuhayak
Bagoe umbak riyeuk keunong sa
Umu sibuleuen prang meutunang
Dum ka timang sabé padra

Bitpi dumnan rakyat mate
Sibagoe le alen teuka
Siploh mate silaksa gantoe
Geunap uroe teuka lanja

Teuma teuka Guru Sen ceubeuh
Leupah that kreueh atueuh donya
Ho saleh ka Panglima Bandran
Reubot lon tuan uleh gata

Kon ruman kah lawan ngon kamoe
Kaba keunoe Baren Miga
Bek an treuk kaeu tuan putroe
Meung meuligoe bek kaeu rupa

Na tadeungo wahe Guru Sen
Gata aduen sisyeedara
Tabri akai nyan keu kamoe
Meutueng Putroe Baren Miga

Teuma jimirit Si Guru Se
Jikheun yoh nyan ubak raja
Han jeuet tuanku taprang ngon alat
Meutuah that ureueng nyan dua

Jinoe tuanku kuboh hekeumat
Bah tasakat raja muda
Guru Sen peubuet hekeumat
Jipileh rakyat nyang bisa-bisa

Jipileh rakan nyang sipadan
Nyang pahlawan guna beurguna
Tujoh uroe jiamai hekeumat
Han jan siat kuta binasa

Abeh reuloh ukta beusoe
Reuloh keudroe kuta raja
Beude di laot that meuhayak
Kuta pipak seun-seun sideupa

Bitpi reubah kuta beusoe
Hana sidroe ureueng binasa
Sabab keuramat ureueng dua droe
Raja ngon Putroe Baren Miga

Raja Abdullah neusurot leugat
Neutakot rakyat bek binasa
Raja meusabda ubak rakyat
Peue na pakat dumna gata

Udeh taplueng dum geutanyoe
Kuta beusoe ka binasa
Teuma seuot Panglima Bandran
Jawueub kalam sabda raja

Ate saket bukon bubarang
Narit krang-ceukang buka suara
Takalon babah teukeucap-keucap
Mata mirah that ban aneuk saga

Pakon tuanku neuyue plueng kamoe
Supo binoe nyang ka geumeung ba
Teuma seuot paduka sulotan
Deungan peurlahan neumeuhaba

Pakri cit laku Panglima Bandran
Jinoe padan ubak gata
Adat meunan po junjongan
Tango kaman saboh calitra

Tuanku pileh rakyat nyang keubai
Ri nyang pandai theun seunjata
Panglima Bandran peukek seumbah
Yoh nyan neupeugah ubak raja

Ureueng nyang beuhe deungon teuga
Keubai deungon kha dumjih rata
Ureueng nyan tuanku han lut beusoe
Meutageurudoe dalam mata

Dalam apui jeuet tapasoe
Tagogajoe han binasa
Adat tapateh ulon peugah
Kupeuleumah taeu ngon mata

Panglima suroh angkot kayee
Neuyue tamon rujee dum bak bangka
Ka meutamon na bube rumoh
Sare mehmoh dumjih rata

Geupeudep apui pantah rijang
Geuyue kalon trang di nap raja
Ho ka gata rakan kamoe
Jak ngadu droe di keue baginda

Panglima lumpat dalam apui nyan
Sajan ngon rakan dum sireuta
Bek antara tutong badan
Meupeukayan hana luka

Raja Abdullah pileh rakan
Nyang saban ngon rakyat panglima
Ri nyang ceubeueh tamong abeh
Jimeutangkeh lam apui raya

Yoh nyan panglima peukek seumbah
Bak khalifah raja raya
Padum na tuanku kapai di droe
Nyang mee peulayeue u laot raya

Raja seuot yoh masa nyan
Ulon gasien hana areuta
Nyang na kapai cit lhee reutoh
Meubajee goh beusoe teumaga

\dat meunan po junjongan
Jdeh kaman tajak sigra
ßeude nyang na dum tatinggai
ame beukai alat seunjata

\angat taek dum geutanyoe
'apeusak jinoe ubak raja
ßeudeh lam kapai ban lhee reutoh
ßeuyue meuuroh ngon eelia

'oteu peugah syahid rakyat
anteut pakat bansineuna
iek deumppek surak wahe rakan
'ujoe Tuhan dumteu rata

Dumna rakyat ucap kalimah
La ilaha illallah dumgeu rata
Masa mujarab bak pandangan
Yoh masa nyan teubiet kuala

'Oh sare troh nyan u laot
Neukek leugat raja muda
Jipeubeude na ban ujeuen
Neuyue theun rueng nyan keu kuta

Kaphe kalon hana ro darah
Abeh gundah si ceulaka
Teuma marit Raja Abdullah
Ka neupeugah bak rakyat dumna

Bek kapeurab bak alam hitam
Dua simanyam kabri hareuga
Keunan kapeurab bak alam mirah
Nyankeu nyang sah alam raja

Raja Abdullah dilee peurab
Lanja neungadap bak kapai raja
'Oh sare rab Raja Sindon
Neudong tuan di nap raja

Laju neutumbok di ulee ate
Neutarek le sigra-sigra
Pakri laku Raja Sindon
Katem ulon tamong agama

Raja kaphe peuek seumbah
Bak khalifah raja muda
Ampo tuanku syahi alam
Keumala nanggroe Syam nyang that mulia

Nyang troh langkah kamoe keunoe
Hajat kamoe tamong agama
Ulon peugah jak tueng putroe
Rakyat meukatoe sajan lon ba

Ulon meutanggoh tujoh uroe
Meugeunap kamoe sabe raja
Ka neupateh Raja Abdullah
Kaphe sum'ah seumbah beurala

Raja Abdullah neupreh tanggoh
Kapai neusaoh di laot raya
Sigala kaphe tamong lam buet
Ka jikhaluet peugot mintra

Siteungoh kaphe seumbah patong
Mohon tulong bak beurala
Tujoh uroe jiamai hekeumat
Troh meukeusud si ceulaka

Peuek seumbah peundita Yahudi
Jimeuanji deungan raja
Deelat tuanku syahi alam
Seumbah laman po meukuta

Ka troh tuanku barang nyang hajat
Ka jeuet hekeumat keu raja muda
Adat meunan rakan teungku droe
Peubuet jinoe uleh gata

Masa nyan le jiboh hekeumat
Jimeuhajat bak beurala
Saboh batee jilhom u laot
Saboh teuseubot ka lham bahtra
Saboh treuk nyan jilhom leugat
Troh ban hajat kaphe ceulaka
Lhee reutoh batee jilhom yoh nyan
Bandum ak lham kapai raja

Jitupeue ka lham Raja Abdullah
Hana saboh ureueng binasa
Raja Abdullah Tuhan tulong
Ie meupayong ateueh bahtra

Siploh deupa ie meulayang
Malaikat tatang ateueh keupala
Pihak leubeli ngon keuramat
Malaikat mawot keunan teuka

Nyankeu raja that meutuah
Gaseh Allah hana tara
Baro neuthee Raja Abdullah
Ia mata limpah sret u dada

Sireuta neukheun Allah hai tuboh
Ho saleh troh geutanyoe dumna
Langet ka u keueng bumoe ka u dhoe
Jeuoh that lagoe nibak nyang ka

Peukek seumbah areh billah
Ka jipeugah ubak raja
Deelat tuanku syahi alam
Keumala nanggroe Syam nyang that mulia

Tuanku ka lham dalam laot
Raja laknat boh ranjana
Soe na gata nyang na utoh
Nyang ek balah mintra raja

Peukek seumbah dumna rakyat
Han sidroe jeuet peupuleh mintra
Dumna rakyat jak bet sampan
Meukeumat tuan bahtra raya

Peukek seumbah dumna rakyat
Bak hadarat raja muda
Tuanku ampon han ek soe bet
Meuukheue lam laot sampan ngon bahtra

Adat han bahtra meuhad sampan
Beuna soe kheun ban dalam istana
Pakri akai dum geutanyoe
Teutap sinoe lam laot raya

Beuthat saba dum geutanyoe
Tangadu droe bak Rabbana
Dumna rakyat yue beuet Quruan
Yoh masa nyan jilakee do'a

Raja Abdullah teutap lam laot
Jinoe lon seubot raja ceulaka
Teuma jimarit Raja Sindon
Jikheun yoh nyan sigra-sigra

Sabda teubuka le ngon peutoe
Jicok asoe peue hade na
'Oh sare lheueh jibuka peutoe
Raja pindoe ate suka

Jingui peukayan yoh masa nyan
Sipeurti ban linto teuka
'Oh sare roh peukayan di asoe
Lon kujak woe dalam istana

Jak intat ulon rakyat meukatoe
Jinoe kuwoe bak putroe muda
Bak uroe nyoe **meundapatkan**
Intan meukarang Baren Miga

Jinoe han soe le kutakot
Ka lam laot uleue bssa
Yoh masa nyan jicok saoh
Layeue jiboh leugat u kuala
'Oh sare troh teungoh u darat
Yo meutat-tat tuboh anggeeta
Raja ngon rakyat jipeugot deumam
Dua ureueng nyan seuuem peungaba

Raja ngon putroe leubeh keuramat
Tuhan Hadarat nyang peunyata
Tamse tapeh dalam uroe
Meunankeu asoe rakyat ngon raja

Abeh saket dum sinaroe
Keuramat Putroe Baren Miga
Raja tanyong ubak rakyat
Supo hekeumat geutanyoe binasa

Peukek seumbah ahli hisab
Bukon hekeumat po meukuta
Na sidroe treuk ureueng meutuah
Ngon Raja Abdullah sabe padra

Saleh dara saleh agam
Han a tok fam kamoe dumna
Teuma jiseuot raja pindoe
Tango kamoe tuan peundita

Pakri akai keu lon jinoe
Takkeun hareutoe uleh gata
Tuanku pioh meulhee uroe
Neusaoh sinoe kapai dumna

Ureueng eseulam matakana biru
Gundahjih tunu dumjih rata
Yoh nyan kapai ka jisaoh
Jipreh tanggoh dumjih rata

Amma bakdu dudoe nibak nyan
Putroe intan lon calitra
Tuan putroe neubeuet surat a l-waqi'ah
Allah peuleumah saboh tanda

Galeb putroe neubeuet Quruan
Leumah neupandang judoneu raja
Neukalon ka lham dalam laot
Keunong hekeumat raja ceulaka

Neukalon rakyat that barollah
Neuili pantah u kuala
Putroe gundah yoh masa nyan
Neumoe jamong ro ie mata

Neuleueng jaro tangah u langet
Moe meurep-rep putroe muda
Neumeulakee ubak Tuhan
Putroe bangsawan meusempreuna

Poteu Allah nyang bri rahmat
Ngon hidayat neukaronya
Adat kuprang sigala rakyat
Mate meuhad han teukira

Teuma lheueh nyan putroe pike
Neumeusyawe dalam dada
Ate sosah bukon bubarang
That neusayang bintang Zahra

Ia mata ro meugeulumbang
Han neutubanpi bicara
Bukon paleh kaphe suang
Aneuk jaang asoe nuraka

Neumeulakee ubak Allah
Beuek leumah akai bicara
Ya Tuhanku neutulong kamoe
Gata sidroe nyang kuasa

Han pat laen lon ngadu droe
Tulong kamoe ya Rabbana
Raja Abdullah neubri seulamat
Sajan ngon rakyat dum barangna

Beukek puleh mintra hekeumat
Beulheueh u darat sampan ngon bahtra
Beureukat keuramat sigala wali
Beureukat Nabi saidil anbia

Neubri seulamat Raja Abdullah
Beureukat syiah nyang du lam rimba
Mintra sihe beukek hilang
Beureukat junjongan pangulee kita

Akai nyang gadoh beukek meuulang
Beumeuwoe badan miseue nyang ka
Beumeuwoe akai miseue dilee
Bek neubri malee ya Rabbana

Ya Tuhan Allah ya Allah
Beumeuwoe tuah miseue nyang ka
Bek neubri malee bak ulon nyoe
Beukek sampo e ban lon pinta

Beukek talo kaphe pindoe
Po lon sidroe tulong hamba
Neubri tampah sihe paphe
Allah Kade neubri sijahtra

Beureukat ayah ngon bunda sajan
Beukek lon lawan kaphe ceulaka
Yahudi paleh haram jadah
Neubri beusosah dum simua

Lheueh neukheun nyang putroe bangsawan
Neusampoh tangan ubak muka
Ate lam dada sangat teutap
Intan malakat pujo Esa

Putroe ingat eleumee hekeumat
Seumbahyang hajat neulakee do'a
'Oh sare lheueh putore seumbahyang
Neumohon tulong bak hak Ta'ala

Abeh teungeut dum sikalian
Sigala insan bansineuna
Ureueng lakoe ureueng binoe
Hana sidroe nyang na jaga

Abeh teungeut dum lat batat
Keunong hekeumat Baren Miga
Nyang na jaga ureueng peuet droe
Meungon putroe sajan neuba

Aneuk putroepi na lhee droe
Ureueng lakoe goh lom raya
Rupapi jroh bangta lhee droe
Neuba jinoe u kuala

Yoh masa nyan bajee neusok
Ngon tangkulok di keupala
Neumeungui ban ureueng lakoe
Tuan putroe balek basa

Neucok saboh jeundawanti
Putroe neume u kuala
Putroe giduek guda taji
Tren u pasia **Baren Miga**

'Oh sare troh u yup aron
Neutanyong yoh nyan ubak sahya
Di kah ulon jeuet kameubeude
Na katukri bak kameujra

Insya Allah he po cut droe
Jeuet di kamoe bube sikada
Kabri kukalon pusa jaroe
Di likot kamoe kadong bandua

Ngon Si Kate neuboh rante
Geuta neuleueng le sigra-sigra
Neupeuduek aneuk banlhee sajan
Aneuk badan ngon Si Katera

Tapreh sinoe aneuk teungku
Jan teungoh du tajak gata
Di lon aneuk kujak siat
Nak troh hajat raja ceulaka

Yoh nyan neujak tuan putroe
Neupioh droe di mieng kuala
'Oh jikalon uleh kaphe
Jimarit le sabe tuha

Pane tuanku ureueng lakoe
Jijak sidroe u kuala
Nyankeu nyang nyo ureueng meutuah
Meekeu tapoh tapeufana

Jigisa beude babah u darat
Jipeuteupat bak Baren Miga
Teuma marit tuan putroe
Tango kamoe dalem raja

Bek tatakot ulon sidroe
Lon nyoe Putroe Bare n mig
Soe jak pateh aneuk bisoe
Patot putroe keunoe teuka

Sigo beude lheueh u darat
Sikureueng ribee rakyat nyang ka fana
Beude hanco yoh masa nyan
Rupajih ban sipeurti ngeu bangka

Lhee go beude lheueh u darat
Binasa meuhad miseue nyang ka
Geunap lhee go jipeulieueh beude
Kaphe mate meukeuba-keuba

Yoh masa nyan puteh licen
Putroe Baren neumeuhaba
Adat han tapateh ulon putroe
Tabuka jinoe leumah tanda

Jicoh kupiah nyang meulungke
Leumah jieu subang meucintra
Leumah subang 'oh jipandang
Mata intan blet-blot cahya

Raja Sindon teungoh u darat
Ka jilumpat dalam bahtra
Mangat ate bukon bubarang
Han tom kupandang siumu donya

Han tom kukalon dumnan putroe
Sigala nanggroe nyan ka kumita
Ulon jak nyoe bit meusampe
Meuteumeung kande tanglong peulita

Raja Sindonpi ka wah-woe
Datok keureutoe waba hila
Jigrop lam kapai bineh riyeuek
Teucampak teuduek miseue meurua

Jibeudoh siuan na dum boh sungkam
Laju curam bak Baren Miga
Sireuta yoh nyan putroe jimeung mat
Ate mangat suka rasa

Masa nyan putroe gaseh bi'at
Saba sikeujap po meukuta
Tadeungo lon kheun narit sipatalah
Bek that geh-goh ban ureueng gila

Tuankeu bek peuturot napsu
Di nap meuribu rakyat meulaksa
Ulon nyoe sidroe hukom junjongan
Baranggajanpi lon rela

Kundo rot wie sakin rot uneun
Jan neumakeun hanalon dawa
Neudeungo lon po junjongan
Baro tunangan jinoe ngon gata

Adat na hajat deelat keu kamoe
Tango jinoe lon kheun rahsia
Padum na tuanku rakyat sajan
Tabri makanan bansineuna

Tayue teungoh bandum u darat
Geutanyoe meuhad tinggai lam bahtra
Ban jideungo putroe kheun meunan
Raja Sindon nyan suroh tantra

Abeh jiteungoh dumna rakyat
Ureueng le that hana tara
Rakyatpi le that barollah
Putroe indah di teungoh tantra

Teuma marit raja pindoe
Deungon Putroe Baren Miga
Tadeungo he tuan putroe
Rakyat ka keunoe bansineuna

Udeh taek dalam sampan
Tajak makan geutanyoe dua
Ulon makeuen sajan tuanku
Neudeungo laku lon calitra

Tadeungo lon po junjongan
Haba laman tapeumulia
Jinoe tuanku tameuucap syahdat
Nak meukuat tamong agama

Na tadeungo tuan putroe
Han di kamoe tamong agama
Phon bak ayah troh ubak droe
Syahdat pindoe han tom nyang ka

Han kuikot Nabi Muhammad
Dudoe trok had akhe masa
Lagi Nabi le hambatan
Jikheun meunan uleh raja

Geunap lhee go neuyue meuucap
Raja kuat jimeudawa
Putroepi ka saket ate
Jinoe beureuhi Allah karonya

Raja Sindon yue pahlawan
Kamat tuan putroe muda
Putroe kalon jikeumeung mat
Ka neulumpat peuet ploh deupa

Abeh jiplueng rakyat barollah
Jitakot bicalh dumjih rata
Ladom jiriwang jikeumeung mat
Neungui alat Baren Miga

Pioh dilee dalem badan
Lon ngui peukayan sikutika
Bunoe tuanku lon meuayang
Nak tatukri ban singoh dan lusa

Ban jideungo narit meunan
Raja Sindon nyan ate suka
Masa nyan le neubuka peutoe
Alat neupakoe dum anika

Kakeu neungui nyan ngon subang
Sikalian han teukira
Neucok minyeuk nyang mangat bee
Neuboh bak ulee putroe muda

'Oh ban neungui nyan peukayan
Rupa na ban buleuen purnama
Lheueh nibak nyan neucok alat
Intan malakat Baren Miga

Neureutek sapai masa nyan le
Teupanca beude sinan dua
Saboh jimeunan Lila Meureubok
Bohjihpi troh barangho donya

Beude keudua Lada Sicupak
Su meuhayak tujoh ploh raja
Tuan putroe that juhari
Ka neumeunari di keue rakyat bha

Dilee neupeunap barat laot
Teuma neusurot barat daya
Trep-trep siseun neupeuhah ulee
Mabok ngon bee pungo gila

Ureueng kaphe mabok ngon bee
Seun sribbee boh beude ba
Neualeh u wie mate sikatoe
'Oh neubet jaroe mate silaksa

Neupeukeue u nap ban barat laot
Neupeukeue u likot ban barat daya
Rakyat neupoh le that mate
Darah ile jeuet langue guda

Masa nyan kaphe sosahjih that
Pantah ban kilit Cut Baren Miga
Yoh nyan ka neupoh neumeusidroe
Kaphe wah-woe pungo gila

Kaphe jiplueng mata u likot
Meujipreh sret beude teuka
'Oh sare meutum suara beude
Lia ate kaphe ceulaka

Nyang ka neupoh dum ngon beude
Jinoe neunari peumeu'en cokma
Yoh nyan neutarek peudeueng bak keuieng
Han tajeuet ngieng seumilu mata

Neureutek peudeueng ban on pisang
Ngon peunanyang na tujoh deupa
Ban jikalon uleh kaphe
Jadeh mate geutanyoe dumna

Bukon paleh Raja Sindon
Putroe ma ubon pakri jiba
Kaphe bandum jiseusai droe
Adat lon thee meunoe bahle jisula

Adat mate sideh di nanggroe
Na cit binoe soe ue rupa
Peurumohjih dum abeh wah-woe
Peusoh nanggroe jak peungon raja

Putroe keu raja na ngon jieh
Geutanyoe abeh peudeueng seuba
Han ek meuteumeung bintang peureuseh
Geutanyoe abeh dum hilang nyawa

Dang-dang kaphe mujakarah
Putroe indah lom neungaza
Neucang rakyat that barollah
Ile darah bagoe ie raya

Haba ceumeucang han lon kheun kri
Na ngon beude na ngon cokma
Si Kate kalon hana soe lawan
Leubeh bak agam nyang sihah jungka

Yoh nyan Si Kate saket ate
Jiwiet rante han ban peubla
'Oh ban putoh rante di badan
Jibet yoh nyan bak u raya

Jicok putroe jiboh u likot
Pioh siat po cut raja
Jinoe namiet nyang seumeupoh
Si Kate bloh lam kawan tantra

Surot po cut lon meutangkeh
Kupeuabeh Rakyat dumna
Di jaroe wie jimat bak u
Di uneun bak teue nyang raya
Rakyat mate abah jipoh
Hanco tuboh jeuet keu sira
Umu lhee uroe jihapit kayee
Abeh padee kaphe ceulaka

Hana sidroepi na tinggai le
Malengkan Si Kate dua ngon raja
Nyang hana mate Raja Sindon
Laen bandum abeh fana

Yoh nyan jipeurab bak raja seudee
Ka jipalee han tilek muka
Jipoh ngon bak u ka abeh beukah
Teuma jieumpah ngon bak teue raya

Bak teuepi hanco teukeudi Tuhan
Jimeuheu yoh nyan Baren Miga
Ho saleh ka po cutku putroe
Bantu kamoe jinoe sigra

Tuan putroe mat peudeueng u jaroe
Neutak jineo raja ceulaka
Neutak di ulee sret u baho
Sang kulet tho hana luka

Beuthat tatak tuan putroe
Gatai asoe lon han tara
Tatak he putroe tasirong-sirong
Untong-untongpi ek raya

Pakri kutak raja Allah poh
Han jitem pajoh alat seunjata
Putroe mohon ubak Allah
Beuneutitah nyang sijahtera

Tren hidayat nibak Tuhan
Leumah yoh nyan akai bicara
Neucok le ija nibak badan
Neukat yoh nyan keu usong raja

Udeh tuanku tamong u gampong
Kamoe usong meukuta donya
Tuanku gantoe Raja Abdullah
Bek neugundah po meukuta

Jan tuanku neuwoe u nanggroe
Sajan kamoe keudeh neuba
Ban raja ngo narit meunan
That sukaan hana tara

Di ulon sep meugata sidroe
Laen barangsoe hana suka
Beuthat beumate rakyat barollah
Di kamoe dahsyah sajan gata

Yoh nyan raja ka geuusong
Rab u gampong droe nyan geuba
Keunong taki reumbang padan
Ubak jamban droe nyan geuba

Yoh nyan geuusong Si Kate gulam
Siblah tuan Baren Miga
'Oh sare troh ubak jamban
Jijok yoh nyan bak Si Katera

Yoh nyan jiglueng ubak ulee
Ka meuseubee muka raja
Si Kate cok peudeueng u jaroe
Jikoh takue raja raya

Raja Sindon sinan mate
Lam jamban aye sinan fana
'Oh lheueh mate Raja Sindon
Neuwoe langsung Baren Miga

Neucok aneuk nyan banlhee droe

Laju neuwoe sigra-sigra

'Oh lheueh manoe suci badan

Neuwoe le rijang u istana

'Oh sare troh u meuligoe

Neueu sunyoe hana tara

Putroe peupuleh sigala rakyat

Leungkap samat abeh jaga

Masa phon prang pade goh roh

Jinoe jeuet takoh mirah rata

Yoh nyan rata rame nanggroe

Teuma neupeugoe judoneu raja

Putroe seumbahyang dua raka'at

Kapai teurangkat bansineuna

'Oh sare leumah matauroe

Neuleueng jaroe neulakee do'a

Raja Abdullah meungucap syuko

Han teukabo keu hak Ta'ala

Yoh nyan abeh tamong u krueng

Neueu ureueng abeh fana

Yoh nyan jimarit Panglima Bandran

Jitanyong yoh nyan ubak raja

Euncit geupoh ureung ngon kayee

Meulaksa ribee rakyat fana

Euncit geupoh boh beude pajoh

Han soe ek peugah meulaksin laksa

Lom jitanyong Panglima Bandran

Soe peubuet nyan po meukuta

Supo buet nyan tuanku droe

Pane keunoe pahlawan teuka

Hana tatupeue Panglima Bandran

Kuasa Tuhan ateueh hamba

Malam baroe kulangue laot
Kueu rakyat han teukira
Kubet bak u deungon bak teue
Rakyat kuhumeui bansineuna

Adat kon kreueh aweuek jaroe
Tuan putroe ka jiteumeung ba
Lheueh neumarit dua lhee patah
Raja Abdullah jinoe meugisa

Laju neuwoe u meuligoe
Neuhei putroe dalam istana
Ho saleh ka tuan putroe
Duekkeu sidroe nyan di gata

Jak taili keudeh u baroh
Taeu musoh abeh fana
Teuma seuot tuan putroe
Neubet jaroe ateueh jeumala

Insya Allah bak seulamat Imam
Po junjongan bek binasa
Meukat kaoi dumna nabi
Sigala wali dum eelia

Beuseulamat bak alon nyoe
Nada kamoe han teukira
'Oh lheueh makeuen rakyat meukatoe
Poteu jinoe neumeusabda

Jak taili nyan u baroh
Bahtra nyang jroh bek binasa
Nyang takalon dumna tuan
Tatueng rampasan dumteu rata

Tameubulueng dumteu sare
Beusabe-sabe bek meudawa
Jeuneh mongmong deungon canang
Keu uleebalang deungon peutua

Beude meuriam bahle keu kamoe
Taintat keunoe dalam kuta
Abeh narit doli hadarat
Jiili rakyat u kuala

Abeh jitueng dum rampasan
Nyan surohan po jih raja
Leupah rakyat ili u baroh
Puteh leusoh meusuara

Ampon tuanku syahi alam
Keumala nanggroe Syam nyang that mulia
Peue cit tuanku neukheun ade
Adat nyang jahe sulet raya

Tuanku kheun masa bunoe
Rakyat sinaroe jideungo rata
Adat kon kreueh aweuek jaroe droe
Meuhad kamoe jiteumeung ba

Nyankeu putroe areh billah
Peue nyang tapeugah abeh nyata
Raja Abdullah sangat ragoe
Neupeulheueh droe nibak mara

Bek takheun-kheun ulon jahe
Haba kutakwi seumilu mata
Adat lon peugah gata meucang
Han yum sigupang kamoe raja

Ban putroe deungo narit meunan
Teusinyom yoh nyan Baren Miga
Abeh haba peurintah prang
Nanggroepi aman miseue nyang ka

Amma bakdu dudoe nibak nyan
Tango tuan lon calitra
Kareuna nanggroe jinoe ka teutap
Ka seungap hana le goga

Baren Miga peukek seumbah
Bak Abdullah raja raya
Deelat tuanku po junjongan
Jaro meulayang atueuh jeumala

Udeh tuanku tajak u Makah
Jak saweue ayah nanggroe mulia
Han peue salah tuan putroe
Tajak jinoe u Makah mulia

Lon bri ngon bahtra meulhee reutoh
Sajan ngon utoh rakan taba
Lon bri pawang nyang that ragoe
Jitupat nanggroe Makah mulia

Kamoe he putroe tinggai siat
Lon bri rakyat sajan gata
Uleebalang nyang that ragoe
Peurdana meuntroe ngon panglima

Patot junjongan tinggai di nanggroe
Ho lheueh dudoe po meukuta
Bek taharap syeedara seubot
'Oh meulikot laen bicara

Harap binasa gasehpi hilang
Meunan tafam dum peukara
Laman tabri sajan meuntroe
Aneuk lhee droe ka binasa

Aneuk tuanku abeh gop poh
Kamoepi gadoh han meuho ka
Umu tujoh thon panteng-panteueng
Keudeh meuteumeung Makah mulia

Bahle meunan tuan putroe
Gata sidroe han binasa
Neukrah le rakyat sigala nanggroe
Neuyue pasoe lhee reutoh bahtra

Tuan putroe bahtra that meuceh
Layeue puteh tihang suasa

Nibak laen raya bahtra nyan
Teumpat duek intan Baren Miga

Tihang geuboh dua seun tujoh
Labang geuboh pirak suasa
Geuboh lingka le kri macam
Keuhaselan ngon kuta mara

Geuboh di ulee akek geusado
Geuboh di iku tulak mara
Bahtra nyang laen lhee reutoh sajan
Nyang ikotan kapai raja

Raja Abdullah tinggai di nanggroe
Neubungka Putroe Baren Miga
'Oh sare troh nyan u laot
Angen jipat barat daya

Leupah putroe bungka sinan
Meukalam yoh nyan sidroe panglima
Gop nyan jimeunan Panglima Duson
Gop nyan gasien hana areuta

Panglima nyan hana mudai
Lhee boh kapai sagai nyang na
Kareuna jiharap keu sulotan
Jijak peungon Baren Miga

Tuan panglima bungka di nanggroe
Umu lhee uroe troh bak raja
'Oh sare troh bak Raja Abdullah
Jipeukek seubah sigra-sigra

Ampon tuanku syahi alam
Keumala nanggroe Syam nyang that mulia
Tuanku kamoe ka meuhimpon
Meujak peungon judo meukuta

Pakon lambat gata keunoe
Layak baroe adoe raja
Tuanku hana rakyat meukatoe
Dang-dang kamoe jak meumita

Jak tabungka wahe adoe
Pade u nangroe ulon yue ba
Tuan panglima bungka ninan
Troh bak kawan leupah 'isya

Droe cit ka ngon teukeudi Tuhan
Teungeut sikalian ureueng lam bahtra
Nyang hana teungeut tuan putroe
Malam uroe neumeujaga

Uroe malam beuet Quruan
Hana ingen nyan keu donya
Jeuoh kapai Panglima Duson
Sajan-sajan ngon kapai dumna

Meunan peurintah nibak Allah
Na meung soe peugah ubak raja
Sare beungoh nyan ngon uroe
Peurdana meuntroe peulayeue bahtra

Lapan uroe tujoh malam
Peulayaran u laot raya
Teukeudi Allah peurintah Tuhan
Malam Seunayan teuka bala

Tuan putroe duek dalam kurong
Rupa ban tanglong Baren Miga
Hana teudoh neubeuet Quruan
Uroe malam neumeujaga

Ate khusyuek that keu Tuhan
Leumah buruhan saboh tanda
Leumah neukalon 'arasy Tuhan
Nyum rasakan di atueh donya

Teubiet suara nyum ban
Bagoe canang proe umpama
Trok ubak had teungoh malam
Bak watee klam teungoh seunia
Deumi teuingat meuntroe paleh
Buet nyang jaeh jikeurija
Tuan putroe han tom jipandang
Teuka ingenan dalam dada

Salang suara dumnan **mangat**
Bah kulihat putroe jroh rupa
Siploh ilah kupeulagee
Bah kutueng keu kee peurumoh raja

Teuma jibeuet saboh hekeumat
Teungeut rakyat lhee reutoh bahtra
Lhee boh bahtra nang hana pangsan
Karonya Tuhan hana peue mara

Kareuna han jitusoe pawang
Ngon sabab nyan han keunong mintra
Meuntroe paleh cok aneuk gunci
Jibuka le ngon kamanya

Ban sare troh tamong u dalam
Tahe mandang sikutika
Na dua jeuem tahe mandang
Teumayong yoh nyam Baren Miga

Neukalon teudong tamse pacan
Teupike yoh nyan putroe muda
Peue buet keunoe wahe adoe
Han tom puroe dilee nyang ka

Nyoe phon teuingat aneuk jalang
Sireuta yoh nyan mulot teurtawa
Hana sapeue tuan putroe
Lon jak saweue he nang nyawa

Ulon takeubah dalam peutoe
Peue tasaweue adoe raja
Peunajoh makanan cit na bak droe
Wahe adoe na syeedara

Tadeungo he tuan putroe
Tabri lon gantoe raja raya
Hana peue salah wahe adoe
Meunyo tagantoe aduenteu raja

Tatueng adoe dalam ngon mideuen
Takeurajeuen uleh gata
Bukon meunan tuan putroe
Napsu kamoe that keu gata

Tabri lon sunteng bungong meuluri
Ie krueng hayati tabri lon rasa
Meunan hajat sikarang ini
Cuba kheun kri tanglong agama

Napsu lon meung duek teuot meutinindeh
Hajat lon meung eh sibantai dua
Pakri bak gata bintang peureuseh
Atawa buleh cubalah kata

Teuma seuot tuan putroe
Ateneu ka doe dalam dada
Astaghfirullah wahe adoe
Bek buet meunoe di lua agama

Pakon adoe buetteu meunan
Di kamoe han paleng muka
Kareuna dina sitree Allah
Meunan peuneugah dalam sabda

Uroe nyoe dina kakeu mangat
Uroe akhirat keunong syeksa
Adat na napsu adoe keu putroe
Barangri nanggroe kujak mita

Kuseumbahyang dua raka'at
Allah intat keunoe keu gata
Hanku jinoh tuan putroe
Iblih pindoe jipeurupa

Adat meunan adoe badan
Di kamoe han paleng muka
Hanbu tango dalam tafeuse
Jeuet keu kaphe nyang meudina

Miseue teuseubot dalam Quruan
Hana iman nyang meudina
Beuthat geutet teuma dudoe
Di kee kugantoe raja muda

Di lon han kutem wahe adoe
Kareuna meuntroe sah syeedara
Di donya kon troh akhirat
Sah kuseubot gata syeedara

Teuma seuot peurdana meuntroe
Jikheun meunoe bak Baren Miga
Adat han tatem tuan putroe
Kukoh takue aneuk gata

Adat kakohpi kupaban
Di kamoe han paleng muka
Tuan putroe ngieng bak aneuk lhee droe
Ka geumanoe ro ie mata

Jinoe nyang ka troh ban riwayat
Ban amanat dilee bak cutma
Allah Allah Tuhanku Rabbi
Mahasuci Allah Ta'ala

Aneuk lhee droe kupulang bak Allah
Ban peurintah Tuhan Nyang Esa
Patot rusok jithok ate droe
Patot gigoe jikap jungka

Na tom gaki jipijak duroe
Na tom jaroe jiculak mata
Takhianat keu aneuk droe
Tuhan peuwoe atueh droe teuma

Ka jisuet geudubang alang
Ka jilayang takue Cut Bangta
Jimeuglueng-glueng le ngon badan
Ulee ka tan bak anggeeta

Bukon sayang buleuen peuet blah
Teupanca darah ateueh leumueng ma
Bukon sayang Bangta meutuah
Takue jikoh meuntroe ceulaka

Nyankeu Bangta nyan samlakoe
Aneuk Putroe Baren Miga
Aneuk nyang tuha kakeu mate
Jinoe pakri han tarela

He putroe cut bungong pade
Cuba kheun kri bungong meutia
Teuma seuot tuan putroe
Nyang meubudoe kuat agama

Bahle mate wahe adoe
Di lon sidroe han kurela
Meuntroe peurab bak aneuk teungoh
Bangta nyanpi jroh miseue nyang tuha

Sajan jibuka dalam seulimbot
Ka teukeujot muda beulia
Ban jikalon sakin meulayang
Bangta meuhei nang jiyue peubla

Aneuk miet cut peue han teukeujot
Meuntroe kukot Allah peumeureuka
Wahe po ma ma junjongan
Neupeubla laman nibak bala

Pakonbu meunoe wahe aneuk droe
Tayue peubla droe bak manusia
Tajakkeu aneuk seutot aduen
Sireuta neukheun ro ie mata
Tajak aneuk beuseulamat
Uroe akhirat meuteumeung ngon ma
Asoe nuraka jilakee ujeuen
Pakon apui dum Tuhan karonya

Nabi Yusuf geutiek dalam mon
Khianat aduen dum syeedara
Salang Nabi ngon mukjizat
Sigala rakyat han jeuet jipeubla

Malek mawot teuka keunoe
Saleh kamoe geutueng nyawa
Pakri neupeubla aneuk lhee droe
Nibak meuntroe waba hila

Adat tabri meuh han sukaan
Di jih buet syetan heundak keurija
Sangkira jeuet aneuk kugantoe
Bah jipoh kamoe nak udep gata

Aneuk tateumee eu Rasulullah
Saleuem tapeugah nibak po ma
Trep ka Nabi cre ngon kamoe
Han tom kulumpoe bijeh mata

Tayue tueng ma aneuk beurijang
Trep ka kudong atueh donya
Teungoh neumarit putroe bangsawan
Sikin jilayang meuntroe ceulakan

Bangtapi ka jikoh takue
Ka dua droe jipeufana
Pakri ate meuntroe bedeuah
Kheundak Allah Po Nyang Esa

Lom jisudi bak putroe indah
He buleuen peuet blah cubalah kata
Dua droe aneuk ka kupoh mate
Jinoe pakri tatem rela

Adat han tatem beuingat-ingat
Aneukteu tulet kupoh fana
Saleih bek akpoh aneukku tulet
Sabab mantong cut teungoh mom bak ma

Meunyo bek kupoh aneukteu nyoe
Ban buet kamoe bek meudawa
Bek le haba nyan wahe adoe
Bah kagogajoe han kurela

Teuma lom jisuet peudeueng lam sarong
Jitak rancong takue Cut Bangta
Kakeu mate aneuk nyang lhee droe
Tuan putroe meugrak rasa

Allah Allah aneuk badan
Tinggai ma wang atueuh donya
Wahe aneuk jantong ate nang
Aneuk teulintang banlhee teurhanta

Kupaban bah kheundak Hadarat
Neubri mangat neubri duka
Ya Tuhanku aneukku lhee droe
Tujo pangkat meuligoe neubri syeuruga

Meuntroe ceulaka jimeukeumah
Jikeumeung reupah Baren Miga
Sireuta neumarit tuan putroe
Tadeungo kamoe kalam sijahtera

Aneuk banlhee takue ka takoh
Lon nyoe saboh tapeufana
Sajan ngon aneuk sigo kumate
Mangat meusampa he adoe raja

Gata han kupoh tuan putroe
Napsu kamoe goh troh u punca
Laju jimat tuan putroe
Bak siseun nyoe han lheueh gata

Jinoe kutem ban napsu adoe
Lon peutroh jinoe ban hajat gata
Raja Abdullah han mee meujudo
Bak ri laku hana seutia

'Oh neutinggai droe di nanggroe
Patot tagantoe jinoe le gata
Sangkira na aneuukku lhee droe
Tan glak kamoe keu bijeh mata

Meunyo ka na ureueng lakoe
Mee meugantoe singoh lusa
Salah beunabek tagundah
Na Po tallah soe keukira

Tapreh adoe siat tanggoh
Lon jak srah tuboh ceumeue leuta
Bek tapeuayang tuan putroe
Tatipee kamoe he nang nyawa

Pakri kutipee wahé adoe
Kareuna kamoe ureueng dara
Hobu kujak ulon jinoe
Lingka bahtra nyoe laot raya

Adat meunan tuan putroe
Jakkeu jinoe beurijang tagisa
Tuan putroe beudoh sinan
Troph le tuan ateueh bahtra

Jikeumeung jak bak rueueng ie
Leumah jieu saboh beujana
Tuan putroe tueng ie seumbahyang
Bak taloe seumirang le neuhala

'Oh sare troh ateueh tihang
Tuan putroe bang lakee do'a
Neupujoe Tuhan nyang that murah
Han tom fiteunah dilee nyang ka

Sabab meugrak ate putroe nyan
'Arasy Tuhan miseue geumpa
Meugrak 'arasy leungo kurusi
Meugrak asre dum anika

Yoh nyan meugrak loh ngon kalam
Meugrak sikalian syeuruga nuraka
Lheueh nyan meugrak langet tujoh
Rasa runtoh sret u donya

Peukek seumbah malaikat
Bak Hadarat Tuhan Esa
Pakon Tuhanku 'arasy meuguncang
Kurusi meulinggang han tom nyang ka

Pakon meugrak nuraka ngon jannah
Meugrak langet troh u donya
Tren fireuman nibak Tuhan
Malaikat nyan deungo sabda

Lafai kutinggai dalam matan
Maknajih tuan kucalitra
Beukit lon lafai panyang sanjak
Kutakot glak ureueng kaca

Baren Miga jeh di bumoe
Aneuk lhee droe ka binasa
Pakon tabri blaa keujih
Nyan phon nideh troh an raya

Nyankeu raja leumoh ate
Kugantoe kubri kukaronya
Jiteumee jep ie krueng hayati
Dudoe page dalam syeuruga

Kulah kama meuh tren di langet
Ka lam laot ku karonya
Ka roh lam preut ikan din-din
Keu si jih nyan po areuta

Adat si jih nyan sajan ngon nang
Pat jiteumeung buet mulia
Jakleh katreng nyan u bumoe
Bek qundah Putroe Baren Miqa

Malek mawot ngon Jibrai
Dua ade tren u donya
'Oh sare troh ubak putroe
Neuguseuk bak dhoe neurahop muka

Pakonbu tamoe putroe bangsawan
Peue syugolan di ateueh donya
Ban neukalon malek mawot
Putroe sujud neuyue tueng nyawa

Tatueng nyawong lon beurijang
Han le kudong ateueh donya
Toh pakri bah lon tueng nyawong
Raseuki mantong ateueh donya

Aneukteu lhee droe hana mate
Gata bek le duka cita
Adat goh lom tatueng nyawong
Tabri kukalon lueng sangkaikala

Malaikat sampoh muka putroe nyan
Leumah neupandang lueng sangkaikala
Neukalon lueng dum meulueng-lueng
Si lueng nyawong manusia

Saboh-saboh lueng Nabi peugah
Luah-luah nibak donya
Neukalon lueng saboh nyang soh
Han le gundah Baren Miga

Peue takheundak tuan putroe
Takheun jinoe kungo nyata
Adat takeumeung keu kiamat
Donya nyoe meuhad jadeh binasa

Bek Allah bri karam nanggroe
Sabab ulon sidroe karam donya
Teutapi bacut tapeutakot
Tapeukeujot bek that ria

Malaikat nyan sumpom sayeuep
Jeuet klam kabot alam donya
Yoh nyan teuka angen ngon ujeuen
Jitren tupheuen panca wareuna

Yoh masa nyan meusu guroh
Nyum ka runtoh alam donya
Teuma neucok le malaikat
Neutiek u darat Baren Miga

Na lhee buleuen peulayaran
Jarak sinan deungon bahtra
Teugeutit putroe u nanggroe Pari
Deungon teukeudi Allah Ta'ala

Bukon sayang tuan putroe
Teuduek sidroe di kuala
Yoh masa nyan tinggai seumbahyang
Ate bimbang keu aneukda

Pat na neueu broh meutamon
Neujak kalon mayet aneukda
Tuan putroe ulee ili
Taloe pasi ngon ie mata

Wahe aneuk po bangta lhee droe
Mateu sidroe pungo gila
Wahe aneuk bukon alang
Cre deungon nang han jan raya

Di gata tajak aneuk banlhee droe
Mateu sidroe meuraba-raba
Amma bakdu dudoe nibak nyan
Meuwoe karangan keu panglima

Jih nyan tan keunong mintra meuntroe
Nyang jak dudoe lhee boh bahtra
'Oh sare troh jiwoe u nanggroe
Jitamong jinoe ubak raja

Jikalon raja duek di bale
Ureuengpi rame hana tara
Ka jideelat Raja Abdullah
Nyang khalifah di ateueh donya

Ka troh tajak u nanggroe Makah
Pat takeubah po cut di gata
Ampon tuanku syahi alam
Seumbah laman namiet nyang hina

Harap binasa sabet nyoe reumbang
Sipeurti habaran ureueng tuha
Cit hana ubah ban nyang kalam
Po junjongan bukon peurbula

Aneuk tuanku banlhee ka geupoh
Putroe ka gadoh han meuho ka
Si Kate deungo narit meunan
Amarah yoh nyan keu poteu raja

Han jan neuseuot uleh junjongan
Si Kate yoh nyan hu ngon mata
Pakon meunan kah raja ri asee
Pakon dilee han kakira

Patot binoe taharap gop me
Hana pike raja nyeo gila
Si Kate cok le ngon peudeueng
Jikeumeung jak cang poteu raja

Raja pike keusalahan
Neuplueng yoh nyan ka neuguda
Limong yok umong leupah neuplueng
Teuch lam lueng raja muda

Masa nyan neukheun Raja Abdullah
Peue lom han kapoh ulon raja
Aneukpi han le peurumoh gadoh
Lonpi kapoh nak sigo fana

Si Kate moe duajih sinan
Sajan-sajan poteu raja
Leumah pike Si Kate lam jasad
Tren hidayat dalam dada

Putroepi gadoh rajapi kupoh
Kee nyoe saboh pungo gila
Po cut lhee droe pi ka han le
Keepi beumate keupeue guna

Poteu jicok ka jijulang
Jipeuwoc rijang u istana
'Oh sare troh u meuligoe
Buju jaroe ateuch jeumala

Neupeumeuh po junjongan
Ampon Sikalian barang deesya
Ampon bak Allah ngon bak Nabi
Bak Allah bri kateumeung syeuruga

Na neudeungo po junjongan
Haba laman namiet nyang hina
Udeh taseutot po cutku putroe
Dua geutanyoe po meukuta

Meunankeu nyang got hai ulon droe
Udeh jinoe bek le jula
Adat meunan tuanku droe
Beurangkat rot bumoe doli meukuta

Tamita po cut sigala nanggroe
Pat meubunyoe tapeunyata
Di lon tuangku pot u manyang
Kuteureubang ateueh guda

Raja Abdullah bungka yoh nyan
Si Katepi tuan jipo sigra
Yoh nyan guda jiboh keukang
Si Kate teureubang u antara

Guda bapo that meurang-rang
Trok bak awan nyang meumiga
Suara geunta bukon bubarang
Na bagoe canang geupuh dua

Umu lhee buleuen jiteureubang
Jipo binatang sigala donya
Guda jipioh bak cabeueng awan
Jiduek sinan sikutika

Teuduek haba Si Kate teureubang
Meuwoe karangan keu Baren Miga
Teutap putroe taloe pasi
Ulee ili pungo gila

Neumoe sabe meusok-meusok
Ingat keu aneuk ka gop enaya
Teuduek haba tuan Siti
Raja Pari keunan teuka

Jikrah rakyat dua lhee ploh
Ili u baroh u kuala
'Oh sare troh nyan u baroh
Jieu leumah saboh cahya

Leumah jikalon di yup aron
Rupa ban buleuen teungoh purnama
Raja humeui dumna rakyat
Jiplueng leugat abeh subra

Raja Pari humeui that sangat
Beungeh rakyat bansineuna
Dilee neumaba jinoe han neubri
Tawoe sare dumteu rata

Bahle sidroe Raja Pari
Geutanyoe sare jipeumeureuka
Raja Pari tinggai sidroe
Jiili dudoe u kuala

'Oh sare troh u yup aron
Leumah jikalon Baren Miga
Peue buet sinoe tuan putroe
Pakon han tawoe u istana

Hana lon tupat tuanku meuligoe
Lon paban woe po meukuta
Meunyo meunan tuan putroe
Udeh jinoe u istana

Yoh nyan neubeudoh tuan Siti
Sajan pari beurangkat sama
Putore jak dilee pari di likot
Cit meupatot ureueng dua

Droe cit ka ngon teukeudi Allah
Pari saleh hana tara
Na sikhan rot geubeurjalan
Marit yoh nyan pari raja

Tadeungo he tuan putroe
Meukheun jinoe ubak gata
Bahle kamoe nyang jak dilee
Han got lagee lon ngieng gata

Meunyo takeubah lon di likot
Meutakot sret bak meudina
Ban putroe ngo haba meunan
Neupateh nyoh nyan ban nyang sabda

Pari jak dilee pantah leugat
Troh le siat u istana
'Oh sare troh u leuen meuligoe
Jimeuhei Putroe Rakna Wangsa

Ho saleh ka putroe meutuah
Tren beupantah keunoe sigra
Tajak cok po cut nyoe di bumoe
Tatren keunoe bek trep jula

Han meupeue-peue tameuayang
Meuasoe leumueng keumeung paksa
Kuyue kajak nyan beurijang
Aneuk jalang kuat meudawa

Jitulak cadoh jipioh taloe
Jisumpom jinoe pasa meugeunta
Teuma jikalon rot rueueng sandeng
Jikeureuleng ngon iku mata

Ban jikalon teudong di leuen
Pane buleuen teungoh purnama
Mate aneuk geukoh ulee
Pakon seudee geupeudua

Bek meupot-pot sinan kameucreuek
Jinoe kutaleuek kajak woe bak ma
Putroe Baren beurkataan
Neueu pari nyan amarah raya

Patot tuanku neukeumeung taleuek
Neukeumeung peudeuek rureueng muda
Buah keumbar asoe di dalam
Geuramah santan di dalam sahab

Narit mustahe jangan tapateh
Jarak di tangan jangan taharap
Bek tuanku neuboh umpang breueh
Saleh teuka weueh singoh dan lusa

Narit nyang jeuheut bek rijang that lheueh
Neuingat beudeuh tuanku raja
Hana hireuen haba putroe
Di jih buet droe jikeurija

Dumna areuta jimeubulueng
Taleukekpi jitueng sigra-sigra
Kah kutaleukek ngon lhee taleukek
Jak woe bak biek nyan di gata

Raja Pari riwang bak putroe
Jitanyong jinoe bak Baren Miga
Tadeungo he tuan putroe
Pajan geuntanyoe tameukeurija

Tuanku preh tujoh uroe
Lheueh idah kamoe bak judo nyang ka
Meunan kaidah kamoe dilee
Supaya tateumee meukeurija

Meunyo meunan tuan putroe
Bek kee sinoe sajan gata
Laman kuduek sinoe sajan
Kutakot tuan roh bak dina

Gotkeu kujak dalam uteuen
Kujak mita umpeuen on kayee muda
Pari leupah jibeurjalan
Meuwoe habaran keu Si Katera

Si Katepi troh le keunan
Guda analan nyang that meujasa
Guda jigiduek that meulaku
Geunta jimeusu ban gaseng Jawa

Suara geunta that meukrang-krang
Beukit canang geupleh dua
Ban neudeungo le tuan putroe
Neumeuheji jinoe sigra-sigra

Katren keunoe he ulon droe
Nyopat kamoe meupreh gata
Si Kate tarek taloe keukang
Guda jiriwang tren u donya

'Oh sare troh u meuligoe
Neutren putroe sigra-sigra
Neumat ngon tika nyan bak jaroe
Tuan putroe boh bak dong guda

Pakon mameung po cut badan
Di kamoe goh lom meuteumeung ngon gata
Tuan putroe ek u meuligoe
Jiek dudoe si Kate muda

Ban sare troh u meuligoe
Marit jinoe ngon Baren Miga
Si Katre nyan akai that janggi
Jikeumeung ci Baren Miga

Na tadeungo po cut badan
Kueh sajan nyan ngon gata
Adat meunan ulon teungku
Ban nyang napsuteu di gata

Abeh narit geumeusasat
Saleh po cut that pungo gila
Neutem binasa po cut badan
Masa beurjalan sigala donya

Hana binasa Poteu Allah bri
Tuhan Ghani nyang peulara
Na tadeungo po cut badan
Di kamoe han paleng muka

Bek tagundah po cut juhari
Umpama nabi di kamoe gata
Nyang kuyue eh bunoe sajan
Bukon tuan sapat dua

Gata si jeh kamoe si nyoe
Bak teumpat nyoe lam istana
Sapat sapo tameupioh
Silama goh troh lom tabungka

Idin keu kee po cut siat
Teungeutku that hana tara
Umu lhee buleuen kuteureubang
Angen sumpom ujeuen seuba

Wahe ulon bek kaeh sinoe
Pari jiwoe jipoh gata
Mate aneuk pari pindoe
Banpeuet sagoe kuboh mintra

Si Kate amai saboh hekeumat
Pari sisat meuraba-raba
Ri nyang nanggroe jikheun uteuen
Ri nyang mideuen jikheun rimba

Nyang ri laot jikheun darat
Tanda sisat pari lam rimba
Teuduék haba Raja Pari
Kisah meuwoe le bak Baren Miga

Teuingat lam ate tun putroe
Meudeh meunoe neubicara
Meunyo teutap lon di sinoe
Pari jiwoe kee binasa

Yoh nyan Si Kate le neupeugoe
He ulon droe beudoh tabungka
Ka neuceupet nibak teuot
Han teukeujot teungeut raya

Neucok unuga kayee sikhan
Neupalee yoh nyan teuntang muka
Nugapi patah ka jeuet keulhee
Teungeut meuteun tee Si Katera

Teuma lom neucok sianeuk batee
Neusumpom di lulee tangkurak raya
Hanco batee na ban anoe
Si Kate sidroe hana jaga

Kaeh di kah he ulon droe
Meujak di kamoe ho langkah ba
Yoh masa nyan tuan putroe
Jadeh jinoe nyan neubungka

Tuan putroe neungui peukayan
Ban atoran alat raja
Neunqui bajee nqon tangkulok
Silueue neusok Baren Miga

Neuboh di ulee kupiah meulungke
Nyan neusok le subang meucintra
Keumah ase sileungkapan
Yoh masa nyan neugiduek guda

Tulong Allah beureukat Muhammad
Neubri rahmat nyang sijahtra
Umu lhee buleuen neubungka sinan
Trokkeu tuan bak saboh raja

Troh u nanggroe Mulabari
Sinan kaphe di kuala
Dudoe Islam dilee kaphe
Ureueng nyang mungke bak agama

Saboh kuta panglima pukat
Ureueng nyan lknat asoe nuraka *
Buetjihpi jeuheut amat sangat
Meuadoe angkat limong ploh sa

Ban jikalon bangta jak sidroe
Keunoe adoe muda beulia
Ban putroe ngo meunan kalam
Neupeurab rijang sigra-sigra

'Oh sare troh putroe keunan
Dum sikalian jipeumulia
Jibri ranup sigapu sapo
Dum meusaho han teukira

Jikeumeung jok meuh sigra u jaroe
Marit putroe sigra-sigra
Bek tabri meuh he dalem droe
Le di naanggroe bak ayahda

Tadong he adoe meusiseun angen
Tacuba meuen tasipak raga
Han jeuet kudong dalem boh ate
Hana pande sipak raga

Adat han jeuet lon peurunoe
Uroe dudoe nak biasa
Jicok raga unyan u jaroe
Tuan putroe sipak sigra

Dilee jitrom deungon gaki
Hana sabé jiek raga
Leumah neukalon uleh malaikat
Tren hidayat Allah karonya

Malaikat nyang hue matauroe
Neutren bak putroe Baren Miga
Pakon buet meunan putroe bangsawan
Gata pilehan pangkat eelia

Yoh masa nyan Allah bri thee
Meuwoe eleumee miseue nyang ka
Lheueh nyan raga jitrom u manyang
Ka meugantung atueh hawa

Raga meugantung kon ngon taloe
Keuramat Putroe Baren Miga
Pakon meunan he adoe droe
Pakon meunoe taikat raga

Hana di kamoe he dalem droe
Kareuna kamoe muda beulia
Sangkira han taikat wahe adoe
Beurijang keunoe hade raga

Dumna rakyat abeh rioh
Jak koh buloh ngon cet raga
U manyang ban jiek u bumoe han sret
Gundah rakyat deungon raja

Adat meunan he dalem droe
Idin kamoe cre ngon gata
Pakon meunan he adoe droe
Tadong sinoe adoe raja

Tzadong sinoe adoe badan
Napsu meurakan deungon gata
Bekbu dalem meurakan ngon kamoe
Sayang nanggroe ceulaka donya

Baranggasoe meuadoe angkat
Pade hana jeuet sigala donya
Hana sapeue keumurahan
Breueh pade tan dueuk troe meukuta

Kucok tungkat kujak geumadoe
Di kamoe troe adoe ngon gata
Adat meunan pawang pukat
Na peue pakat lon ngon gata

Tajak keunoe ubak sunyoe
Beurijang jinoe bek trep jula
Ban jideungo pawang pukat
Jijak leugat sigra-sigra

Tatem tamong agama Islam
Tatueng lon tuan nyan keu gata
Kareuna ulon kon ureueng lakoe
Ureueng binoe aneuk raja

Adat han tapateh ulon peugah
Bah lon peuleumah deungon tanda
Tuan putroe cok kupiah
Pawang leumah subang meucintra

Leumah subang meuteurapna
Duloe intan blet-blot mata
Ban jikalon geusyik pukat
Ka jilumpat na siploh deupa

Na tadeungo he teelan droe
Han le kuwoe u rumoh tangga
Keubit han kuwoe le u rumoh
Ka na putroe jroh keunoe teuka

Gata nyang laen meutacom bee
Teutap bak kee putroe jroh rupa
Laen siuroe salah lagee
Leumah meunalee bak rakyat dumna

Putroe tarek nibak keuieng
Neuploh peudeueng bak anggeeta
Neureutek peudeueng ban on pisang
Panyangjih tuan na tujoh deupa

Tuan putroe jak neukangkang-kangkang
Neutak geulumpang bube krong raya
'Oh sare reubah bak geulumpang
Teukeujot angkatan bansineuna

Yoh nyan rakyat meungucap syahdat
Suara nadamat ban ie raya
Nyang hana meungucap panglima pukat
Jiplueng leugat le jiguda

Tapreh sinan dalem linto
Dara baro jak tueng gata
Hana kupreh wahe adoe
Balee putroe lam istana

Ka jilumpat paya gampong
Leuhop 'oh reukueng jikheun 'oh dada
Neucok peudeueng teuma u jaroe
Putroe koh takue tuan panglima

Neuboh ulee dalam talam
Leugat neuriwang dalam kuta
'Oh sare troh ubak rakyat
Jimeupakat bansineuna

Ho ka gata wahe rakyat
Pawang pukat kaikat dumna
Pakon geukat panglima pukat
Ureueng laknat asoe nuraka

Kamoe paban han ek po junjonga
Han ek muelawan kamoe dumna
Ampon tuanku syahi alam
Seumbah laman kamoe dumna

Adat na soe poh pawang pukat
Kamoe deelat meuboh keu raja
Na tadeungo wahe rakyat
Beumeupakat sigala raja

Jikrah rakyat tunong baroh
Raja tujoh ploh abeh dum teuka
Abeh jitren dumna rakyat
Sapeue pakat dumna raja

'Oh sare abeh jimeusumpah
Putroe peuleumah ulee panglima
Ban jikalon uleh rakyat
Ka jideelat dumjih rata

Droe cit teukeudi nibak Tuhan
Neubri eleuham dumjih rata
Baren Miga gaseh Allah
Han ngon payah Islam rata

Han peue taparang ngon meukarat
Cit ngon mangat tamong agama
Geurasi nan Raja Makmu
That meusyeuhu sigala donya

Umu lhee thon teutap keurajauen
Nanggroepi aman hana tara
Nanggroepi suci amat sangat
Dumna rakyat kukoh agama

Raja tujoh ploh mangat ate
Kareuna han le seumbah beurala
Sabab teuka ureueng keuramat
Geutanyoe that meubahgia

Ureueng lakoe ureueng binoe
Dum jipujoe raja muda
Droe cit ka ngon teukeudi Allah
Raja Abdullah keunan teuka

Ka neutamong nyan u dalam
Ngadap junjongan raja muda
Ban putroe eu teuka judo
Neutren laju di istana

Marit noh nyan tuan putroe
Neukheun meunoe ubak raja
Bek tadeelat ulon sidroe
Kareuna kamoe ureueng hina

Raja Makmu lom neutanyong
Patbu gampong po meukuta
Nanggroe kamoe sideh di Syam
Taklok sulton dua blah raja

Adat tuanku raja nanggroe Syam
Hokeu tuan neukeumeung bungka
Na tadeungo he adoe droe
Meupeugah jinoe ubak raja

Saleh na neujak putroe keunoe
Judo kamoe han meuho ka
Bek tamita tuan putroe nyan
Meuteumeung han deungon gata

Tadong tuanku beuteutap sinoe
Dendayang sidroe lon bri keu gata
Ulon tuanku han ek bri nafakah
Goh sret idah bak kutapa

Nyankeu lon bri tuanku dendayang
Kareuna tuan teungoh tapa
Insya Allah adoe badan
Meunyo ka idin nibak gata

Yoh masa nyan ka neubri putroe
Ka neupeujaroe ubak raja
Beipi mangat rupa analan
Rab-rab saban ngon Baren Miga

Tuan putroe boh sabuh hekeumat
Teubiet siat judo raja
'Oh ka malam seungap rakyat
Putroe got that keunan teuka

'Oh sare lheueh neusituboh
Putroe gadoh han meuho ka
Teuma teuka ureueng lakoe
Ceupet asoe raja muda

Dua lhee droe dendayang sinan
Hana neuthee nyan Baren Miga
Neulakee idin bak Raja Makmu
Bungka laju jak meumita

Neubri ngon beukai le Raja Makmu
Abeh dumpeue neukaronya
Keu Raja Abdullah beukai neubri
Ka neumeucré droe nyan dua

Raja neujak jeuep-jeuep nanggroe
Pat na meubunyoe meupeuteuka
Amma bakdu dudoe nibak nyan
tango lon tuan laen calitra

Raja Makmu teuma meugah
U nanggroe Makah bak raja raya
Nyankeu raja di nanggroe Arab
Ade sangat hana tara

Ho saleh ka Bangta Sulotan
Takalon ban uleh gata
Tame alat sileungkapan
Saleh jilawan aneuk raja

Neuba sajan Bangta Sulotan
Nyang analan limong ploh bahtra
Jipot angen barat timu
Kapai laju u nanggroe raja

Troh u nanggroe Mulabari
Jitet beude that guranta
Teuma jitaleh nyan di darat
Geukrah rakyat peugot kuta

Sare leungka kuta pasi
Rakyat ili bensineuna
Geuato meuriam nyoh masa nyan
Jadeh geulawan aneuk raja

Raja Makmu ka troh keunan
Jipasoe meuriam tujuh ploh sa
Keu aneuk beude dum peunajoh
U dalam geuboh jabet keuruma

Masa nyan hireuen Bangta Sulotan
Han hak jilawan geutanyoe teuka
Tapaban bah kheundak Allah
Ban peurintah Tuhan Nyang Esa

Dang-dang raja neumeupakat
Beude di darat that guranta
Yoh nyan keunong Bangta Sulotan
Ngon upeh nyan jabet keuruma

Tahe hireuen Bangta Sulotan
Nyo tuan nyan pangkat eelia
Bangta neucok saboh sampan
Neudayong yoh nyan u kuala

Neuplueng Raja Mulabari
Yoh nyan neuwoe le laju lam kuta
Bangta Sulotan tamong leugat
Neukheundak deelat raja muda

Raja nanggroe preh di pinto
Treh le laju Bangta muda
Bangta Sulotan heundak deelat
Neuplueng leugat Baren Miga

Ampon tuanku deelat seumbah
Keumala Makah lagoe gata
Nyoekue kamoe Raja Makah
Jinoe tapeugah raja muda

Raja Makmu jaweueb jinoe
Na bak kamoe raja muda
Udeh tuanku tamong u dalam
Tajak seumayam atueuh tahta

Teuma ase ranup lam puan
Dudoe makanan neukaronya
Abeh makeuen dumna rakyat
Sujud khideumat bak syeedara

Ampon tuanku syahi alam
Seumbah laman po meukuta
Tabri idin doli hadarat
Lon teubiet siat u lua kuta

Baren Miga neuteubiet le
Raja Mulabari geuboh nama
'Oh sare troh nyan u padang
Neupioh sinan di bale raksa

Neuyue krah rakyat tunong baroh
Raja tujoh ploh abeh dum teuka
Abeh meuhimpon timu barat
Dumna rakyat bansineuna

Raja meusabda yoh masa nyan
Bangta Sulotan neukheun ka teuka
Neyuyue jime peurseumbahan
Ngon haluan dumjih rata

Sare troh bak Bangta Sulotan
Jideelat tuan bansineuna
Teuma geujok ngon peurseumbahan
Ubak rakan raja muda

Raja Mulabari yoh nyan meukalam
Peue na peusan poteu raja
Teuma seuot Bangta Sulotan
Nyoe na kireman peuneuet ayahda

Du neupeuet ubak kamoe
Neuyue jok u jaroe meuh sibara
Insya Allah mulia bak lon
Patot lon seuon atueh juemala

Raja Makmu ka neupike
Meugeugule ngon ie mata
Salang raja mulia sangat
Na cit peuneuet nyan keu hamba

Raja Makmu neumeukalam
Ubak kawan Bangta muda
Ka neuyue jak bak saboh alue
Jieu meuh hu meureutoh gunca

Raja yue kuet yoh masa nyan
Neuyue usong dalam bahtra
Neulakee droe Bangta Sulotan
Tapeuidin adoe lon bungak

Jakkeu tuan beuseulamat
Beujeuoh alaknat mara bahya
Kakeu neuwoe Bangta Sulotan
Sajan ngon rakan Makah mulia

'Oh sare troh u **nanggroe Makah**
Ka neupeugah bak ayahda
Ampon tuanku syahi alam
Seumbah laman doli sroepada

Bit leubeh that Raja Makmu
Keuramat lon eu dum peukara
Neuyue krah rakyat tunong baroh
Na tujoh ploh raja teuka

Ban tujoh ploh ngon peurseumbahan
Neuyue jok rijang keu kamoem dumna
Teuma lon cok peuneuet junjongan
Lon teurimong yoh nyan sangat mulia

Lheueh nyan teuma jimeukalam
Jiyue jak rakan tamuek lam paya
'Oh sare troh dalam alue
Jieu meuh hu meureutoh gunca

Raja Makmu suroh rakyat
Angkot leugat dalam bahtra
Laen nibak nyan dum sinaroe
Intan pudoe ngon mutiara

Ulon pike dalam ate droe
Raja Makmu nyoe geumaseh raya
Ban lon kalon meunan lahe
Lon bungka le sigra-sigra

Han lon jeuet le tanyong sipatah
Nyo ahllah eelia raya
Nyokeu ureueng leubeh pangkat
Lahe keuramat Allah karonya

Ban Raja deungo meunan kalam
Hireuen yoh nyan poteu raja
Teuduek haba keu Bangta riwang
Kisah meuulang keu Baren Miga

Teupike Raja Mulabari
Gantoe neuboh le laen peutua
Neuboh raja geunantoe droe
Neubungka jinoe u Makah mulia

Raja bungka yoh masa nyan
Sidroeneu tuan ngon tun neuba
Padum lawet neubeurjalan
Trokkeu tuan u nanggroe mulia

Ban sare troh u nanggroe Makah
Teukeudi Allah meuteumeung ngon Bangta
Sajan meuteumeung muda samlakoe
Meumat jaroe sabe syeedara

Hoka ayahteu dalem droe
Taba kamoe bak ayah gata
Insya Allah he dadoe droe
Kubateu jinoe bak ayahda

Tapreh adoe kujak peuseumbah
Kujak peugah bak ayahda
Bangta Sulotan neujak pantah
Ka neupeugah sigra-sigra

Neudong di yup peurakna seumbah
Junjong khalifah di leuen istana
Deelat tuanku syahi alam
Saboh manikam keunoe teuka

Raja Makmu teuka keunoe
Ubak jaroe po meukuta
Neutanyong bak Bangta Sulotan
Padumna rakan keunoe jiba

Bangta neubet le ngon jaroe
Tuanku sidroe raja teuka
Jakleh tatueng he aneuk droe
Taba keunoe raja muda

Bangta Sulotan jak tueng jinoe
Han neuthee adoe Baren Miga
Udeh adoe tamong u dalam
Bak junjongan po meukuta

Beukit meunan wahe aduen
Taba ulon jak bak raja
Lamu neutamong yoh masa nyan
Bangta Sulotan ngon Baren Miga

'Oh sare troh bak junjongan
Yoh masa nyan neudeelat raja
Deelat teugayu syahi alam
Seumbah lamanteu nyang hina

Raja kalon rupa samlakoe
Teuingat keu Putroe Baren Miga
Patbu nanggroe he aneuk droe
Peugah bak kamoe bijeh mata

Nanggroe lon tuanku di yup sagop
Mata uroe lop nyankeu tanda
Adat na udep Putroe Baren
Bah lon peukawen aneuk ngon gata

Bek tuanku neuingat le
Ka troh janji Allah Ta'ala
Tadong aneuk gata sinoe
Sajan kamoe ureueng tuha

Insya Allah po junjongan
Meudong sajan ngon po meukuta
Teutapkeu raja sajan hadarat
Poteu meupakat deungon Bangta

Galak lon that keu Raja Makmu
Nyum bak kueu bek peuweh mata
Meuna sinoe Raja Makmu
Siulah keu Baren Miga

Adat meunan po junjongan
Pakri padan toh bicara
Meunyo meunan po junjongan
Pat na tunangan tacuba mita

Nyankeu gundahku aneuk droe
Hana putroe tunangan raja
Bit na aneuk Putroe Sunoe
Tunangan droeteu aneuk raja

Adat meunan wahe ayah
Tango lon peugah saboh bicara
Beuthat putroe nyan tunangan kamoe
Lon bri keu adoe raja muda

Bahle tuanku lon meupayah
Asai bek gaduh sinoe raja
Meunanpi jeuet aneuk junjongan
Meuka sukaan nibak gata

Bah kucuba jak meuteumeung
Ulon jak kheun bak raja muda
Na tadeungo he adoe canden
Ulon peukawen gata adekda

Pakri hai cut lem peukawen laman
Areuta lon tan jeunamee hana
Bek tagundah adekda badan
Na bak lon tuan jeunamee gata

Bangta Sulotan jak bak ayah
Jaroë dua blah ateuëh jeumala
Deelat teugayu syahi alam
Seumbah laman po meukuta

Ka ulon tanyong po junjongan
Jeunamee tan jikheun hana
Meuka tapeukawen bak meusampe
Jeunamee tabri aneuk raja

Padumna jeunamee Putroe Sunoe
Neukheun bak kamoe po meukuta
Jeunmaee aneuk cit ka putosan
Lhee boh talam kaoi ayahda

Saboh talam pirak saboh talam meuh
Saboh alat lheueh nyan geuteumpa
Nyankeu kaoi nyang geulakee
Janji lon dilee deungon raja

Geubri teulangke ubak putroe
Geupeukawen jinoe ngon raja muda
Poteu yue jak ngon teulangke
Peukong janji meukeurija

'Oh sare troh keunan teulangke
Ka neukheun le sabda raja
Na tadeungo he pot cut droe
Meupeukawenteu jinoe ngon raja muda

Timu barat that meusyeuhu
Raja Makmu geurasì nama
Putroe seuot teuma sipatah
Insya Allah uloteu rela

'Oh abeh narit nibak putroe
Teulangke woe sigra-sigra
Katrhoj jiwoe bak junjongan
Teumanyong yoh nyan raja raya

Peuebu haba ulonteu yue jak
Trok ban kheundak Allah karonya
Insya Allah po junjongan
Bak putroe nyan ka jirela

Ban geudeungo narit meunan
Bangta Sulotan meukeukira
Lhee boh talam kaoi sulotan
Nam boh talam teuma neuganda

Sikureueng talam teuma ase
Jeunamee Siti Sunoe muda
Saboh talam pirak saboh talam meuh
Saboh alat lheueh nyan geuteumpa

Saboh talam peunoh manikam
Saboh talam mutiara
Saboh talam pudoe saboh talam intan
Saboh talam yakut meutia

Saboh talam treuk zaburujat
Sikureueng meuhad bak jikira
Ureueng lhee ploh neuba sajan
Jak intat alangan uleh Bangta

Sigo geutet beude nubat
Tanda beurangkat po cut Bangta
'Oh sare troh u leuen meuligoe
Rakyat putroe jitren sigra

Kareuna Bangta goh lom nikah
Pakon jipeugah u istana
Sabab bak rakyat na neubri thee
Jikira ban dilee tunangan Bangta

Bangta keumeung ek yoh nyan leugat
Tika meuikit neuleueng lanja
Han soe ek teugah Bangta Sulotan
Geuleueng hamparan leungkap dumna

Bangta Sulotan yue ek rijang
Nyang me idang sajan neuba
Geuyue sambot rijang-rijang
Bak dendayang lam istana

'Oh sajan troh keunan idan
Geuploh rijang geupeunyata
Sajan geukalon asoe idang
Rakyat sikalian hireue liga

Geuboh ranup dalam puan
Ngon makanan leungkap dumna
Sajan lheueh makeuen Bangta ngon rakan
Yoh masa nyan neumeusabda

Ho ka gata asoe meuligoe
Tayue tren keunoe putroe muda
Beurijang jitren Putroe Sunoe
Hajat kamoe kalon rupa

Yoh nyan teumakot Putroe Sunoe
Ri geumanoe ro ie mata
Sasab jitakot Bangta Sulotan
Kareuna pahlawan hana tara

Neupasrah droe ubak Tuhan
Neutren rijang lam istana
Ban Bangta eu yo that badan
Neumarit yoh nyan sigra-sigra

Bek he adoe ateteu gundah
Na peue lon peugah ulon ngon gata
Jinoe peue takheun tatem
Kupeukawen gata ngon raja

Lon peukawen ngon Raja Makmu
Nyang that meusyeuhu di atetueh donya
Putroe seot teuma sipatah
Alhamdulillah ulon rela

Bangta Sulotan tinggai di sinan
Siteungoh rakan woe bak raja
Abeh neupeugah dum sibarang
Neuyue intat rijang raja muda

Rakyat jiwoe troh u dalam
Ngadap junjongan meukuta donya
Seumbah nibak po cut ubak kamoe
Neuyue intat jinoe raja muda

Raja yue peuase sileungkapan
Ban atoran adat keurija
Abeh ase dum sikalian
Meuwoe karangan ubak Bangta

Yoh masa nyan Bangta Sulotan
Neumeubisan deungon ayahda
Han tom di gop sigala nanggroe
Ureueng binoe meukawen dua

Nibak Allah meunan teukeudi
Areh Siti Baren Miga
Geutet beude nideh ninoe
Bandua sagoe sare subra

Ban bak linto meunan bak inong
Santeut timang sabé padra
Ayah ngon Bangta dua meubisan
Dum peurasan sabé bandua

Leungkap peurasan bak uroe nyan
Alat keurajeuen raja raja
Hana soe thee ureueng binoe
Kareune neungui pekyaan raja

Padum-padum ngon peurasan
Han tatubanpi calitra
Peurintah keurija han le lon seubot
Kutakot lanjot bak tabaca

Nyang lon seubot dua lhee krak
Bek gadoh sigak meukeu tanda
'Oh sare lheueh ijab kabui
Geupeukek mampleue bak putroe muda

Geupeusambot ujung jaroe
Ban adat geutanyoe Pulo Raja
'Oh sajan troh tuan putroe
Sujud jinoe ubak raja

Neubri ngon meuh dua katoe
Intan ngon pudoe laen neuganda
Putroe Sunoe sangat lisek
Abeh jitilek dum peukara

Abeh jikalon dum sikalian
Jithee raja nyan ureueng dara
Tun pputroe tren teuma ubak nang
Jaroe meulayang ateueh jeumala

Na tadeungo po ma **badan**
Pakon meunan takeurija
Peue tapeukawen lon ngon inong
Han got bangon han tom nyang ka

Nyang na di gop inong ngon agam
Nyo sipadan sabe padra
Leusong ngon leusong tapeuduek sajan
He po ma badan han jeuet keu laba

Meunyo tan alee kri tatop pade
Tacuba pike he po ma raja
Meunan misalan ulon boh mise
He ma boh ate ingat beumeusra

Pakon po ma tatueng keu kamoe
Ureueng binoe keupeue guna
Wahe aneuk po aneuk badan
Pakon meunan tameuhaba

Pakri tamarit he aneuk droe
Taboh kamoe ureueng gila
Nyankeu aneuk Raja Makmu
Meugah meusyeuhu sigala donya

Geutah gaca nyang mirah haloh
Geutah ipoh nyang leubeh bisa
Kri takheun inong agam meureugoh
Jih nyan di jeuoh keunoe jiteuka

Bek takheun-kheun bek tawaham
Raja agam bukon dara
Bit nyo dara he ma badan
Beuhareuem tuan bukon peurbula

Ureueng peunyamun jitipee rakyat
Jingui alat mesieu raja
Dang meusudi tuan putroe
Meuthee jinoe bak raja muda

Ho aduenku Bangta Sulotan
Udeh tatren he syeedara
Ulon jikheun ureueng binoe
Malee kamoe dikeue tantra

Adat han tatren dalam badan
Bahle kulhon nak meunyata
Beungeh raja hana bagoe
Sabab geukheun droe ureueng dara

Abeh gundah dumna rakyat
Teumakot that putroe muda
Jikalon rupa na ban rimueng
Teumakot bandum agam dara

Yoh nyan jikheun bit nyo agam
Gadob waham bit kon dara
Ureueng binoe dum teuduek-duek
Jiteumeutuek bansineuna

Meuhpi that le sinan meusapat
Adat tasukat na peuet gunca
'Oh sare lheueh jiteumeutuek
Makanan geujok dumjih rata

'Oh lheueh makeuen dum seuleusoe
Rakyat jiwoe maseng u tangga
Maseng-maseng woe u nanggroe
Seungue putroe ka seunia

Raja Makmupi neuriwang woe
Bak aduen droe Bangta muda
Putroe Sunoe tren u bumoe
Beude jipasoe nyang raya taga

Sigo jitet beude nubat
Teuka rakyat na lhee laksa
Ka troh keunan ubak putroe
Jiseuon jaroe ateueh jeumala

Pakon po cut neupangge kamoe
Neukheun jinoe siri sabda
Nyang jeuet lon pangge aduen ngon adoe
Tango jinoe he syeedara

Takueh parek lingka meuligoe
Kumeung eu budoe raja muda
Raja Makmu kumeung kalon proe
'Oh jan neuwoe dalam istana

Jikueh parek banpeuet sagoe
Teuma jiwoe rakyat dumna
Sare seupot asa uroe
Linto baro woe lam istana

'Oh sare troh u leuen meuligoe
Parek sinaroe neueu rupa
Raja Makmu teupike jinoe
Bit nyu putroe nyoe le that bicara

Laju neukek u meuligoe
Bak Putroe Sunoe neupareksa
Raja tanyong ubak putroe
Peue parek nyoe judo muda

Bukin areh putroe sambinoe
Taci kamoe tawaham dara
Jinoe takalon kugrop parek
Ek ngon han ek sinan nyata

Tuan putroe tren rijang-rijang
Jijak pandang peurbuetan raja
Kareuna putroepi that jantan
Ka roh lawan ngon raja muda

Lagi keuramat khusyuek tawaduek
Mata jitop rok-rok masa
'Oh sare troh putroe lihat
Raja lumpat parek raya

Di leuen istana neugrop meulayang
Seun ret ka teudong likot istana
Sigala rakyat teuhah babah
Dumnan pantah jipeugah dara

Teuma neukek u meuligoe
Neuduek putroe sajan raja
'oh lheueh makeuen dum sikalian
Simpan idang bansineune

Neuduek dua nyan ka seunang
Ngon dendayang sajan sireuta
Teuma marit tuan putroe
Taweh jinoe dendayang ngon maja

Kamoe hai maja meukeumeung eh
Taweh beuabeh bansineuna
Raja Makmu teuma meukalam
Neumarit ngon putroe muda

Gata putroe hana malee
Dikee jamee peuleumah hawa
Gop tapinah dum tayue weh
Tapeuleumah napsu waba

Tajeuet peuleumah hawa napsu
Geutanyoe po aneuk raja
Teuduek haba putroe bangsawan
Neuhumeui sikalian asoe istana

Abeh jiplueng dum sinaroe
Soh meuligoe tinggai cit dua
Tuan putroe yoh nyan meukalam
Neuhormatkan raja muda

Tunkua ampon syahi alam
Neudeungo laman sipatah kata
Geunap lhee thon ka troh umu
Ulon napsu hana tara

Neupeutroh hajat nibak malam nyoe
Neueukeu jaroe atueuh jeumala
Hana neusayang nyan keu kamoe
Ulonteu nyoe ureueng hina

Guda puteh geuboh keukang
Aneuk guda plang raja poh lawa
Beuraya gaseh geudong neusayang
Tuanku pandang meusiblah mata

Raja Makmu jawueub rijang
Deungo lon tuan saboh calitra
Kapai api dipuseng asap
Heundak beurangkat keu nanggroe Hindu

Wahe putroe cut intan malakat
Sayanya meuhad nyang puetroh napsu
Harap adekda keupada Allah
Harap di bawah kakanda itu

Kamoe nyang peutroh ban napsu hajat
He bungong riwat intan meutabu
Akan teutapi he nyak bungong
Tanggoh lon lhee thon he bintang timu

Kareuna ulon dalam tapaan
Dudoe lheueh nyan saja troh napsu
Seuot putroe puteh leusoh
Jaroe lon siploh atueh jeumala

Meunyo tuanku neumeutanggoh
Taleuek lon neuboh bek trep jula
Karcuna napsu hana neupeutroh
Allah hai tuboh dalam beurcinta

Teureubang manyang itek peulati
Baycuen nuri keumbali pulang
Ate lon suka sangat beureuhi
Buleh kakanda hampiri badan

Cubalah hampe badan beursama
Ayoh kakanda muda bangsawan
Ban neudeungo taleuek jilakee
Ate ka ratee araja muda

Putroe han teudoh jibet jaroe
Hajat kamoe ubak gata
Yoh nyan raja sangat gundah
Neumohon bak Allah^h neulakee do'a

Ya Ilahi wa ya Rabbi
Keuk syaksi Poku gata
Neupeulheueh lon nibak saket
Bek roh sulet ngon putroe muda

Gatakeu Tuhan teumpat lon kheun droe
Laen han soe bri karonya
Lheueh neumohon bak Hadarat
Tren hidayat bak Rabbana

Tren hidayat ubak ate
Po tallah bri juru basa
Teuma neumarit ngon tuan putroe
Tango kamoe judo muda

Taduek keunoe tuan putroe
Beuteuntang kamoe rot baroh gata
Tuan putroe duek teuma siteuntang
Raaj pandang ubak muka

Ubak nade raja pandang
Putroe yo badan miseue geumpa
Droe cit ka ngon teukeudi Tuhan
Putroe yoh nyan yo anggeeta

Ka meutoto sigala urat
Meunyum ladat jeuep-jeuep ruma
Lalu andai tuan putroe
Ban geumanoe reuoh teuka

Teupet ngon mata yoh masa nyan
That ingenan hana tara
Peurintah Tuhan teuma dudoe
Tuan putroe gadoh pueh hawa

Putroe pike ubak ate
Han kuyue le poteu raja
Salang goh lom neusituboh
Badan ka leumoh dum anggeeta

Teutap neupioh tuan putroe
Teungeut sidroe lam istana
Singoh beungoh geukrah rakyat
Nibak hadarat raja raya

Baren Nasi neuyue krah rakyat
Neuyue meupakat bandum rata
'Oh abeh troh keunan rakyat
Meusabda deelat raja raya

Raja meusabda ubak rakyat
Soe meupakat taboh keu raja
Karena ulon la'eh sangat
Soe meupakat bak gata dumna

Peukek seumbah dumna rakyat
Ubak deelat raja raya
Ampo tuanku po junjongan
Seumbah laman po meukuta

Nyang patot meunyo khalifah
Gantoe ayah po cut Bangta
Teutap Bangta keu Raja Makah
Ayahneu boh keu raja raya

Teuduek haba Bangta Sulotan
Laen karangan meugisa punca
Geumeupakat dumna rakyat
Raja Makmu that keu panglima

Bangta Sulotan nyang phon deelat
Teuma rakyat dum simua
Droe cit ka ngon teukeudi Allah
Ngon khalifah hana tara

Hana soe thee ureueng binoe
Nyan di manggroe keu panglima
Heuhukom rakyat sangat ade
Abeh takwi deungon bicara

Ureueng meununtut han teupeugah
U nanggroe Makah keunan teuka
Ureueng Meuse ngon ureueng Syam
Ureueng Yaman keunan teuka

Nanggroe Makah tauh bak Tuhan
Ujeuen malam yoh nyan teuka
Sibuleuen lhee seun teuka ujeuen
Sibuleuen dua seun jareueng teuka

Adat nyang ka cit le nyang tan
Meunan ladem ujeuen teuka
Umu lhee thon neukeurajeuen
Sapeupi tan na meumara

Bak siuroe leumah nyang got
Neuyue seutot ureueng Cina
Ka neuyue jak sidroe bujang
Jibeurgjalan sigra-sigra

'Oh sare troh tuan bujang
Jitamong rijang bak ureueng Cina
Gata geupangge ubak hadarat
Neuyue seutot sigra-sigra

Cina deungo haba bujang
Jijak rijang hana jula
'Oh sare troh keunan datang
Raja yoh nyan neumeusabda

Wahe tokang tango ulon
Tapeugot patong saboh keu hamba
Jipeugot patong yoh masa nyan
Saleukek badan Baren Miga

Jiboh keuieng batee ceureumen
Jiboh badan batee kaca
Lingka patong meusigak that
Peukayan leubat hana tara

Ka geupeukek patong yoh nyan
Neuyue ba rijang ateueh guda
Geupeuh ngon canang gong ngon geundrang
Arak-arakan raja-raja

Hana jithee sigala rakyat
Masa jipeugot uleh Cina
Teuka rakyat jijak pandang
Jisangka insan dumjih rata

Ureueng nyang rab han teupeugah
Ureueng nyang jeuoh han teukira
Tango lon kisah Raja Pari
Nyan jiwoe le u rumoh tnagga

'Oh troh u rumoh aneuk bisoe
Jieu putroe han meuho ka
Pari beungeh amat sangat
Jicok tungkat brat nam gunca

Jijak mita pat nyang meugah
Troh u Makah jipeuteuka
'Oh sajan trohjih nyan u Makah
Raja ahlillah neuthee jaga

Neuthee teuka pari yoh nyan
Neukheun bak rakan rakyat dumna
Euntreuk teuka ureueng sidroe
Tungkat beusoe ban bak u raya

Jipoh gata bek tagundah
Tungkat patah meukhan dua
Raja peuingta ubak rakyat
Kadrop kaikat pari raja

Akan teutapi bek tapoh-poh
Pari nyan saleh hana doseuta
Dudoe nibak nyan teuka Cati Kleng
Tujoh krak leumbeng jime nyang raya

Masa neuwue di nanggro Pari
Nanggroe Cati Baren Miga
Tuan putroe jikeubah di rumoh
Cati gaduh jak meumita

Deumi jiwoe troh u rumoh
Jieu ka gaduh han meuho ka
Jicok leumbeng deungon peudeueng
Peurise jisandang saboh nyang raya

'Oh sare troh u nanggroe Makah
Raja peugah ubak tantra
Jinoe Cati Kleng teuka keunoe
Leumbeng di jaroe ngon peudeueng raya

Jitak jitop gata han saket
Jih taikat taboh singkla
'Oh sare lheueh sabda sulotan
Jiprehkeu yoh nyan jieu teuka

Na sikeujap jipreh di blang
Teuka yoh nyan Pari Raja
Jikeumeung poh dumna rakyat
Jidrop jiikat sigra-sigra

Na sijameung teuma dudoe
Cati pindoe keunan teuka
Jikeumeung cang dumna rakyat
Di blang jiikat jiboh singkla

Dua ureueng ka lam taloe
Kisah jinoe raja muda
'Ajayeb subhanallah
Raja Abdullah keunan teuka

Umu tujoh thon gadoh putroe
Jeuep-jeuep nanggroe neujak mita
Hingga troh neujak u nanggroe Makah
Sinan meugah putroe muda

Poteu bungka na sijameung
Seun rot meuteumeung sidroe raja
Nyan jimeunan Raja Bageudat
Jibeurangkat u Makah mulia

Jijak intat wase nanggroe
Karena meugantoe laen araja
'Oh sare troh u nanggroe Makah
Ngon Raja Abdullah meuteumeung sigra

Sideh sinoe le that ureueng
Kareuna meuteumeung dua raja
Meubri saleuem geumeuhoreumat
Beur'idat-'idat sabé raja

Abeh narit neumeupeugah
Raja Abdullah mmeusuara
Gaseh sayang wahe aduen
Tapeungan lon he syeedara

Tapeungan lon kuprang Makah
Gata kuboh keu panglima
Adat ek talo taprang Makah
Kubri upah meuh sibara

Insya Allah adoe meutuah
Kuprang Makah kuruntoh kuta
Neubungka ninan na sijameung
Teuma meuteumeung meuntroe ceulaka

Sajan meuteumeung ngon poteu sidroe
Aneuk jalang moe pura-pura
Wahe dalem takoh takue lon nyoe
Teumuda lon sidroe han meuho ka

Keu haba meuntroe hana neuhireuen
Si Katepi han na neukira
Jimeupike rakyat barollah
Putroe meugah di Makah mulia

Si Kate marit yoh masa nyan
Udeh beurjalan u Makah mulia
Dang-dang raja geumeupakat
Si Raja Kilat teuma jibungka

Bungka jen pari Si Raja Kilat
Jijak peugah had abak Baren Miga
Tuanku judo teuka keunoe
Peurdana meuntroe sajan neuba

Raja Kadipi na sajan
Bak junjongan meukuta donya
Tuanku neumita saboh padan
Adat talawan judoteu raja

Ban neungo haba Si Raja Kilat
Doli hadarat neumeusabda
Na tadeungo dumna tuan
Tapeuase sikalian dum peukara

Lane nibak nyan makanan nyang mangat
Anggo jabet sajan keuruma
Sabdapi lheueh nibak junjongan
Ase sikalian ngon sikutika

Raja Abdullahpi troh u Makah
Neukeumeung sasah rakyat dumna
Neukeumeung cang ureueng arak patong
Neukeumeung timpong dum simua

Teuka seuneuot dumna rakyat
Kamoe namiet po neukuta
Tuanku seulamat nibak kamoe
Surat saboh roe neueu tanda

Jicok surat jipeuleumah
Raja Abdullah ka neubuka
Dalam surat neueu phon kalam
Nyankeu isem Allah Ta'ala

Lheueh nyan neupujoe keu Po tallah
Rahmat Allah ngon sijahtera
Tango kamoe ya Abdallah
Neumeulangkah u istana

Barangpeue tuan tameuhajat
Bak hadarat tapeunyata
Bek tamueng poh ureueng di blang
Tamong rijang po meukuta

Ban neudeungo narit meunan
Neutamong yoh nyan ubak raja
Neudong di yup peurakna seumbah
Neutren di rumoh Baren Miga

Ampon tuanku po junjongan
Seumbah laman po meukuta
Bek tadeelat lon nyoe sidroe
Kareuna kamoe ureueng hina

Laju neusujud ubak teuot
That bit 'idat sabe raja
Laju neukek lom u leupu
Teumpat meusaho jamee teuka

Ase ranup dalam puan
Neusantapan uleh raja
Sabda raja bak uleebalang
Ureueng di blang keunoe taba

Tayue tamong dum u dalam
Beuabeh sikalian sajan raja
Abeh tamong rakyat barollah
Ranup lam karah geubri dum rata

'Oh lheueh geubri ngon makanan
Geuyue makan rakyat dumna
'Oh lheueh makeuen sigala rakyat
Doli hadarat neumeusabda

Silap raja di meuligoe
Han neuthee Putroe Baren Miga
Neupuliek ranup di hadapan
Neuseuon tangan atueh jeumala

Ampon tuanku meuribee katoe
Teuka bak kamoe ureueng nyang hina
Han kupajoh ranupteu nyoe
Han got budoe raja muda

Ureueng binoe tahaрап u blang
Meuaneuk jalang pie gata
Pakon tangui buet nyang han patot
Buet nyang karot takeurija

Neugisa pundok u hadapan
Leumah neupandang raja muda
Pakon tuanku neugisa pundok
Peue na heundak po meukuta

Han troh heundak deungon kamoe
Pundokteu nyoe tumpoi mata
Ban raja deungo narit meunan
Amarah yoh nyan hu ngon mata

Neusuet pundok dalam sarong
Neutop meulambong bak ulee dada
Pundok neutop ka patah lhee
Neusrom lulee ka tan mata

Raja makmu beudoh bak neuduek
Neucok pundok sigra-sigra
Neukalon pundok han le patah
Raja Abdullah pucat muka

Raja Makmu yoh nyan neukheun
Neuyue jak tueng patong Cina
'Oh sare troh patong keunan
Jiplueng-plueng yoh nyan hadapan raja

Raja Makmu peukek seumbah
Bak Abdullah raja raya
Ampon tuanku po junjongan
Seumbah laman po meukuta

Nyan leupeue putroe tuanku di blang
Jak neutanyong barangpueu haba
Bekbu laloe tuanku droe
Sapa judo droe jak bak gata

Yoh nyan raja that bit malee
Neumoe meuree-ree ngon ie mata
Sayang putroe sapa judo droe
Meutaloe-taloe ro ie mata

Raja Makmu gusuek peumangat
Teuma neuceupet sigra-sigra
Raja rasa ubak jaroe
Nyum jaroe Putore Baren Miga

Yoh nyan maken that sosah ate
Maken sosah le nibak nyang ka
Adat lon kheun nyo nyoe putroe
Geuboh kamoe atueh sula

Karena takot salah waham
Saleh agam saleh dara
Kri cit narit Raja Makmu
Neukheun laku ubak raja

Yoh nyan neukheun bak Raja Abdullah
Bek that sosah sangat duka
Bek le tuanku beurcintaan
Putroe nyang hilang lon tuan peuna

Meubek tuanku niet ubahkan
Karonya Tuhan kabui pinta
Udeh tuanku tajak u bale
Sidehkeu meuri ulon peunyata

Kulakee tulong ubak Allah
Beuabeh kuyue krah rakyat dumna
Raja Kadi ngon Bangta Sulotan
Yoh masa nyan neupeuduek dua

Raja Abdullah peurdana meuntroe
Neuyue duek jinoe sapat dua
Baren Nasi neuyue duck di teungoh
Bicara damoh Baren Miga

Abeh meuhimpon dum uleebalang
Rakyatpi yoh nyan hana tara
Baren Miga neubet jaroe
Tadeungo kamoe he tuan dumna

Ulonteu nyoe heundak meukalam
Bak nyang salaham meuah beurata
Baren Miga got neuhadap
Tango hikayat ulon baca

Nakeu seuot Raja Abdullah
Insya Allah cubalah kata
Habaku nyoe kupeuingat
Saleh trok had ureueng nyan dua

'Ajayeb subhanallah
Tango lon kisah saboh calitra
Tango lon kisah sidroe sulotan
Keurajeuen aman di atueuh donya

Neumeuaneuk na dua droe
Sidroe putroe sidroe bangta
Troh ubak had mate putroe
Teutap meutui aneukneu dua

Ayah jibungka u nanggroe jeuoh
Gantoe geuboh laen raja
'Oh sajan troh u nanggroe jeuoh
Droeneu geuboh keu raja raya

Aneuk tuha neuba sajan
Tinggai adoe nyan dalam istana
Umu lhee thon teuma dudoe
Teuka keu dادoe saboh bahya

Raja nyang geuboh keu geunantoe
Teuka bak adoe dalam istana
Jilakee meukawen hana jitem
Jipadan laen bahle dina

Maken dina that han jitem
Meunyang meukawen hana suka
Beungeh putroe yoh masa nyan
Raja lalem nyan jikheun gila

Ngon sabab nyan saket ate
Jipeugot le surat sigra
Lalu jipeuet saboh kireman
Jikheun putroe nyan jimeudina

Bukon saboh bangta jitroh
Tujoh-tujoh dalam istana
Jikheun putroe nyan meuteuntee
Jiboh budak lhee dalam paya

Teuma woe aduen di nanggroe jeuoh
Lalu jipoh putroe muda
Han jan sidek bak ureueng nanggroe
Jikoh takue Nuron A'la

Bit ka jipoh hana mate
Tuhan Ghani nyang peulara
Malaikat me dalam uteuen
Meuligoe neupeutren dalam syeuruga

Umu lhee buleuen teutap sinan
Teuka keunan sidroe raja
Raja neujak peurburuan
Neumeukawen ngon Nuron A'la

Na dua thon neuduek lam gunong
Neuwoe u gampong bak teumpat raja
Lhee droe aneuk putroe di sinan
Teukeudi Tuhan teuka bala

Teuka kaphe nyan u nanggroe
Jimeung tueng Putroe Nuron A'la
Talo kaphe putroe meulawan
Ngon sabab nyan han jiteumee ba

Padum lawet dudoe nibak nyan
Putroe bangsawan ate that duka
Napsu rindu bukon bubarang
Neukeumeung jak pandang paduka ayahda

Putroe mayoh that rindu keu ayah
Jilakee meulangkah sajan judonya
Lakoejih han jitem jak sajan
Neubri laen wadi nyang raya

Lhee reutoh bahtra ureueng jak sajan
Di putroe tuan bahtra nyang raya
Lapan uroe peulayaran
Malam Seunayan teuka bala

Jiboh hekeumat keu laen rakan
Jitamong si jih nyan bak putroe muda
Ji heundak meudina deungon putroe nyan
Ureueng binoe han paleng muka

Ban pasujih han neujinoh
Abeh jipoh aneuk raja
'Oh lheueh mate aneuk ban lhee droe
Ubak putroe jikeumeung teureupa

Jiweh putroe jijak srah droe
Jiek dudoe bak tihang bahtra
Jimohon titah ubah Tuhan
Malaikat tren neujak publa

Neucok uputroe uleh malaikat
Neutiek u darat Baren Miga
Nyankeu nyang na ulon tu'oh
Lon woe u rumoh uroe ka jula

Teuma neumarit Raja Abdullah
Neukheun pantah sigra-sigra
Neukheun bacut treuk tuanku droe
Meuwoe Putroe Nuron 'Ala

Tapreh sinoe tameupakat
Lon woe siat rijang kugisa
Meuntroe ngon Kadi ka geunta teuot
Kareuna goh meupat Baren Miga

Dumnan haba goh cit meukri
Ubak pike rakyat dumna
Sang ureueng jak lam buleuen peungeuh
Na nyum-nyum deuh nyum-nyum hana

Raja Makmu woe u meuligoe
Bak Putroe Sunoe le neuhal
'Oh sare troh bak Putroe Sunoe
Uroe nyoe kamoe ka troh tapa

Teuma neuboh bu dalam idang
Raja makan sapat dua
'Oh sare lheueh neusrah jaroe
Marit jinoe putroe muda

Peue hikayat neukheun bunoe
Mangat lon deungo got calitra
Na tadeungo tuan putroe
Surat sinoe ho saleh ka

Tacok beurijang tuan putroe
Tame keunoe kueu rupa
Saleh di lua saleh lam peutoe
Tuanku droe saleh di bara

Bandumjih tuan mita surat
Hana sapat jieu rupa
Dua lhee boh puliek pineueng
Goh meuteumeung surat geumita

Beungeh raja bukon bubarang
Neucok peudeueng puteh mata
Neukeumeung cang dumna ureueng
Abeh jiplueng dumjih rata

'Oh sare seungue dalam meuligoe
Neumeungui jinoe bungong meutia
Ija meukasab putroe sawak
Neudong pirak deungon suasa

Neumeupinggang ija meusujoe
Dum sinaroe meukasab Roma
Gleueng di jaroe ngon adimat
Leungkap alat bandum rata

Neusok subang di geulunyueng
Cahya intan plueng blet-blot mata
Jaroe siploh han jeuet meukuien
Neusok euncien nyang meugeunta

Neusok digitek ragam tujoh
Teulunjok neuboh unggah deureuma
Lompi neusok euncien di gitek
Neutilek nyang tujoh mata

Bandum peukayan mata intan
Peungeuh malam ban purnama
'Oh roh neusunteng ngon bungong keumang
Bit tiwah bintang jan malam jula

Adat kureuengpi meubacut
Rab-rab santeut deungon Zalikha
Neuboh ranup lhee boh puan
That analan Baren Miga

Masa nyan neutren di meuligoe
Tamse leukek pindoe meulet di banda
Jitiek lingiek ban lumo meunang
Watee jilinggang bagoe leukek kua

Barangsoe ngieng tahe mandang
Siakan-akan aneuk syeuruga
Ate beureuhi hireuen dahsyah
Meuseuki syiah jipaleng muka

Teuku ngon teungku hana peue peugah
Tijoh ie babah 'oh neueu rupa
'Oh ban leumah putroe beurjalan
Tahe mandang raja raya

Tuan putroe jak laju pantah
Raja Abdullah gadoh bicara
Bukon bubarang sangat gundah
Raja Abdullah duka cita

Pakrikeu untong Allah hai tuboh
Jiyue jak peurumoh raja muda
Peukeku kubri keu tuan putroe
Intan ngon pudoe hana kuba

Bit na kuba meuh tujoh katoe
Kujok jinoe han meuguna
Kareuna mudah meuh bak putroe
Adat na pudoe na cit mulia

Putroepi troh ubak ayah
Deelat khalifah paduka ayahda
Deelat teugayu syahi alam
Seumbah laman patek nyang hina

Na neuturi ulon nyoe sidroe
Nyoekeu Putroe Baren Miga
Neuyue poh ulon nyan bak dalem
Tuhan Karim nyang peulara

Pakon tabri kukeurajeuen
Dumna ureueng kupeudaya
Putroe meuteumeung deungon ayah
Ie mata limpah ile bandua

Neupeiduek ranup saboh karah
Di keue ayah meukuta donya
Neucok ranup lom saboh puan
Neuhadap yoh nyan ubak Bangta

Neumeuteumeung deungon sulton
Na ban hujan ro ie mata
Neulakee meuah ubak aduen
Tuan putroe kheun ubak Bangta

Na tadeungo he dalem droe
Janji kamoe deungon gata
Ka troh janji hai dalem droe
Meuteumeung adoe di Makah Mulia

'Oh lheueh marit ngon Bangta Sulotan
Putroe palengkan bak Kadi raja
Nateu keunoe Raja Kadi
Bukon that deungki gajah sula

Sabab han kutem meukawen ngon kah
Kaba fiteunah bak ayahda
Kapeuek surat u nanggroe Makah
Lon troh mukab dalam istana

Bukon saboh aneuk kupoh
Dua lhee boh kutiek lam paya
Bukon jeuheut that bicara Habsyi
Bukon deungki gata syeedara

Siri kawom bangta kutroh
Peugah beusanggoh po ceulaka
Abeh narit neupeudapat
Sujud khedeumat bak ayahda

Neusujud lom bak Bangta Sulotan
Wahe aduen ampon deesya
Teuma neusujud bak judo droe
Neumoe-meumoe hana tara

Neupeuduek puan di hadapan
Neumarit yoh nyan ngon meuntroe ceulaka
Nateu keunoe peurdana meuntroe
Gata adoe po meukuta

Sabab han kutem ban napsu adoe
Takoh takue keumuen di gata
Hana tawueuh aneukku cut that
Banolhee urat gata enaya

Abeh narit geupeudapat
Teuma geukat ureueng nyan dua
Ladom bak takue ladom bak jaroe
Rante beusoe di gaki dua

Sibang parui han le malee
Tha meulintee han soe kira
Keudeungaran u meuligoe
Putroe Sunoe poh droe hana tara

Bukon paleh badanku malang
Ureueng inong keu kee teuka
Kri cit narit Putroe Baren
Neukheun bak dalem Bangta muda

Tabri kuek u meuligoe
Ubak putroe dalam istana
Putroe geupeulheueh nibak geumat
Neukeun le leugat dalam istana

'Oh sare troh bak Putroe Sunoe
Tango kamoe he putroe muda
Na taturi ulonteu nyoe
Ulon Putroe Baren Miga

Pulehkeu ate nibak amarah
Poteu Allah peugot basa
Teuma neutanyong buet nyang gayeb
Pakri udepeuteu syeedara

Putroe peugah yoh masa nyan
Ban peurbuetan dilee nyang ka
Abeh neupeugah awai akhe
Putroe ile ngon ie mata

Teiduek haba tuan putroe
Kadi ngon meuntroe lon calitra
Kadi geutanom sikhan badan
Yoh nyan geurajam si ceulaka

Limong aneuk batee jisrom sidroe
Baranggasoe ureueng teuka
Geutamon batee banpeuet sagoe
Sireutoh sidroe jisrom neurela

Teuma di meuntroe di jih geugantung
Geukat u cong bak keuruma
Tujoh uroe tujoh malam
Geupeutren han tom cong bak keuruma

Trok ubak had tujoh uroe
Geupeutren meuntroe teuma geusula
Banduajih geusula jinoe
Geutet lam apui si ceulaka

Ka geukrui abee nyan u laot
Angen bapot sigala donga
Abeh haba Kadi ngon meuntroe
Teuma dudoe laen kira

Padum uroe lheueh nibak nyan
Geumeupadan meukeurija
Geupeukawen Bangta Sulotan
Deungan tunangan dilee nyang ka

Geupeukawen Putroe Sunoe
Ngon aduen Putroe Baren Miga
Keumah haba nideh ninoe
Droe cit dumpeue dilee ka leungka

Geupeubaro haba jinoe
Asoe nanggroe jak bak raja
Ban lakukan adat sulotan
Ban atoran adat keurija

Deungon peurasan balabagi
Bandum sare bri sianika
Peurintah keurija han lon kheun kri
Buet ka ase raja raya

Hana lon kisah lon takot lanjot
Nyoe lon seubot meukeu tanda
Tujoh uroe Bangta meukawen
Putroe Baren tueng teumuda

'Oh sare troh peurjamuan
Ban lakuan adat keurija
'Oh lheueh geubri ngon makanan
Geupeudong sinan siuroe dua

Teuma marit Putroe Sunoe
Aneuk padum droe adoe di gata
Ulon kalon bak uram ok
Na lhee aneuk lagoe di gata

Hana aneuk lom di kamoe
Hana sidroe he teumuda
Pakon tasom nibak kamoe
Aneukteu lhee droe jipreh gata

Patbu jinoe aneuk kamoe
Neukheun jinoe he teumuda
Takheun teumuda beuabeh peuneugah
Insya Allah adoe raja

Aneukteu adoe dalam laot
Lam pruet eungkot nyang that raya
Eungkot jimeunan ikan dinding
Eungkot nyan meujen raja beurala

Tajue jak tueng ubak aduen
Tayue tueng keumuen ubak ayah wa
Tajoh intan keu alamat
Bek trep lambat meuwoe bak gata

Ban neudeungo narit meunan
Neujak bak aduen neukheun le sigra
Neusujud bak Bangta Sulotan
Tajak tueng keumuen he syeedara

Abeh neukheun dum amanat
Bangta jak leugat u laot raya
Neumeuheu eungkot dum sikalian
Neupangge yoh nyan uleh Bangta

Ho saleh ka ikan dinding
Eungkot nyang meujen inong beurala
Kapeuleumah keumuen kamoe
Aneuk Putroe Baren Miga

Lhee go neuhei di bineh laot
Timue eungkot ban gunong raya
Neukalon mata bube seuladang
Deuh neupandang uleh Bangta

Hayut neukalon peurintah Tuhan
Bak eungkot nyan sangat raya
Leubeh keuramat ureueng dua droe
Tuan putroe ngon Bangta muda

Han jitem bri aneuk lhee droe
Hana jitusoe nyankeu Bangta
Teuma neubri grak nibak Allah
Bangta peuleumah deungon tanda

Neucok intan ka neupeugah
Jiyue cok bak kah Baren Miga
Eungkot jideungo putroe bangsawan
Jimuntah yoh nyan sigra-sigra

Jipruh u darat ka meuhuet-huet
Po Bangta sret u babah kuala
Aneuk nyang tuha ie 'oh keuieng
Tulet'oh reukueng teungoh 'oh dada

Bangta lhee droe sapat teudong
Ie miyup manyang sabab cut raya
Ka jiteungoh bangta lhee droe
Neueu jinoe le ayah wa

Bangta kalon ubak keumuen
Na ri ujeuen ro ie mata
Masa jiteungoh nyan u darat
Jimeumat-mat sabe syeedara

Peue na pike wahe dalem droe
Takheun jinoe kungo nyata
Wallahu a'lam he adoe droe
Han kutupeue bijeh mata

Leumah jikalon sidroe ureueng
Teuma teumanyong lhee droe bangta
Nyobu gata ureueng Makah
Tacuba peugah meungo nyata

Seuot kuya yoh masa nyan
Nyobu ulon bijeh mata
Nyobu kamoe ureueng Makah
Deungo lon peugah po bak gata

Na tango gah po ma kamoe
Nanneu Putroe Baren Miga
Wahe aneuk po junjongan
Ulon nyoe aduen Baren Miga

Baren Miga di meuligoe
Udeh tawoe aneuk bak po ma
Neucok keumuenneu ban lhee droe
Saboh neutingkue neugulam dua

'Oh sare troh peuwoe u nanggroe
Neujoh bak Putroe Baren Miga
Neucok aneuk nyan banlhee droe
Tuan putroe ro ie mata

Yoh nyan aneuk neuwa-wa banlhee
Neucom di ulee neurahop muak
Trep that aneuk gata cre kamoe
Bak uroe nyoe keue mata

Wahe aneuk ka jeuet plueng-plueng
Meuteumeung ngon nang boh ate ma
Adat han cit mayoh deundam
Uroe malam lon meucinta

Meutuah kah meutuah kamoe
Aneukku lhee droe meuteumeung ngon ma
Aneukpi gadoh mapi gadoh
Han mee kuteuoh lhee droe gata

Mateu gadoh jeuep-jeuep nanggroe
Keudeh keunoe angen ba-ba
Bangta lhee droe jimoe sangat
Jideungo narti nibak po ma

Wahe po cut aneuk meutuah
Raja Abdullah nyan ayah gata
Sajan meuteumeung deungon ayah
Ia mata limpah sret u dada

Aneuk neucok nyan banlhee droe
Neucom jinoe neurahop muka
Wahe aneuk po keumala nanggroe
Jeh 'oh uroe meuteumeung ngon gata

Droe cit ka ngon teukeudi Allah
Di nanggroe Makah meuteumeung aneukda
Lheueh nyan meuteumeung ngon Baren Nasi
Neusujud le lhee droe bangta

Bangta lhee droe seumbah kusyik
Raja nyang rayek sangat mulia
Raja kalon cuco lhee droe
Ka geumanoe ngon ie mata

Ka neugusuek nyan nibak dhoe
Teuma dudoe neurahop muka
Beuseulamat cucoku lhee droe
Tuhan sidroe nyang peulara

Dudoe nibak nyan han teupeugah
Rakyat barollah keunan dum teuka
Ureueng lakoe ureueng binoe
Hana padoe teuka lanja

Kareuna meugah dum sikalian
Meuteumeung bangta nyan lam pruet beurala
Teuka ureueng jeuep-jeuep jajahan
Sigala alam jitren simua

Dan lagi aneuk nyan beusaran
Han sapeue tan jiteumee rasa
Meuh ngon pirak ladom meuceh
Geume abeh keu aneuk raja

Ladom geume intan ngon pudoe
Ija meusujoe meukasab Roma
Abeh jibri keu aneuk sulotan
Dumjih tuan jipeumeulia

Areutapi le han teuhimat
Ureueng intat sigala donya
Mangat ate ma ngon ayah
Raja Abdullah suka rasa

Nang ngon aneuk Tuhan peusapat
Tulong Hadarat hana peue mara
Kusyik ngon kuya ate mangat
Meutuah that Baren Miga

Mangatkeu ate dumna rakyat
Lahe keuramat dum peukara
Jeuep-jeuep sagee Allah tulong
Nyankeu ureueng gaseh Rabbana

Jeuep-jeuep nanggroe ureueng gaseh
Jitheè leubeh eelia raya
Lagi jitakot bandum nanggroe
Rakan raja nyoe bandum takwa

'Ajayeb subhanallah
Teurlalu undah lom calitra
Amma bakdu dudoe nibak nyan
Peurintah Tuhan han ek kira

Umu nam buleuen sajan nang mbah
Di nanggroe Makah lhee droe bangta
Allah teukeudi Tuhanteu sidroe
Bangta lhee droe lom cre ngon ma

Teuka saboh cicem burak
Keunan jijak u Makah Mulia
Raya badan nam yok umong
Hayut tapandang ateteu lia

Sifeuet cicem nyan sangat indah
Deungo lon peugah kucalitra
Bulee kuneng ban meuh meuntah
Pruetjih mirah ban suasa

Gaki cicem dum manikam
Yakut ngon intan jampu meutia
Bulee sayeuep nyan zaburajat
Meukilat-kilat indah rupa

Di ateueh sayeuep di miyup jaroe
Miseue geutanyoe manusia
Aneuk jaroe siblah lhee ploh
Meunan neuboh Allah Ta'ala

Jidong di lua kuta Makah
Raja Abdullah jimeuheu sigra
He Abdullah tango kamoe
Aneukteu lhee droe tabri kuba

Meuhan tabri nyan keu kamoe
Kutiek meuligoe u laot raya
Hana sidroe nyan na seuot
Dum teumakot pucat muka

Baren Miga teubiet sidroe
Neutanyong hareutoe ngon saksama
Pakon talakee aneuk kamoe
Hobu jinoe takeumeung ba

Ho nyang hajat nibak Tuhan
Aneuk lhee nyan cre ngon gata
Bitpi kupeucre bek tagundah
Na Po tallah soe peulara

Adat meunan he teelan beh
Lon meutanggoh ubak gata
Lon meutanggoh meulhee buleuen
Goh pueh meusyen ngon aneukda

Cicem seuot narit sipatah
Bahle lon preh tanggoh gata
Cicem burak jipo jinoe
Putroe Baren woe lam istana

'Oh sajan troh u meuligoe
Neukheun le jinoe ubak raja
Tadeungo kamoe po junjongan
Kheundak Tuhanteu Nyang Esa

Saboh cicem rupa indah that
Saleh malaikat Tuhan karonya
Jilakee tuanku aneuk geutanyoe
Tabri jinoe po meukuta

Meuhan tabri aneuk lhee droe
Jitiek meuligoe u laot raya
Deelat tuanku pike beuabeh
Beugot that gleh neuura-ura

Poteu pike beuna ngon salah
Ie mata limpah sret u dada
Adat meunan tuan putroe
Tabri jinoe bahle jiba

Tuanku jinoe peugot peukayan
Alat keurajeuen sianika
Sigala pande peugot alat
Rayek ngon cut abeh leungka

Troh had tanggoh umu lhee buleuen
Janji jitren miseue nyang ka
Lom jimeuheu miseue dilee
Abeh seudee rakyat ngon raja

Nyang phon seudee tuan putroe
Neuteubiet sidroe neujak bri basa
'Oh sare troh tuan putroe
Tango kamoe cicem raya

Jinoe kubri aneukku lhee droe
Kupeujaroe ubak gata
Aneukku pasrah nibak Tuhan
Dum sikalian milek Rabbana

Jinoe tapioh meusikeujap
Dang meupakat ayah deungon ma
Cicem jipreh tuan putroe
Neutamong jinoe ubak raja

Neuyue peukeumah dumna alat
Jimoe rakyat bansineuna
Karena gadoh dalam nanggroe
Bangta lhee droe aneuk raja

Soe nyang pandang bak bangta lhee droe
Sang geumanoe ro ie mata
Sabab han jituho cicem teureubang
Jinoe tinggai nang deungon ayahda

Han jan neuduek sajan nang mbah
Jinoe lom gadoh miseue nyang ka
Jilakee do'a dumna rakyat
Bak Allah peuseulamat lhee droe bangta

Teuma marit tuan putroe
Bek le tamoe gata dumna
Aneuk kupasrah ubak Allah
Ban peurintah Tuhan Nyang Esa

Wahe aneuk po bangta lhee droe
Kupeujokteu jinoe bak hak Ta'ala
Insya Allah po ma badan
Ampon lon tuan barang deesya

Meuah bak Allah ngon bak Nabi
Bak lon han le tameudeesya
Lheueh nyan jipeurab ubak ayah
Raja Abdullah ro ie mata

Jiseumbah ayah banta lhee droe
Jilakee jinoe ampon deesya
Tapeuampon ayah teungku droe
Geunap uroe talakee do'a

Insya Allah he aneuk droe
Tuhan sidroe nyang peulara
Bangta lhee droe that ceureudek
Meuteumeung ngon kusyik deungon kuya

Baren Nasi ngon Bangta Sulotan
Na ri hujan ro ie mata
Ka jisujud jilakee meuah
Insya Allah Tuhan peulara

Ka neuikat baluem bak keuieng
Ka meuleng-leng ngon ia mata
Bangta lhee droe geuba u blang
Rakyat ireng na lhee laksa

Soe nyang pandang that geusayang
Abeh mabok-bang pungo gila
Cicem peurab jipreh u bumoe
Jijak banlhee droe bangta muda

'Oh sare troh ateueh cicem nyan
Jibapo lanam dalam hawa
Ri dum rakyat nyang sajan u blang
Dum sikalian ro ie mata

Nam uroe nam malam jiteureubang
Teukeudi Tuhan troh lam syeuruga
Ka troh bak krueng Ma'ul Hayati
Cicem yue jep le ie ubak bangta

Bangta jideungo narit cicem
Jijep le yoh nyan sigra-sigra
Lheueh jijep ie bangta lhee droe
Cicem peuwoe nyan u donya

Lhee uroe lhee malam goh troh u bumoe
Cicem keupruk droe saycuep bandua
Ka teugeutit bangta lhee droe
Sret u nanggroe bak calitra

Bangta nyang tuha masa nyan sret
Bak teuseubot u nanggroe Cina
Bangta teuduek di yup geulumpang
Di teungoh blang mahajana

Droe cit ka ngon teukeudi Tuhan
Raja nanggroe nyan ka troh masa
Raja ka mate yoh masa nyan
Beurdawaan rakyat dumna

Ladom po jeh ladom po nyoe
Aneuk kamoe taboh keu raja
Teuka narit ureueng sidroe
Na bak kamoe saboh bicara

Adat tapateh ulon saboh
Bek tameupoh geutanyoe dumna
Meutuah pusa meutuah lidah
Meutuah babah muda beulia

Aehb geupateh han geubantah
Jipeungui gajah jiboh rungka
Gajahpi lheueh geuboh alat
Bak Hadarat jimeupinta

Ya Ilahi wa ya Rabib
Bak Allah bri kabui pinta
Beureukat mukjizat sigala nabi
Keuramat wali dum eelia

Beuek troh hajat uleh Allah
Beujiboh le gajah nyang jeuet keu raja
Kadeungo kamoe wahe gajah
Bohkeu di kah nyang mee keu raja

Yoh nyan gajah ka jilangkah
Rakyat barollah ikot dumna
'Oh sajan troh yup geulumpang
U teungoh blang mahajana

Jicok le bangta jikeubah di rueng
Jideelat bandum ureueng nyan na
Jipeutamong laju u dalam
Dum sikalian jideelat rata

Jipeukawen muda samlakoe
Deungon Putroe Samidum Rakna
Jiboh keu raja lam nanggroe nyan
Teutap di sinan sidroe bangta

Neukeurajeuenpi raya amat
Jigaseh le rakyat bansineuna
Teuduek haba bangta nyang phon
Neukeurajeuen di nanggroe Cina

Tango lon kisah nyang adoe nyan
Teukeudi Tuhan he syeedara
Saboh teugeutit u Pagaruyung
Keunan teusurung sidroe raja

Bangta nyan sret u bineh laot
Jiteungoh eungkot troh lam bangka
Nanggroe nyan han tom eungkot geukalon
Ka tujoh thon bak calitra

Han tom geukalon eungkot pukat
Rakyat lapeue that hana tara
Nyang na jipajoh meueungkot darat
Jeuneh seupat eungkot paya

Jeuneh bace nyan deungon kruep
Suara ngep-ngop lam kubang raya
Amma bakdu kisah bunoe
Tango adoe lon calitra

Jimoe jiteumeung aneuk miet cut
Sabab eungkot han tom jirasa
Meugah teuma sigala nanggroe
Rakyat tren jinoe meulaksa-laksa

Sajan troh rakyat u bineh laot
Jikuet le eungkot dumjih rata
Lheueh nyan meugah teuma dudoe
Bak tuan putroe peurumoh raja

Maka cit narit tuan putroe
Neubet jaroe atueuh jeumala
Deelat tuanku po junjongan
Deungo laman lon calitra

Meugah eungkot that barollah
Abeh jiteungoh lam-lam bangka
Adat meunan tuan putroe
Lon cuba jak jinoe kupeunyata

Poteu pike na sjameung
Jan ie paseueng eungkot jiteuka
Adat kon na ureueng meutuah
Han jiteungoh eungkot dumna

Raja neukrah dumna rakyat
Neutren leugat u kuala
Ka neuba ngon gajah balohan
Sireutoh rakan sajan sireuta

'Oh sare troh u bineh laot
Neukalon eungkot pat na cahya
Timu barat neujak pandang
Leumahkeu yoh nyan ban beuneung raja

Neukalon hu meujeureulah
Hana ubah ban bintang rusa
Di ateuh nyan saboh tudong
On meupayong indah rupa

Raja neukheun ubak rakan
Preh he teelan sinoe gata
Raja neujak teuma sidroe
Neueu samlakoe bangat muda

Bangta keumeung beudoh rijang
Brat di keuieng baluem raya
Poteu raja dong di likot
Bangta marit yoh nyan sigra

Deelat tuanku laman meukatoe
Ulonteu nyoe ureueng nyang hina
Pakon tuanku neudong di likot
doli hadarat ureueng mulia

Yoh nyan teupike raja keudroe
Pat jithee kamoe raja raya
Kon kee raja he aneuk droe
Raja lam nanggroe hana teuka

Raja meuhei dumna rakyat
Keunoe tapeurab dumna gata
Rakyat peurab rijang-rijang
Ban jipandang hireuen liga

Sajan ngon raja bangta sidroe
Rupa samlakoe leumah cahya
Jiba le gajah meubalohan
Trok le keunan ngon balatantra

Geuploh baluem nibak pinggang
Geupeuek rijang bak gajah raya
Yoh masa nyan geupeuwoe rijang
Rakyat sukaan hana tara

Nideh ninoe teuka ureueng
Han teubileueng ngon sikutika
Masa raja jak ureueng sireutoh
Jinoe ka troh dua laksa

Saboh sane teuka ureueng
Keunan meuhimpon ubak raja
Bangta geuba taloe bineh krueng
Rakyat ireng na lhee laksa

Eungkot lam krueng mudek sajan
Trok bak kubangan pante raya
Ureueng nyang han tren di meuligoe
Jijak jinoe bak gaki kuta

Bangta ka troh u meuligoe
Rakyat meukatoe abeh dum teuka
Geumeupakat yoh masa nyan
Geupeukawen ngon aneuk raja

Putroe geupeunan Sinaran Buleuen
Mangat bak takheun jroh that rupa
Ka meuhimpon dumna syiah
Geupeunikah putroe ngon raja

Haba keurija han lon kisah
Aneuk tan nang mbah soe padubawa
Tujoh uroe lheueh bangta meukawen
Teutap sinan raja muda

Sinan keurajeuen di Pagaruyung
Tuhan tulong dalam sijahtra
Teuduek haba bangta dua droe
Kisah jinoe bangta muda

Amma bakdu dudoe nibak nyan
Nyang adoe nyan lon calitra
Banta nyang tulet sret nanggroe Rom
'Oh nan tamam ka samporeuna

'Oh sret keunan bangta sidroe
Rakyat meukatoe teuma teuka
Droe cit ka ngon teukeudi Tuhan
Raja nanggroe nyan ka troh masa

Umu dua thon ka lheueh mate
Han saboh le jeuet keu raja
Soe nyang geuboh keu geunantoe
Geunta asoe miseue geumpa

Hingga geuiem han geuboh le
Tuhan Kade thee sibeuna
Bak siuroe dumna rakyat
Geumeupakat tuha muda

Pakri padan dum geutanyoe
Teuboh nanggroe meuhana raja
Soe keu geunantoe mat khalifah
Cuba peugah dumteu rata

Tren hidayat dalam ate
Rakyat sigala be sapeue haba
Tajak cok jinoe gajah puteh
Talakee bak Allah nyang sijahtra

Tayue jak mita baranggapat
Gajah beurangkat sigra-sigra
Ban sare troh sama teungoh blang
Jicok rijang bangta muda

Teuma jipeuwoe le gajah nyan
Laju u dalam jime sigra
Lheueh nyan jipeuduek ateueh batee
Rakyat meuribee deelat rata

Teutap geuraja lam nanggroe nyan
Aneuk sulotan raja muda
Nanggroepi aman rakyat meupakat
Tuhan Hadarat bri kuasa

Sabab bangta nyan mat khalifah
Raseuki mudah sigala donya
Teutap keurajeuen lhee boh nanggroe
Aneuk Putroe Baren Miga

Teukeudi Allah peurintah Tuhan
Meuwoe aneuk nyan lon bak po ma
Abeh meuhimpon bangta lhee droe
Ubak Putroe Baren Miga

Bahkeu dumnan meusilapeh
Hana abeh lon calitra
Le lon tinggai hana lon seubot
Lon takot lanjot panyang that haba

Lawet lawan teuma dudoe
Lon kisah jinoe laen calitra
'Ajayeb subhanallah
Tango lon kisah Bangta Muda

* * *



PN BALAI PUSTAKA — JAKARTA

